





21.4.149

21 R. 4







JOANNIS ANTONII
VULPII
CARMINUM
LIBRI TRES.

Ejus item Opuscula soluta oratione scripta,
quæ variis in voluminibus dispersa
ad hoc tempus legebantur.

ACCESSERE

*Eruditorum quorundam Virorum, quibuscum ipsi
amicitia intercedit, Poemata nonnulla.*

NEC NON

JOANNIS ANTONII VULPII antiquioris, Patricii
& Episcopi Novocomensis, ac HIERONYMI ejus
fratris Carmina quæ supersunt.



PATAVII. CIOIOCCXXV.
EXCUDEBAT JOSEPHUS COMINUS.
SUPERIORUM PERMISSU.



Illustriſſimo atque Excellentiſſimo Viro

ANTONIO RAMBALDO DE COLLALTO;

S. Salvatoris, Credatii, Muſeſtris, &c. in Italia, Comiti:
Pirnitz, Rudoletzi, Cernæ, &c. in Germania, Domino:
CAROLI VI. CAESARIS, REGISQUE HISP. &c.
Clavis Aureæ Cubiculario, nec non A ſecretioribus
Conſiliis, &c. Patricio Veneto, &c.

Joannes Antonius Vulpius S. P. D.



LEGANTIUM omnium literarum, ac Poeseos in primis, eam scimus antiquis temporibus fuisse fortunam, **VIR ILLUSTRIS** atque **EXCELLENTIS**IME, ut qui ad hujusmodi studia colenda maturius animum appulissent, diuturnisque demum vigiliis, laboribus, & contentionibus id quod voluerant, effecissent; non solum digito monstrarentur, &

iiii D E D I C A T I O.

in populi cœtibus clari nobilesque haberentur, sed etiam virorum principum amicitiiis, opibus, atque honoribus mirabiliter in civitate florerent. Quibus præmiis quanta vis inesset ad maxima queque ingenia primum excitanda, tum alenda & confirmanda, quum res luceat ipsa per se, non est cur pluribus verbis coner ostendere. Vix enim unum aut alterum invenias, qui nulla recte factorum mercede sibi proposita, nudamque tantummodo honestatis formam secuti, egregium semper aliquid cogitare, scriptisque immortalitate dignis posteritati consulere velint. Plurisque, ne labores gratuito suscipiant, impedimento est voluptatum amor: quas reprehendere quidem, tristisque oratione in invidiam adducere, vulgaris quoque hominis est; contemnere autem omnino, fortique animo repudiare, heroicum ac prope divinum facinus merito existimatur. Multos rei familiaris angustie a sublimium rerum inquisitione ad humiles curas cogitationesque traducunt: qui nimirum sentiant, bonis libris per-volutandis, & poematis fingendis, nihil hodie compendii fieri; ex vili contra officina uberrimos sæpe fructus provenire. iccirco sibi sapere videntur, si egestati quantumvis cum doctrina conjuncta locupletem inscitiam præferre non dubitent. Quamobrem, optime de republica, deque universis ingenuarum artium cultoribus meruisse dicendi sunt Reges illi ac Cæsares, quas in summo rerum humanarum fastigio collocatos id semper sollicitos habuit, ut homines ad præclara natos, at propter inopiam, demisso animo atque oppresso jacentes, liberalitate & beneficiis erigerent ac recrearent.

Quis

D E D I C A T I O. v

Quis enim acri adolescens ingenio, cui pramiorum & gloria spes objecta fuerit, vel desidia vitiiisque corrumpi, vel fortune injuria se debilitari patiatur? Porro, si dati & accepti rationes diligenter consiciamus, fateri necesse erit, multo plus a doctis viris in diuites ac potentes collatum esse, quam ipsi ab illis acceperint: opibus enim affluentes caduca & mortalia, eruditi & disertum numquam interitura largiuntur. O questuosam igitur permutationem; haud ita magno pretio bonam existimationem parare, laudem, celebritatem, memoriam denique nominis sempiternam! Hujus generis exemplorum veteres historiae plena sunt: ne autem hoc nostro tempore animi magnitudinem, pecuniaeque despicientiam penitus obsolevisse, litterati homines jure conqueri possint, TV cum paucis aliis dare operam statuisti, Vir nobilissime. In ea quippe Familia ortus, cujus Longobardos Reges auctores olim existisse compertum est; quae de antiquitate, potentia, diuitiis, auctoritate, illustrium castellorum dominatu, viris pace belloque clarissimis, nulli fere aut Italicarum, aut exterarum concessura sit; majorum tuorum imaginibus non ad superbiam atque ignaviam, sed potius ad virtutis imitationem uti soles: & quum amplissimum patrimonium, ac nobilitati tuae respondens, divina providentia tibi obtigerit, largum & magnificum TE praebes, quum aliis rebus multis, tum praecipue disciplinis ornandis, doctis hominibus excipiendis fovendisque, postremo nobilium oratorum, historicorum, ac poetarum, quibus mirifice delectaris, monumentis luculente admodum ac splendide eden-

vi D E D I C A T I O.

dendis: taliumque sumtuum facultatem fructum divitiarum putas. Finem orationi meae numquam faciam, si de excellentibus animi tui bonis, quibus inter ceteros AULAE CAESAREAE Proceres (quantos, &) quales viros!) adeo insignem locum obtines, singillatim dicere aggrediar: id unum tamen silentio praeterire nullo modo possum, in quo laudum tuarum summa consistit; T E videlicet CAROLO VI. CAESARI, Optimo Principi, invicto barbararum gentium domitori, orbis terrarum amori, sagacissimo ingeniorum aestimatori, acceptum &) spectatum esse, ejusque gravissimo certissimoque testimonio commendari. Huic T V, Vir eximie, sollertiam tuam in rebus gerendis, pietatem, fidem, constantiam, fortitudinem, comitatem, aliasque homine tuo loco nato dignas virtutes, florenti adhuc aetate ita probavisti, ut is propterea novis honoribus T E quotidie cumulare non desinat; &) quum apud T E superiore anno Pirnitzi, quod castellum in Germania tuae ditionis est, sumtuoso planeque regio apparatu fuerit exceptus, unum ex iis deinceps esse voluerit, quos de salute ac negotiis Imperii consulere, &) quibuscum tanta molis pondus partiri consuevit. Quae omnia quum ad me fama pertulisset, audissemque insuper, T E tantis occupationibus distractum, si quid tamen otii nancisci potes, id nulla in re libentius, quam in studiis bonarum artium consumere, eaque animi alacritate, ea numerorum verborumque dulcedine Etruscum Poema scribere, ut paucissimi, vel eorum numero qui omne tempus aetatis in hoc genere contri-

DEDICATIO. vii

trivere, TVI pares esse vix possint; incredibili desiderio flagrare cœpi libellos aliquot meorum Carminum, Latina lingua confectos; magnaque diligentia elaboratos, nonnulla item Opuscula soluta oratione, quæ illis addere, ac rursus vulgare decreveram, ad TE potissimum mittendi, tuoque nomine inscripto condecorandi. Hoc vero ne diutius cuperem, APOSTOLUS ZENUS effecit, vir humanissimus atque eruditissimus, quem scilicet morum studiorumque similitudo ad amicitiam tuam attraxit: is enim quum litteras meas de hac re accepisset, mihi continuo gratificatus, quod tantopere efflagitaveram, abs TE facillime impetrauit. Cui viro quum antea debebam plurimum, tum hoc uno beneficio tantum debeo, quantum persolvere, numquam sane fuerit meorum facultatum. Accipe igitur, COLLALTE præstantissime, hilari fronte munusculum hoc nostrum, luminibus quidem ac ornamentis dicendi minime excultum, sed tamen ab hominẽ tui observantissimo profectum: et consilii mei rationem in hisce edendis, quæque in hoc volumine contineantur, ac denique totius operis dispositionem cognoscere ne graueris; quæ singula brevissime, si poterò, exponam.

Dua me causse præ ceteris impulerunt, (nihil enim dissimulabo) ut hæc qualiacumque in vulgus emittere auderem. Altera, insita quedam omnibus de se suisque rebus opinio, quæ in nobis præcipue qui Musas amamus, vim suam ostendere solita est: nullum enim poetam reperias (quod olim Cicero animadvertit) qui non sibi opti-

viii D E D I C A T I O.

optimus videatur: quemadmodum & raros parentes, qui non liberis plus aequo indulgeant, eorumque vitia verbis extenuent, aut etiam in bonam partem accipiant. Pignit iccirco, quæ subito calore in adolescentia effuderam, sed acri deinde lima perpoli veram, & ad normam elegantissimorum scriptorum severe exegeram, domi semper continere, ac blattis demum comedenda relinquere. Volui fructum aliquem capere lucubrationum mearum, & otii mei rationem exstare; præsertim quum doctorum virorum judicia, quæ privatim expertus fueram, huic nostræ cupiditati blandirentur, & dubitanti fiduciam adderent. Si quis autem de versiculis nostris ita pronuntiet, eos nihil aliud esse quam lusus nugæque, & primæ ætatis oblectamenta, non equidem huic sententia valde repugna-vero: dummodo & ipse vel invitatus fateatur, hujusmodi lusibus majorem solidioremque sæpe gloriam multos quæsi-visse, quam e tristioribus disciplinis aliquando colligatur. Nec vero est, cur a frigidis istis & jejunis calumniatoribus quidquam sibi metuant studia nostra; videmus enim, rem poeticam ab illis ferre contemni, quos ad condendum carmen ineptissimos natura progeniuit: hi nempe minimi æstimant ea bona quibus carent, atque adeo levis-simum facillimumque id opus judicant, cujus ipsi periculum numquam fecerunt. Nos interea tenuibus hisce & popularibus contenti simus,

— — — — — * ut sibi quivis

Speret idem: sudet multum, frustra-que laboret

Aufus idem. — — — — — Al-

* Horatius in Arte Poetica, v. 240.

D E D I C A T I O. ix

*Altera causa erat, quamobrem hanc aleam subire cō-
luerim, ut præjudicatam de Italorum inertia, præva-
que discendi ratione opinionem, non tam meo, quam ele-
gantium amicorum exemplo, quorum Poemata hoc in li-
bro legentur, ex animis plurimorum, quoad possem, e-
vellere; qui falso clamitant, ut vaticinari interdum
ac furere videantur, Italos litterarum gloriam, a ma-
joribus acceptam, omnino perdidisse. Confutandi sunt ho-
mines male feriat non iurgiis neque conviciis, at ipsa
vi & splendore veritatis; ut tandem parcant Italico
nomini, gentisque nostræ indolem agnoscant, quæ quam-
vis inclinatione temporum nonnumquam hebescat, mox,
veterino quasi excusso, pulchriorem illustrioremque sese of-
fert. Ego certe in Elegia scribenda; quod genus poema-
tis jam inde a pueritia maxime adamavi; Tibulli ve-
neres, candorem, incorruptamque Latinitatem me potis-
simum secutum esse profiteor: neque iccirco Propertii ner-
tos, eruditionem, peregrinos colores, aut Ovidii copiam,
ingeniumque sum aspernatus: quemadmodum & in ce-
teris carminibus, optimum quemque Romanum poetam
mibi ad imitandum proposui. Quid vero tantis cona-
tibus egerim, penes doctos homines harumque rerum pe-
ritos iudicium esto. Atque hæc de universa Poesi nostra
summatim dixisse sufficiat. Nam quæ sequuntur histori-
ca, oratoria, & philosophica scripta, non hoc primum
tempore prodeunt: sed in variis antea libris, nostra cu-
ra sumtuque editis, studiosorum jam probata suffragiis,
legebantur: quæ omnia propterea in hoc volumen congef-*

x D E D I C A T I O.

si, ut maximi pro litterarum dignitate his continuis octo annis a nobis exantlati labores facilius cognoscerentur.

Nunc reliquum est, ut de elegantissimo, quod huc ex amicorum scriniis intuli, Corollario, pauca quedam subjungam. Hæc quanti-vis pretii Carmina, & magno huic ætati ornamento futura, nisi preces nostra obstitissent, auctorum verecundia tenebris atque oblivioni damnaverat. Nos amicitia jure intercessimus; neque passi sumus, talium ingeniorum fœtus perire, ex quibus non inanem conjecturam facere liceat, quantum hodie apud nostros homines hujusmodi studia floreat. Occurrit igitur ante alios JOANNES CHECOTIUS, Ecclesiæ Vicetima Canonicus, vir pietate eximia, ingenio admirando, memoria singulari, Græca Latinaque lingua doctissimus, qui profanas litteras cum sacris jampridem commutavit: ad ipsum enim pertinet Divina Oracula, Veterisque ac Novi Fœderis Libros populo in concione explicare. Hujus quum omnia priscam redolent elegantiam, tum in primis nobilis & lectu digna est Elegia illa, quam ipse de Hymno CALLIMACHI in Lavacra Palladis, post Angeli Politiani, summi viri, & Germani cujusdam, doctrina insignis, quem eruditi satis norunt, μεταφράσεις,vertere placuit: quas iccirco minoribus typis descriptas iterum exhibuimus, ut lectores nova cum veteribus conferendo, majorem utilitatem ac voluptatem perciperent. Ob eandem causam, Græci Poetæ exemplar, unde hæc omnia sunt derivata, e regione Checotiani operis collocavimus. Accedunt statim FRANCISCI ZANOTTI,

Ci-

DEDICATIO. xi

Civis Bononiensis, eruditissimi atque urbanissimi viri; nec non Latina Etruscaque Poeseos gloria valde celebris, qui nunc Philosophia decreta patrio in Gymnasio magna cum laude explanat, Elegia sex; quas ipsum Catullum scripsisse non puderet; adco Romana orationis candorem, simplicitatem, suavitatem, ceterasque dicendi virtutes praeferrunt, quas tantopere in eo poeta suspicimus. Nonnulla deinde MATTHAEI BURDEGATI, juvenis e Patavina nobilitate, addere placuit: cujus erga me fidem ac pietatem, secundis & adversis meis temporibus, plures jam annos expertus sum; & quo propterea familiarissime utor. Neque tamen amicitiae inferviam, sed potius veritati, si affirmarvero, ejus carmina mollissime in aures influere, tenera esse, arguta, jucunda, qualia denique scriptoris ingenium atque eruditionem facile ostendant. Hunc excipit DOMINICUS LAZARINUS DE MURRO, Patricius Maceratensis, Humaniorum Litterarum in Gymnasio Patavino Professor doctissimus, veraeque ac germanae eloquentiae vindex acerrimus; qui benigne ac more suo fecit, quum versiculos aliquot a se conscriptos, omnibusque numeris absolutos, nobis edendos permisit, neque alienum dignitate sua existimavit, si huic societati nostrae se admisceret.

Postremo, ne volumini varietas deesset, quae fastidiosos etiam homines plerumque ad legendum invitatur, mihi visum est JOANNIS ANTONII VULPII antiquioris, Patricii & Episcopi Norvocomensis, qui saeculo decimo-sexto a CHRISTO nato Latinam Poesim frequentavit,

xii D E D I C A T I O.

vit, Satyrique Horatiane formam sua imitatione satis diligenter expressit, Carmina omnia colligere, atque iterum divulgare: hoc etenim ipsi VULPIO Nomini tribuendum putavi, quod semper Musis amicum fuisse hæc monumenta declarant. Qua in re præstanda, strenuo sane adiutore usi sumus, viro optimo atque humanissimo, JOSEPHO MARIA STAMPA, Clerico Regulari Congregationis Somasche, qui ejusdem VULPII Eclogam quamdam venustissimam, numquam antea perulgatam, scholiisque eruditis a se illustratam, duo item Epigrammata inedita nobis Mediolano misit; eoque munere, insignis poetæ manes, omnesque pariter litterarum studiosos sibi in perpetuum obstrinxit. Nec HIERONYMI VULPII, JOANNIS ANTONII fratris, Epigrammata nonnulla prætermittenda esse duximus; quod nimirum suavia & candida nobis viderentur: hæc autem omnia, etiam quæ typis commissa circumferebantur, in hac nostra editione longe emendatiora & nitidiora exhibemus.

Jam TE arbitror, Vir amplissime, & reliquos omnes, in quorum manus hæc nostra ventura sunt, totam consilii mei rationem, quæque ad hoc volumen perficiendum ornandumque contulerim, posse intelligere. Majora hæc erunt procul dubio, si homines audierint, a TE, cujus de hoc laborum genere certum ac limatum judicium est, non improbata fuisse; meque horum vel auctorem, vel impulsorem, vel etiam præbitorem, in fidem & clientelam tuam hilare & perbenigne acceptum. Interea dum hac spe unice sustentor, laudesque tuas ad lyram canere

D E D I C A T I O. xiii

nere aggredior, valebis plurimum, COLLALTE magnanime, cum lectissima Uxore, fortissimi Viri nepte, ac suavissimis Liberis; nostræque de TE benemerendi voluntati fauebis.

Patauii, Idibus Januarii, Anno a V.P. Clō Id CCXXV.

A D



A D E U M D E M

Illustrissimum ac Excellentissimum Virum

O D E.



UAE pulsa doctis articulis, novo
 Permulcet aures carmine barbitos?
 Quæ voce nubes alma Siren
 Dissipat, imbriferosque ventos?

Non sic opacis defiliens jugis
 Venit canentem pinus ad Orphea,
 Quum propter imbellis quietos
 Cerva latus posuit leones:

Nec sic deorum coetus Apollinem
 Plectro sonantem suspicit aureo
 Laudes paternas, & superbos
 Fulmine terrigenas subactos;

Ut

D E D I C A T I O. xv

Ut me, receptus sensibus intimis,

Torum pererrat Pierius calor,

Dum concava insuetos moventur

Ad numeros Heliconis antra.

Vivitne rursus blandus Anacreon,

Orci solutus compede lurida:

Cui vina semper, cui jocosus

Semper Amor, Geniusque cordi?

Rursumne pennis æthera dividit

Thebanus ales; quo gravibus modis

Dicente victrices quadrigas

Arduus intremuit Cithæron?

COLLALTE regum progenies, tuæ

Agnosco nervosque & strepitum lyræ;

Seu foeda præbentes catenis

Colla Getas, humilique vultu

Vinci dolentes, carmine persequi;

Narrare mihi seu libeat fide

Quæ tela depromunt eburnis

Purpurei pharetris Amores.

TE

xvi D E D I C A T I O.

TE gaudet, urnam pronus in auream,
Miscere TUSCIS ARNUS oloribus:

Intacta submitunt apricos

ARCADIAE TIBI prata flores.

Quin &, vagantem dum recreat gregem,
Fregisse pingues Faunus arundines

TE fertur audito, nigraque

Sub nemoris latuisse fronde.

Musis amicos est aliquid lares,

Ac tecta castis hospita vatibus,

Lauro & coronatas tueri

Nobilium facies avorum.

Quod stirpis olim principibus tuæ
Sceptrum juvenus barbara detulit;

Gens vestra quod latos ferocis

Pannoniæ populavit agros,

Viresque ferro contudit hostium,

Leti periclis objiciens caput;

Laus magna certe: sed minores

Traditur haud meruisse palmas

Et

D E D I C A T I O. xvii

Et VINCIGUERRAE carmen, & acribus
Doctæ puellæ clarus ab ignibus,

Qui bella COLLALTINUS æque,
Ac teneras coluit Camœnas.

Hos BLANCA partu scilicet edidit,
Addi novenis digna sororibus:

Quam jure miretur Corinna, &
Ipsa viris metuenda Sappho.

Felix, avaro qui procul agmine,
Vulgi profanis moribus abstines;
Virtutis exemplum vetustæ,
Largus opum, cupidusque famæ!

Felix, merenti cui gravat horrea
Justo deorum munere Copia;
Et nixa robustis juvencis
Mille solum renovant aratra!

Sed TE propinquum sideribus locat
Collecta summi gratia CAESARIS;
Fers unde præsignes honores,
Consiliis animisque magnus:

xviii D E D I C A T I O.

Longinqua non TE corripiet dies
Obliviosi fluminis impetu:

Pulcherque facundis manebis
Historicis labor, & poetis.

Pictis tabellis heu male credimus
Gesta & virorum nomina fortium:
Musis, Apellei colores,
Cedite, Praxitelisque saxa.



IN-

I N D E X

Forum quæ hoc Volumine continentur.

D	<i>Edicatio ad Illustrissimum & Excellentissimum Virum, ANTONIUM RAMBALDUM DE COLLALTO, quæ Præfationis etiam locum obtinet.</i>	pag. iii
	<i>Ode ad Eundem.</i>	xiii

JOANNIS ANTONII VULPII CARMINUM
LIBER PRIMUS. pag. 3.

Elegia I.	<i>Lyconis querelæ de gravi Pholoos valetudine.</i>	3
Elegia II.	<i>Lycon vota solvit Apollini Ἀλκιόδαμ, quod is numine suo Pholoen ad salutem reduxit.</i>	6
Elegia III.	<i>Næra puella iniquo animo fert, Rhodomillum adolescentulum procul a se rusticari.</i>	9
Elegia IIII.	<i>Aglæ puella Lydamum deperit; sed pudore impedita quominus desiderium suum cuiquam aperiat, in hortis domesticis mærore & lacrimis contabescit.</i>	11
Elegia V.	<i>Ad Ponticum. Ut temere peregrinari desinat.</i>	14
Elegia VI.	<i>Ad Joannem Baptistam Alexium, Medicinæ Doctorem, veterem amicum suum. Conjugium laudat.</i>	18
Elegia VII.	<i>Ad Franciscum Zanottum, Civem ac Professore Bononiensem, Poetam elegantissimum.</i>	22
Elegia VIII.	<i>Doridis puellæ laudes. Ad Illustrissimum Comitem Alphonsum Aldrigestum, Patricium Patavinum.</i>	25

JOANNIS ANTONII VULPII CARMINUM
LIBER SECUNDUS. 32

Elegia I.	<i>Navigacionem detestatur.</i>	32
Elegia II.	<i>Rusticam tranquillamque vitam optat.</i>	35
Elegia III.	<i>Divitiis paupertatem præfert.</i>	38

Ele-

- Elegia IIII. De Antonio Lando, Veneto Senatore Amplissimo, quum
is Aedis D. Marci Procurator creatus esset, Anno Sal. cId Id CC XVI.
41
- Elegia V. De Guidone Antonio Barbatio, Bononiensi Senatore, quum
is Summum Patrie Magistratum III. iniret Kal. Januarii Anni
cId Id CC XVIII. Ad Jacobum Antonium Bassanum e Soc. Jesu. 43
- Elegia VI. Viro Nobilissimo, Petro Grimano, Ex Legato Reipubli-
cæ Venetæ ad Carolum VI. Cæsarem Aedis D. Marci Procurato-
ri, amplissimam dignitatem gratulatur. 47
- Elegia VII. Ad Virum doctissimum Dominicum Lazarinum de Murro,
Patricium Maceratensem, & in Patavino Gymnasio, Græcarum La-
tinarumque Litterarum Professore Primarium. 49
- Elegia VIII. Ad Matthæum Burdegatum, Nobilem Civem Patavi-
num, certissimum amicum, ac pernecessarium suum. 52
- Elegia IX. Ad Virum eruditissimum, & de Itatorum ingenis præcla-
re meritum, Apostolum Zenum, Caroli VI. Cæsaris Historicum,
& Poetam. 60
- Elegia X. Ad Antonium Zenum, Sacræ Theologiæ Doctorem, avun-
culum suum carissimum. 64

JOANNIS ANTONII VULPII CARMINUM
LIBER TERTIUS. 65

- I. Laudes Divi Rainerti, Pisarum Patroni. 65
- II. Epithalamium in Nuptias Francisci, Mutinæ Principis, & Car-
lotta Aglaes Borboniæ, Philippi Ducis Aurelianensis filiæ. 73
- III. Charidemus. Ecloga. 77
- IIII. Orator bonus in causa mala. 84
- V. Quum N. N. Venetæ classis Imperator e militia domum reversus
esset. 86
- VI. In Funere Ferdinandi Obicii Marchionis. 88
- VII. Aegles morituræ lamenta. 89
- VIII. Helena Senescens. 90
- IX. Ad fontem, ut sibi Phyllidis imaginem referat. 91
- X. Epitaphium puellæ venatricis. 91
- XI. In aurigam, qui Lalagen abduxerat. 92
- XII. Hieme indulgendum voluptati. 93
- XIII. De Melampi fidissimi cantis interitu. 94
- XIIII. Ad amicos Patavinos, dum ad Benacum commoraretur. 95
- XV. Ad Lycidam. Amori tempestive obsequendum. 96

I N D E X. xxi

XVI. <i>Ad Nearchum, singulari forma, & præclara indole adolescentem.</i>	96
XVII. <i>In Nuptias Francisci, Mutinæ Principis, & Carlottæ Aglaæ Borbonicæ.</i>	97
XVIII. <i>Ad Joannem Franciscum Barbadicum, Episcopum Brixiensem, S. R. E. Cardinalem creatum.</i>	98
XIX. <i>Inscriptum sepulcro Familiæ Vulpie Patavii in æde D. Lucie.</i>	99
XX. <i>Sub effigie Aloysii Alamanni Florentini, Poetæ nobilissimi.</i>	99
XXI. <i>Sub imagine Nauceli, Portus Naonis fluvii, apud quem olim Bartholomæus Eivianus, fortissimus imperator, celebrem Academiâ instituerat.</i>	100

JOANNIS ANTONII VULPII OPUSCULA *soluta oratione scripta, quæ variis in voluminibus dispersa ad hoc tempus legebantur.*

<i>Andræ Nangerii, Patricii Veneti, Vita.</i>	103
<i>Jacobi, sive Adii Sinceri, Sannazarii, Neapolitani, Viri Patricii, Vita.</i>	125
<i>Dissertatio in Lucretium, ad Virum doctissimum Joannem Gratianum, in Gymnasio Patavino Philosophiæ Professore Primarium.</i>	161

JOANNIS ANTONII VULPII DEDICATIONES, ET PRAEFATIONES. 191

<i>Dedicatio Operum Andræ Nangerii.</i>	191
<i>Præfatio in Opera Andræ Nangerii.</i>	194
<i>Dedicatio Fabularum Gabrielis Faerni.</i>	200
<i>Præfatio in Fabulas Gabrielis Faerni.</i>	205
<i>Dedicatio Poematum Hieronymi Fracastorii.</i>	209
<i>Præfatio in Poemata Hieronymi Fracastorii.</i>	213
<i>Dedicatio Poematum Jacobi, sive Adii Sinceri, Sannazarii.</i>	220
<i>Præfatio in Poemata Jacobi, sive Adii Sinceri, Sannazarii.</i>	223
<i>Dedicatio Opusculi Augustini Valerii S. R. E. Cardinalis, de cautione adhibenda in edendis libris, &c.</i>	225
<i>Præfatio in idem Opusculum, &c.</i>	229
<i>Epistola ad Joannem Petrum Paschalicum, Venetum Senatorem Amplissimum.</i>	238
<i>Præfatio in Cornelium Nepotem.</i>	241
<i>Præ-</i>	

xxii I N D E X.

<i>Præfatio in Valerium Flaccum.</i>	245
<i>Præfatio in Libros Severini Boethii de Consolatione Philosophiæ, ad Virum doctissimum Jacobum Giacometti, Philosophiæ Moralis in Gymnasio Patavino Professore extimium.</i>	247

<i>Eruditorum quorundam Virorum, quibuscum JOANNI ANTONIO VULPIO amicitia intercedit, nempe JOANNIS CHECOTII Vicetini, FRANCISCI ZANOTTI Bononiensis, MATTHAEI BURDEGATI Patavini, DOMINICI LAZARINI DE MURRO Maceratenfis, Poemata nonnulla.</i>	255
---	-----

<i>CALLIMACHI CYRENAEI in Lavacra Palladis Hymnus.</i>	256
--	-----

<i>JOANNIS CHECOTII Vicetini Metaphrasis Elegiæ, five Hymni Callimachi Cyrenæi in Lavacra Palladis.</i>	257
<i>Angeli Politiani Metaphrasis ejusdem Elegiæ Callimachi Cyrenæi.</i>	268
<i>Auctoris cujusdam alia Metaphrasis ejusdem Elegiæ Callimachi Cyrenæi.</i>	272

<i>Ejusdem Joannis Checotii Carmina nonnulla.</i>	276
---	-----

<i>I. Ad Amicum.</i>	276
----------------------	-----

<i>II. Vicetia urbs N. N. Præfectum, a se discedentem, alloquitur.</i>	279
--	-----

<i>III. Lycidas.</i>	280
----------------------	-----

<i>IIII. In Editionem Operum Andreae Naugerii a Joanne Antonio Vulpio procuratam Epigramma Græcum.</i>	281
--	-----

<i>V. Idem Latine redditum, eodem Checotio interprete.</i>	282
--	-----

<i>VI. Inscribendum sepulcro Sebastiani fratris, immatura morte prærepti.</i>	283
---	-----

<i>VII. Sub effigie D. Caroli Borromæi.</i>	283
---	-----

FRANCISCI ZANOTTI Bononiensis CARMINA

<i>Elegia I. Ad Fernandum Antonium Gbedinum.</i>	284
--	-----

<i>Elegia II. Ad Virum Celeberrimum, Joannem Baptistam Morgagnum, in Gymnasio Patavino Anatomæ Professore Primarium.</i>	285
--	-----

<i>Elegia III. Ad Puellam.</i>	288
--------------------------------	-----

<i>Elegia IIII. Ad D. Philippum Nerium.</i>	290
---	-----

Etc.

I N D E X. xxiii

Elegia V. De Guidone Antonio Barbatio, Bononienſi Senatore, quum is Summum Patriæ Magiſtratum III. intret, Kal. Januarii Anni c1010ccxviii.	294
Elegia VI. Ad Joannem Antonium Vulpium.	302

MATTHAEI BURDEGATI Patavini CARMINA.

307

I. Quum Joannes Franciſcus Barbaticus, S. R. E. Cardinalis, a Bri- xienſi ad Patavinam Eccleſiam gubernandam traductus eſſet, An- no c1010ccxxiii.	307
II. Ad Joannem Antonium Vulpium, Anticum eximium ac ſingularem.	311
III. Ad Aeglen, de Amynta venatore.	317
III. De puella fluvio merſa.	318
V. Ex Italico Franciſci Petrarce: Or vedi, Amor, che giovi- netta donna Tuo regno ſprezza, ec.	318

DOMINICI LAZARINI DE MURRO Materatenſis CARMINA.

319

I. Fingit, ſe proveſſiore etate in amorem incidiffe.	319
II. In funere optatiſſimi amici, Claudii N.	322
III. De fonte Murrano.	323

JOANNIS ANTONII VULPII Antiquioris, Patricii & Epilcopi Novocomenſis, CARMINA que exſtant Omnia. Ac- ceſſere HIERONYMI VULPII, Joannis Antonii fra- tris, Epigrammata nonnulla.

323

De Vita Joannis Antonii Vulpii Antiquioris, Epilcopi Novocomenſis.

325

Paulli Manutii Epilſola ad Joannem Antonium Vulpium.	328
I. Ad Hieronymum Dandinum, Epilcopum Forocornellenſem.	329
Satyra I.	339
II. Ad Alexandrum Farnefum, Cardinalem. Satyra II.	339
III. Amariſſidis querelæ de Daphnide abſente. Ecloga ad huc inedita; Joſepbi Mariæ Stampa, Clerici Regularis Congregationis Somaſchæ Adnotationibus illuſtrata.	347
III.	347

xxiiii I N D E X.

III. De Bembo.	353
V. Ad Ludovicum Dulcium.	356
VI. De M. Antonio Flaminio, qui putabatur mortuus. Ad Franciscum Taurellum.	357
VII. Sub imagine Attilæ.	358
VIII. Sub imagine Friderici I. Imperatoris.	358
IX. Sub imagine Isabelle Aragonie.	359
X. Sub imagine Georgii Frangepanii.	360
XI. De Antonio Leva.	361
XII. In Fontem Plinianum, atque in ædes magnificentissimas a Comite Joanne Angussola ad eum fontem extructas. adhuc ineditum.	361
XIII. De quadam veteri Inscriptione ad C. Plinium Cæciliū pertinente. adhuc ineditum.	362

HIERONYMI VULPII Novocomensis EPIGRAM- MATA nonnulla.

I. In statuam Satyri & Pueri.	363
II. In statuam Vertumni.	363
III. In statuam Adonidis.	364
III. Sub imagine Joannis Jacobi Trivultii.	364
Joannis Matthæi Toscani, & Francisci Marti Molsæ Testimonia de Hieronymo Vulpio.	365

F I N I S.



JOANNIS ANTONII
VULPII
CARMINUM
LIBRI TRES.



JOANNIS ANTONII VULPII
C A R M I N U M
LIBER PRIMUS.

ELEGIA I.

Lyconis querela de gravi Pholoes valetudine.



DICEBAM: Nimios oderunt numina fastus;
Nec semper lucos fulmina missa petunt.
Quo tibi formosæ titulum, nomenque pudicæ,
Si lædit memores impia lingua deos?
Pluribus heu nocuit fœdus violasse puellis:
Successusque suos non habuere doli.
Desine jam, Pholoe, promissis fallere amantes;
Nam solet occulto Pœna venire gradu.
Hæc ego dicebam. sed tu contemnere docta,
Audisti nullo tot mea verba metu.
Ecce cubas; pallentque obsessi febribus artus;
Jamque omnis tenero fugit ab ore decor.
Infelix querula testaris voce dolores,
Diducisque gravi sicca labella siti.

A 2

Et

Et mecum pariter lacrimis tua mater obortis
Adsidet impresso nocte dieque toro.
Interdum gemit: interdum languentis ocellis
Oscula dat: superis tum pia vota facit.
Quæ precor excipiat non dura Juppiter aure,
Ominaque in pelagus tristitia ventus agat.
Spes bona; sed misero luctatur sæpe timori:
Et me sollicitis morsibus urit amor.
O certe dignum (nisi mendax fama) Prometheus,
Cujus edant avidi viscera volturii.
Gentibus ille novum simul æthere detulit ignem,
Non veritus magni sceptrum superba Jovis,
Continuo turpes venire in corpora morbi:
Ex illo celeres Mors habet atra pedes;
Dilacerantque sinus gnatorum in funere matres,
Et luget raptum mæsta puella virum.
At vos, quæ trahitis mortalia fila, sorores,
Numina carminibus sancta futura meis;
Flectere si fas est Acherontis jura precando;
Stamina felici ducite lenta colo.
Tu quoque Persephone damnatum attingere crinem
Abstineas. meritæ victima pulla cadet.
Crescentem nolite, deæ, præcidere messem:
Tempus erit, vestras quum vocet illa manus.
Nunc me quid citharæ, quid frons redimita corymbis,
Aut quid Gorgonei fluminis unda juvat?
Utilius medicas potui divertere in artes,
Et latebras Coi sollicitare senis.

Tunc

C A R M I N U M L I B. I.

5

Tunc mihi quærenti succos adhibere salubres
Gramina præberet læta minister Amor.
Forſitan heu, ſultos dum ſero conqueror annos,
Pendet ab indocto vindice tanta ſalus.
Adſit at ille frequens, validas & miſceat herbas;
Ut ſciat, ut curet, non amat ille tamen.
Phœbe pater, ſeu te nemoroſi frigida Pindi
Rura tenent, Xantho ſeu lavis amne comam:
Huc age, Phœbe, veni, ſidibus choreiſque relictis,
Et certam in dubiis caſibus adfer opem.
Tu mihi reſtituas dilectæ corpus amicæ;
Servabitque ægros una medela duos.
Irrita ſic numquam depromas tela pharetra:
Rideat Oebalio ſic tibi flore lyra.
Intonſique fluant per eburnea colla capilli;
Gaudeat & longa virginitate ſoror.
Mitis erit Pholoe, (faciles ignoſcite divi)
Et diſcet blando mollius ore loqui.
Læſa Venus, depone minas: jam ſeclitur illa.
Nullus de dominæ crimine flebit amans.
Poſtmodo turmatim fumantia templa petemus;
Et bibit annofum feſta favilla merum.
Stabunt inſignes vittis, auroque decori,
Guttura dent cultris qui ferienda, boves.
Ipſa etiam tepidas ſupplex accedet ad aras,
Quam circum plauſu tota caterva ſonet.
Adponetque ſuos vivo de marmore vultus,
Cæſaque ſacundis hæc monumenta notis:
QVOD.

QVOD. MIHI. VENTVRAE. SPES. EST. PRODVCTA. IVVENTAE
 ET. REDIT. IN. GRACILES. PRISTINA. FORMA. GENAS
 HOC. PRECIBVS. CARI. FATEOR. DEBERE. LYCONIS
 AT. PRO. ME. VOTI. SIT. REVVS. IPSE. LYCON

ELEGIA II.

*Lycon vota solvit Apollini ἀδελφεῶν, quod is
 numine suo Pholoen ad salutem reduxerit.*

DUCITE jam pactos ad Phœbi templa juvencos;
 Urantur festis tura Sabæa focis.
 Utque meri madeant sollemnes imbre favillæ,
 Solvite fumoso vincla vetusta cado.
 Incedat lautus pura cum veste sacerdos,
 Cui cingat nitidas lanca vitta comas.
 Hunc mecum celebrate diem, pia turba, sodales;
 Et bona jucundo murmure verba sonent.
 Nuper enim lento jacuit quæ pressa veterno,
 Ad solitos lusus nostra puella redit.
 Illam de mediis ereptam faucibus Orci
 Restituit Clarii dextera docta dei.
 Aspice, qui teneros audes contemnere vates;
 Exorant nostræ fata severa preces.
 Nec poterat sine me tristi descendere lecto,
 Nec fugere inferni colla timenda canis.
 Et nunc informes horreret pallida ripas,
 Quas inter nigræ labitur amnis aquæ.
 Tunc mihi mærentes duxissent funus amici;
 Nam me post Pholoen vivere fata vetant.

Quas

C A R M I N U M LIB. I. 7

Quas ego non lacrimas, quæ non suspiria fudi?
 Testis qui nostro pectore regnat Amor.
 Ah quoties trito mala somnia farre piavi,
 Inque meum volui vertere cuncta caput!
 Promisi quoties iratis munera divis,
 Procubuique sacras horridus ante fores!
 Nulla prope est miseris non conscia fletibus ara,
 Nulla tenent celebres quæ simulacra vias.
 Delius audivit mitis placidusque rogantem:
 Nimirum castis vatibus ille faver.
 Aoniamque lyram, & plectrum suspendit eburnum;
 Languenti medicas applicuitque manus.
 Lucebant humiles adventu numinis ædes:
 Ancillæ insolito dirigere metu.
 Quaque pedem tulerat, redolebat semita myrrham,
 Quidquid & in tota nascitur Assyria.
 Continuo plaudens rutilas Amor aureus alas
 Sternuit. auspiciis est dulce secuta salus.
 Tunc macies lento coepit discedere passu:
 Post rediit candor, purpureusque color.
 Ac velut, hibernæ pulso jam frigore brumæ,
 Spirat ab occiduo gratior aura mari:
 Suavius & verno rident in gramine flores,
 Qui gaudent molli virginis ungue legi;
 Sic Pholoe positam recipit cum fenore formam,
 Telaque luminibus promit acuta magis.
 Illa novos etiam gestit domuisse maritos,
 Claraque de templis præmia ferre domum.
 Vos,

Vos, quorum tenui splendent unguenta capillo,
 Nostis & argutos arte movere pedes,
Quæritis & rota fallendas urbe puellas,
 Jam procul abistis: fortior illa venit.
Nam fuerit quicumque audax, is cuspide fixus
 Versabit læsum sæpe dolore latus.
An potius roseasque genas, oculosque loquaces
 Optatis magno posse videre malo?
Auguror: hæc stimulat mentes insana cupido.
 Sic avidis fallax piscibus esca nocet.
Ore favete omnes: prodit meus ignis: & ante
 Insternit violis Gratia nuda viam.
Et volitat circum parvorum coetus Amorum:
 Quæque jecur figant, spicula mille gerunt.
En tetigit supplex intonsi limina Phœbi,
 Jamque meam donis liberat illa fidem.
At tu Latonæ proles, quo vindice morbi
 Cimmerios repetunt fœda caterva lacus,
Perge precor meritam nobis servare puellam,
 Sospite qua vivam, qua pereunte cadam.
Effice, ne longo forma hæc defloreat ævo:
 Tu faciles mores, tu bona verba doce.
Evenient. crepuit laurus, flammæque resurgunt,
 Et volucris liquidum prospera findit iter.

JOANNIS ANTONII
VULPII
CARMINUM
LIBRI TRES.

Heu miseranda Neæra, sinistro exercita fato,
 Invitam heu patruus quam jubet esse domi.
 Ferreus ah, quicumque sacros divellit amantes,
 Et statuit longas inter utrumque vias.
 Illi sub terris carpat mala viscera vultur,
 Et cinerem faxis femina, virque petant.
 O si me subiti delatam turbinis alis
 Aureus excipiat corde micante puer;
 Qualia desertæ spectarent oscula valles!
 Tunc ego vel superis invidiosa forem.
 Adnuerit precibus melior Fortuna; vagantem
 Prosequar, implexis qua via densa rubis.
 Nec fugiam sævos excire cubilibus apros,
 Nec gerere imbelli tela, sudemque manu.
 Illum si vitrei quærentem fluminis undas
 Ad cava Nympharum traxerit antra sitis,
 Hærebo lateri custos, ne gurgite ab imo
 Lascivæ properent ad nova furta deæ:
 Dumque parant tereti circumdare brachia collo,
 Thiodamanteus pectore cedat Hylas.
 Et rear ætheria labi de sede Tonantem,
 Frondosum quoties moverit aura nemus.
 Nunc umbrasque leves, & inania gaudia fingo,
 Quæ veniunt, facili diffugiuntque pede.
 Nunc morior curis, nunc mille pericula terrent,
 Luridus & mæsto pallor in ore sedet.
 Currite, quid statis? volvendi, currite, meses:
 O tandem ignavis addite calcar equis.

Pro-

C A R M I N U M L I B. I. 11

Proximaq; increpitet cessantem bruma Novembrem.

Ille potest miseris fletibus esse modus.

Quo feror ah demens, nimioque Cupidine victa?

Oravi stulte. vota maligna cadant.

Tempora tarda fluant. puero sunt otia cordi,

Ne terat indignus mollia membra labor.

Tristia ne torvi timeat praecepta magistri,

Neu fuscet roseas sera lucerna genas.

Ipsa dabo poenas, ut ne quid sentiat ille.

Aequum est, ut puero sospite plectar ego.

E L E G I A I I I I.

Aglaie puella Lygdamum deperit; sed pudore impedita

quominus desiderium suum cuiquam aperiat, in

hortis domesticis marore et lacrimis contabescit.

Hic-certe redolent flores, Zephyrique susurrant,
Et vitreus placida labitur amnis aqua.

Hic licet æstivos umbra lenire calores,

Dum findit medio Sirius arva die.

Invitant molles jucunda silentia somnos,

Et præbet facilem graminis herba torum.

Huc feror Aglaïe, crudeli obnoxia fato,

Si possit lacrimas tergere forma loci.

Pallentes violas ubi quondam in ferta legebam,

Gaudebamque leves mobilis ad thiasos,

Candida quum tremulæ nerent mihi fila sorores.

Vidissem Stygiæ tunc ego regna deæ;

B 2

Aut

Aut mala duxissem primo cum lacte venena :
Sic fueram curis eripienda semel .

Nunc me torquet Amor : nunc impacata medullas
Flamma vorat . misera , Mors , precor , atra , veni .
Nec liquidi fontes , nec stagna virentia mulcent ,
Nec vaga quæ tenues concutit aura sinus .

Et quæcumque suos volucris meditatur amores
Garrula , flebilibus visa dolere modis ,
Illa mihi sævos in pectore suscitât ignes ,
Et monet oblitâ illa madere genas .

Ah mea quam certo fixisti pectora telo ,
Lygdame , quum premeres terga ferocis equi ;
Et modo contractas retineres fortis habenas ,
Et modo anhelanti frena remissa dares !

Mirabar , sive ille citos revolutus in orbes
Iret , seu dociles tolleret arte pedes .

Teque unum denso puerilis in ordine turmæ
Spectabam cupidis perdita luminibus .

Tu potis es Libycos etiam tractare leones ,
Quos tantum Idææ cymbala Matris agunt .
Armeniaque tibi vellent mansuescere tigres ,
Quæ Bromium collo vix patiente vehunt .

Talis arenosis Eurotæ ludere ripis
Arduus , & spargi pulvere Castor amat .
Sed tu Ledæum pulcherrime Castora vincis ;
Hunc mater quamvis , & soror ipsa probent .
Felix o sonipes , quem dulcia jussa fatigant ,
Cui manus incomtas fingit amica juba !

Quem

C A R M I N U M L I B. I. 13

Quem dominus blanda compellat voce frementem,
 Et cogit subitas deposuisse minas.
 At me, dum fuscis versat Nox humida currus,
 Inclusam thalamo cessat adire sopor.
 Sublimique Venus tangit regina flagello.
 Hæc dea turbato scilicet orta mari est.
 Pervigil Auroram votis, precibusque lacerato,
 Et queror ignavos nolle redire dies.
 At mihi quid prodest dimota Lucifer umbra?
 Tempora vertuntur; me tamen urit Amor.
 Non sum quæ fueram. rosei fugere colores:
 Velat inornatum sordida mitra caput.
 Sæpe ego lanificæ studiis operata Minervæ
 Imposui pensis, matre jubente, manum.
 Sed ferus ille puer soboles Cythereia, plenos
 Abjecit calathos, & grave risit opus.
 Quantum erat, o superi, (si quos novistis amores,
 Nec placet averſa negligere aure preces)
 Aut olim Phinei misero me perdere fato,
 Ne possent oculi crimen habere mei:
 Aut mihi (fabor enim secretis abdita silvis)
 Adnuere optati gaudia conjugii?
 Heu quæ virgineo temere vox excidit ore?
 Da veniam lapsæ tu, precor, alme Pudor.
 Hactenus, alme Pudor, potui: nunc denique victam
 Alterius domini regna superba premunt.
 Sic tamen, ut lacrimas ausim celare cadentes,
 Quas tantum flores, mutaque saxa vident.
 O quæ-

O quæcumque tibi ventura est, Lygdame, conjux,
 Felix, & magnas inter habenda deas!
 Illa quidem formaque potens, & amore mariti
 Deferet antiquam candida nupta domum:
 Teque ulnis complexa, atque oscula dulcia figens,
 Jurabit, præ te nolle tenere Jovem:
 At gelidus toto fugiet mihi sanguis ab ore;
 Et, simul audiero, languida facta cadam.
 Tunc mihi succinctæ studia exercere Dianæ
 Certum est per silvas, & nive tecta juga.
 Quid mea, decepti, frustra speratis, amantes,
 Connubia, & blando perditis ore preces?
 Lygdamus unus erat qui me sibi jungere posset:
 Hunc si fata negant, innuba semper ero.

ELEGIA V.

AD PONTICUM,

Ut temere peregrinari desinat.

TUNE igitur dulces fratres, caramque parentem
 Liquisti, & patria lentus abesse potes?
 Dumque oculos nova detineant spectacula rerum,
 Pontice, difficilis jam tibi nulla via est?
 Nec te cærulei sonus æquoris, aut juga montis
 Terrent, aut pluvio sidere tristis hiems?
 Sed properas, insane, æstus perpeffus, & imbres;
 Impellitque tuas quælibet aura rates?

Et

C A R M I N U M L I B. I. 15

Et tamen, heu, molli fueras nutritus in umbra;
 Et (memini) optabas otia tuta puer.
 Cur tua mutata est sententia? cur vagus hospes
 Quæris, & inventas perdis amicitias?
 Nullane finis erit tot barbara litora adire?
 Tot maris ac terræ certa pericla sequi?
 Deferuit quicumque suos perjuris amores,
 Ultrices pelagi non bene tentat aquas.
 Nam Venus e spuma violenti nata profundi,
 Devotum pœnis urget acerba caput.
 Sæpius in teneræ jurasti verba puellæ,
 Te procul a domina vivere nolle tua.
 Vivis, & exciderunt animo promissa, fidesque:
 Vivis, & immemoris nomen amantis habes.
 Tu licet extremos accedas puppe Britannos,
 Dura vel immiti qua coit unda gelu;
 Dein septemgeminæ curras ad flumina Nili,
 Et tua miretur carbasa fuscus Arabs;
 Una tamen vincet peregrinas Julia formas,
 Julia, quam turpi deferis ipse fuga.
 Hæc Antenoreæ concessa est gloria terræ:
 Hic sedem imperio jam sibi legit Amor.
 Dum scopulos cernis, miser, & deformia cete,
 Et gaudes raucis fletibus Alcyonum,
 Interea dominæ sapientior hæret amator,
 Qui sperat damno crescere posse tuo.
 Illa quidem lacrimas te discedente profudit,
 Solvit odoratas victa dolore comas.

Plu-

Plurimaque immeritis fecit convicia nautis ,
Dixit & in summos libera verba deos .
Te quoque crudelem lingua titubante vocavit ,
Et quæstæ est , pactam sic cecidisse fidem .
Pontice ter felix , formosæ cura puellæ !
Sed tibi non dederunt dii tua nosse bona .
Si quid adhuc cessas , nec te vetus excitat ardor ,
Digna feres tantæ præmia duritiæ .
Illa suæ (monco) florem miserata juventæ ,
Alterius collum dulce gravabit onus .
Tum te contemnet , meliori junctæ marito ;
Inter & amborum gaudia risus eris .
Quare ne dubita rapidos huc flectere cursus ;
Corrumpunt segnes commoda magna moræ .
Num residere juvat , qua Threicio Aquiloni
Obvertit gelidum Gallica terra latus ;
Et pater Oceanus Morinorum a litore curvo
Dividit angusto regna Britannia freto ?
Istic , dum cohibent luctantes lineæ venti ,
Tollitur & multis unda superba minis ,
Londinum , ac Tamesin suspiras , improbe : nec te
Mater , amicorum nec pia turba movet .
Qui desiderio interea torquemur inani ,
Votaque pro caro suscipimus capite .
Dic mihi , quum celebres lustraveris impiger urbes ,
Quum terras omnes videris , & maria ,
Quid referes tandem longarum ambage viarum ?
Nempe tua exstimulat pectora laudis amor .
Com-

Compulit Aefoniden ventosis gloria pennis
 Linquere dilectæ litora Theſſaliæ,
 Ignotumque ſacra pelagus tentare carina,
 Tolleret ut rutili velleris exuvias.
 Laudis amore, minor Lacedæmona liquit Attrides,
 Et poſuit Phrygio caſtra Pelasga ſolo.
 Nec, quæ Priamides violaverat impius hoſpes,
 Fœdera conjugii paſſus inulta diu eſt.
 Sic Laerte ſatus, murorum everſor Ulyſſes,
 Diſceret ut mores, claraque geſta hominum,
 Pervadens medios Læſtrygonas, & Cyclopaſ,
 Non prius ad fidæ limina Penelopes
 Reſtituit ſe ſe, multas quam cerneret oras,
 Virtutem expertus per duo luſtra ſuam.
 Ante magna movent alti documenta Platonis,
 Aut iter antiqui nobile Pythagoræ;
 Occultas avidi rerum qui noſcere cauſas,
 Cecropia ille quidem ceſſit, at ille Samo? (tus:
 Quid tamen hæc memoro? paucorum eſt bellica vir-
 Naturæ paucis vincere clauſtra datur.
 Multi longinquas emenſi navibus undas,
 Stultitiam feſſi dein retulere domum.
 Te potius vatū dulces evolvere luſus,
 Te citharam digitis increpuiſſe decet.
 Quod ſi laudari cupis, en laus optima: certi
 Præclarum exemplum, Pontice, amoris eris.
 Tu modo fac redeas: hoc mæſti optamus amici;
 Hoc fratres, cana cum genitrice, rogant.

Postulat hoc tacitis pulcherrima Julia votis,
Quæ pretium redditus una futura tibi est.

ELEGIA VI.

AD JOANNEM BAPTISTAM ALEXIUM

Medicinæ Doctorem, veterem amicum suum.

Conjugium laudat.

QUID juvat argutum deducere carmen, ALEXI,
Blandaque lascivo nectere verba pede:
Aut quid vicinis cithara placuisse puellis,
Dum venit ad numeros turba jocosa tuos;
Quem jubet in vacuo solum tabescere lecto,
Et videt irato lumine magna Venus?
Nam si mille meos errent armenta per agros,
Pactolique fluat nostra liquore domus:
Atque opibus Lydo possim certare tyranno,
Et me victorem barbara terra tremat;
Nil mihi profit ebur cara sine conjuge. frustra
Luceat Assyriis eruta gemma vadis.
Nec mihi Sidonio pulvinus murice tinctus,
Nec faciant somnos stragula picta bonos.
Quod si me castis foveat complexibus uxor,
Meque vocet balbo filius ore patrem;
Tunc ego vel Scythica tulerim cum gente vagari
Nudus, & imposito plaustra movere Lare.
Nec dubitem sævis animam committere ventis,
Fessaque sub gelido sternere membra Jove.

Su-

C A R M I N U M L I B. I. 19

Sustineamque famem desueta pellere glande .
 Tunc mihi restinguat sobria lympha sitim .
 Felices olim , quos aurea protulit ætas ,
 Factum deliciis , & sine fraude genus .
 Illi conjugium viridi pepigere sub antro ,
 Vel prope aquæ rivum composuere caput .
 Hospitium cupidis præbebat amantibus arbor :
 Implebant molles poma caduca sinus .
 Flosculus offensam placabat sæpe puellam ,
 Osculaque inventi promeruere favi .
 Ipse puer Veneris circumvolitabat inermis ,
 Gaudebatque rudes cædis habere manus .
 Nondum sanguineo formam corrumpere fuco
 Cœperat , externos nupta secuta viros .
 Nec ratis Hesperios nigris admorat Eois ,
 Unde novas merces femina dura petit .
 Tunc etiam pauper poterat securus amare .
 Si fas est , veteres quæso redite dies .
 Ferrea nunc alios didicerunt sæcula mores :
 Candida jam toto cessit ab orbe Fides .
 Nunc sibi divitias fulvo quisque exstruit auro ;
 Et (pudet heu) pretio vxnit avarus amor .
 Femina pellectis ingenti dote maritis
 Imperat , & niveis vecta superbit equis .
 Non illi cura est dulces educere natos ,
 Nec plenas multa carpere nocte colos .
 At potius Tyrias auro distinguere vestes ,
 Et speculum pexis ante sedere comis .

Tum , quoties alti prodit de limine testî ,
Spectari populo per fora , perque vias .
Illa modo irriguos spatatur lenta per hortos ,
Et juvenum blandos accipit aure jocôs .
Nunc spectat mimos curvis ornata theatri ,
Nunc animo solitos versat acerba dolos .
Infert se thalamo non fastiditus amator ,
Et sedet in tepido , dum cubat illa , toro .
Heu contemte pudor ! cur jam Lucretia nulla est ,
Quum tot nostra ferant sæcula Tarquinius ?
Hæc etiam castas vitiant exempla puellas ,
Et quæ tam claros non habuere patres .
Quid tamen antiquis prohibet nos moribus uti ?
Dos fuerit nobis ampla , pudicitia .
Vilia securas exornent pocula mensas ,
Argilla & Samiæ turbine ficta rotæ .
Nos gremio pueros excepit flavus Apollo :
Pieria digitos imbuir ipse lyra .
Et docuit sacram choreas agitare per umbram ,
Dum streperet rauco tibia curva sono .
Ambo , quid sit Amor , quid fortes novimus arcus ,
Et nostrum simili pectus ab igne tepet .
Ergo quid noctes miseri vigilamus amaras ,
Ponimus & medio corpora pigra toro ?
Occurrunt comtæ , venias quocumque , puellæ ,
Ex oculis geminas conjiciuntque faces .
Hæc placet , aureolos quod colligit arte capillos :
Mobilis hæc summos detegit arte pedes .

Hanc

Hanc decet aspectu juvenes captare: sed illi
 Purpureus tenero ludit in ore pudor.
 Nec mihi vineta rigent duro præcordia ferro,
 Ubra nec puero sæva læna dedit;
 Ut me nulla queat sensim expugnare voluptas,
 Aut Veneris nullæ tangere blanditiæ.
 Adsis, o Hymenæe, boni bone raptor amoris,
 Quo coeunt fausto vir, mulierque duce.
 In thalamos properet conjux formosa pudicos,
 Moribus, & facie concilianda viro.
 Et mihi succrescat proles imitata parentem,
 Quam Charites lepidis artibus erudiant.
 Mecum opto pariter sis fortunatus, ALEXI,
 Et possis fato candidiore frui.
 Non semper gelidi manant de nubibus imbres,
 Aut furit excussis ventus in arboribus.
 Tu quoque Fortunæ rapido jactatus ab æstu,
 Debita Virtuti præmia, amice, feres.



ELEGIA VII.

AD FRANCISCUM ZANOTTUM

*Circum, ac Professore Bononiensem,
Poetam elegantissimum.*

QUALIS, ut accepit speratæ pignora formæ,
 Regius ignoto flagrat amore puer:
 Et nondum visæ fingit sibi conjugis ora,
 Naufraga quam sævi distinet unda freti:
 Perditus & pictæ blanditur sæpe tabellæ,
 Et dolet ingratos tardius ire dies;
 Talis ego, absentem dum te complector, amice,
 Qui mihi de solo cognitus ingenio es,
 Multa interjectis facio convicia terris,
 Et studeo vultus mente videre tuos.
 Nulla mihi dulcem quæ fervet cera figuram;
 Nec solido carum vivit in ære caput:
 Qui tamen æterno possit certare Catullo,
 Sæpe tuus nostra versus in aure sonat.
 Hic & Apelleas, & vincit Mentoris artes:
 Hunc taciti frustra temporis arma petent.
 Tu quoties parvi tractas prope flumina Rheni
 Auditam faxis, arboribusque lyram:
 Et laudas tremulos dominæ ridentis ocellos,
 Quæque nitet roseis purpura fusa genis;
 Certatim denso prætexit agmine ripas
 Najades, & circum candida turba fedit.

Su-

Sustinet ipse suos cursus jam segnior amnis,
 Invisoque pedem torquet ab Eridano.
 Quam juvat humenti corpus demittere in herba,
 Atque inter faciles plectra movere deas!
 Negligit hæc strophio molles vincire papillas,
 Hæc aperit niveum veste fluente latus.
 Illa placet flavos nodo collecta capillos,
 Huic incompositas ventilat aura comas.
 Felix, quem teneris commendat Musa puellis:
 Cui non alterius ditior arca nocet!
 Nimirum sapiunt, & fama teste probantur,
 Carmina divitiis quæ potiora putent.
 Quid foret Andromede, quid falso vecta juvenco,
 Aut quid pennigero Tyndaris orta Jove,
 Aurea si veterum siluissent carmina vatum?
 Deficit, & nullo vindice forma perit.
 At mecum, immitis quereretur dum facta Lycinnæ,
 Flerunt & montes, & nemora, & Dryades.
 Illa tamen lacrimas ridebat sæva dolentis,
 Terrebatque novis me violenta minis.
 Nunc merito contempta jacet; vinclisque solutis,
 Prætereunt nostri tecta superba pedes.
 Nunc me femineos fudisse ad limina questus,
 Nunc pudet ad clausam ferta tulisse domum.
 Et quæ mendaci texebam carmina laude
 Ignis habet. chartis excidit illa meis.
 Quam celebret, mediis leporem qui captat in undis,
 Et subigit valido litora sicca bove.

Jam-

Jamdudum blandi nugas oblitus Amoris,
Debueram Paphiæ ponere vota deæ.
Fugit enim choreis, & lusibus aptior ætas;
Vicimus: in gelido stat mihi corde silex.
Dum me prima novo vestiret flore juventa,
Perspectus misero nec satis esset amor,
Mirabar crines, & lactea colla puellæ,
Quidquid & incautos ducere fraude solet.
Sed velut irrigui per mollia gramina prati
Noxia mortifero vipera dente subit;
Sic inter placidos vultus, cantusque, jocosque,
Compositos didici sæpe latere dolos.
Vos ego nunc moneo, similis quos decipit error;
Tendite maturæ carbasa vestra fugæ.
Nec promissa fides, circumfusi que lacerti,
Nec moveant querulo dulcia verba sono.
Et majora loquar: non semper credere tutum est,
Tristitia quum lacrimis ora, sinusque madent.
At tibi si qua pia es, nec moribus uteris istis,
Persolvat læta præmia fronte Venus.
Carior est gemmis, & fulvo carior auro,
Quæ mulier cupido fida reperta viro est.
Scilicet huic nostri statuunt monumenta libelli:
Hanc adimit summo fama benigna rogo.
Penelope vivet, longæ quæ flamine telæ
Reppulit instantes nupta severa procos.
Vivet Hypermnestre duras exosa sorores,
Quæ timuit sponsi tingere cædæ manus.

Eheu

C A R M I N U M L I B. I. 25

Eheu quam rigidas exemplis obferat aures,
 Et tantum ſcleri perfida turba faver!
 Quod ſi certa tuis precibus contingat amica,
 Et qualem raro ſæcula noſtra vident;
 Pone memor Veneri Pario de marmore ſignum,
 FRANCISCE, & meritis da pia tura focis.
 Tunc tua magnificis præſtet fortuna triumphis,
 Nec tibi malueris, quas habet Indus, opes.
 Tunc mihi plena mei venient ſolatia caſus.
 Tu modo ne tacito gaudia conde ſinu.

E L E G I A VIII.

Doridis puella laudes

AD ILLUSTRISSIMUM COMITEM

ALPHONSUM ALDRIGHETTUM,

PATRICIUM PATAVINUM.

NON ita femineos coetus exhorruit Orpheus,
 Tartarei deſſens irrita dona dei:
 Nec ſic Theſides nemori, ſtragique ferarum
 Dicitur Actæas poſthabuiſſe nurus:
 Tanta nec objecit famoſæ probra Lacænæ
 Stesichori ſacro pulſa furore lyra;
 Quantum ego certus eram cunctas odiſſe puellas,
 Et vanum ulciſci per maledicta genus.
 Huc me compulerant immitis facta Neæræ,
 Huc elati animi, verbaque plena dolo.

D

Qued-

Quodque semel nitidi species me luserat oris,
Formosis nullam rebar inesse fidem.
Sed veterem tua jussa movent, ALPHONSE, sodalem,
Ne temere incoeptum currere pergat iter.
Propositumque unus potes expugnare, quod ullæ
Flectere non lacrimæ, non potuere preces.
Ergo si facilis tenero sum rursus amori,
Si quid dulce sonant carmina nostra, tuum est.
Gaudes jure; tibi stetit hæc victoria magno:
Nec subito vinclis brachia capta dedi.
Tu mihi nescio quam Venerem jactare solebas
Calcantem irato colla proterva pede:
Et pueri, toto victor qui regnet Olympo,
Terribiles arcus, indomitamque facem.
Quin etiam didici priscorum somnia vaturn,
Tristia nempe feros fata manere viros.
Ut fidibus quondam Rhodopeia saxa trahentem
Orphea thyrsigeri diripueret chori.
Hippolytusque perit scelerata fraude novercæ,
Devovit gnati quum caput ipse pater.
Quique Helenæ turpi temerarat carmine formam,
Mutavit stultum lumine captus opus.
Tum reliqua addebatur exempla timorem,
Historiis promens quidquid amare docet.
At tua securas veniebat fabula in aures:
Contemfere leves pectora nostra minas.
Has mihi si pœnas cecinisset Pythius ipse,
Rapta forent celeri dicta severa Noto.

Nam

Nam frustra terrere pares, discrimine vitæ
 Spem libertatis qui bene credat emi.
 Multi ne tætro marcerent carcere, dira
 Supplicia, & positas non timuere cruces.
 Quid refert, hostem, an dominum patiaris Amorem?
 Ille deus nullo vincitur obsequio.
 Asper eram, tumidisque genis, ALPHONSE, loquebar
 Quæ possent siccos verba decere senes.
 Tu tamen, ancipitis suadente cupidine palmæ,
 (Gloria difficili nam solet ire via)
 Callidus ad miras bellator confugis artes,
 Dura novo tentans pectora consilio.
 Et mihi formosæ laudas persæpe puellæ
 Lumina nocturnis æmula sideribus.
 Et, quæ bombycis vincant tenuissima fila,
 Fulgentes auro versicolore comas.
 Quas modo gemmatum docte disponat in orbem,
 Errantes humero mox volitare sinat.
 Nec retices gracilemq; manum, roseumque labellum,
 Mella ubi flexanimus dulcia fingat Amor.
 Tum Cypriæ sublecta deæ mollissima verba,
 Palladis arguto non sine blanda sale.
 Hanc, memoras, Indis carmen præferre pyropis,
 Non sit ut Aonio gratior ulla choro.
 Hanc fastus odisse omnes, mala crimina formæ:
 Et vix invidiæ tanta patere bona.
 His addis raramque fidem, castumque pudorem;
 Quem sancte, at nulla rusticitate colat.

Plurimaque ingenuis narras de moribus, & me
Ah sensim incautum sub juga prisca trahis.
Non, ALPHONSE, tuæ ut vellem subrepere flammæ;
Nimirum hoc veteres solvit amicitias;
Sed tantum ut caro Doris dilecta sodali
Vitaret Stygios, me celebrante, lacus:
Nec foret invisum jam nobis femina nomen;
Commendat totum scilicet una genus.
Illa dies memori sub pectore fixa manebit,
Qua primum cupido visa puella mihi est.
Te ducente, deæ tamquam venturus in ædem,
Suspensio tetigi limina sancta pede.
Limina, queis docti figunt sæpe oscula vates,
Et placido vultu janitor adstat Amor.
Occurrit nobis flavos incomta capillos
Doris, & aspectu non timefacta meo est.
At suavis teneras infecit purpura malas.
Non humiles animos arguit ille color.
Talis mane rubet Tithono Aurora relicto,
Frigidulo croceos humida rore sinus.
Talis perspicui fulget rosa fontis ad undas,
Cui stipent pulchrum lilia cana latus.
Mox in amatorem flammantia lumina vertit,
Tecum submisso pauca locuta sono.
Dii magni! raram faciem, cultusque pudicos!
Abstulerant oculos dulcia visa meos.
Forsthan objecta me lusit imagine somnus,
Fingere qui cupidis hæc simulacra solet.

Sed

Sed tu me vigilem juras, ALPHONSE, fuisse,
 Nec dubiam verbis rem sinis esse tuis.
 Ah, quicumque jugum domini detrectat Amoris,
 Aspiciat tantum Dorida, mitis erit.
 Consiliumque ferum, vitamque perosus inertem,
 Damnabit veteris tempora duriæ.
 Quem tamen haud capient blandæ spectacula formæ,
 Tam doctæ moveant, artificesque manus.
 Circum inerant calathis operosæ pensâ Minervæ,
 Pictaque felici tela nitebat acu.
 Atque aliquot scamno positi jacuere libelli,
 In quibus Etrusci carmina vatis erant.
 Quorum ope sic reliquis prælucet Laura puellis,
 Ut solis nimium suppressit astra jubar.
 Tum demum vera dixi te voce beatum,
 Miratus faciles tam tibi, amice, deos.
 Quid poterant homini largiri numina majus?
 Præ tali domina quis sibi regna velit?
 Huic ego crediderim vixisse heroidas illas
 Artibus, & facie, non probitate pares.
 Antiopen, Semelen, venatricemque Atalantam,
 Quamque tulit nivei per mare forma bovis.
 Laertisque nurum, & repetitam mille carinis
 Tyndaridem, cujus crimine Troja ruit.
 Et quas præterea Græji cecinere poetæ,
 Turba licens, vanos fingere nata jocos.
 Juppiter hanc melius sublimibus inserat astris,
 Qua ferus Erigonæ dat sua terga Leo.

Nam

Nam cur Parrhasia turpavit pellice cælum?
 Aut cur Cassiopen lucida sella tenet?
 Hac melius nequeant cyathos tractare deorum
 Alcidis conjux, Iliacusve puer.
 Sed, te contento, nolit fidissima Doris
 Ardua magnanimi tecta subire Jovis.
 Fortunati ambo, quos dulcia fœdera jungunt,
 Fœdera non ullo dissolvenda die.
 Postera concordēs animas mirabitur ætas,
 Et vos laudatis addet imaginibus.
 Vester amor querulæ nescit mala jurgia linguæ,
 Nec pullius gelido sæpe timore labat.
 Nullaque securos pungunt suspiria somnos:
 Inque vicem stabili certat uterque fide.
 Desipit ah, quisquis lacrimas in amore, metusque
 Optat, & iratæ sævitiam dominæ.
 Et faciem exsanguī quærit mutare colore,
 Et miserum tota vertere nocte latus;
 Crescat ut alterno jucunda dolore voluptas.
 Hostibus hæc placeant tristia vota meis.
 Quondam ego crudelē poteram perferre Neæram;
 Sed læsere graves pectora nostra vices.
 Omnis enim cupidus mulier spe lætat amantes
 Interdum, & facili perfida fronte nitet.
 Deinde ubi mendaci stultos dulcedine traxit,
 Tum vero occultam promit amaritiem.
 Sic, gravidis frustra se se inclinantiā ramis,
 Tantaleam, perhibent, ludere poma famem.
 Qua-

C A R M I N U M L I B. I. 31

Quare tam certa felix, ALPHONSE, puella,
 Utere diis placidis, utere sorte tua.
 Hæc vobis longum concordia duret in ævum;
 Nec minuat blandas curva senectæ faces.
 Donec ad Elysios pulchra cum Doride campos,
 Exacto lucis tempore, serus eas.
 Occurrent umbræ tenues per florea rura,
 Congressus vestros & sibi quæque petet.
 Nunc ignosce, precor, tanto si pondere victum
 Deficit ingenium sub tua iussa meum.
 Non mihi Callimachi, non Umbri plectra poetæ:
 Nec mihi tam puras Musa ministrat aquas.
 Ille puellarum, Phœbo vix cognitus, osor
 Hæc ego conscripsi: num tibi forte leve est?





JOANNIS ANTONII VULPII
C A R M I N U M
LIBER SECUNDUS.

ELEGIA I.

Navigationem detestatur.



QUI primus tuto solvit de litore puppim,
Contemnens avidi multa pericla maris;
Primus & ignotis cōmisit carbasa ventis,
Non certe nostri sanguinis ille fuit.
Sed ferus, & rabidæ nutritus lacte lænæ;
Qui posset scopulos vincere duritie.
Hinc leti patefacta via est: hinc plurima semper
Oceanus tumidis corpora volvit aquis.
Tunc peperit vigiles damnosa pecunia curas,
Prædaque paullatim quodlibet ausa nefas.
Num tanti est, quæso, pelagi cognoscere Nymphas,
Et Nerei mutum sollicitare pecus,
Dormiat ut gelido conjux mæstissima lecto,
Et fleat immemoris tristitia facta viri?

O mi-

O miser, invito quisquis discedit Amore,
Nec patitur blandas pondus habere preces.
Illum persequitur poënis Rhamnusia virgo,
Admonitus magnos ut sciat esse deos.
Nam modo Threicio strident Aquilone rudentes,
Interdum e Libyca tollitur Auster humo.
Jam Zephyrus madidas a vespere concutit alas:
Jam tu Memnonias deferis Eure domos.
Tunc frustra cupit in patriis consistere terris,
Inque sinu dominæ claudere posse dies.
Quid profunt merces? quid pondera divitis auri?
Aut quid Erythræis concha petita vadis?
Omnia fallaci debentur munera ponto.
I nunc, atque malas congere divitias.
Ipse autem fluctu in medio versatur avarus,
Et refugo spumas naufragus ore vomit.
Nonne fuit satius glæbas movisse paternas,
Cogentem validos ad juga curva boves?
Nonne fuit satius, quam fuscis pergere ad Indos,
Ante suos lætum consenuisse Lares?
Et celebrare focum, & pueris antiqua referre
Tempora, & angusta delituisse casa?
Et tandem lacrimas inter, gemitusque suorum
Deficere, & coram verba suprema loqui?
Hic saltem vili texisset membra sepulcro,
Quæ nunc alterno gurgite pulsa natant.
Placatique pio requiescent funere manes,
Transisset Stygios & levis umbra lacus.

E

O va-

O valeant silvæ potius, pereantque secures,
Quam scindat liquidas ulla carina vias.
Aut abeant pessum virides, niveique lapilli,
Quos vagus extremo quærit in orbe labor.
Hos olim veteres ignoravere puellæ:
Et placuit primis forma sine arte viris.
Quid nocuit crines collo sparsisse solutos?
Insignem aut gemmis non habuisse manum?
Tunc teneros nexis velabant frondibus artus;
Ducebantque hilares brachia nuda choros.
Et nondum cæsi Neptuno viscera tauri
Ponebat, dubium nauta secutus iter.
Sed quisque agrestes Faunos, Dryadasque colebant
Aut lacte, aut puris rustica turba favis.
Tunc ego vixissem, nec me tam sera tulissent
Sæcula! tunc solum vivere dulce fuit.
At vos Aeolii fratres, hiemesque sonantes,
Saxaque in audaces perniciofa rates:
Tuque o Scylla rapax, tuque o violenta Charybdi,
Et si quos alios continet unda metus;
Præmoneo; frustra cupitis mea vela videre.
Me retinent villæ, cultaque rura placent.
Hic æstate legam flaventes messor aristas,
Autumnoque premam pinguis musta pede.
Hic possim stabulis tardas expellere vaccas,
Et revocem saturas ipse magister oves.
Interea jactas aliquis mihi navita merces
Narret, & adverso lintea rupta Noto.

Cre-

C A R M I N U M LIB. II. 35

Credam ego præcipiti differri turbine puppes ,
 Horridaque immenso monstra natare mari :
 Humentesque Hyadas pluvio consurgere cælo ;
 Dum sedeam patrium credulus ante focum .
 Hoc probat Eurynome , tacita quæ noctis in umbra
 Medoaci rapidas carmine sistit aquas .
 Quam Venus , & dulces casta cum Pallade Musæ
 Certatim donis excoluere suis .
 Si tamen instabilem jubeat me scandere navem ,
 Et secum arduos tendere ad Aethiopas ,
 Terra vale , dicam : quid enim ? parere necesse est .
 Jam , piger , e nostro pectore cede , timor .
 At potius mihi natali tellure sepulto
 Ipsa ferat tristes munus in exsequias .

E L E G I A II.

Rusticam tranquillamque vitam optat .

SI Fortuna mihi , vultu blandita sereno ,
 Deferat arbitrii vela regenda sui ;
 Non ego divitiis optem superare beatos ,
 Libera non Indi sceptrum tenere maris .
 Invidiam fugisse velim , curisque solutus
 Vertere privato jugera pauca bove .
 Et modo pastorum calamos æquare canendo ,
 Et modo gramineo flectere membra toro .
 Aspiciam presso surgentes vomere glæbas
 Quum properat durum fortis arator opus .

E 2

Nec

Nec pigeat medio spicas legisse calore ,
Nec pleno autumnı munera ferre sinu .
Et religem sectos agresti more maniplos .
Hæc fuerat priscis gloria consulibus .
Illic non pudeat , desit si forte minister ,
Condita sordenti promere vina cado .
Illic , dum puro niteat mihi mensa salino ,
Cœnem fictilibus dulce libenter olus .
Ante focum sedeam turba vallatus amica ,
Frigus , & hibernas fallere doctus aquas .
Villica lanifico deducat stamina fuso ,
Sopitæque fluant mollia pensa manu .
Tunc placeat largo crateras vertere Baccho
Omnibus , & regem ducere sorte meri .
Felices , quibus ista licent : quos ambitus urbis
Non tenet , aut multo limina trita pede !
Hos nec sollicitos auri male sana libido ,
Nec tumidum falsis fluctibus æquor habet .
Ignorant cædes , ignorant Martia castra ,
Quæque sonant rauco vendita verba foro .
Hi commune trahunt cum diis cælestibus ævum .
Si tamen Admeti pavit Apollo greges ;
Et soror occultos nemorum Dictynna recessus
Incolit , errantes usque secuta feras .
Tu quoque flava Ceres , parci tutela coloni ,
Temporaque incinctus vite , Bimater , ades .
Capripedes adsunt Fauni , Satyrique bicornes ,
Et Nymphæ Arcadio grata rapina deo .

Qui-

Quique solet vigiles hortis defendere fures
 Turgidus, & sæva non modo falce minax.
 Terminus accedit dubii finitor agelli,
 Et lactis niveo culta liquore Pales.
 Dicitur & volucer villas habitare Cupido,
 Herbofoque vagum pascere colle pecus.
 Dire puer, nigro quid foeda mapalia fumo,
 Quid miseri agricolæ juncea tecta subis?
 Hic labor insanas depellit pectore curas;
 Otia nec blandis artibus apta vides.
 Hic tenuis victus, hic usti solibus artus:
 Hic riget æstivo pulvere densa coma.
 Nil agis. auratas alio converte sagittas,
 Cordaque deliciis pervia quære tuis.
 Mille patent aditus, ubi cultu forma paratur,
 Torquet ubi lautos femina comta viros;
 Et laxant animos epulæ, rebusque secundis
 Discurrit media candidus urbe Jocus.
 Me sine securis tranquillum vivere silvis,
 Dum ferat extremos curva senecta dies.
 Ah memini, quum plaga recens, rudibusque medullis
 Ignotus nitido venit ab ore furor;
 Pertulerim quantos insomnis nocte dolores,
 Quotque pererratae sint mihi luce viæ.
 Mitius inclusos urebant æra Perilli:
 Sævit montani mitior ira lupi;
 Quam tua letifero cuspis medicata veneno.
 Heu nimium nostri sanguinis illa bibit.

Ad

Ad laqueos mage cautus ero. quæ retia fugit,
 Longius insidias provida sentit avis.
 Sit mihi, Pegasides, vestros haurire liquores,
 Et de Pierio carpere fecta jugo.
 Nec terrent dumeta, & inhospita lustra ferarum,
 Dum fugiat sacro carmine pulsus Amor.
 O utinam talem detur deducere vitam,
 Et moveant faciles vota modesta deos.
 Interea Spes alma sedet, meliusque futurum
 Cras, ait; & ridens craftina fata manet.

ELEGIA III.

Divitiis paupertatem præfert.

VICINAS alius meditetur nubibus ædes,
 Et vehat externis marmora cæsa jugis.
 Divitis ut domini pavidum terat atria vulgus:
 Despiciant humiles ut nova tecta casas.
 Et serat immensis late pomaria campis,
 Alcinoique paret vincere delicias.
 Illi purpureis madeat vindemia prelis:
 Illi det messes non venerata Ceres.
 Pingua centenis exerceat arva juvenis,
 Et nitidos læto gramine pascat equos.
 Aurea cui volitent circum laquearia curæ:
 Stet vigil æratas cui timor ante fores.
 Nec possint citharæ fugientem ducere somnum,
 Aut quæ tranquillo murmure lympa cadit.

Non

Non mihi Tænario surgunt fastigia saxo,
 Nec Parius mira sculpitur arte lapis.
 Nec mihi Sidonio corrumpitur alba veneno
 Lana, nec articulos Indica gemma terit.
 Sit mihi parva fatis fumoso culmine villa,
 Dispenset vacuos dum mihi Parca dies.
 Nec me tangat amor numquam satiatus habendi,
 Unde hominum cædes, & scelus omne venit.
 Hic jubet adversos bello concurrere fratres:
 Hic sæpe immeritis toxica mixta dedit.
 Hic docuit rigidum falces procudere in ensen,
 Et ratibus tumidi scindere terga maris.
 Hunc lacrimæ, gemitusque juvant, & sparsa cruore
 Limina, & occultis impia furta dolis.
 Hoc suadente boni falluntur nocte mariti,
 Et didicit sanctam lædere nupta fidem.
 Ipsa petit cupidus prædator templa deorum;
 Nec verus impuras submovet ara manus.
 Ah pereat, quisquis rutilum fornacibus aurum
 Excoquit, aut gelidi viscera montis adit.
 Dignus quem subito tellus concludat hiatu,
 Duraque Sisyphio saxa labore premant.
 Pauper amicitias melius colit: otia pauper
 Lentus agit. fati despicit ille minas.
 Nec queritur, quod spem longi deceperit anni
 Non expectata grandine tactus ager;
 Aut male defendat liventes pampinus uvas,
 Aut pereant succo deficiente greges.

Quid

Quid prodest miseram quærendo absumere vitam,
Nec lucri indomitam tollere posse famem?
Num minus ostrino sævit Mors pallida lecto?
Aut regum cellas præterit illa domos?
Omnes umbriferæ transvectat navita cymbæ:
Ad Styga communis, nec remeanda via est.
Quamvis assiduis putrescant pauperis ossa
Imbribus, & cineres fictilis urna tegat:
At dives titulis ornet monumenta superbis,
Ut memoret ferus nomina prisca nepos;
Nudus uterque tamen regionibus errat in imis,
Et peragit nigri ferrea iussa dei.
Quin etiam ingentes annorum pondere turres,
Et superis moles invidiosa ruet.
Signaque deficient veros imitantia vultus;
Nec poterunt scriptas ferre sepulcra notas.
Atque ubi marmoreis tolluntur tecta columnis,
Tardabit celeres quælibet herba pedes.
Me nemus Elysium, & stillantes balsama trunci,
Ruraque perpetuo florida vere manent;
Quum tota ingenuas consumpta ætate per artes,
Pieridas inter nostra senecta cadet.
Illic est, quicumque aurum, gemmasque perosus
Continuit modico libera vota lare.
Tunc procul inferno demersos gurgite avaros
Ridebo. incassum plebs inhonora fremet.

C A R M I N U M LIB. II. 41

E L E G I A IIII.

DE ANTONIO LANDO,
VENETO SENATORE AMPLISSIMO,

*Quum is Aedis D. Marci Procurator creatus
esset, Anno Sal. cId Id ccxvi.*

DUM Venetas arces, atque Itala regna tuetur,
Et pia magnanimus corripit arma Leo
Pro templis, puerisque, & libertate Latina;
Barbaraque ingenti litora voce quatit:
Quo fremitu nostris procul a regionibus actus,
Matribus Ismariis inficit ora pavor:
Inque vicem ad nostras veniens Victoria puppes
Deserit injustos diva superba Getas:
Indomitofque minax urget Bellona jugales
Everfura tuas, Hæme nivalis, opes:
Transfuga dum Boreas intendere Thracia flatu
Vela negat, medio destituitque mari:
Dumque vident lætæ summa de rupe Procellæ
Turpia damnata corpora classe vehi:
Fatorumque moras ægre patiuntur, & iræ
Sollicitant votis tempora lenta suæ;
Quam bene promeritos contingit LANDUS honores,
Non levis antiquis gloria LANDUS avis!
Cujus adhuc mites optat Vicetia fasces,
Imperii celeres quæsta fuisse dies.
Præsîde quo largas diffudit Copia fruges,
Expulsumque Utini cessit ab urbe nefas.

F

Con-

Conveniunt populusque frequens, hilarisque senatus:
Fertur per celebres aurea pompa vias.
Excipiunt plausum vitreo sub gurgite Nymphæ,
Glaucaeque formosæ Doridos antra sonant.
Ipse caput Proteus musco præcinctus, & alga
Sic ait, atque imo sustulit ora vado:
Salve læta dies, fati melioris origo,
Unde fluent niveo tempora fausta pede.
Exspectata venis, LANDUM nova purpura vestit,
Spesque novæ surgunt, ac timor omnis abit.
Ite agite, Hadriacos proscindite remige fluctus,
Candida felices pandite vela rates.
Jam piget Ionium duro servire tyranno,
Jam redit ad Venetos Creta recepta duces:
Et Pelopis tellus, & Cypros, & horrida ventis
Quæcumque Aegæas insula frangit aquas.
Eventura cano. dabis o gens impia pœnas,
Et passim hostili cæsa tereris equo.
Omina dat LANDUS, clari genitoris imago.
Cernitis, ut nati vivat in ore pater?
Quem Pallas tories est admirata loquentem,
Altaque septenis addita Roma jugis.
Ille quidem puri fruitur nunc ætheris haustu,
Sidereasque tenet nobilis umbra domos:
Non tamen humanas penitus contemnere curas,
Aut animo patriam deposuisse potest.
Et bene habet, nobis quod pignora tanta reliquit.
Hoc saltem servant fata benigna caput.

Innu-

C A R M I N U M L I B. II. 43

Innumeros magnis virtutibus impleat annos,
 Dum steterit princeps urbis in arce suæ.
 Tum demum gemini claudentur ferrea Jani
 Limina: tunc terra pax erit, atque mari.
 Et Venetos Oriens positus venerabitur armis:
 Incipient longo tela perire situ.
 Finierat Proteus. Nymphæ adfensere canenti,
 Brachiaque alternis implicuere choris.

E L E G I A V.

DE GUIDONE ANTONIO BARBATIO,
 BONONIENSI SENATORE,

*Quum is Summum Patriæ Magistratum Ill. iniret
 Kal. Januarii Anni clō lō ccxviii.*

AD JACOBUM ANTONIUM BASSANUM

E S O C. I E S U.

SOL pater, æterna mundum qui lampade lustras,
 Atque hominum varias cernis ab axe vices:
 Qui dum hiemes volvis, dum pomiferos autumnos,
 Fortunam stabili non finis esse pede:
 Annorumque ictu mortalia cuncta fatigas,
 Firmaque paullatim subruis imperia:
 Non tamen eximios audes virtutis honores
 Deterere; hanc etenim sæcula nulla domant:
 Exsere purpureos pelago, Sol, exsere vultus;
 Funde precor toto purius orbe jubar.

F 2

Nunc

Nunc decet infueto currus ardore nitere, &
 Flammea disponi per juga chrysolithos.
Nunc stratos ostro, quod neverit Amphitrite,
 Aurea cornipedes mandere frena decet.
Te quoque odoratos æquum est coluisse capillos,
 Et festum luxu sic agitare diem.
Tandem exspectatæ Jani venere Kalendæ,
 Unde suum præceps incipit annus iter.
Hac olim niveos mactabant lûce juvencos,
 Tum quum gavisa est consule Roma novo.
Omnis & Assyriis fumabat messibus ara,
 Placabat magnos & sibi quisque deos.
At quoniam hæc longum fato secum abstulit ævum,
 Prospice qua Rhenus pingua culta secat,
Et procul aerias ostentat Felsina turres,
 Aemula Romanæ Felsina lætitiæ.
Clarus avis, opibusque potens BARBATIUS heros
 Accipit hic patriæ candida signa suæ.
Quem si magnanimi gravis audiat umbra Catonis
 Abdita promentem pectore consilia,
Et circumfusi vertentem corda senatus;
 Lætetur, priscum non periisse decus.
Cui nunc pro donis Arabum, pro sanguine fuso
 Taurorum, & quæ fert vana superstitio,
Pulchra parant docti libare poemata vates,
 Mollia Pierius queis rigat ora liquor.
Hos inter clari nomen BASSANUS amici
 Ad vaga sublimi sidera laude vehit.

Qua-

Qualem te memorant a funere conjugis, Orpheu,
 Infernum cithara perdomuisse canem.
 Umbrarumque domos, regemq; adiisse tremendum;
 Horridaque abreptæ limina Persephones.
 Dein retulisse pedem, & sola sub rupe sedentem
 Dilectos superis concelebrasse viros.
 Plurima quum summo descendit quercus ab Hæmo,
 Sustinuitque suas impiger Hebrus aquas.
 Me ne igitur, BASSANE, ullos conscribere versus
 Jussisti, & cultis obstrepere ingeniis?
 Durior & ferro, & saxi frangentibus æquor
 Sim, tibi si optanti munera parva negem.
 At me deficiunt sub iniquo pondere nervi,
 Nec strepitum rauca fert mea Musa tubæ.
 Est tibi, qui possit veteres æquare poetas
 ZANOTTUS, vestri gloria rara chori.
 Hic nobis tenerum post sæcula longa Catullum
 Restituit, blandos edidicitque modos.
 Hic, quoties libuit penni diffindere nubes,
 Fortia Pindaricis facta canit numeris.
 Scilicet hunc poscit soboles BARBATA vatem,
 Quem fovit casto Calliopea sinu.
 Hujus erit labor, antiquos evolvere fastos,
 Præclarumque suo ducere fonte genus.
 Inviictosque duces, pugnataque bella referre,
 Et spolia audaci rapta cruenta manu.
 Quique toga insignes fuerint, studiisque Minervæ,
 Pectoraque Aonio perluerint latice.

Tum

Tum canet, ut repetens animo benefacta parentum
Rite colat magnus nomina tanta nepos.
Utque tener, viridi primum florente juventa,
Sirenum dulces fugerit illecebras.
Turpiaque ignavi contemserit otia vulgi,
Ausus difficiles Herculis ire vias.
Egregium donec mirata Bononia civem,
Hoc illum summo jussit honore frui.
Multaque præterea narrabit carmine digna,
Quæ solum vestris cognita sunt oculis.
Me tenet urbs Patavi, sacris terra hospita Musis,
Medoacus placido quam pater amne lavat.
Quod tamen aspectu vestro, & sermone carendum est,
Heu videor Scythicas incoluisse nives.
Nunc optata mihi præ cunctis Felsina terris,
Sis felix, ac te Copia semper amet.
Nec tibi lugubris noceat vis effera belli;
Pacalisque tuas nectat oliva comas.
Et quicumque altos intraverit advena muros,
Te dicat florem, te decus Italiæ.



C A R M I N U M L I B. I I. 47

E L E G I A V I.

V I R O N O B I L I S S I M O

P E T R O G R I M A N O ,

*Ex Legato Reipublicæ Venetæ ad Carolum VI. Cæsarem
Aedis D. Marci Procuratori, amplissimam
dignitatem gratulatur.*

MIRABAR curvo nuper de litore, qua se
Medoacus placidis in mare volvit aquis;
Et digito procul Hadriacas novus advena turres
Indicat, & remis navita mutat equum;
Quid streperet conchæ tanto mihi murmure Triton:
Duceret insolitos quid Galatea choros:
Summaque nudatis findentes æquora mammis,
Percuterent virides cymbala rauca deæ.
Quum subito nostras GRIMANI nomen ad aures
Accidit, & plausus cognita caussa mihi est.
Nempe hic, longinqua postquam regione moratus
Auxisset patriæ spemque, decusque suæ;
Et Venetis jungens felicia Cæsaris arma
Fregisset magno barbara corda metu;
Clademque, excidiumque Italis pepulisset ab oris;
Attigerat reduci limina cara pede.
Qui nunc purpureo incedit sublimis amictu,
Inter honoratos excipiturque patres.
Hoc meruit docti facundia pectoris index,
Consiliumque sagax, nec temerata fides.

Hoc

Hoc meruit, casus animo sensisse futuros,
Nec rerum dubias pertimuisse vices.
Et cæcos penetrasse aditus, tenuesque recessus,
Fraus humana quibus condita sæpe latet.
O quoties, quum victa jacent animalia somno,
Et regnat pulso grata labore quies,
Ipse vigil, rapido curarum percitus æstu,
Abstinuit molli ponere membra toro:
Oblitusque sui; & patriæ memor usque salutis,
Multa tulit, tanto vix patienda viro!
At quicumque imi contagia linquere vulgi
Postulat, Herculeam tendat in astra via.
Serta manent fortem, forti debentur honores.
Aeternos perhibent sic statuisse deos.
His olim studiis usa est GRIMANA propago,
Late conspicuum tolleret unde caput.
Noscere quam penitus quisquis cupis, inspicere fastos,
Claraque nobilium perlege facta virum.
Quorum alius duri per mille pericula belli
Contudit adversos, Marte favente, duces;
Ferreæque hostili detraxit rostra carinæ,
Et fixit pulchras postibus exuvias.
Turbatas alius pacavit legibus urbes,
Plecteret ut vetitum debita poena nefas.
Regibus hic populisque tulit mandata senatus:
Huic fulsit sacro murice cincta coma.
Quid memorem tot magnifice parta otia Musis?
Tot collecta pia signa vetusta manu?

Quid

C A R M I N U M LIB. II. 49

Quid semper profugis virtutibus hospita tecta?
 Aut quid contemtas munera fortis opes?
 Egregiæ, gaudete, animæ, cæloque recepti
 Heroes: gaude tu quoque, magne nepos.
 Vivetis pariter communibus in monumentis:
 Aequabit celebres fama nepotis avos.
 At tibi dent faciles superi, GRIMANE, quod optas,
 Compositis patriæ rebus adesse senem.
 Donec, gemmato canos velante tiara,
 Contingat primæ sedis honore frui.
 Impia tum priscum vertentur sæcula in aurum:
 Sidera tum cupiet deferere alma Themis.
 Interea tenuem, quæso, ne despice Musam;
 Utque olim valeam scribere plura, fave.

E L E G I A VII.

AD VIRUM DOCTISSIMUM
 DOMINICUM LAZARINUM DE MURRO,
 PATRICIUM MACERATENSEM,

*& in Patavino Gymnasio, Græcarum Latinarumque
 Litterarum Professore Primarium.*

ET si te, Vir magne, meæ nil laudis egentem
 Pierides claris vatibus annumerant:
 Immensumque volat celebris tua fama per orbem,
 Nec tibi jam Lethes unda nocere potest:
 Seque tua Livor domitum virtute fatetur,
 Inclyta qui nigro nomina dente petit;

G

Atta-

Attamen, his ausim quod te committere chartis,
Ne mihi propterea tristior esse velis.
Quærimus obscuro lucem, pretiumque labori,
Vivat ut auspiciis pagina nostra tuis.
Optamusque, animi sensus aperire latentes;
Nimirum innumeris cogimur officiis,
Quæ præstare soles; & quorum gratia apud me
Durabit, summo vix abolenda die.
Et vero, ut noctis pallentem dimovet umbram
Quæ dea puniceo candida fertur equo;
Vanaque diffugiunt incerto Somnia passu,
Quum Sol æquoreis exserit ora vadis;
Non aliter veteri tua vox Antenoris urbe
Invitam jussit cedere Barbariem.
Et nunc illa procul sitientes fugit ad Afros,
Ereptamque sibi respicit Ausoniam.
Vindice te, redeunt quas Græcia protulit, artes:
Romanique adeo vis redit eloquii.
Fontibus e puris lymphas haurire salubres
Jam licet: incautis nulla venena nocent.
Intima tu referas magni penetralia Tulli,
Unde nitor verbis, & venit unde lepos.
Et quæ Nicomachi proles præcepta reliquit,
Et quæ divinus fuderat ante Plato.
O si Mæonius tumulo confurgat Homerus,
Laudari quantum gaudeat ore tuo!
Aurea cui levibus pulsanti sidera pennis
Graculus, & turpes increpitant fulicæ.

Tu

C A R M I N U M LIB. II. 51

Tu flendum proponis, avo cognomine, ULYSSEM,
 Luctifonisque imples tota theatra modis.
 Ignota, obscenis huic nubit filia tædis,
 Nereidum falsas mox aditura domos:
 Hic natum imprudens tepidas obruncat ad aras,
 Dum putat hostili flectere fata nece.
 Præcinit, heu, diros vates non credita casus;
 Frustra: nam miserum numina læva premunt.
 Et quæ pollutos genitoris cæde penates
 ELECTRA assiduis conqueritur lacrimis,
 Digna SOPHOCLEI virgo splendore cothurni,
 Edocta est ITALOS te præeunte sonos.
 Quam tua prosequitur iusto SALVINUS honore
 Carmina, Tyrrheni gloria prima soli!
 SALVINUS, cui mella sui depromit Hymetti
 Pallas, & Argolicas ipsa recludit opes:
 Etruscæque favent Charites, Musæque Latinæ;
 Adsurgitque virum docta caterva seni.
 Nec tantum prisco Tiberis Varrone superbit,
 Quantum hoc sublimes extulit ARNUS aquas.
 Ut tua dicta libens tersa CHECOTIUS aure
 Excipit! ille pio junctus amore mihi.
 Qui postquam lucos potuit, Heliconiaque antra
 Linquere, Jordanis flumina sancta bibit.
 Hunc summo gaudens prospectat ab æthere Frater,
 Cui Mors, heu, rapidas intulit atra manus:
 Et videt, hoc se quam VICETIA jactet alumno,
 Totaque ab egregii pendeat ore viri.

52 JO. ANTONII VULPII

Nos humiles etiam teque, & tua scripta probamus.

Ne tibi devota sim, rogo, mente pudor.

Vilia neu timidæ munuscula temne Camœnæ;

Quos me jussit amor mittere, versiculos.

Solliciti pergat sic vota implere magistri

Jamdudum Latia clarus in urbe puer;

Non dubia Heroum soboles, tuus ille C O L U M N A,

Pandit qui Grajo, te duce, vela mari.

Sic te dextra sinat nullo Fortuna tumultu

Vivere dilectis molliter in studiis.

E L E G I A VIII.

AD MATTHAEUM BURDEGATUM,

NOBILEM CIVEM PATAVINUM,

certissimum amicum, ac pernecessarium suum.

DE SINE, mi veterum laudando tempus avorum,

Perfidia nostros insimulare dies;

Quod spolia e caro poscat sibi quisque sodali,

Nec timeat læsæ crimen amicitia;

Tristia quod blando lateant sub melle venena,

Nil moveant duros quod benefacta viros;

Certeturque dolis, & dira pecunia regnet,

Quæ scelere, ac multo parta cruore juvat.

Si sapiis, ingratas, oro, compesce querelas:

Non hoc est demum tempore pulsa fides.

Tu licet humanæ primordia gentis, amice,

Et repetas animo sæcla vetusta tuo;

Uno

Uno quum pariter mortales jure, deosque
 Pacato regeret falcifer orbe fenex;
 Invenies tamen antiquæ vestigia fraudis,
 Et cernes, vetitum fluxerit unde nefas.
 Tunc homines gelidis vitam coluere sub antris
 Inter montivagas, horrida turba, feras:
 Aut sævum contra Boream, pluviasque, tegebant
 Exiguam culmo cæspitibusque domum.
 Tunc de frondosa quatiebant ilice glandes,
 Quas tenero agrestis manderet ore puer.
 Suscepere cavis acclines flumina palmis:
 Ignoti fuerat gratia nulla meri.
 Publica materies & causa cupidinis, aurum
 Tunc prope se Stygias abdiderat tenebras.
 Non Tyrio infectum splendebat vellus aheni,
 Nec quæ longinquo e littore bacca venit.
 Divitiæ grandes, contexta cubilia fronde,
 Raptaque ab hinnulei tergo pellis, erant.
 Num minus infestus vitiavit pectora livor,
 Pectora tam parvis exsatiata bonis?
 Quis credat? densis miscebant prælia silvis;
 Et dabat iratis quælibet arma furor.
 Inque vicem fixis laniabant dentibus artus:
 Spargebat largo sanguine vulnus humum.
 Cædis origo, suis decerpta cydonia ramis,
 Aut in præruptis arbute lecta jugis.
 Munera quæ rudis ad dominam quum ferret amator,
 Commisit validos aspera rixa procos.

Quid

Quid mirare, mala si quis nunc mente laboret,
Et faciem fingat, nec putet esse deos?
Impia nunc magnos tolerant perjuria sumtus:
Fallendo placitas cogit avarus opes.
Negligat officium, tenues conculcet amicos,
Supremas repat divitis in tabulas,
Quem prætexta juvat, claros quem tollere fasces;
Cui deductorum sedula turba placet.
Effodit huic gemmas nigros mercator ad Indos:
Huic datur Attalico stertere posse toro.
Solus Phidias lapides, atque æra Myronis
Possidet: ingenio solus, & arte valet.
At quisquis modico vivit contentus agello;
Cui faciles epulas villica rure gerit:
Quem peccare pudet, superos qui castus adorat;
Spernitur, & capitis nomen inertis habet.
Non tamen insani vincat sententia vulgi,
Virtutem ut nullo jusserit esse loco.
Fervet adhuc pietas paucorum pectore: fervet
Numquam corrupti certa fides animi.
Et superest Pylades, carum qui servet Orestem;
Cui sint pro misero vota sodale mori.
Ne facere immiti, quæso, convicia lingua
Temporibus nostris, candide amice, velis.
Te specta, moresque tuos: laudabitur ætas
Hæc tibi. quo præstent sæcula prisca novis?
Grata recordanti fuerint, quæ nempe dedisti
Maxima constantis tot documenta viri.

Post.

C A R M I N U M LIB. II. 55

Postquam etenim sacri conscendere, me duce, montis
 Fata jugum tenero te voluere pede;
 Calce ubi perpetuum duris e cautibus amnem
 Elicuit volucer Bellerophontis equus;
 Ambo concordēs junxere adamantina vincla,
 Quæ non funereo solverit igne rogas.
 Seu me nimboſo nascentem lumine vidit
 Proximus Hesperiiis fluctibus Aegoceros:
 Sive minax atræ violenta cuspide caudæ
 Scorpius: ætheriæ sive minister aquæ:
 Teque Jovis pueri, vel Maja Atlantide cærus;
 Conveniunt miro sidera nostra modo.
 Tu mecum solitus noctu versare diuque,
 Cognita Romano scripta diserta foro:
 Trojanum Aenean, celsi monumenta Maronis;
 Tityron; &, latas quid faciat segetes.
 Et quos lascivo questus dictavit amanti
 Lesbia, jucundis non sine blanditiis.
 Præterea culti quæ flevit Musa Tibulli,
 Dum reputat Nemesis tristia facta suæ.
 Et quæ Cyrenes Umber sectatus alumnum,
 Occlusas dominæ concinit ante fores.
 Nec piguit legisse venusti carmen Horati,
 Sparſaque Socratico dicta severa sale.
 Quidquid & in placidis Epicuri somniat hortis
 Qui rerum causas, primaque texta canit.
 Tum præcepta levis quæ fert consultus amoris
 Naſo, peregrino jussus obire solo.

De-

Denique Plautini risusque, jocosque theatri,
 Et nitidum vates quod dedit Afer opus.
 Testis erit Phœbus, testes Libethrides undæ,
 Doctaque Pierides numina, noster amor.
 Est locus, umbrosi quem cingunt arbore colles,
 Et Patavi decimus dividit urbe lapis:
 Irriguis secundus aquis; ubi plurima floret
 Vitis, & albentes pandit oliva comas.
 Hunc amat Arcadico Pan commutare Lycæo,
 Et nemora argutis mulcet arundinibus.
 Hic leporem curvo venantur Oreades arcu,
 Hortaturque suos ipsa Diana canes.
 Hic volucrem possis viscata fallere virga,
 Aut tereti laqueo præmia parva sequi.
 Eusebii Vallem perhibent. quæ gaudia nobis
 (Ah memini) felix attulit iste locus!
 Quum me contempta venientem sæpius urbe
 Excepisti nitido lætus in hospitio.
 Scilicet hic nostris præbebas otia Musis:
 Duximus hic agiles, nocte silente, choros.
 Adfeditque bonis gratus conviva puellis;
 Detinuitque meas alea blanda manus.
 Et modo paganæ ridebam pubis amores,
 Phyllidis aut spreto de Corydone jocos:
 Et modo mirabar, Phæacis æmula silvis,
 Quæ BARBADICO juncta vireta lari.
 O mihi transactas curis sine tristibus horas!
 O mihi jucundos, & sine nube dies!

Illis

Illis nostra velim condi regionibus ossa,
 Si tumulo faveant fata benigna meo.
 Eheu, quod subito merfit nos invida fluctu
 Fortuna: instabili semper acerba pede.
 Scilicet hæc dulces ausa est dissolvere coetus:
 Compulit hæc miseras sustinuisse vices.
 Et nunc ipsa dolent absentes rura poetas:
 Suspirat veterem villula tristis herum.
 Te nunc, Musarum tranquilla a sede remotum,
 Exercent rauci tædia longa fori.
 At me dilectæ mors insperata parentis
 Perculit. heu merito mater amata tuo!
 Quem mihi liquisti crudeli funere luctum!
 Gaudia quam penitus tunc periire mea!
 Et potui tanto durus superesse dolori?
 Impia nec cineres miscuit urna duos?
 Ex illo molles absumere cura medullas,
 Et lacrimis pulsus coëpit abire sopor.
 Tunc mihi, non succi quos candida porrigit Hebe,
 Non valida in Colchis gramina cocta focis;
 Pocula non Helenæ, magnus quæ laudat Homerus,
 Assiduam poterant demere tristitiam.
 In me quid prisca renovata exempla Lycambæ,
 Aut referam structos in mea damna dolos?
 Quid memorem sparsos nulla mercede labores,
 Ut Danai proles improba perdit aquam?
 Et, quo mærorem cumulari denique sensi,
 Immodicis animum pervigilem studiis?

H

Tu

Tu mihi subdebas ægræ solatia mentis,
 Ut vellem forti pectore ferre mala.
 Casibus & nullis obnoxia regna docebas
 Virtutis; vero sola referta bono.
 Quam Fortuna tremit, domitus cui supplicat orbis:
 Purpura quam, viles & venerantur opes.
 His ego mansuetas impleri vocibus aures
 Gaudebam: luctus hæ minuere meos.
 Nec mihi, nobilium decus ALDRIGHETTUS avorum
 Defuit; Aoniæ maximus arte lyræ.
 Nec SALIUS, cui dant superi florente juventa,
 Vincere consiliis, & pietate viros.
 Hic scenæ reducem nuper commisit Ulyssæm,
 Mutuaque infractæ gaudia PENELOPES.
 Promittitque, datis longe se plura daturum;
 Eximio juveni stet modo firma salus.
 Dii vobis tribuent felicia cuncta, sodales,
 Successu careant ni mea vota suo,
 O utinam nostro tandem satiata periclo,
 Vertat præcipitem Sors inimica rotam;
 Incipiantque mihi niveæ procedere luces:
 Et numquam lacrimis imbuat ora dolor.
 Possit & optatos ex me spectare nepotes,
 Qui nobis peperit commoda tanta, pater.
 Tres mihi sunt fratres (& longa ætate supersint)
 Pieridum casto nomina nota choro.
 Quorum (a) alius medicæ succensos artis amore
 Edocet, humano in corpore quid lateat.

Egre-

Egregiis (b) alter lucem scriptoribus adfert,
 Et duraturum sedulus urget opus.
 Tertius (c) ad dominæ concessit moenia Romæ,
 Scrutatur Latii qui monumenta soli.
 Tres pariter nobis tribuit fortuna sorores,
 Pectora sacratis addita virginibus.
 His fruar, & semper possim concordibus uti:
 Hos molli excipiat cana senecta sinu.
 Præcipue seros conjux mihi vivat in annos,
 Quam mihi felici foedere junxit Hymen:
 Inclyta quam docti produxit terra Catulli
 Insignem sanctæ laude pudicitiae.
 Hæc ubi complevit formosa prole penates,
 Annosi tumulo contegat ossa viri.
 Et pro me, nostros curet, foveatque libellos;
 Quæ manet extremos gloria post cineres.
 At tibi qui primas roseus consuevit ad ædes
 Colla puer brevibusnectere brachiolis;
 Floreat, & sensim patrias adolescat in artes,
 Ingenioque suum tollat ad astra genus.
 Non hæc immemores discerpent vota procellæ,
 Si quis apud superos est pietatis honos.

H 2

ELE-

-
- (a) JOANNES BAPTISTA VULPIUS, in Gymnasio Patavino
 Anatomæ Publicus Professor.
 (b) CAJETANUS VULPIUS, Sacerdos; qui mecum optimos libros
 illustrat, ac Typographiæ Cominiæ excendendos præbet.
 (c) JOSEPHUS VULPIUS, Soc. Jesu; qui Romæ, jussu PETRI
 MARCELLINI CORRADINI S. R. E. Cardinalis, Latij
 Profani, & Sacri antiquitates persequitur.

ELEGIA IX.

AD VIRUM ERUDITISSIMUM,

et de Italorum ingeniis præclare meritum,

APOSTOLUM ZENUM,

CAROLI VI. CAESARIS HISTORICUM, ET POETAM.

CANDIDA fatales nerunt tibi fila sorores,
 Augusto propius cui licet ore frui:
 ZENE, Palatinus cui fingit carmen Apollo,
 Sufficit & dignos CAESARIS aure sonos.
 Quem sæpe admittit victricis ad oscula dextræ
 CAROLUS, & sacro detinet alloquio.
 Hic te divitiis auget cumulatque merentem,
 Effundens pleno munera larga sinu.
 Qualia in antiquum legimus collata Maronem,
 Dum caneret forti bella, virosque tuba.
 Nec se materiem numeris gravioribus aptam
 Denegat. hinc Musæ fama petenda tuæ est.
 Aspice, confusæ quot volvat stragis acervos
 Discolor Odrysi sanguine Danubius:
 Et quæ sparsa jacent vultu metuenda minaci
 Corpora securæ limine Pannoniæ.
 Qui sibi vesana fingeabant mente triumphos,
 Ecce gerunt capti ferrea vincla duces:
 Taurunisque dolent excindi mœnia bello,
 Et vetera hostili signa refixa manu.

Par-

C A R M I N U M L I B. I I. 61

Parte alia Thressæ sumunt lugubria matres,
 Accusatque suos barbara turba deos:
 De gnatis & conjugibus, quorum ossa reliquit
 EUGENIUS rabidis diripienda feris.
 Hic domibus flammam prohibet, templisque ruinam:
 Hic vacuos tanto nos jubet esse metu.
 Dignus, Romanas aquilas cui credere CAESAR,
 Germanæque velit robora militiæ.
 Dignus, Tarpejas postquam conscenderit arces,
 Vicinus poni, Scipio magne, tibi.
 Interdum tamen Aonia spatiat in umbra,
 Et facilis miti carmina fronte probat.
 Impiger ut quondam fidibus gaudebat Achilles,
 Hecora pernici quum lacerasset equo.
 Delius ut, strato certis Pythone sagittis,
 Ad teneros flexit mollia membra choros.
 Hunc tu si celebres, vetus irascetur Homerus,
 Namque argumenti pondere victus erit.
 An te forte piget populos narrare subactos?
 Horrida vel paribus dicere castra modis?
 Laudibus ornetur pulcherrima CAESARIS Uxor,
 Excelsa Mulier tam bene juncta Viro.
 Quæ quoties Indis crines radiata pyropis,
 Felici plantam protulit e thalamo;
 Omnia purpureo circum loca lumine vestit,
 Diffunditque omni pectore lætitiā.
 Qualis verticibus Juno stellantis Olympi
 Per medios transit maxima cælicolas.

Hanc

Hanc spectat canos Cybele turrita capillos,
Maternoque fovet gaudia iusta sinu.
At fragilem sapiens formam contemnit ELISA:
Aeternis animi ducitur illa bonis.
Fortunæque suæ luxum virtutis habenis
Temperat: & superos religiosa colit.
Dii vos, assidua quorum prece templa fatigat,
Adnuite; orantis ne pia vota cadant.
Et facite, ut Puero solari læta Maritum
Possit; qui celebris nomina reddat Avi.
Imperioque olim Byzantia regna paterno
Addat: foedifragos & premat usque Getas.
Tu carmen sollemne para, quod proxima cunis
Aurea floridulo concinat ore Venus.
Interea, tibi dant cursus dum fata secundos,
Et bona te placido provehit aura mari;
Parvus ego adsuevi, populi ut commercia vitem;
Me totum in dulces abdere litterulas.
Nunc juvat Ausonii scrutari ænigmata juris;
Et quæ bis senis condita sunt tabulis.
Nunc vigili studio rerum perquirere causas,
Imperus & stabili qui rotet astra vice:
Nonnumquam doctas inter cessare puellas,
Fertur Mnemosyne quas peperisse Jovi.
Sæpe etiam, PATAVI cælo qui mœnia tollunt,
Miramur claros consulimusque viros.
MORGAGNUM in primis, firmo tibi foedere vinctum;
Unde venit LIVI gloria tanta FORO.

Hic

C A R M I N U M LIB. II. 63

Hic sibi sollerti conscripta volumina cura
 Misit ad Eoos, misit ad Hesperios.
 Corporis humani cæcas tentare latebras
 Ausus, & ignotas ante docere vias.
 Hunc, quoties animum nostras appellit ad artes,
 Nutritum Suadæ dixeris in gremio.
 Et legimus cultos GALEARDI sæpe libellos,
 Quo retinet dotes BRIXIA cive suas.
 Per quem deterfo fulget GAUDENTIUS ore,
 Ne pereat longo pagina sacra situ.
 Volvimus & quas Hadriaca nunc digerit urbe
 Ille tuus varias Frater EPHEMERIDAS.
 At tu CAESAREA me prospice mitis ab aula,
 Calcar & ingenio, qua potes, adde meo.
 COLLALTUM que roga, nostris ut præbeat aurem
 Lusibus: Etruscæ spemque decusque lyræ.
 Hic etenim profugas cœpit revocare Camœnas,
 Neglectisque pius vatibus ultor adest.
 Illa nempe sibi famam virtute meretur,
 Qua petiit quondam sidera Tuscus Eques.



ELE-

ELEGIA X.

AD ANTONIUM ZENUM,
SACRAE THEOLOGIAE DOCTOREM,

avunculum suum carissimum.

TE quoque debuerant, nostræ germane parentis,
Ore pio graciles dicere Pierides.
Tu me plus oculis puerum consuetus amare:
Magna tibi semper, primaque cura fui.
Et tua sunt merito superis audita benignis
Fervida pro nostræ vota salute domus.
Hos etenim candor, purique a crimine mores,
Assiduæque valent conciliare preces:
Nec minus erroris nullo corrupta veneno
Carmina; cælestis quæ tibi dictat Amor.
O felix, rutilum cui præ virtutibus aurum
Sordet: qui parvo sub lare latus agis!
Cui dant unanimes inter florere sodales
Innocuæ Charites, & sine felle joci.
Vive diu; sed quum terreno a carcere liber,
Lucida veloci prefferis astra pede;
Collocet insigni te sede PUERPERA VIRGO,
Eximia VIRGO quam pietate colis.
Aeternumque soror, violis ornata, rosisque,
Adfideat; subito heu funere rapta tibi.



JOANNIS ANTONII VULPII
C A R M I N U M
LIBER TERTIUS.

I.

LAUDES DIVI RAINERII,
PISARUM PATRONI.



QVAE, virgineo coetu se juncta fororum,
Castalium nemus, & gelidi juga fron-
dea Pindi

Linquere amas, rapidoque olim sub-
vecta volatu,

Aërios ventos, atque ardua nubila tranas,
Uranie; cui Pieridum rex Juppiter uni
Aeternos astorum ignes, sedesque beatas
Inspectare dedit propius, caeloque decorum
Inmiscere caput; nostras age, diva, medullas
Adflatu pervade tuo. non tristia bella,
Non domitas gentes, aut fractis oppida portis,
Non juvenum contra lusus, dulcesve hymenæos

I

Com-

Commemorare juvat: mortales temnere fines
 Aggredior, vatumque vias tentare piorum.
 Tu mihi diva animos, celeres tu suffice pennas,
 Insolitam cæli faciem, atque ignota paventi
 Sidera; ut optata confidam victor in arce.

Sacra iterum antiquæ celebrant trieterica Pisæ,
 Pisæ, quas felix undis interluit Arnus,
 Tyrrheni salis immensum declivis in æquor.
 Huc omnis propero confert se Etruria gressu,
 Religione calens, studioque excita videndi,
 Matres atque viri, & comitum longissimus ordo.
 Nimirum hic formosæ urbis tutela, salusque,
 Vota libens, miserasque preces RAINERIUS audit,
 Marmoreo lætus templo, & fumantibus aris;
 Heros indigena, & superi vetus incola regni.
 Quem rebus quondam patriæ florentibus, hoste
 Jam pulso, & populis circum ditione subactis,
 Nobilis egregio peperit Spingarda marito.
 Quid loquar, ut claro fidentem sanguineavorum,
 Elatumque opibus (namque hæc certissima pestis)
 Paullatim blandus vitæ deflexerit error;
 Impuleritque, rudi Sirenum litora puppe
 Audacem, veritasque bonis contingere terras?
 Heu quæ ventorum rabies, quæve aspera cæco
 Mersit hiems pelago juvenem! quibus ille periclis
 Jactatus! quibus in scopulis, & syrtribus hæsit!
 Quum subito erranti, per noctem candida fulsit
 Lux oriens; qua nempe deûm pater, atq; hominum rex
 Di-

Dimovet obsessis ignavas mentibus umbras,
 Accenditque animos pulchro virtutis amore.
 Extemplo conversæ auræ, placataque sævi
 Ira maris: tum e naufragio servata carina
 Arripuitque fugam, & portu successit amico.
 Talis eum primo figentem in litore plantas
 Excipit ALBERTUS, quem protulit aspera CYRNOs,
 Vir pietate potens, cultorque acerrimus æqui;
 Qualis Cecropio juveni Minoïa quondam
 Dum calet, ac flavo suspirat in hospite virgo,
 Fila dedit relegenda manu, quibus omne reclusum
 Tecti iter ambigui; monstrataque janua rursus,
 Ah toties fuso miserorum tincta cruore.

Principium hinc magnis virtutibus: hinc nova
 rerum

Se se aperit series. pudet heu malefana secutum
 Somnia; præteritosque dolet, quos perdidit, annos.
 Conscia mens culpæ, stimulis & verbere sævit.
 Illum, purpureæ posito fulgore juventæ,
 Expertem frugum Cereris, laticumque Lyæi,
 Uberibus lacrimis manantem, & pectore ab imo
 Rumpentem questus, ac se peccasse fatentem,
 Vidit, quum pelago radiantia tolleret ora,
 Occiduas vidit Phœbus devexus in undas,
 Viderunt mediæ tranquilla silentia noctis.
 Liquitur, ut verno contactæ sole pruinæ,
 Aut nix, quæ tepido sensim tabescit ab Austro.
 Tandem exhausta, gravi caligine lumina torpent;

Nec potis est ullos rerum novisse colores.
In tenebris jacet; ac singultibus omnia complet.
Quid tibi tunc animi, mater miseranda, fuisse;
Quid, genitor, tibi, care, putem? quum victa dolore,
Capta oculis, vultum fletu perfunderet, ac se
Complexu vestro subduceret unica proles?
Incipit ille patris luctu, matrisque moveri,
Et regem celsi supplex veneratur Olympi,
Amisissos reddat visus, & flamine sancto
Deleat antiquæ placidus vestigia noxæ.
Tertia nocturnos Aurora fugaverat ignes;
Annuit Omnipotens, mundum qui numine torquet,
Discussæque oculis nebulae, & lux reddita prima est.
Quin etiam tenues cælo demissa per auras
Vox audita viro: Lacrimarum desine tandem,
Pone metum, vimque immodici compesce doloris:
Nulla tibi æternas intentant crimina poenas,
Impressum scelus eluitur: redit aurea casti
Libertas animi, & vinclis potes ire solutis.

Ille Dei tanto firmatus pignore mentem,
Læticia exsultat: sed enim nova pectore versat
Consilia, extorrem patria, rerum omnium egenum,
Solem, imbremque pati, & sacratas quærere terras,
Jordanes ubi rura secat, Libanusque superbum
Ostentat caput, & nutantes vertice cedros
Sustinet. hic magnorum operum monumenta su-
per sunt,
Queis, hominum generi certa impendente ruina,
Par-

Parta salus, turpi quum scilicet in trabe fixus,
 Terribile excussit Genitori fulmen, & iras
 Communuit Natus, mansuraque sanguine sanxit
 Foedera, pacem orans. Ergo altis moenibus exit,
 Ac vix alloquio flentes dignatur amicos.
 Jussa vocant superum; nec fas obsistere contra.
 Ecce autem rutilam volucrum regina per aethram
 Visa tenere facem rostro, atque ingentibus alis
 Insuetas monstrare vias. ille omine letus,
 Hac duce fert alacris terræque, marisque labores;
 Et semper gelido lucos Aquilone sonantes
 Ingreditur: montesque feros, & inhospita saxa
 Adicens superat. non illum barbara cultu
 Gens terret, grandesque lupi, fulvique leones:
 Donec speratas accessit fessus ad oras.
 Illic cælestis miserantem incommoda regis,
 Plurima quæ passus, dum tristia Tartara bello
 Subrueret, partoque iret sublimis honore,
 Septima vidit hiems: illic, lucentibus astris,
 Multa gemens, dulcemque oculis, & pectore somnum
 Excludens, veræ pro religionis alumnis,
 Quoscunque arborum donis, atque ubere glæbæ
 Nutrit Terra parens, Nereusque amplectitur undis,
 Orabat facilem votis, precibusque faventem
 Regnatorem orbis. tum magno incensus amore,
 Lustrabat sacri vestigia quæque cruoris,
 In partes animum varias, & singula versans.
 Hic turpes ignominias, dirumque videnti

Exi-

Exitium CHRISTO (vos horti & gramina testes)
 Sanguineus toto manavit corpore sudor:
 Parte alia sævis liventia terga flagellis
 Præbuerat, lapidi innitens: hic spinea texit
 Infontem galea, & jaculis confixit acutis.
 Hac tulerat gressum ad sterilis fastigia montis
 Imposita cruce: sollemnes ubi cæsus ad aras,
 Supplicia, heu, sceleri fuerant quæ debita nostro,
 Morte luit; subitis quum sol expalluit umbris,
 Et ferrugineo vultum velavit amictu.
 Hæc memorans, casuque animum concussus acerbo,
 Dat gemitum, pressoque filet RAINERIUS ore.

Illo forte loco steterat, quo candida primum
 Pectora, parque ebori latus, exutosque lacertos,
 Militibus duris, ad clari lumina cæli,
 Ostendit magno Proles æquæva Parenti:
 Continuo molles, divina exempla secutus,
 Rejicit ex humeris vestes, villisque rigentem
 Induitur lacrimans tunicam, argumenta doloris,
 Spartea quam vili succingit fibula nodo.
 Nec non assuetas epulas, & munera Bacchi
 Respuit, æterno certus parere magistro;
 Inque quaterdenas profert jejunia lucas.
 Venerat ad colles, quibus olim virgine cretus
 Arcanas Genitoris opes, mentisque beatæ
 Gaudia, mortalem promsit fallentia sensum:
 En iterum Deus ille, Deus; cui nube sedenti
 Palla imos tegit alba pedes, facieque corusci

Ex-

Exsistunt radii: dextra, lævaque seniles
 Apparent vultus; hinc pace insignis, & armis
 Legifer, insanos potuit qui spernere fluctus,
 Dum fugeret Pharii crudelia sceptrâ tyranni:
 Illinc, flammato qui raptus in æthera cursu,
 Justitiæ vindex, scelerumque asperrimus osor.
 An referam, ut Grajæ, Syriæque elementa loquelæ,
 Ignotos ritus, & verba ignota precantum,
 Ipse Italus, nulla doctus perceperit arte,
 Attigerat quoties sacрати limina templi?

Sed patriam antiquam, dulcesque revifere terras
 Tempus adest: præit auratis Laus candida pennis.
 Omnis in occursum portis effusa juvenus,
 Adventante viro: faciles mirantur amictus,
 Dejectos oculos, & plenos numine vultus.
 Triginta magnos Titan impleverat orbes,
 Tresque super flavæ curvarant horrea messes,
 Ex quo vitales primum R A I N E R I U S auras
 Duxerat: hic illum florentem ingentibus actis,
 Et veteres mira morbos virtute fugantem
 Astra vocant, superique expectant præmia regni.
 Forte dies aderat, quam fallax ritus avorum
 Sacrarat Veneri Idaliæ, propriamque dicarat:
 Nunc memor humana pro libertate peremti
 Nobis facta Dei, tristem sub pectore curam
 Suscitât, & diræ suadet miseresce cædis:
 Hac ille ingrati contagia corporis ultro
 Indignatus, obit; vi magni victus amoris;

Ful-

Fulgidaque ardenti vestigia fixit Olympo,
Civibus ah desiderium, luctumque relinquens.
At facer in tenues dum spiritus emicat auras,
(Horresco referens) totam concussa per urbem
Sponte sua celsis sonuerunt turribus æra.

Felix, o nimium felix, qui nempe beatas
Vestus es in sedes, & vesceris æthere puro!
Sis bonus, atque tuas cælo tamen aspice Pisas,
Quæ tibi sollemnes deducunt undique pompas,
Festaque purpureis cingunt altaria vittis.
En fora, templa, viæ celebres, en atria cereis
Collucent facibus: laudes tibi quilibet ordo,
Aurataque canit fulgens in veste sacerdos.
Tu mæstas oculis lacrimas, tu pessima pellis
Agmina morborum, caris tu matribus ægros
Restituis natos: te sentit nubilus Auster
Nimborum late, tempestatumque potentem.
Nam quoties ruptis exundant flumina frenis,
Turbidus & coeno gurgēs per pingua fertur
Arva furens, merfisque seges procumbit aristis;
Flent miseri agricolæ, & palmas ad sidera tollunt,
Teque in vota vocant: tum vero spumeus amnis
Decedens campis, noto se condit in alveo:
Palantes Aquilo nubes agit: ore nitenti
Nocturnas urget per sudum Cynthia bigas.
At rursus arenti Procyon quum sidere sævit,
Quum sitiunt herbæ, & rimis tota arva fatiscunt;
Tu rorem optatum mittis, quo languida passim
. Ger-

C A R M I N U M LIB. III. 73

Germina, pallentesque novantur in arbore frondes.

Jamque adeo, si nostra tuas dicentia laudes
Carmina, si ulla mover tantarum gloria rerum,
Sancte, fave, Musamque humilis ne despice vatis;
Exiguis qui te donis, & paupere cultu
Prosequitur, supplexque tuos instaurat honores
Medoaci ad ripas; ubi felix prole virorum
BUZZACARENA domus, Pisæis finibus orta,
Floret adhuc, palmas & vincere tendit avitas;
Qua de stirpe olim tibi contigit optima mater.

II.

Epithalamium

IN NUPTIAS FRANCISCI, MUTINAE PRINCI-
PIS, ET CARLOTTAE AGLAES BORBONIAE,
PHILIPPI DUCIS AURELIANENSIS
FILIAE.

HUMIDA Nox, tacitis paullatim evecta quadrigis,
Ad medium summi spatium pervenit Olympi;
Quam chorus Astrorum sequitur lascivus, & ante
Inter mille Jocos, & nudos inter Amores
Filius Uraniaë graditur, cui fervida semper
Vota puellarum, & juvenum suspiria cordi;
Pulcher, amaracino religatus flore capillos,
Et croceo indutus vestigia candida focco.
Cernitis, ut tenera, lætum nubentibus omen,
Accensæ dextra quatiat ramalia pinus:

K

Et

Et pede felici labens, auctoribus & diis,
 Regifico luxu ornatas descendat in ædes?
 Qualis quum subito clarum per nubila fulgur
 Emicuit, vel post nimios quum discolor imbres
 Oppositus Phœbi radiis apparuit arcus?
 Jam thiasis, epulisque modus: jam fessa quierunt
 Murmura plaudentum: jam tibia garrula cessat,
 Aurea nec pulsus reboant laquearia chordis.
 Marcentes oculos invadit somnus: & ipsi
 Languidulo segnes connivent lumine lychni.
 At vigil interea tardis irascitur horis,
 Pectore vulnus alens, & cæco absumitur igni
 ACTIACUS juvenis, nostri spes maxima sæcli,
 Heroum prisca deductus origine sanguis.
 Lenta nec ingratae declinat colla quieti
 Regia virgo, genas casto suffusa pudore,
 In thalamos cupidi virgo ventura mariti.

Par bene compositum, superis dilecta propago,
 Tali nupta viro, & tanta vir conjuge felix,
 Pellite sollicitas toto de pectore curas:
 Advenit certo fatorum percita cursu,
 Quam sæpe optastis votis communibus, hora:
 Advenit qui pacta deus connubia firmet,
 Quique olim forti faciat vos prole parentes.
 Dicite Hymen, juvenes; clamate Hymenæe, puellæ.

Quod ni certa deum vates oracula fallunt,
 Candida ter decies quum Luna coegerit orbem,
 Parvulus ingenti ludet RAINALDUS in aula,

Et

Et ridebit avo, tenerisque amplexus, & hærens
 Brachiolis, caræ procumbet in oscula matris.
 Tum puero suaves adflans Cytherea lepores,
 Non sine jucundo motabit carmine cunas:
 Lacrimulasque pia deterget Gratia dextra.
 Dicite Hymen, juvenes; clamate Hymenæe, puellæ.

Deinde ubi firmatis poterit consistere plantis,
 Dulciaque insueto jam finget verba palato,
 Qualia magnarum virtutum semina prodet!
 Quale dabit specimen, quæ pignora laudis avitæ!
 Ut genitor gaudebit! ut urbs lætabitur ipsa!
 Ut sibi tum Ausonia antiquos promitteret honores!
 Non aliter, cinctum violis quum ver caput effert,
 Ac primum gravido turgent in palmite gemmæ,
 Autumnum, & madidi prospectant munera Bacchi
 Agricolaë, atque hilari præcerpunt mente racemos.
 Dicite Hymen, juvenes; clamate Hymenæe, puellæ.

At simul incipiet molli pubescere veste,
 Formosoque novæ crescent cum corpore vires,
 Non illum ignavo corrumpent otia cultu
 Vitantem soles, & aperti frigora campi:
 Sed spumantis equi validos conscendet in armos,
 Efficietque manu docilem, mirante magistro:
 Qualis Pellæi soboles præclara Philippi,
 Cui quondam immensus vincenti defuit orbis.
 Aut jaculum torquens, & acutæ cuspidis hastam,
 Intrabit silvas, latebrosaque lustra ferarum,
 Et vehet optatam sero sub vespere prædam.

O quoties illum per devia rura secutæ
Naïdes aspicient pulchro sudore madentem ,
Et pulchro flavos respersum pulvere crines !
Aspicient , cupientque suis refovere lacertis ,
Collectamque sitim porrecta exstinguere lympa .
Dicite Hymen , juvenes ; clamate Hymenæe , puellæ .

Sæpe etiam dulci Musarum tactus amore ,
Phoebea inviset nigrantes arbore colles ,
Proluet ac roseum Libethri fonte labellum .
Tum veterum relegens insignia facta virorum ,
Romanæ amissos flebit virtutis honores ,
Quos tandem (heu facinus !) delevit longa vetustas :
Seque datum terris agnoscat numine divûm ,
Qui solus Latias possit sarcire ruinas .

Dicite Hymen , juvenes ; clamate Hymenæe , puellæ .
Quid memorem , stricto quot barbara demetet
ense

Colla virûm , cristis , & ferri luce coruscus ?
Quot consternatos Thracum calcabit acervos ?
Non aliter medio in pelago , stridente procella ,
Ah miseros nautas nimbosus terret Orion .
Quid memorem , cæso quantos aget hoste triumphos ,
Quanta foro statuet , populo plaudente , tropæa ?
Dicite Hymen , juvenes ; clamate Hymenæe , puellæ .

Possẽm alios vobis motus aperire futuros ,
Tali nupta viro , & tanta vir conjuge felix ,
Quos mihi fatidico cecinerunt omine Parcæ :
Atque aliam certo venturam tempore prolem ,
Quæ

C A R M I N U M LIB. III. 77

Quæ studiis referat, non vultu, aut nomine tantum;
 HIPPOLYTOS, BORSOSQUE, & maternos LODOVICOS:
 Ni vos alma Venus, genialisque aurea lecti
 Fulcra vocent: scelus est jam gaudia vestra morari.
 At tu ne zonæ damnum leve, virgo, solutæ
 Flere velis, lacrimisque oculos turbare nitentes:
 Audisti quæ pulchra manent te præmia matrem?
 Quæ superi posita pro virginitate rependent?

Tempus abire mihi est: signum dat pronuba

Juno:

Purpureus castos excepit lectus amantes.
 Ite procul, juvenes; tacitæ simul ite, puellæ.

I I I.

C H A R I D E M U S. Ecloga.

Chromis, Neæra.

QUo properas, dejecta oculos, turbata capillum,
 Agrorum decus, & nemorum, formosa Neæra?
 Quid teneros oblita choros, dum cetera pubes
 Mollia veloci ludit per gramina saltu,
 Aut violas legit, & Nymphas de more coronat,
 Tu latere incautæ furtim digressa parentis,
 Avia lustra petis? nec te decedere silvis
 Hesperus, & gelida præceps Nox admonet umbra;
 Sed flere, ac nimio juvat indulgere dolori?
 Ne cela ne, virgo, senem, quæ caussa serenos

Mu-

Mutarit vultus; namque est mihi cura mederi.
Nec. O Chromi, pastores quo possint frangere pacto
 Vim pueri, quem flava Ceres, quem pulcher Apollo,
 Lenæusque pavent, &, quæ dedit ubera, mater?
 Hic homines domat, hic superos: nec vulnus Amoris
 Ullæ umquam sanant herbæ, vel pocula Circes:
 Arreptoque lupum citius depellere ab agno,
 Quam valeas fixis educere tela medullis.
 Aërios igitur per montes, nostra dolentis
 Carmina, septena dum fallit arundine curas,
 Pan vagus excipiat; veterisque haud immemor ignis,
 Abdita desertis in rupibus audiat Echo.
 Me sine virgineum, pastor, servare pudorem,
 Et male conceptas aluisse in pectore flammæ.
Chr. Quæ vos exagitat vesania tanta, puellæ?
 Unde gravis Pudor hic, placidi corruptor Amoris?
 Certe illum obscuris Erebi truculenta sub antris
 Tisiphone peperit, pavitque Megæra veneno.
 Ut lolium segeti, vernis ut floribus Ausler,
 Vitibus ut grando, teneris ut stirpibus hædi,
 Passeribus laquei, torrenti Sirius anni,
 Sic pudor exitio est Veneri, Venerisque ministro.
 Humanos tantum sensus pervertere pestis
 Hæc potuit: parcit pecori, generique ferarum.
 Quum desiderio nivei commota juvenci,
 Mugit amabiliter per opacas bucula valles,
 Ipse palam taurus cupidæ respondet amicæ,
 Occurritque celer, nec mutua gaudia differt.

Par-

Parte alia exsultans viridi lascivus in herba
 Hinnit equus, aperitque suos hinnitibus ignes :
 Excutiensque jubas, calces jacit, & tremit artus ;
 Nec sibi difficiles umquam suspirat amores .
 Ecce Dionæ commiscet rostra columbæ ,
 Blandaue mentito decerpunt oscula morfu :
 Ecce levi feno, vel molli stramine fulta ,
 Succumbit rutilo facilis gallina marito .
 Tum variæ passim volucres, quas alma voluptas
 Invitat, liquidum concentibus aera complent ;
 Et fociis flammæ, & dulcia vulnera fassæ,
 Suspendunt caros e qualibet arbore nidos .
 Scilicet has nullus pudor impedit . o bona virgo ,
 Pelle metus : animum non hæc exempla movebunt ?
Næ. Egregios narras morum, vitæque magistros,
 Quadrupedes, & aves . Tu me genitoribus ortam
 Talibus, Alcinoe casta, fortique Lycota,
 Finitimi quibus adfurgit vicinia ruris,
 Vis olidæ fieri similem, turpisque juvencæ ?
 Nec te, crede, meos decet incendiisse furores
 Promissa vetulum barba, canoque capillo .
Chr. Onimium sapiens, ne dicam ferrea ! nescis,
 Nescis, quid sit Amor; vel candida pectora certe
 Perstrinxit summa leviter deus ille sagitta ;
 Si, quid messorum de te, quid curvus arator
 Garriat, aut noctu carpentes pensa puellæ,
 Sollicito reputas animo . contemnite, amantes,
 Rumores vacuos, & inanis murmura linguæ :

Et

Et quisquis petulans aliena negotia curat,
 Iratam Venerem, iratum experiatur Amorem.
 Me plures hiemes, virgo, fecere peritum,
 Humanæ memorem fortis, mitemque, bonumque;
 Qualis in apricis mitescit collibus uva,
 Assiduo longi solis percocta calore.
 Atque utinam levesque genæ, fronsque illa rediret
 Expers rugarum, & patientia crura laboris:
 Quæ mihi perpetuis ageretur lufibus ætas!
 Non tantum pecudes, non sola armenta videbis
 Concipere hunc ignem, & laqueo circumdare col-
 lum,

Quorum turpe putas imitari facta puellam:
 Ipse deum genitor, tonitru qui terret Olympum,
 Cogitur ardescens invicta Cupidinis arma
 Sentire, inque humiles cælo descendere terras,
 Vel tauro latitans, vel plumis alitis albæ.
 Desine dissimulare; tenes namque omnia; nec te
 Ulla fugit, superum quæ fabula narret amores.
 Nuper enim viridis positam te margine ripæ,
 Audivi celeres mulcentem carmine ventos,
 Argutaque imo prominentem corde querelas:
 Me procul in densis seges occultabat aristis.
 O tibi si dulces libeat renovare, Neæra,
 Dulci voce modos! tanto nil munere nobis
 Majus erit. non sic morituri carmen oloris,
 Non scelus Odrysii plorans philomela tyranni
 Vere juvat, nostras ut vox tua pellicit aures.

Jam

C A R M I N U M L I B. III. 81

Jam lenes numeri, & fletum suadentia verba
 Exciderunt animo: nocet huic odiosa senectus.
 Sic tibi, virgo, frui placito contingat ephœbo,
 Ne nostras contemne preces, votisque faveto.
Næ. Quid faciã infelix? durum est tua spernere jussa,
 Care Chromi. quamvis magno interclusa dolore
 Vox perit, & coeptos rumpunt suspiria questus,
 Conabor tamen, & fido mea vulnera testi
 Exponam; quando ipsa jubet Fortuna, soletque
 Interdum fieri cantando mitior ignis.
 Hic ubi ramosis latissima quercubus umbra
 Decidit, arboreo vitemus tegmine solem,
 Et fessum teneras latus acclinemus ad herbas.

Anchisen Venus, aut Cyprium sectatur Adonin;
 Flava Ceres calet Iasio, Endymione Diana;
 Najadas urit Hylas, Galateam candidus Acis;
 Blanda fovet Cephalum roseis Aurora lacertis;
 Formosa Herculeis gaudet complexibus Hebe:
 Et mihi, pace, deæ, vestra, licet esse beatæ,
 Si modo me lætis videat Charidemus ocellis.

Obtulit hunc nobis invicti mater Amoris
 Ducentem simas in pascua mane capellas:
 Obtulit; & subito furor, heu, descendit ad ossa.
 Qui nitido color in vultu! quæ gratia puræ
 Frontis erat! quantas fundebant lumina flammæ!
 Molliâ puniceis certabant labra rosetis:
 Ludebantque levis disjecti flatibus auræ
 Colla per intonsi nive candidiora capilli.

L

Ex

Ex illo vigil hibernas producere noctes ,
Hæu, didici, largoque oculos corrumpere fletu;
Luteus & mæsto confedit pallor in ore :
Ex illo neque consuetos accedere fontes ,
Visuram faciles , & dignos virgine cultus ,
Nec lapsas formare comas , nec carpere flores
Cura mihi : sordent artes , choreæque , jocique ,
Me miseram , & graciles ignis depascitur artus .

Ah quoties , dilecta parens dum quæreret , unde
Triste malum hoc , quod me jucundo in limine vitæ
Ureret , ac toto pepulisset gaudia vultu ,
Sum caussata gravem lateris , capitivæ dolorem !
Ah quoties lacrimas deprendit sedula nostras
Thestylis , & dixit , Misero tabescis amore !
Protinus erubui , nec sum tamen ausa fateri .

Cor salit , & celeres trepidant in corpore venæ ,
Hæret lingua metu , caligine lumina torpent ,
Membraque frigidulo sensim sudore madescunt ,
Si tenues pueri voces , & sibila nota
Me feriant : quid , si optati lux fulgeat oris ?
Tunc mihi visceribus concrevit sanguis in imis .

Sæpe illum extremo linquentem pascua sole
Et malo petii , & risu lasciva procaci :
Ille verecundos gremio demisit ocellos
Præteriens , nec me verbo dignatus amico est .

O dulcis Charideme ; vagus tu collibus erras ,
Aut tæxis caveas , & vimineos calathiscos ,
Fessaque in herbofo componis membra cubili ,

Dum

C A R M I N U M LIB. III. 83.

Dum thyma pascentes tondent, cythisumque capellæ:
Cura nec interea miseræ subit ulla Neæræ.

Sæpe etiam rigidis horrentia vepribus audax

Diceris umbrosi superare cacumina montis:

Ah ne te duri sentes, neve aspera lædat

Glæba pedes: Veneri non impia silva pepercit,

Et rosa tam pulchro passa est se sanguine tingi.

O mihi, care puer, liceat compellere tecum

Disperfos per prata greges, tecumque sub ulmo

Projectam, docto calamos inflare labello!

Multa recenserem cantu tibi furta deorum,

Ut nemorum latebras fugeres, atque abdita lustra.

Tum canerem liquidi pendentem e margine fontis

Narcissum, gelida quum se miser arsit in unda:

Ut frustra incumbens labiis, & brachia tendens,

Perderet amplexum, & vanæ daret oscula formæ.

Ah, ne te similis tangat, Charideme, cupido,

I procul a ripis. formosos fascinat amnis.

Sed quoniam ludunt me somnia, nec mihi furvæ

Nebant nascenti tam candida fila sorores,

Litus aro, Zephyris & retia tendere pergo.

Non audit Charidemus: habet rude pectus amorum.

Eheu quid superest miseræ mihi? scilicet alto

Vertice de montis præceps dare corpus in æquor.

Vivite vos fontes, & flumina; vivite fagi:

Aeternum segetes, æternum rura valete.

Tota mihi certum est potare obliviam Lethes,

Si delere queant nostros epota furores.

Chr. Quas tibi pro tali persolvam carmine grates,
 O virgo, Aonias inter numeranda puellas?
 Paullatim ferus ille puer mansuescere discet;
 Ne dubita: validas & nos adhibebimus artes
 Consilioque senex pugnabit, amore Neæra.
 Spes animum firmet; sperandum est omnia vivis:
 Desperet quisquis nebuloso merfus Averno est.
 Aspice, nunc pluvios inducit Juppiter Austros,
 Mox abigit cælo nubes, mundumque serenat.

IIII.

Orator bonus in causa mala.

POSTQUAM deorum cœpit expulso metu
 Aetas rigere ferrea:
 Flevitque Pietas, immerentis hospitis
 Cruore tingi limina,
 Passimque civium insepulta per vias
 Feris relinqui corpora:
 Carique fratris frater (o dirum scelus!)
 Admovit ensẽ gutturi;
 Neglecta Virtus fugit ad solium Jovis,
 Nec se videndam præbuit.
 Vix nunc suprema conspici vestigia
 Dolemus almæ virginis.
 Novere pauci, prisca quid jubeat Fides,
 Quid nuda mandet Veritas:
 Errat superbum jure contempto nefas,
 Legeſque in occulto silent.

Quod

C A R M I N U M L I B. III. 87

Quod si dolosi spes refulgeat lucri,
Quidvis egestas imperat :
Corrupta luxu liberi Cupidinis
Turpis juvenus æstuat.
Nec segniores pruriunt, quibus prope est
Exacta vitæ fabula.
At quum scelestos esse, plurimos juvet,
(Tanta est voluptas criminum)
Decora fontes præferunt cognomina,
Et umbra virtutis placet.
Ut sæpe solidum, ligna quæ tegit, levis
Mentitur aurum bractea.
His artibus si accedat orator catus,
Permutat atris candida.
Ornatque miris laudibus dignos cruce,
Versatque lingua judicem.
Ait, Cethegos innocentes vivere,
Et patriæ amantissimos.
Apicioque, quidquid invidi fremant,
Frugaliorem neminem.
Quod est, id esse pernegat: contra invenit,
Nusquam quod exstat gentium.
Et quos parato carnifex laqueo manet,
Hos eripit suspendio.
Clamat, minatur, obsecrat, jurat, monet,
Blanditur, increpat, furit.
Si forte desint verba, rem lacrimis agit,
Gestuque fletus adjuvat.

Per-

Percussus interim, ut solet vento mare,
 Circum popellus fluctuat.
 Tollitque vocem, & plaudit oranti manu,
 Gaudetque stultus decipi.
 Minus diferti robur apparet viri,
 Ni caussa perditissima est.
 Nam si vocetur ad tribunal Curius, aut
 Fabricius, aut siccus Cato,
 Quis tunc figuris usus, aut coloribus?
 Patronus esto quilibet.
 At si reperto lis eget mendacio,
 Summus petendus artifex.
 Tunc singularem fabricet calumniam
 Demosthenes, vel Tullius.

V.

*Quum N. N. Veneta classis Imperator
 e militia domum reversus esset.*

NON semper gelidi ripas quatit horridus Hebri
 Curru sonante Romulæ gentis pater.
 Quem cruor, & foedi morientum pulvere vultus,
 Quem dissolutis versâ muris oppida,
 Percussæque juvant acies, clamorque, minæque,
 Regumque ahenis vincta nodis brachia.
 Interdum properat dilectam visere Cypron;
 Ibiq; Nymphas inter, & molles choros

Te

Te solam, Cytherea, petit: tibi deditus uni
 Dat se protervis exuendum Amoribus.
 Quorum alii galeam capiti, clypeumque sinistra
 Demunt, jocofo garrientes agmine.
 Pars tollunt junctis ingentem viribus hastam,
 Pars impedire floribus gestit deum.
 Ille satur myrrha crines, & dulce renidens
 Jubet valere militarem Thraciam.
 Sic te jactatum longis, dux magne, periclis,
 Cui jam satis superque partum est gloriæ,
 Excipit alta domus festis ornata coronis,
 Fratresque cara civitati pectora.
 Blanda Quies cupidis te tandem amplexa lacertis,
 Laboriosum purpura vestit latus.
 Et strepitus bellorum, & tristes dedocet iras,
 Pellitque duram fronte pervicaciam.
 O igitur studia, & curas oblite priores,
 Gaude paratis, dux amice, honoribus.
 Sat tibi sint noctes, quas per vaga somnia ducas,
 Visus modo atri per profunda Nerei
 Hostiles turbare globos: modo flectere puppes,
 Lesboa qua se frangit unda rupibus:
 Et modo præcipites fugientum urgere catervas;
 Dum te revertens ponat in tuto dies.

VI.

IN FUNERE

FERDINANDI OBICII MARCHIONIS.

SI possent lacrimas effundere numina, quorum
 Tranquillo posita est alta quies animo:
 Te flerent memores Prudentia, bellica Virtus,
 Te Mavors, quamvis ex adamante gerat
 Horrendum thoraca, & magna fulminet hasta;
 Imbutus quamvis cædibus innumeris.
 At parte ex alia Charites, Pietasque, Fidesque
 Flerent, ac rupta tristis Amor pharetra.
 FERDINANDUM omnes ingenti voce vocarent,
 Heroem, quo non fortior, aut melior
 Nascetur nobis multis redeuntibus annis.
 O Mors! Parcarum o pectora dura nimis!
 Sed quoniam superi non ligent quod voluere,
 Debemurque atro cuncti homines Erebo,
 Nos decet uberibus perfundere fletibus ora,
 Spargereque immundo pulvere sæpe caput.
 Et flores, lacrimasque ad tantum ferre sepulcrum,
 Dum Sol immenso conditur Oceano,
 Et dum Nox deprensa a lumine matutino
 Pallentes acri verberare pungit equos.
 Te raptum queritur variis exercita fati
 AUSTRIA, quam justo CAROLUS imperio
 Nunc frenat post amissos fratremque, patremque:
 Te passis etiam crinibus Italia.

Aspi-

Aspice, quos imo gemitus de pectore ducat
 Conjux, in viduo sola relicta toro.
 Illa dolet, caro quod non est juncta marito,
 Et nimium tardos increpat usque dies.
 Quæ tamen in terris diuturna ætate supersit,
 Exstincti populos admoneatque viri.
 FERDINANDE, vale, nosque aspice lætus Olympo,
 Ne pergat miseros excruciare dolor.

VII.

AEGLES MORITURAE LAMENTA.

RESPICE desertam, si mens mutabilis, Aeglen:
 Saltem huc flecte avidos ad morientem oculos;
 Quos equidem lætos optata morte futuros
 (Dura nec heu sævi fata Jovis prohibent!)
 Auguror; o furdo crudelior æquore Phædon,
 O silicum venis, o chalybe asperior.
 At quoniam Veneri certum est me perdere, cujus
 Tristis adhuc nostris ara calet lacrimis:
 Nec prodest votis numen coluisse deorum;
 Vos, precor, este bonæ vos mihi Nereïdes.
 Et miserum fluctu molli propellite corpus,
 Qua findit liquidas perfidus ille vias.
 Candida sic scopuli de verticibus præruptis
 Audita est magnis vocibus ingemere
 Deliciæ silvarum Aegle, dum fune soluto
 Curreret ingratus per mare velivolum,

M

Ne-

Neglectis precibus, scelerato pectore Phædon,
 Virgineique ferens corporis exuvias.
 Irrita verba levis discerpfit ventus: at illa
 Subiectum saltu se dedit in pelagus.

VIII.

HELENA SENESCENS.

EUROPAE, atque Asiæ pestis, quam Troiüs hospes
 Abduxit casto conjugis e thalamo:
 Quam propter sævis arserunt Pergama flammis,
 Et penitus Priami concidit alta domus:
 Ut primum in speculo spoliata flore juventæ
 Conspexit faciem, pallidasque genas;
 Illa ego sum tanto, dixit, repetita labore?
 Illa ego, quam vellet detinuisse Paris?
 O male consumi procures! male perditæ sanguis!
 O Danaï, pugnae causâ pudenda fuit.
 Quo fugit nitor, heu, solitus, Charitesque, Venusque?
 Denique, formosæ quid superest Helenes?
 Sic ait, & canos vellens a stirpe capillos
 Ingemuit, raris non sine lacrimulis.



C A R M I N U M LIB. III. 21

IX.

Ad fontem, ut sibi Phyllidis imaginem referat.

O FONS, qui puros volvens e rupe liquores,
 Per nemus arguto laberis usque sono;
 Deliciæ Nympharum, & capripedum Faunorum,
 Quo levat æstivam sæpe Diana sitim;
 Sic tibi cælestes defendat populus ignes,
 Auraque vicinis ludat in arboribus:
 Sic te nec pastæ possint violare capellæ,
 Ulla nec immundo vellere turbet ovis;
 Blanda refer, quæso, caræ mihi Phyllidis ora.
 Illa meum sævo torret amore jecur.
 Hoc solet ad speculum flavos disponere crines,
 Et nitidum vario cingere flore caput.
 Quid precor? instabilem secum rapit unda figuram,
 Torfit ut a ripis nostra puella pedes.
 At semel indomitis postquam me fixit ocellis,
 Aeternum memori corde recepta manet.

X.

Epitaphium puella venatricis.

QUISQUIS amas, nostrum lacrimis adsperge sepulcrum;
 Sic tibi mansueti sint in amore Dei.
 Illa ego venandi studio notissima Thisbe,
 Candida quæ placui mille puella procis;

M 2

Dum

Dum vagor , & leporem canibus , jaculoque fatigo ,
 Vipereo cecidi faucia dente pedem .
 Hoc me compositam tumulo flevire parentes ;
 Hic me pastorum gens pia lacte colit .
 Et Corydon , veteres cui vivunt pectore flammæ ,
 Alloquitur cineres , vanaque verba jácit .
 Qui seros utinam possit spectare nepotes ,
 Pinguiaque innumero molliat arva bove .
 Tu quoque , si misera turbaris clade , viator ,
 Aequa tuis votis numina semper habe .

XI.

In aurigam , qui Lalagen abduxerat .

DI tibi dent noctesque malas,viduumque cubile:
 Pellere glande famem , ponere fonte sitim ;
 Qui tecum , heu , Lalagen , scelerate auriga , tulisti .
 Et frangant celeres obvia saxa rotas .
 Humida palliolo siccantem lumina vidi ,
 Dum nos in media linqueret illa via .
 Non aliter doluit pavido Proserpina vultu ,
 Ad Styga quum rapidis abstraheretur equis .
 Clamabat frustra matrem , comitesque puellas .
 Illa aberat : comites terga dedere fugæ .
 Sic aquila Phrygium quondam portante ministrum ,
 Obstupuit gelido pectore fida cohors .
 Hæsimus , ut subito percussi fulminis ictu ;
 Et visa est tenebras nox geminare suas .

For-

Fortuna in miseros semper conjurat amantes .

Jactare o tantas parce , superba , minas .

Templa tibi statuent , te cingent pinguibus aris ,

Dulcia ne mixto pocula felle bibant .

XII.

Hieme indulgendum voluptati .

TEMPORA dum fugiunt, præceps dum vertitur an-

Attulit exiguos horrida bruma dies . (nus ,
Vento silva fremit : stat frigore lucidus amnis :

Albent conspicuæ per juga summa nives .

Cæruleus tristes diffundit Juppiter imbres ;

Nullaque jam liquido gutture cantat avis .

Non audet stabulis pecudes emitte pastor :

Obsidet ardentes garrula turba focos .

Nunc vino certare juvat , nunc ponere mensas ,

Nunc strepere , & multa ducere nocte choros .

I , puer , & cyathos generoso prolue Baccho :

Temperet auratam Lesbios arte lyram .

Tympana pelle manu , tremulis nec parce cachinnis ,

Delia : tuque latus fusca Lycinna move .

Quid tum , si nostros carpat vicinia mores ,

Et nequeant juvenum gaudia ferre senes ?

Nil certe frontis noceat mihi ruga severæ .

Jam veniet tacito Mors inopina pede .

Qui sapit , arripiat labentis commoda vitæ .

Non violenta diu ludere fata sinent .

XIII.

XIII.

De Melampi fidissimi canis interitu.

THESTYLI, coge pecus: non hac dormire sub
ulmo,
Dum vigilant fures, invida fata sinunt.
Occidit ille gregis felix tutela Melampus,
Latrantem rapidi quem tremuere lupi.
Vos quoque in obscuros nemorum procedere saltus
Parcite oves. custos dentibus acer abest.
Nunc decet hibernas insomnem ducere noctes,
O Lycida. insidiis umbra maligna favet.
Ille minax rictu, villisque horrentibus audax,
Egit nocturnas pervigil excubias.
Auribus exiguos captantem sæpe susurros
Nulla tamen vano moverat aura sono.
At si quis culti sæpem tentaverat horti,
Protinus ingenti voce monebat herum.
Nunc miser, heu, vacui per campos errat Averni,
Tollentemque minas Cerberus ipse pavet.
Sed bene consuluit nostro Fortuna periclo,
Quod catulos utero pulchra Lycisca gerit
Exstincti de stirpe patris; qui fenore multo
Hinc abigant turpes fida caterva feras.
Interea, totum ne raptor perdat ovile,
Candida, Faune, tuos imbuet agna focos.

XIV.

XIV.

*Ad amicos Patavinos, dum ad
Benacum commoraretur.*

Hic ubi cymba levis Benaci ludit in unda,
 Consuetasque parat piscibus insidias:
 Et mihi miranti prodit pellucidus humor
 Candida nudarum corpora Naiadum:
 Pubentesque rigat vicinis fontibus herbas
 Mollis odoratis ripa sub arboribus;
 Quamvis multa meis poterant obistere curis,
 Ne flerem Venetæ rura beata plagæ,
 Et quos dura mihi rapuerunt fata sodales;
 Non tamen a lacrimis lumina mæsta vacant.
 Quid si me Phario Meroë circumflua Nilo,
 Fertilis aut pingui ture teneret ager?
 Nulla peregrinæ facies telluris, amici,
 Me valeat dulci detinuisse mora.
 O me felicem, si vobis mutua cura est,
 Si quando igne pari pectora vestra calent!
 Interea, dum me longinquus distinet error,
 Vobiscum est nostræ maxima pars animæ.



XV.

AD LYCIDAM.

Amori tempestive obfistendum.

AGGERE quæ modico potuit prius unda repelli,
 Obrueret subitis ne fata vorticibus;
 Postquam se medios tumefacta effudit in agros,
 Dum properat seram ferre colonus opem,
 Heu facinus! turpi late premit omnia limo;
 Et vix, qua sensim defluat, ulla via est.
 Sic dum parvus Amor circa tua pectora ludit,
 Insidiis quærens, vulneribusque locum,
 Effugisse dolos, volucresque arcere sagittas
 Res fuerit, Lycida, non operosa tibi.
 At frustra sævi detrectes regna tyranni,
 Si ponat capta victor in arce pedem.
 Ne mitem tibi finge deum: prohibere ruentem
 Una salus: domitis parcere nescit Amor.

XVI.

AD NEARCHUM,

singulari forma, & præclara indole adolescentem.

O, cui Pieridum, Charitumque favore, Ne-
 arche,
 Corporis, atque animi contigit omne decus;
 Quum tibi sit facies, qualem sibi malit Adonis,
 Concedis casto non tamen Hippolyto.

Hinc

C A R M I N U M LIB. III. 97

Hinc de te certant Venus, atque innupta Diana :
 Utraque sed vano fervet amore dea .
 Nempe tibi ante oculos, juvenis formosa pudici
 Versantur, calidis corpora trita rotis ;
 Et qui, dum tenera tractat venabula dextra ,
 Concidit obliquo dente percintus apri .
 Quodque suis nequeant avertere tristia fata ,
 Nec Dictynna tibi, nec Cytherea placet .
 Sola placet, carum quæ per mare servat Ulyssæ ,
 Vertice de summi nata puella Jovis .

XVII.

I N N U P T I A S

FRANCISCI, MUTINAE PRINCIPIS, ET
 CARLOTTAE AGLAES BORBONIAE.

NUBIT ATESTINO juveni BORBONIA virgo :
 Italiæ superi quid dare majus habent ?
 Alma Venus redeuntem ulnis excepit Amorem ,
 Et nati egregium læta probavit opus .
 Non olim Phrygio Lavinia juncta marito
 Attulerat Paphiæ gaudia tanta deæ ;
 Unde bonis avibus crevit Romanus alumnus ,
 Pressit & imposito barbara colla pede .
 Scilicet heroum, & regum de sanguine mixto
 Scipiadas longe prospicit illa novos .
 Qui Thracum spoliis, domitoque Oriente superbi
 Antiquis cumulent laudibus Ausoniam .

N

Qui

Qui revocent profugæ pulſos Virtutis honores,
 Qui foveant artes, juſtitiamque colant.
 Et (quod Romulæ genti per fata negatum eſt)
 Magnanimam ſervent tempus in omne do-
 mum.

XVIII.

AD JOANNEM FRANCISCUM
 BARBADICUM,

*Episcopum Brixienſem, S. R. E.
 Cardinalem creatum.*

DEBITA quod tandem te, BARBADICE, locarit
 Romanos inter purpura ſacra patres,
 Jam populo magnus, fortunatusque videris:
 Tamquam ſit virtus pectoris auſta tui.
 Aut contentus opum, vel Muſis æqua voluntas
 Creverit, aut ſanctæ religionis amor.
 Sed nobis, quos non fallaci in cortice rerum
 Detinet ambiguſ vana figura notis,
 Viſus eras pridem felix: te nempe locarant
 Inter præclaros maxima facta viros.



XIX.

*Inscriptum sepulcro Familiae Vulpiae
Pata-vii in aede D. Luciae.*

NOS. TENET. ALTA. QUIES. PLACIDOQUE. SIMILLIMA. SOMNO
QVAE. SVMVS. IGNARIS. CORPORA. VISA. MORI
HIC. ERIMVS. DONEC. RESERATO. CHRISTVS. OLYMPO
AETERNO. IVBEAT. NOS. VIGILARE. DIE

XX.

*Sub effigie ALOYSII ALAMANNI Florentini
Poetae nobilissimi.*

DUM frumenta Ceres, vites dum Bacchus amabit,
Paxque feret pleno mitia poma sinu;
O ALAMANNE, tuis veniet nova gratia Musis,
Quem rapuit Tuscis Gallia litoribus.



XXI.

*Sub imagine Nauceli, Portus Naonis fluvii, apud
quem olim Bartholomaeus Livianus, fortissimus
Imperator, celebrem Academiam instituerat.*

OLIM parvus eram, vixque ulli cognitus amnis :
It mea nunc tumido lymphæ superba pede .
Argutos etenim pavi NAUCELUS olores,
Qui se, meque suo carmine in astra ferant .



JOANNIS ANTONII
VULPII
OPUSCULA

SOLUTA ORATIONE SCRIPTA;

Quæ variis in voluminibus dispersa
ad hoc tempus legebantur.





ANDREAE NAUGERII

PATRICII VENETI

V I T A.



ANDREAS NAUGERIUS, Orator, Historicus, & Poeta, longe doctissimus, atque elegantissimus; cujus olim in Europa universa pervulgatum, ac celebre nomen fuit; vix eam apud homines dignitatem obtinere videtur, quam ipse sibi pulcherrimarum artium studiis ingenti cum laude conciliaverat. Utrum id acciderit negligentia temporum quæ deinceps consecuta sunt, in vecto præsertim in scholas corruptissimo genere dicendi: an vero quorundam levitate, qui præclara ingenia multitudine magis, quam excellentia monumentorum metiri consueverunt; non satis compertum est. Hujus ego maximi viri memoriam, situ pæne atque oblivione obrutam, excitare quodammodo, ac repræsentare, in ani-

animum induxi; non, quod eum existimem, ut illustrior fiat, orationis cujusquam indigere: sed ut Italis adolescentibus, egregia plerumque indole præditis, ejusmodi exemplar proponam, in quod sæpius intuentes, abjecto otio & nugis, de veteri eloquentiæ gloria recuperanda, unde superiore sæculo excidimus, aliquando incipiant cogitare. Natus est igitur ANDREAS Venetiis, anno post CHRISTI adventum clccccclxxxiii. Parentes habuit Bernardum Naugerium, & Lucretiam Polanam. Hæ familiæ in antiquissimis Venetæ civitatis numerantur. Antiquior tamen Polana; quæ scilicet urbis initia vetustate fere attingere dicatur. Excolebantur per id tempus ab hominibus gloriæ cupidis magno labore, magnæque animorum contentione, non in Italia solum, verum etiam apud ceteras Europæ nationes, optimarum studia disciplinarum; quæ jam inde ab excidio Romani imperii, diuturno plurimum sæculorum intervallo abjecta penitus, & prope mortua jacuerant. Et jam eo perducta res erat, tum antiquorum scriptis ex abditissimis bibliothecis eruendis, tum iisdem ita emendandis, explicandisque, ut nullo negotio ab juventute intelligi, mandarique memoriæ possent: sæpe etiam ad illorum normam atque vestigia novis fingendis argumentis, orationibus, omnique poematum genere: ut qui in posterum nascerentur, tan-

tantisque copiis instructi, acrius tamen iudicium, severioremque delectum ad legendum, scribendumque conferre voluissent, ii procul dubio supremam manum, & veluti fastigium quoddam, absoluto nondum operi demum imposituri viderentur. Id enim peccabant homines, alioqui cruditi, neque ab ingenio inopes, quod aut unumquemque scriptorem sine discrimine leſtitarent, & ex unoquoque verba, sententias, varios loquendi modos passim exciperent, & in sua scripta transferrent; unde necesse erat genus quoddam orationis existere absurdum prorsus, atque inconcinnum, perinde ac *si multa jura confundat coquus*, quod est apud comicum quemdam poetam: aut Cicerone contempto, ceterisque optimis, qui aurea illa Augusti ætate, vel paullo ante vixerunt, deteriorum quam simillimos se esse mallent, puerileſque ineptias, inanemque ac stultam loquacitatem incredibili iudiciorum perversitate ſectarentur. Quæ vitia (ut est rerum humanarum perpetua quædam vicissitudo) ita rursus in amore, atque in pretio esse, ita mentes eorum qui se dicendi rationem adolescentibus tradituros profitebantur, occupare cœperunt; ut nemo proximis his temporibus vel poeta, vel orator haberetur, qui non eodem morbi genere laboraret. Quod nisi per disertissimos viros huic pesti maturius occursum fuisset, ne umbra quidem sanioris elo-

quentiæ ad posteros pervenire posset. In ejusmodi corruptelas inciderat NAUGERII adolescentia. Quapropter (ut ea facillime percipi, atque adhærescere cernimus, quæ a summis auctoribus in animos discipulorum profecta, eos levi momento percellere, & in quamcumque partem impellere solent) ipse quoque prima illa ætate, quam omnem ad alienum arbitrium institui pudor juber, vulgari doctorum hominum consuetudine, quasi æstu quodam, aliquamdiu se abripi passus est. Apparebat in eo præstans, & ad omnia natum ingenium: memoria valebat plurimum; ut integros prope poetarum libros, quibus in primis delectabatur, magna cum audientium admiratione ex tempore posset recitare: litterarum vero cupiditate ita incensus ferebatur, ut præ illarum dulcedine non solum voluptates alias omnes repudiaret, verum etiam valetudinis curam sæpius abjiceret. Accedebat ad hæc mira vocis & pronuntiandi suavitas: hilaritas & comitas vultus, quam tamen adjuncta gravitas temperaret: congressus & sermonis facilitas: status denique motusque corporis, quod illi procerius natura dederat, decorus atque elegans. Quibus rebus id consequabatur, ut quum omnibus æque acceptus esset, tum firmissimas societates, sanctissimasque amicitias in dies sibi compararet; neque ejus processibus magnopere invideretur. Quum puer esset,

set, in Latinis litteris perdiscendis operæ plurimum studiique consumpsit; quas magna famæ celebritate Venetiis docebat M. Antonius Coccius Sabellicus, quum ei stipendium publice præberetur; vir sane doctus, & ut illa ferebant tempora, scriptor disertus, & gravis: qui primus **Veneti Senatus decreto*, ejus Reipublicæ Historiam ab exordio Urbis memoriæ prodidit; deinde immensum opus aggressus, universam omnium sæculorum, gentium, & locorum antiquitatem iis libris complexus est quos Enneadas appellavit. Hunc tamen NAUGERIUS in loco parentis observabat, multumque apud ipsum præceptoris valebat auctoritas; pulchrior tamen, & absolutior eloquentiæ species in adolescentis animo insidere cœpit. quam assidue contemplatus (ut erat judicio acerrimo, quod ætas jam corroborata sensum perficiebat) in elegantissimis tantum scriptoribus legendis, imitandisque juventutem suam deinceps collocare statuit. Excitabatur ad id quum mirifica voluptate, quam ex hujusmodi meditationibus capiebat: tum spe gloriæ,

O 2 quæ

* *Veneti Senatus decreto*) Id certe viri docti complures ante nos litteris tradiderunt: quos tamen omnes refellit Apostolus Zenus, Caroli VI. Cæsaris Historicus ac Poeta, in Vita M. Antonii Sabellici, quam accuratissime conscriptam anno MDCCXVIII. ejus Historiæ Venetæ præposuit. Ostendit enim, Sabellicum nullo jubente id operis aggressum, tantummodo ut animo obsequeretur, urque civitatis de ipso præclare meritis monumenta a rudium scriptorum barbarie vindicata ornatiore stilo componeret.

quæ ab optimis quibusque, tamquam amplissimum præmium expetitur recte factorum: tum præcipue Petri Bembi civis sui exemplo, quem ad barbariem profligandam strenuum profecto ducem mansuetiores Musæ sibi delegisse videbantur. Igitur quæ sibi adolescentulo, seu potius puero, minus castigata olim exciderant; inter quæ Silvas aliquot ad Papinianarum similitudinem carmine conscriptas; ne quid apud posteros de laude sua detrahi aliquando posset, non invitus in ignem conjecit. qua de re in ejus Lusibus lepidum exstat Epigramma. Ut autem eam dicendi facultatem, & gloriam, ad quam toto animo, totis viribus jampridem contendebat, certius & brevius assequeretur, Patavium profectus est; ubi Græcas litteras a Marco Musuro Cretensi, qui eas ibi profitebatur, avide arriperet. existimabat enim (id quod experientia comprobatum videmus) qui Græce nesciret, aditum ad veram solidamque eruditionem patere nemini. Florebant eo tempore per Italiam hujusmodi studia, adeo ut vel tarditatis, vel inertiae crimen effugere vix possent ingenui adolescentes, si qui ad illa maturius animum non appulissent; in tanta præsertim copia magistrorum. Capta enim recens Constantinopoli ab immaniissimo Turcarum Rege Mahumete, quo, veluti Athenas alteras, ad cultum animi capiendum, e tota Græcia concursus

sus fieri soliti erant; expulsi inde doctissimi homines, in Italiam ad Pontificem Maximum, ceterosque Christianos Principes venerant exsules, eamque nova quasi doctrinæ luce perfuderant. Inter quos eminebant facile Bessarion Nicenus, Joannes Lascaris, Demetrius Chalcondylas, Theodorus Gaza, Joannes Argyropylus, Constantinus Lascaris, Georgius Trapezuntius, & is quem superius diximus, Marcus Musurus. Horum ope Græca eruditio longe lateque propagata, eos denique fructus peperit, qui a nobis dulcissimi, atque uberrimi percipiuntur. Tanto suscepto negotio, id perfecit NAÜGERIUS cura, exercitatione, assiduitate, magistrum sæpius interpellando, & ex illo obscurissima quæque sciscitando, ut jam scriptores Atticos non solum penitus intelligeret, sed etiam pressius imitaretur, & in suos usus convertere posset. Neque a poetis Græcis evolvendis rei difficultate absterrebatur; quorum ea fuit in scribendo sive licentia, seu potius artificium, ut Antonius ille magnus apud Romanos orator, quamquam Græcarum litterarum peritus, eos tamen, quasi aliena quâdam lingua locutos, attingere non conaretur. Pindarum in primis admirabatur, quem & manu sua non semel descripsit; ut Aldus Manutius missa ad eum Epistola testatur. Eloquentiæ porro studiis optimo consilio sapientiæ studia conjungenda censuit;

fuit ; sine quibus orationem omnem , quamvis multo verborum lumine illustratam , jejunam tamen , futilem , sanorumque hominum auribus indignam esse oportet . Itaque non mediocrem philosophiæ operam dare cœpit : Petrumque Pomponatium , de rerum natura acutissime differentem , in Patavino Gymnasio frequens audivit . Ob insignem vero spectatamque probitatem , celsam præclaramque indolem , magnos in quolibet litterarum genere celerrimosque profectus , ita præceptoribus carus erat , ut nihil non ejus causa vellent , omniaque de illo summa , omnia præter vulgarem consuetudinem , non vanis opinionibus augurarentur . Morabatur ille Patavii libentissime ; in urbe nimirum ab honorum contentione , civilibusque concertationibus maxime remota : ubi per summum otium ac tranquillitatem in iis artibus versaretur , sine quibus vitam aut nullam , aut sane acerbam putabat . ipsa etiam cæli adspiratio salubris , ac temperata , hororum , suburbiorum , & Medoaci fluminis amœnitas , opacæ frigidæque per æstatem ambulationes ; tum sodalium , qui eodem studiorum causa venerant , consuetudo sermonesque jucundissimi , animum a cura , corpusque a laboribus recreabant . Quam urbis nobilissimæ faciem bello illo quod a potentissimis Europæ Regibus contra Venetos acerrimum gestum est , nonnihil a Ger-

Germanis militibus deformatam ægre admodum tulit, elegantique poemate deploravit. Utebatur cenfore scriptorum suorum Christophoro Longolio, viro in Germania nato, sed qui scribendi exercitatione, doctrinaque multiplici cum præstantissimis Itatorum ingeniis contendere posset; & si diutius ei vivere contigisset, in summum oratorem evasurus videretur. Coluit etiam ex nobili suæ civitatis juventute Casparem Contarenum, singulari vitæ innocentia, morumque gravitate adolescentem: Petrum Bembum, qui veteris germanæque eloquentiæ laude inter ceteros clarus, atque insignis habebatur: Christophorum, & Angelum Cabriellios, Nicolaum Theupolum, Augustinum Pisaurium, Paullum Canalem; qui omnes principum familiarum, in quibus orti erant, amplitudinem ac dignitatem litteris ornare, ac quodammodo cumulare non desinebant. Contulerant se item ad ejus amicitiam Joannes Cotta, & Bartholomæus Riccius: quorum alter suavissimis versibus Catulli municipis sui urbanitatem, & vñeres exprimere conabatur: alteri vero NAUGERIUS ipse auctor fuit, ut ex purissimis tantum fontibus, non ex turbidis quibusdam rivulis, candorem, copiam, atque ornamenta Latine orationis hauriret. Nemini tamen arctiore necessitudinis vinculo conjunctus fuit, quam aut Hieronymo Fracastorio, excellentis ingenii

genii viro, qui e recentioribus poetis omnium proxime ad Publii Virgilii divinas illas in con-
dendo carmine virtutes accessit: aut Joanni Bap-
tistæ Rhamnusio, homini reipublicæ admini-
strandæ scientissimo, cujus tum fidei, tum pru-
dentia Decemvirum Consilium (est hoc gravis-
simi magistratus apud Venetos nomen) negotia
sua omnia, & mysteria servanda tradiderat: aut
denique Rhamundo, & Joanni Baptistæ Turria-
nis fratribus, e Veronensi nobilitate; quorum e-
rant multæ, ac reconditæ litteræ, incredibilis
humanitas, amorque sapientia. Ad hos in Baldi
montis recessibus prope Veronam doctissimos il-
los de re poetica sermones habuit, qui a Fra-
castorio diligentissime excepti, monumentisque
mandati, ad nostram usque ætatem pervenere.
Nisi quis fortasse existimare velit, Fracastorium
totam ejusmodi disputationem affinxisse N A U-
GERIO; amici nimirum ingenio, ac studiis ma-
xime accommodatam. Quod etsi mihi videtur
a veritate abhorre, ceteris tamen judicandum
relinquo. Consuetudo ejus plenissima suavitatis
erat: animus ab omni simulatione alienus: ser-
mo, qui plurimum delectaret, neminem læde-
ret: pronuntiatio denique ipsa verborum tam
dulcis, tam varia, & in omnes partes flexa, ut,
sive aliquid legeret in conventu amicorum, sive
narrationem ordiretur, sive de disciplinis, rebus-
que

que domesticis loqueretur, eos qui audirent mira quadam voluptate affectos a se dimitteret. Quum vero sibi ipse numquam satisfaceret in scribendo, & ea quæ primo impetu effudisset, ad limam idemtidem acri, & polito judicio revocaret, obrectatorum reprehensiones lente admodum ferebat; quin immo ex iis utilitatis aliquid elicere studebat. Quo factum est, ut invidiam omnem atque offensionem, quæ præstanti ejus ingenio, singularique doctrina nonnihil excitata fuerat, idem constantia, & magnitudine animi paullatim exstingeret. Quamvis autem gloriæ cupiditate duceretur, non tamen ad illam nimia festinatione properandum existimabat: neque umquam, dum viveret, e commentationibus suis aliquid, nisi dissimulato nomine, in conspectum hominum prodire passus est. Nam pauca illa NAUGERII, quæ sunt in manibus, amicorum ejus pietas aut clanculum excepta, aut precibus extorta, aut eo mortuo in adversariis inventa, ab interitu vindicavit. Mirabile est, quum quotidie plurimum meditaretur, nullumque illi a legendo, scribendoque tempus vacuum relinqueretur, quam multa veterum scripta (Terentii nimirum, Lucretii, Virgilii, Horatii, Tibulli, Ovidii, Quintiliani) ad incorruptorum codicum veritatem exegerit: quos undique studiosissime conquirebat. In primis vero

M. Tullii Ciceronis monumenta immortalitate dignissima, quæ diuturno ante tempore dejecta, mutila, & fere ignorata in tenebris delituerant, ipse magnis laboribus digessit, supplevit, bonoque in lumine collocavit. Quo beneficio ita doctorum hominum rationibus, ingenuorumque adolescentium studiis prospexit, ut, etiamsi nihil aliud ab eo profectum esset, ob hoc unum tamen ingentes ei gratiæ ab omni posteritate essent habendæ. Usus est autem in emendandis antiquorum libris, Aldi Pii Manutii opera, fideli sane atque assidua, a quo diligentissime colebatur: quumque ille, insigni calamitate accepta, de typographia deponenda cogitaret (quæ res non mediocre bonis litteris detrimentum illatura videbatur) hortatu NAUGERII; animum jam demissum & oppressum erexit, atque in incepto permansit. Quum igitur propter eximias, rarasque virtutes, excellens ingenium, omnibusque disciplinis excultum, probatam denique industriam, NAUGERIUM universi diligenter, justissimisque laudibus in cælum ferrent; tantum aberat, ut ipse sua miraretur, ut potius ea semper verbis extenuaret, dictitaretque: *se ingentium operum rudia quadam tantummodo fundamenta jecisse, absolutionem vero ad ceteros pertinere*. Pie castæque DEUM colebat, Christianæque Reipublicæ fines longius proferri vehementer cupiebat; neque,
ut

ut id perfici posset, Leoni X. Pontifici Maximo, apud quem summo erat in honore, stimulos ad movere destitit, ut is desides, dissidentesque inter se Principum animos ad bellum Turcis inferendum auctoritate sua impelleret, atque incitaret. Id præstitit NAUGERIUS Epistola quadam eidem Pontifici inscripta, quam Ciceronis Orationibus opera sua emendatis apponi curavit. Amicis numquam defuit, quos omni officiorum genere prosequeretur; sed alieniores etiam, quos optimarum artium studio ardentius inflammatos cognovisset, in familiaritatem suam libentissime recipiebat; quibuscum honestissimos de virtute, præclarisque antiquorum institutis sermones habebat, ut qui ad eum venissent, doctiores semper ab eo se discedere faterentur. Patriæ vero civiumque caritas in eo tanta erat, ut, quamquam ab omni ambitione remotissimus esset, idque a natura haberet, ut secessu ac solitudine magis, quam urbano strepitu delectaretur; nihilominus, quoties Reipublicæ tempora postularent, ejus commodis, quam tranquillitati suæ inservire mallet. Sed quum primum a negotiis laxamenti aliquid nactus fuerat, statim a curiæ forique conspectu, aut in suburbanum suum, quod Murani possedit amœnissimum, aut in Forojuliensem regionem, lætam atque uberem, aut ad pulcherrimum Benaci litus, tamquam a tempestate in portum

aliquem, confugiebat. Voluptatibus autem agriculturalum, quæ potissimum videntur esse sapientis, mirum in modum afficiebatur: omnesque natas e terra stirpes, earumque vim atque naturam cognoscendi cupidus erat: quarum etiam nonnullas, eatenus nostris hominibus incognitas, ex Hispania in Italiam secum advexit. Romæ fuit aliquando; ibique Petro Bembo, & Jacobo Sadoletto, viris eo tempore omnium eloquentissimis, valde familiariter usus est. quumque diligens esset scrutator antiquitatis, & in Historiis legendis diu multumque versatus, de veterum ædificiorum splendore, ac magnitudine, ex iis quæ superessent rudibus sagacissime estimabat. Nec leviora studia omnino contempsit; nam & de signis, & de picturis, & de sonis atque concentibus judicium facere poterat; ut etiam puerum fidicinem domi aleret, suæ amicorumque voluptati. Quum enim pulchritudinis veluti quamdam ideam animo comprehensam haberet, iccirco in unaquaque re quid aptum, quid decorum, quid elegans esset; quid contra, facillime sentiebat. Ob vehementissimam autem, quam in litterarum studiis adhibebat, animi contentionem, assiduas immoderatasque vigilias, habitu corporis paulatim viciato, in periculosum incidit morbi genus, quod *μελαγχολίαν* Græco nomine medici appellant: cujus vi adeo constituta-

status est, ut quamquam invictissimus, libros tamen omnes abjicere, industriæque suæ cursum omnino interrumpere coactus fuerit. Per id tempus in Bartholomæi Liviani, Venetarum copiarum imperatoris, contubernio vixit: fortissimi sane viri, sed adversa sæpius fortuna usi: quem tamquam exemplum veteris disciplinæ unice admirabatur; fatoque suo functum illustri Oratione laudavit. Livianus contra NAUGERIUM diligebat, jampridem in Academiam suam cooptatum, quam ipse ad Portum Naonis constituerat, occluso propter bellorum calamitatem Patavino Gymnasio. Fluit ibi Naucelus fluvius, quem antea contentum atque ignobilem Academia nobilitavit; eumque videtur alumnorum suorum scriptis editis pro signo apposuisse. Iisdem in regionibus, secundum Livianum, Hieronymo Savorgnano, summo duci, NAUGERIUS plurimum tribuebat; cujus consilio, fide, virtute Opsopium munitissimum oppidum contra validam hostium oppugnationem Veneto Imperio conservatum est. Depulso igitur morbo (magnam enim illi levationem attulerant itinera, animique remissio) totum se rursus in litteras abdidit, a quibus ægre se avelli patiebatur. Quamobrem tanta opinione probitatis, tantaque existimatione doctrinæ apud cives suos florere cœpit, ut vix quisquam inveniretur, quem ullo virtutis

ge-

genere cum eo conferendum putarent. Legaverat supremis tabulis ante aliquot annos Veneto Senatus bibliothecam suam vetustis codicibus refertissimam Bessarion Nicenus, homo Græcus; Platonicae doctrinae studiosissimus; qui ob singularia in Christianam Rempublicam merita, egregiamque in Concilio Florentino navatam operam, ab Eugenio IV. Pontifice Maximo in amplissimum Cardinalium ordinem lectus fuerat. Ei bibliothecae custodiendae Senatus praefecit M. Antonium Sabellicum; quo e rebus humanis sublato, id munus continuo ad NAUGERIUM, una cum onere Historiae conscribendae, delatum est. Hæc enim duo primis illis temporibus conjuncta fuere; cujus rei, præter ceteros, testem locupletem habemus Petrum Bembum, qui & ipse post NAUGERIUM utramque provinciam suscepit, Senatus decreto. Quantam porro Latini sermonis elegantiam, quantam in rebus gestis colligendis diligentiam, quantam civilis prudentiae copiam, ad eorum alterum cum dignitate præstandum NAUGERIUS afferret, quum e Bartholomæi Riccii, Romuli Amasæi, aliorumque doctorum virorum libris intelligi potest, qui omnes ejus operis rudimenta mirifice laudant; tum ex ipsius Orationibus conjecturam facere licet, in quibus multa leguntur eo stilo scripta, qui non valde ab Historia distet, Cæsarisque imitationem, quem

quem ille sibi proposuerat, aperte prodant. Con-
 ciones se passim narrationi admiscuisse, testatur
 ipse apud Fracastorium; Polybii videlicet, ac
 Thucydidis, gravissimorum scriptorum, auctori-
 tatem secutum. Totam vero Historiam indecem
 libros tribuerat, exorsus a Caroli Octavi, Gal-
 lorum Regis, in Italiam adventu; id quod post-
 ea, deletis NAUGERII lucubrationibus, a Paul-
 lo Jovio, & Francisco Guicciardino pariter fa-
 ctum videmus. Utinam aut ei longior vita sup-
 peditasset, aut abundantiore otio frui licuisset (de
 quo multum Reipublicæ tempora detraxerunt)
 ut quod inceperat, absolvere, & perpolire pos-
 set: aut saltem inchoatum opus ad nos perveni-
 re passus esset; quod ille, veritus iudicium po-
 steritatis, testamento comburi iussit. Quo casu
 desiderata est etiam Oratio qua Catharinam Cor-
 neliam, Cypri Reginam, singulari virtute mu-
 lierem, vita sanctam pro concione laudaverat:
 item de Venatione libri duo, & alter de Situ Or-
 bis, carmine conscripti: quæ omnia si exstarent,
 quantus ille vir fuerit, manifestius & plenius
 ostendi posset. His tamen quæ supersunt, tam-
 quam e naufragio reliquiis, jacturam ceterorum
 consolari præstat, quam de inanibus hominum
 contentionibus, fallaci spe, fragilique fortuna plus
 æquo dolere. Quum igitur omni disciplinarum
 genere animum excoluisset, boni civis officium
 exi-

existimavit fore NAUGERIUS, si prudentiam diuturno studio comparatam, usu etiam aliquo rerum confirmaret, & ad communem Patriæ salutem, dignitatemque converteret. Fœdus iccerat Senatus Venerus, ob tuendam Italiæ tranquillitatem, cum Carolo Cæsare, eodemque Hispaniæ Rege: utque firmitus potentissimi Principis voluntatem sibi adjungeret, legatos hac de re ad eum mittere constituerat. Legationem tam illustrem, in qua tamen plurimum difficultatis inesset, hortatu amicorum, sibi petiit NAUGERIUS: eaque cunctorum suffragiis impetrata, una cum Laurentio Priolo Collega in Hispaniam profectus est. Sed quum iter ii nondum confecissent, Franciscus Galliæ Rex, maximo exercitu coacto, in Insubriam venit, quam ad se pertinere contendebat: occupatoque Mediolano, ad Ticinum castra posuit, eamque urbem arctissima cinxit obsidione. Dum hæc gererentur, & nuntius deditionis in dies exspectaretur, non longe absuit, quin Senatus legatos revocaret: timebat enim, ne Rex victoria elatus in Venetorum fines irruptionem faceret, agrosque eorum fœde popularetur: & iccirco Cæsaris rebus lente admodum favebant, præsertim quum a Regis amicitia inviti discessissent. Verum præter omnium opinionem accidit, ut Galli commisso prælio cum Cæsaris exercitu, qui ad urbem obsidione liberan-

ran-

randam appropinquabat, in fugam versi turpissime caderentur; Rexque ipse in hostium potestatem veniret: quibus rebus auditis, legati imperatum est, ut ad Carolum recta pergerent. Ea legatione impeditus NAUGERIUS quadriennium fere a Patriæ, amicorumque conspectu abfuit; susceptamque provinciam magno Reipublicæ comodo, & cum summa fidei, prudentiæque laude administravit. Sed quum Itali Principes, qui nimiam Cæsaris potentiam formidabant, foedere inter se facto, & Francisco, Galliæ Rege, qui pridem e custodia evaserat, in foederis societatem accepto, bellum Carolo indixissent, ni ad condiciones quas ipsi proposuerant, descendere voluisset: post multa de pace colloquia, legati re infecta dimissi sunt. Vix domum attigerat NAUGERIUS, quum ei novum onus imponitur, altera scilicet ad Franciscum Regem legatio. Quapropter magnis itineribus citissime in Galliam evolvit. Mandatorum summa erat, Regem inducere, ut cum exercitu in Italiam ad Cæsaris opes infringendas statim rediret: ejusque conatibus omne auxiliorum genus polliceri. Sed quum Regem adiisset NAUGERIUS, ab eoque honorifice fuisset exceptus, non solum pro Venetæ Reipublicæ dignitate, verum etiam ob ipsius ingentes præclarasque virtutes (plurimi enim Rex ille magnus liberalium artium studia, doctosque

homines æstimabat) Blæſio in oppido ad Ligerim de improviſo in febrim incidit, eaque vehementius ingraveſcente, paucis diebus poſtquam decubuiſſet, * vi morbi conſumptus eſt. anno videlicet a CHRISTI adventu cło lo xxix. viii. Idus Maji; quum ipſe annum ætatis ageret xlv. Elatus eſt quam ampliſſime, ſummo Regis mærore: multiſque excellentium virorum laudationibus ejus exſequiæ honeſtatae ſunt. Nuntio autem de Legati morte Venetias allato, incredibile eſt, quanto luctu Civitas univerſa fuerit affeſta: quem dolorem fratres ejus acceperint, quem amici, quem familiares: in primisque Joannes Baptiſta Rhamnufius, & Petrus Bembus; cujus illud de NAUGERIO teſtimonium exſtat luculentum, in Epistoſis recentiori hac Italica lingua conſcriptis: *Multis ſeculis Venetam Rempublicam, qui cum eo comparari virtute poſſit, Civem habituram eſſe neminem.* Rhamnufius vero, annum poſt vigefimum ſecundum, amiciffimi hominis memoriam repetens (qua erat apud ſenatorium ordinem gratia) Senatusconſultum fieri curavit, quo Imagines NAUGERII, & Fracaſtorii, ex ære ſcitiffime expreſſæ, illuſtri in loco Patavii collocari juberentur: idque continuo præſtitum eſt, interrupto urbis muro vetuſtiſſimo, conſtructoque novo fornice,

ac

* *Vi morbi conſumptus eſt*) Quod morbi genus *Naugerium* ſuſtulerit, vide apud Hieronymum Fracaſtorium libro 2. de morbis contagioſis, cap. 6.

ac ponte contra templum D. Benedicti. Desiderium etiam gentilis sui lenire magna ex parte visus est Bernardus Naugerius, vir eloquentissimus, pluribus legationibus pro Patria obitis clarus, ac tandem in Cardinalium Collegium a Pio IV. Pontifice Maximo cooptatus, & Veronæ Antistes creatus. Imago tamen NAUGERII nostri diuturnior, & nullo umquam temporum spatio interitura, sunt scripta ejus elegantissima; pauca quidem, si numero spectentur, sed quorum paucitatem apud æquos judices venustas, candor, suavitas, ceteræque dicendi virtutes abunde compensare possint. Quid enim ejus Orationibus, quas in funere Liviani Ducis, & Lauretani Principis habuit, aut copiosius, aut dulcius, aut ad permovendos animos magis idoneum? Multa in iis verborum lumina, qua simplicium, qua conjunctorum: crebræ gravesque sententiæ: apta & disposita omnia. Quid porro ejus Versibus admirabilius, aut quod magis cum antiquitate ipsa certare videatur? quos quum legas, nullo negotio te aliquid simile efficere posse confidas, at quum expertus fueris, frustra labores, atque ab incepto deterrearis. Primus ille viam munivit ad optimorum poetarum imitationem in Epigrammate scribendo; quam rationem secuti plures non exiguam sibi laudem, licet in re tenui, pepere-re. Lectu etiam digna sunt nonnulla, quæ ado-

lescens Etruscis carminibus lusit : mollia sunt, arguta, candida, & omnino ad Francisci Petrarchæ normam efficta. Ex quibus omnibus facile intelligitur, quam teretes, religiosasque aures habuerit, quam limato, & acri judicio fuerit : quum & optimos tantum scriptores perlegeret, ac deterioribus ita infensus esset, ut multa Martialis volumina, non sine diris atque execrationibus, statò die quotannis incenderet. Quo tamen factò in multorum incidit reprehensiones, qui videlicet acerbe ferrent, eum poetam despiciatui haberi, quem & ipsi vehementer probarent, & si diis placet, Catullo etiam anteponerent. Nec minorem in eum invidiam excitavit Epistola quædam, dissimulato auctoris nomine a Francisco Asulano emissa, in qua NAUGERIUS adversus Volcatii Sedigiti sententiam gravissimis argumentis contendit, Latinæ Comœdiæ principem, longeque Plauto excellentiorem poetam, Terentium haberi oportere. Sed quemadmodum obrectatores NAUGERIO non defuerunt (quod fatum est clarissimorum virorum) ita laudatores quamplurimos habuit; qui quum præsertim de mortuo loquantur, nulla suspicio est, eos amicitiae causa esse mentitos.

125

J A C O B I, S I V E
A C T I I S I N C E R I
S A N N A Z A R I I
N E A P O L I T A N I,
V I R I P A T R I C I I,
V I T A.



AEUMELLINA Cifalpinæ Galliæ regio est, in Ducis Mediolanensis ditione. Ejus fines ab Oriente, Ticino flumine; a Meridie atque ab Occasu solis, Pado & * Sessite; a Septemtrionibus, Novariensi agro terminantur. Ea quum pluribus castellis & vicis distincta est, tum pagum continet nobilissimum, fossis, aggeribus, portisque munitum, opibus vero frequentiaque incolarum cum paucis conferendum, ut omnino urbis instar esse videatur: SANCTUM NAZARIUM appellant. Nomen invenit (nisi conjectura fallor) e viro fortissimo, qui patre Africano natus, Neronis Cæsaris temporibus maximos cruciatus toleravit, seque acriter morti obtulit, ut pro CHRISTI doctrina, quæ tum primum proferebatur, contra veterem gentium superstitionem propugnaret. Hujus reliquæ corporis, quum diutius

* *Est Sessite*) Ita Plinius appellare videtur lib. 3. cap. 16. flumen quod a recentioribus *Sessa*, vel *Sicida* vocari consuevit.

tius ignoratæ latuissent, Mediolani tandem a Di-
vo Ambrosio, illius civitatis Antistite, repertæ
sunt, statimque a populo summa religione coli
cœptæ: qui cultus adhuc non in urbe solum,
sed etiam in finitimis locis, festis institutis die-
bus, constantissime retinetur. In eo pago, stir-
pis antiquitate, divitiarum splendore, rerumque
gestarum gloria ceteris longe præstitit SANN-
AZARIORUM familia; quæ ab ultimis Hispaniæ
regionibus illuc profecta, eas copias paullatim,
eamque amplitudinem consecuta fuerat, ut im-
moderatæ Vicecomitum potentia sola obsistere
posse videretur. Hoc genere procreatus Nicolaus
Sannazarius, Carolum III. Dyrrachinum, ex An-
degavensibus principibus, qui anno post CHRIS-
TUM ortum ccccclxxx. ab Urbano Pontifi-
ce evocatus, eo consilio in Italiam venerat, ut
regno Neapolitano potiretur, tribunus militum
secutus est; pulsisque demum hostibus, ob singu-
larem virtutem, præclaraque in eo bello edita
facinora, nonnulla in Lucanis castella a Rege vi-
ctore, beneficii loco accepit. Jacobus vero Ni-
colai F. Ladislao Caroli F. strenuo adolescenti,
cui patris morte regnum obvenerat, tristissimo
ac difficillimo ejus tempore, utilem adeo operam
præbuit, eique ad fugandum Ludovicum Ande-
gavensem ita præsto fuit, ut Petrinum, seu Mon-
tis Draconis rupem, apud quam olim Sinuessæ
sitæ

sita erat, bonam item Falerni agri partem, Mas-
sicos montes, oppidulumque ad Vulturni ostia,
prope Linternum illud vetus, P. Cornelii Scipio-
nis Africani secessu & sepultura nobilitatum, ami-
cissimi Regis voluntate possidere cœperit, remque
paternam æque, ac veterem avorum gloriam mi-
rum in modum amplificaverit. Sed, ut rerum
quæ ex fortuna pendent, varia commutabilisque
ratio solet esse, paucis post annis Ladislaus, vi-
genti admodum ætate, nullis relictis liberis, ex-
cessit e vita. quo defuncto, Joanna soror ejus,
impotenti animo mulier, & cujus mores pluri-
mum a fraternis abessent, regni administrationem
suscepit. Hæc, quum sentiret, se odiosam esse
illis qui vivo fratre, honoribus & gratia in aula
floruisent, eos insectari numquam destitit, do-
nec dignitate omni per summam injuriam spo-
liatos, bonis avitis & patriis funditus everteret.
Jacobus igitur ex beato repente miser, tenuis-
simum patrimonium Jacobo Nicolao filio reli-
quit, quo vix principis civis personam, amplif-
simæque familiæ nobilitatem tueri posset. Ista-
men, casus adversos, ut poterat, sapienter mo-
desteque ferens, uxorem duxit Masellam a San-
cto Mango, civem Salernitanam, vetusto & nobi-
li genere ortam, ex qua JACOBUM, cujus potissi-
mum causa hæc omnis mihi instituta narratio
est, ac Marcum Antonium liberos procreavit. Na-
tus

tus est JACOBUS hic noster Neapoli, anno a CHRISTI adventu dccccxlviii. festo die SANCTI NAZARII, v. Kal. Sextilis: quod ipse clarissimis carminum suorum monumentis non semel testatum esse voluit. Per id tempus Alphonfus Aragonius, Rex Neapolitanus, cognomento Victor, qui a Joanna Regina adoptatus fuerat, vir bellica laude maxime præstans, pacisque artibus ornatissimus, mortem obiturus, Ferdinando filio ex nobili concubina suscepto regnum tradidit. Tum & stellæ crinitæ, quas Græci cometas appellant, & prodigia multa in cælo visa; quæ tamquam futurarum signa calamitatum vulgi animos perterrebant. Bellorum deinde motus tota Italia excitati sunt: quibus privatorum bona direpta, liberi homines in servitutem abducti, exercitus sæpe magni occisione occisi. Multa præterea oppida terræmotibus corruere, florētissimisque urbibus pestilentiae vi solitudo & vastitas illata est. SANNAZARIUS igitur pessimis auspiciis vitam exorsus, quum per ætatem nondum ipse sibi prospicere posset, patrem amisit; matrique in tutelam traditus una cum fratre natu minore, fortunæ iniquitatem experiri cœpit. Mater ejus, virilis animi femina, quum se in tantas rei familiaris angustias adductam videret, neque haberet, unde sibi suæque familiæ sumtus liberales suppeditarentur, maxime pro urbis

bis Neapolis opulentia & dignitate, extrema filiorum pueritia in Picentinos concessit, Nuceriaeque Paganorum domicilio collocato, ibi parce admodum continenterque vivebat. Eo in oppido JACOBUS, ut erat eximio ingenio, & ad colendam poesim aptissimo, Librum illum suum vernaculo sermone fertur inchoasse, quem pastorum lusibus amoribusque refertum, ARCADIAM inscripsit. Antequam vero Neapoli excederet, Juniani Maji, celebris eo tempore ludimagistri, domum frequentaverat, a quo Latinis Græcisque litteris diligenter imbutus est. Is porro quanto in honore semper fuerit apud gratum memoremque beneficii discipulum, SANNAZARII Carmina passim declarant, in quibus Majus doctissimis hominibus annumeratur, & ob singularem prudentiam, rerumque usum, miris laudibus in cælum tollitur. Dolebat sane optimo præceptori, summam vim ingenii, qualem scilicet in puero perspexerat, situ veluti quodam ac prædore obsolescere, neque in principum virorum conspectu, pulcherrimæque urbis luce positam esse; iccirco Masellæ* auctor fuit, ne tam egregiæ indolis filium in abdito diutius manere pateretur; sed

R

po-

* *Auctor fuit, ne pateretur*) Hæc loquendi ratio minus Latina sit oportet, si Paulo Manutio auscultare velimus, qui Comment. in Epist. 1. lib. 1. M. Tullii Ciceronis, pag. 6. ita scriptum reliquit: *Addo illud, Auctorem dici, non qui hortatur, ne quid fiat, sed qui hortatur, ut fiat. Itaque, Auctor, & Dissuasor Cicero opponit: ceteraque ejusdem, atque etiam aliorum exempla*
ad

potius, copiis omnibus quæ illi reliquæ essent, contractis, JACOBUM Neapoli ingenue liberaliterque educandum curaret. brevi enim fore agebat, ut sumtus in ea re facti, amplioribus longe commodis, quæ plerumque studiosorum adolescentium industriam consequi solent, abunde compensarentur. Paruit fideli consilio materfamilias, & primo quoque tempore cum liberis Neapolim venit. Florebat ea tempestate in celeberrima urbe Joannes Pontanus, vir disciplinis omnibus, & præcipue illis quibus juvenum animi ad humanitatem informantur, præter ceteros excultus atque expolitus. Ad hujus domum, tamquam ad certissimum Musarum & Sapientiæ templum, flos nobilitatis & juventutis Neapolitanæ undique confluebat: & cuicumque adolescenti bona de ingenio suo spes esset, is neminem alium, nisi Pontanum, studiorum suorum hortatorem quærebat. Quapropter non defuere, qui Pontani Academiam (sic enim ipse lectissimorum ingeniorum concilium illud cœtumque appellabat) equi Trojani simillimam fuisse dicerent; ex qua scilicet non quidem belli duces, urbiumque expugnatores, at egregii poetæ, summiq; oratores plurimi in aper-

ad affirmationem semper, numquam ad negationem spectant. Quæ tamen regula maxime luculento Bruti ad Ciceronem exemplo falsa esse deprehenditur, qui Epistola 15. libri Epist. Ciceronis ad Brutum, hoc pacto scribit: Nam illi (Antillio) ita sentienti de republica magnopere AUCTOR fui, N E differres tempus petitionis suæ. Ipsique M. Tullio Epist. 27. lib. 11. ad Famil. Matius dicitur NON suscipiendi belli civilis gravissimus AUCTOR.

pertum prodierint. Consuetudo autem erat, ut quicumque bonarum artium cupiditate inflammatus ad maximum virum se applicuisset, novum sibi nomen imponeret, ex antiquitate depromptum. putabant etenim, ejusmodi nomina & plus dignitatis in se continere, & blandius quodammodo jucundiusque in aures influere posse. Quo tamen facto nonnulli censoriæ gravitatis homines vehementer offensi sunt; quibus nimirum Christiana lædi pietas, & majorum instituta convelli videbantur, si, nominibus quæ sanctissimorum virorum olim fuissent, penitus abjectis, in eorum locum alia supponerentur, quæ profanarum gentium memoriam renovarent. Sed pleræqueres in hominum vita, quæ neque summam honestatem, neque rursus insignem turpitudinem adjunctam habent, perinde sunt ut accipiuntur; nec quidquam adhuc in eo genere vel a sapientissimis excogitari potuit ita elegans atque perfectum, ut nullos omnino reprehensores invenerit. Pontanus igitur, quo reliquos exemplo excitaret, Jovianus appellari voluit: SANNAZARIUM vero jam pridem in familiaritatem receptum, ACTIUM SINCERUM ex eo nominavit, quod ille princeps ex Latinis bucolico poemate piscatores de amoribus suis in *acta* colloquentes induxisset, & quod sine fuco & fallaciis vitam ageret, nec aliud clausum in pectore, aliud in

lingua proutum haberet; amaretque puram & simplicem dicendi formam, in qua scilicet ipfius ingenium & mores apertiffime elucebant. Quæ vero argumenta impulerint Paullum Jovium, ut monumentis traderet litterarum, a SANNAZARIO avitum gentilitiumque nomen repudiatum fuiſſe, equidem ignorare me fateor. Nam licet JACOBUS, ubi conventus amicorum iifdem ſtudiis gaudentium, aut feſtiva aliqua ſcriptio, hilaritatem & jocos poſtulare videbatur, illo altero nomine ſæpius uteretur, non tamen ad eas inceptias umquam descendit, ut proprium clariffimæ familiæ vocabulum aſpernaretur. immo vero, id ſibi magno ornamento eſſe, & apud poſteros fore, exiſtimans, optimis verſibus commemorare ac celebrare non deſtitit. Quum igitur ad eximiam ingenii ſuavitatem eas artes adjunxiſſet adoleſcens, quæ duros etiam & agreſtes homines mollire ac mitigare conſueverunt, incidit in amorem formoſiſſimæ puellæ, nobili genere ortæ, quam *Carmofinam Bonifaciam appellabant. SANNAZARII autem, & Bonifacii, quod ejuſdem vicinitatis eſſent, in idem quoque concilium Portæ Novæ adſcripti erant. Hujusmodi concilia Neapolitani *ſedes* vocant. quum enim propter urbis magnitudinem cives nobiles domiciliis

* *Carmofinam Bonifaciam*) Ipſe vero Sannazarius, aliiſque ejus temporis poetæ *Harmofynem* vocant.

ciliis inter se distantes, vix unum in locum convenire possent, de republica consultaturi, urbs in quinque regiones distributa est, quarum singulis suam veluti curiam esse voluerunt, in qua viri primarii proxima loca incolentes, sententiam dicerent, & suffragia ferrent. Ut autem omnis ejusmodi amor anxius & sollicitus est, variasque animis perturbationes afferre solet, SANNAZARIUS noctes atque dies miserrime afflictabatur, non enim illi puella mutuam voluntatem tribuebat, sive id pudicitiae custodiendae causa faceret, sive quod ad formosam pertinere arbitraretur, amatorem saevitia exercuciare. In tanta igitur acerbitate postremum illud adolescenti perfugium relinquebatur, plenis querelarum carminibus modo levitatem suam, modo puellae crudelitatem, modo fortunae vim atque imperium accusare; quod quidem egregie praestitit magno breviorum poematum numero, hac recentiori Italica lingua scriptorum, quae maxime omnium Latino epigrammati respondere existimantur. Aliud etiam genus frequentavit, argutis concinnisque sententiis cum superiore fere conveniens, quod vero ad circuitum verborum, numerorum varietatem, figurarumque splendorem attinet, longe copiosius. Hoc veteres Graeci *ᾠδὴν*, Itali multis post saeculis *cantionem* dixerunt. Utroque genere SANNAZARIUS ita excelluit, ut scriptores fere omnes qui-

quicumque a Francisci Petrarchæ obitu usque ad sua tempora lyricam Italorum poesim excoluerant, de gloriæ possessione deturbaverit. Non minimum enim desciverant illa ætate ab elegantia scribendi, contemnisque antiquiorum exemplis, novam quamdam rationem excogitaverant demulcendi aures imperitorum, quæ, corruptis judicii, longe lateque diffundebatur. Acute quidem rem inveniebant, (id quod etiam barbari persæpe faciunt) sed inventam expolire nequaquam poterant, in quo vis omnis eloquentiæ sita est. Sententiæ plerumque improbables erant, contortæ, nimis exquisitæ; verba inculta, horrida, ex trivio arrepta; numeri laxi, fluctuantes, dissoluti; tota denique oratio neque nervis colligata, neque articulis distincta, ut rudem inopemque consilii scriptorem facile agnosceres. Magna igitur SANNAZARIO laus debetur, quod & quanto in errore homines versarentur, aut unus, aut certe cum paucis animadverterit, & ad veterem penitusque insitam opinionem ex eorum animis evellendam summo conatu aggressus fuerit. quæ quidem res ipsi ex sententia successit; paullatim enim sanum ac splendidum orationis genus non juventuti solum, sed etiam iis qui turpiter aberraverant, vehementer probari cœpit. & quod a SINCERO tamquam primis lineamentis inchoatum, adumbratumque fuerat, id postea

ea Petrus Bembus incredibili studio, labore, diligentiaque perfecit. Quum hæc SANNAZARIUS meditaretur, matre optima orbatus est; cujus immaturum interitum in ARCADICIS lufibus elegantissime deploravit. Ut autem puellæ, propter quam curis vigiliisque angebatur, si posset, memoriam omnem deponeret, in ultimam Galliam profectus est; quam regionem ARCADIAE nomine ferunt ab eo involutam fuisse. Ibi quum aliquamdiu moratus esset, sentiretque in dies ægritudinem augeri, neque amicæ, patriæque desiderium ferre amplius posset; quæ amantium inconstantia est, magnis itineribus Neapolim rediit. At huic gravi diuturnoque morbo tristiores medicinam fortuna opposuit; SANNAZARIO enim absente, Carmosina, nondum ætate provecta, de vita migraverat. Qui casus quantum amatori luctum attulerit, satis indicant ECLOGÆ Italica Latinaque lingua conscriptæ, quibus Phyllidis mortem deflet; sic enim ipsi amores suos obducere ac velare placuit. Quum itaque ejus ingenii fama, quæ per omnium fere civium aures pervaserat, in domum Ferdinandi Regis pervenisset, Federicus Regis filius natu minor, juvenis poetarum studiis mirifice deditus, cum ad se cupide arcessitum testis ac sedibus suis recepit, præcipuaque benevolentia prosecutus, in intimis & familiarissimis semper habuit. Præce-

teris

teris autem poeseos generibus, regium adolescentem spectacula illa capiebant quæ veteres mimos quodammodo salibus & jocis exprimerent. quapropter SANNAZARIUS, ut erat ingenio ad excogitandum promptissimo, novis lepidisque fabulis fingendis docendisque, ei quotidie gratior acceptiorque fiebat. Proavorum temporibus adhuc in manibus erat libellus quidam a SINCERO exaratus, facetiarum ac festivitatis plenissimus, quem vulgus Neapolitanum, Gliomerum appellabat. in eo scilicet collecta erant rudia & obsoleta verba, argutæ item brevesque sententiæ, quæ olim populari sermone jactabantur. his auctor multa ridicula addiderat de suo, ut qui opus legissent, ab ingenioso doctoque homine profectum, haud temere suspicari possent. Iisdem artibus & officiis paullatim effecit, ut ipsum Isabella de Baltio, quæ cum Federico nupta erat, & Constantia ex Havalorum gente mulier ornatissima, bonarumque artium supra muliebrem imbecillitatem studiosa, plurimum diligerent atque admirarentur. Hæc quum Federico, germano Isabellæ fratri, in matrimonium data esset, quo die Pyrrhi Ducis Altamurani, soceri sui, domum introivit, totum nuptiarum apparatus a SANNAZARIO optima ratione dispositum descriptumque invenit. Ob eandem ingenii præstantiam, Ferdinando Regi, & Alphonso Calabriæ

briæ Duci, ad quem regni hereditas pertinebat, familiaris factus est. Hunc porro imperatoria laude florentem, bello Etrusco secutus, in ejus exercitu militavit. Comitem etiam illi se præbuit ad Hydruntum recipiendum, fugandosque Turcas, qui oppidum illud suis præsiidiis occupaverant. Mox quum Ferdinandus pro Hercule Ferrariensi Duce, socer nimirum pro genero, contra Sixtum Pontificem, ejusque foederatos arma cepisset, idem Alphonsus ad Nomenti, Tiburisque expugnationem SANNAZARIUM secum duxit; tametsi prope Lanuvium prælio superatus, de gloria, quam maximis rebus gestis adeptus fuerat, nonnihil amisisse visus est. Si quid autem poetæ sub ipsis pellibus otii relinquebatur, id totum in scribendis epigrammatis consumebat; ex quibus unum præcipue celebratur, quo Ladislai, Regis fortissimi, & de SINCERI majoribus optime meriti, facinora complexus est. Ita, quod mirabile omnino videri debet, bellicam laudem cum litterarum studiis conjunxit; quum plerumque contingat, inscitia milites, ignavia litteratos homines laborare. Consecuta sunt deinde ejusmodi tempora, quæ florentissimam Aragoniorum familiam in extremum discrimen sæpius adducerent, regnoque tandem spoliata, exsiliis, continuisque regum funeribus penitus perderent atque delerent. Carolus

S

enim

enim Ludovici F. Galliæ Rex, acerrimo ingenio adolescens, & qui totius Italiæ dominatum appetere, induxerat in animum, regnum Neapolitanum Ferdinando eripere, & ad id facinus maximas copias brevi tempore comparaverat. Sed tanta malorum mole impendente, Ferdinandus, exacta jam ætate, mortem obiit. Alphonsus vero, qui in patris locum successerat, quum potentissimi hostis adventum formidaret, neque in populi principumque civium auxilio spem ullam poneret, quibus nimirum propter crudelitatem invisum se esse intelligebat, pristinae virtutis oblitus, ac fortunæ cuncta permittens, in Siciliam confugit, ibique haud multo post e vita excessit. Ferdinandus itaque ejus filius, cujus mores paternis moderatiores erant, regni administratione suscepta, quantum potuit, Gallorum conatibus restitit; quibus quum par esse non potuisset, avitumque imperium amisisset, nequam tamen animo fractus, rei felicius gerendæ occasionem captabat. Accidit autem peropportune, ut Carolus in Galliam reverteretur; a cujus discessu strenuus adolescens incredibili virtute, celeritate, prudentia, hostes prælio fudit, remque amissam recuperavit. Sed perturbatum regni statum componere molienti acerba mors intervenit. Ad Federicum igitur ejus patrum omnis potestas translata est. Existimabant ho-

mi-

mines , nec injuria , SANNAZARIUM , qui in Regis clientela semper fuisset , neque in tantis calamitatibus ad florentem hostium fortunam umquam ab eo descivisset , summum locum & dignitatis & gratiæ apud ipsum obtenturum . sed eventus omnium opinionem fefellit . Etenim Federicus Robertum quidem Bonifacium , Balthasarem Pappacodam , & Antonium Grisonem , viros nobilitate insignes , quibus familiariter utebatur , donis oppidorum ac vectigalium locupletavit , SANNAZARIO autem pensionem tantummodo largitus est , qua illi sexdecim millia H-S quotannis ex ærario solverentur , rus item suburbanum , in Pausilypi montis latere situm , cui Mergilline nomen est , ob amœnitatem magis , pulcherrimumque Tyrrheni maris prospectum , quam ob fructuum ubertatem , a superioribus Regibus in pretio habitum . Aegre admodum tulit JACOBUS , officiorum suorum , diuturnique servitii tam exiguum sibi mercedem tributam , seque illis posthabitu quos ipse fide benevolentiaque adversus dominum (ut quidem arbitrabatur) aut superasset , aut certe adæquasset . nec sibi temperare potuit , quominus arguto epigrammate muneris tenuitatem Regi exprobraret , agricolam ab eo se factum , non obscure conquestus . At postea loci deliciis caprus , Mergillinem suam laudibus in cælum ex-

tulit, Regemque ipsum liberalitatis nomine celebravit. Otiosam tamen & quietam ætatem sine periculis & laboribus ei diutius agere non licuit; etenim quadriennio post, Ludovicus, qui e Duce Aurelianensi Rex Galliæ in locum Caroli creatus fuerat, & Ferdinandus Hispaniæ Rex, Alexandro Pontifice Maximo suadente, contra Federicum conjurationem fecere, ut eum communibus copiis regno pellerent. Oppressus itaque hostium viribus Federicus, ac regni possessione spoliatus, in Galliam ad Ludovicum abire maluit, quam apud Ferdinandum exsulare. hunc enim, ob consanguinitatis jura nefarie violata, vehementer oderat. Eo casu præclarissimum fidei, constantiæque exemplum a SANNAZARIO proditum est. Nam quum pauci omnino Regem in exsilium secuti essent, & ex his quoque nonnulli, eo relicto, domum rediissent, ipse ab ejus latere numquam discessit, cumque eo tamdiu fuit, dum ille curis ac mærore confectus, mortem oppeteret. Quodque incredibile multis videri possit, antequam iter ingrederetur, quum oppidula duo, & portorium, quod sexto ab urbe lapide collocatum incolæ Gaudellum appellabant, vendidisset, quadringenta viginti tertiam ex venditione collecta, libentissime Regi obtulit, vix exigua tantæ pecuniæ parte ad vitæ necessitates sibi reservata. Neque vero exstin-

ti

cti memoriam colere unquam destitit, sed & in
 ejus funere ingentem lacrimarum vim profudit,
 & qui in eo perdendo operam suam omnem stu-
 diumque posuerant, in hostium numero habuit,
 apertissimoque odio semper persecutus est. Ve-
 rissimile autem videtur, Elegiam illam tertii li-
 bri quam ipse tamquam ad Federicum missam
 in vulgus edidit, post Regis mortem conscri-
 ptam fuisse; in ea enim de ejus exsilio ac se-
 pultura mentio fit. sed fortassis poeta ideo simu-
 latione usus est, ut scilicet Cajetæ vaticinium
 majorem iis qui legissent, admirationem move-
 ret. Jam omnibus pietatis officiis diligentissime
 persolutis, quum patriæ desiderio teneretur, Nea-
 polim rediit, anno post CHRISTUM ortum
 clo Io v. Non est autem silentio prætereundum,
 vetustissimos codices, multisque antea sæculis in-
 visos, a SINCERO e Gallia in Italiam fuisse al-
 latis; particulam videlicet Ovidiani poematis de
 Piscibus, Gratii Falisci, & Olympii Nemesiani
 carmina de Venatione, Rutilii Numatiani Itine-
 rarium; necnon Valerii Martialis, Aufonii, &
 Solini scripta, iis quæ vulgo circumferri sole-
 rent, emendatiora. Neapoli porro (ut erat in-
 signi morum elegantia, quam ex principum vi-
 rorum familiaritatibus hauserat) Joannam Re-
 ginam præcipue coluit atque observavit. Quum
 autem regia in domo assidue versaretur, Cas-
 san-

sandræ Marchesiæ, ingenio ac forma præcellentis puellæ, e comitatu nobilium mulierum quæ circum Reginam erant, amore captus est. Hæc sibi Joannæ voluntatem pudoris ac modestiæ significatione præ ceteris conciliaverat. Non tamen, ut sæpius fit, fœdis perturbationibus agitabatur SANNAZARIUS, ætatem illam jam prætergressus quæ maxime libidinum imperio subiecta est: at veterum Platoniorum more, occultam animi pulchritudinem ex corporis dignitate conjiciens, in ejus potissimum contemplatione mentis oculos defigebat. Igitur omni dictorum factorumque turpitudine procul amota, ea tantummodo puellæ præstabat officia quæ virtuti nihil officere posse viderentur. Nec rivales moleste tulit. quum enim Alphonsus Castriota, vir primaria nobilitate, eodem tempore Cassandram amaret, & ut firmius puellæ animum sibi adjungeret, pollicitus ei esset, se illam uxorem ducturum, ipsumque postea promissi poenituisset; omnes nervos contendit SANNAZARIUS, ut Leo X. Pontifex Maximus, matrimonium ratum haberet, neque Alphonsum juramento solveret; usque in eo est auctoritate Petri Bembi, qui tum Pontifici ab epistolis erat. sed quum ob nimiam adversariorum potentiam, optata impetrare non potuisset, iniquiore in Leonem animo postea fuit. Quemadmodum

dum vero iis iratum se præbuit quorum confilia & mores plurimum a suis distare cognovisset, ita multorum amicitias floruit qui eodem studio litterarum, veritatis, & constantiæ tenebantur. Caros ideo in primis habuit e Neapolitanis civibus, Franciscum Pudericum, acerrimo judicio virum, qui quamvis oculis captus, quid pulchrum, quid rectum esset in scriptis poetarum oratorumque, egregie dijudicare poterat: Lucium Crassum, antiquitatis studiosissimum: Petrum Compatrem, Hieronymum Carbonem, Thomam Fuscum, Rutilium Zenonem, Joannem Franciscum & Marinum Caracciolos, Joannem Sangrium, Antonium Garlonium Allifarum Ducem, Trajanum Cabanilium Trojæ ac Montellæ Dominum, Chariteum, Andream Matthæum & Belisarium Aquivivos, alterum Hadriæ, alterum Neritinarum Ducem; qui omnes elegantioribus Musis mirifice dediti erant: Petrum item Summontium, qui res Neapolitanorum litteris mandavit, Alexandrum ab Alexandro Jurisconsultum, hominem liberalibus doctrinis politissimum, Hieronymum Seripandum Cardinalem, Ferdinandum Havalum, Piscariæ Ducem, imperatoremque fortissimum; a quibus contra impense diligebatur, maximique fiebat. Summa etiam illi necessitudo fuit cum Joanne Pardo Hispano, Philosopho præstantissimo, & cum Antonio

nio Galateo Appulo, qui medicinæ operam dabat. Coluit præterea omnibus officiis Joannem Pierium Valerianum Bellunensem, Julium Senensem, Michaellem Marullum Byzantinum, Bartholomæum Scalam Florentinum, Gabrielem Altilium in Lucania natum, Petrum Gravinam Siculum, Elysiū Calentium Appulum, Aegidium Viterbiensem Cardinalem, Ludovicum denique Montaltium Syracusanum, viros ingenii laude, vitæ innocentia, morumque suavitate spectatissimos. Ex Venetis, Petro Bembo, qui tum in litteris regnabat, & Marco Antonio Michaelio, plurimum tribuit. Aldi quoque Manutii, hominis de politiori antiquitate præclare meriti, industriad atque eruditionem valde suspexit, cui & ARCADIAM suam typis divulgandam permisit. Dilexit & complures alios; quos singulos enumerare nimis longum, atque adeo injucundum foret. Quos autem semel in amicitiam recepisset, iis usque ad extremum spiritum inviolatam fidem servavit; neque umquam commisit, ut aut beneficiorum oblitus, aut in difficultatibus periculisque amicorum lentus ac negligens videri posset. Hanc sane fidelitatis constantiæque laudem, tamquam ipsius propriam & singularem, omnes, ne inimicis quidem exceptis, ACTIO SINCERO tribui debere, una voce prædicabant. Erga Jovianum Pontanum,
quo

quo studiorum suorum impulfore in juventute usus erat, ita semper animatus fuit, ut erga semetipsum; & quamquam illum carminis dignitate, Latinique sermonis elegantia procul dubio superavisset, nihilominus, quoties occasio oblata esset, de illius ingenio, eruditione, sapientia, cum familiaribus honestissime loquebatur. Hujus etiam scripta e domesticæ bibliothecæ tenebris primus in lucem evocavit; adhibitis ad eam rem Francisco Aelio, Petroque Summontio, viris eruditissimis. multorum profecto dissimilis, qui postquam sine cortice natate didicerunt, ut in veteri proverbio est, ac nonnullam dicendi facultatem adepti sibi videntur, eos quorum opera profecerunt, non solum præ se contemnere, sed etiam vehementius insectari solent. Ea præterea SANNAZARII probitas fuit, ut quadam epistola ad M. Antonium Michaelium data, se pluribus quidem saluti fuisse, nemini vero umquam nocuisse, gloriari potuerit. quæ laus una ceteris omnibus merito anteposenda est. A litibus summopere abhorruit; videbat enim, nihil magis animi tranquillitati, studiisque rectioribus adversari, quam strepitum fori, vulgariumque hominum concertationes. Justitia quantum ab ipso culta sit, non uno argumento cognosci potest. Quo primum tempore Gallica natio Neapolitanum regnum invaserat,

T

nul-

nulla æqua judicia fiebant; qui provinciis præerant, maleficio & scelere pascabantur; nobilium bona publicabantur; cuncta denique ex victorum libidine, non ex legis ratione gerebantur. SANNAZARIUS tanta rei atrocitate commotus, egit sedulo cum Petro de Roccaforti, cujus fidei negotia regni Galliæ commissa erant, ut ejus apud Regem auctoritate modus injuriis aliquando statueretur; ad quem etiam Elegiam misit, in qua scilicet Astræam cum ipso conquerentem inducit. Cæsarem Borgiam, Ducem Valentinum, tyrannorum crudelissimum, quem præceps atque effrenata regnandi cupiditas ad pessima quæque suscipienda facinora quotidie impellebat, probrosis carminibus maledictisque vexavit; & de ejus tandem perniciæ lætitiā apertissime tulit. Nebulones, parasitos, comessatores, & qui ad cædem faciendam pretio conducti latrocinia in urbibus exercent, ac noctu diuque cum telo ambulant, maxime oderat. Nec eorum mores probare poterat qui licet ingeniosi, doctrinaque exculsi, reliquos tamen omnes infra se ducerent. quamobrem & Politiano infensior fuit, eumque binis epigrammatis laceravit, quod nimirum, vir alioqui doctissimus, se insolenter efferret, (ut SINCERO quidem videbatur) &, quemadmodum olim Quintus ille Palæmon, secum natas, secumque morituras litteras arbitraretur. atas dif-
fiteri

fiteri nolim, inimicitias quas cum Michaelē Marullo, & Bartholomæo Scala, Marulli focero, Politianus gerebat, præcipuam SANNAZARIO odii causam fuisse. Pietate ac religione in Superos nemini concessit. Quum enim Aegidium Viterbiensem, Augustinianæ familiæ Monachum, improbos homines acerrima concione objurgantem audisset, ac nescio quo Virgilii versiculo, quo ille opportune ad faciendam fidem usus erat, mirabiliter se affici sensisset; gravem illum virum diligere, omniq̃ue officiorum genere prosequi cœpit: ac deinde rerum divinarum amore inflammatus, egregium illud DE PARTU VIRGINIS poema inchoavit, quod omnium sæculorum posteritas admirabitur. Ne autem aliquid prætermitteret quod ad cultum sanctissimæ DEI OPTIMI MAXIMI Genitricis pertineret, in scopulis Mergillinæ templum ædificavit, ejus divini partus memoriæ sacrum, cui templo Monachorum Collegium adjunxit, qui se MARIAE Servos appellant; iisque prædia reliquit, ex quibus octo millia HS in singulos annos perciperent, ad festos dies anniversarios agendos, & ut Federici Regis, ACTII SINCERI, ejusque parentum peccata, DEUM quotidie precando, expiarent. Divo quoque NAZARIO sacellum exstruendum curavit. Præ ceteris vero cælestibus, Augustinum maximum illum Theologum,

Gaudioſum, Jacobum Picenum, atque Antonium Luſitanum, cujus ſepulcrum Patavii poſitum toto orbe terrarum celebratur, a SANNAZARIO in honore habitos fuiſſe, quum ex ipſius poematis apparet, tum ex aliorum teſtimoniis conſtat. Non tamen pietate impediabatur, quominus in ſtudiis humanitatis ac litterarum verſaretur; ſed amicis qui ad eum ventitabant, ſemper novum aliquod epigramma, ſalis atque urbanitatis plenum, aut elegiam recitare ſolitus erat, quæ nitore atque elegantiâ cum antiquorum ſcriptis certare poſſet. In hoc genere Propertium ſibi ad imitandum propoſuit, candidum ſane poetam, Græcorumque ornamentis abundantem; cujus tranſmarinos lepores nativâ quadam Tibulli, & Ovidii ſuavitate paſſim temperavit. Quum vero ad heroicum poema aggreſſus fuiſſet, nuſquam a Virgilii magnitudine deſiciebat oculos, quem adeo admirabatur, ut ejus natalem diem quotannis ſollemni convivio cum familiaribus celebraret. Numerorum poeticorum ſcientiam, ei qui in ſcribendo carmine excellere velit, maxime neceſſariam, at multis antea ſæculis ignoratam, unus perfecte calluit, ac reliquis exemplo monſtravit. de qua ipſum diſputantem, quamvis eo tempore admodum adoleſcentem, Pontanus inducit in eo dialogo cui Aſtio nomen eſt. Quâ potiffimum re, tanta SANNAZARIO deberi glo-

gloria mihi videtur, quantam consecutus est Bem-
bus, quod homines ad M. Tullii scripta diligen-
tius evolvenda primus excitaverit. In opus DE
PARTU VIRGINIS perpoliendum infinitos pæ-
ne labores infumfit, illudque perpetuis annis vi-
ginti accuratissime castigavit; lucubrationum sua-
rum tristic ac morosus omnino censor. Et quam-
quam subtili judicio præditus esset, quo & a
pravis recta, & a mediocribus optima discerne-
re posset, ipse tamen sibi diffusus, ad Franciscum
Pudericum, doctissimum senem, assidue venie-
bat, cumque illo de versibus a se nupetrime fa-
ctis communicabat. Quem ferunt auribus adeo
fastidiosus fuisse, ut a SINCERO decem inter-
dum versus in eandem sententiam recitarentur,
antequam illi plane satisfaceret. Ob hanc nimiam
in scribendo diligentiam, statarium poetam non-
nulli SANNAZARIUM nominavere, qui videli-
cet manum de tabula tollere nesciret. Neque
ulli, dum vixit, iratior fuit, quam cuidam,
qui scripta ejus nondum satis emendata furtim
abstulerat, eaque Venetiis edere constituerat.
Quum autem Leo X. Pont. Max. de tam præcla-
ro poemate audisset (erat enim res in omnium
fermone) incredibilem animo voluptatem cepit;
non solum quod litteratorum hominum conati-
bus favere solitus erat, sed etiam quod e re Chri-
stiana fore existimabat, si pia hujusmodi atque
ele-

elegantia scripta impiorum quorundam scriptis opponerentur, qui religionem a majoribus traditam, eo potissimum tempore labefactare, ac funditus delere cupiebant. Itaque ad SINCERUM litteras dedit, admodum honorifice scriptas, quibus ei singularem in DEUM pietatem, vimque ingenii admirabilem gratularetur, eumque ad perfectum jam opus quamprimum edendum hortaretur. Verum, offensione exorta quam supra commemoravimus, SANNAZARIUS poema apud se continuit, dum Leo e vita migraret. quo mortuo, opus tandem typis descriptum, ab Antonio Seripando Clementi VII. ex eadem Mediceorum familia Pontifici, auctoris nomine oblatum est. Pergratum ac perjucundum sibi munus fuisse, & se tam egregii scriptoris de facie cognoscendi valde cupidum esse, Clemens humanissimis verbis Seripando significavit; eique, ut iustas debitasque SANNAZARIO gratias ageret, imperavit. Quod etiam ipse per litteras præstitit, quibus immortalis beneficio se affectum ab illo confessus est; cui pariter æqualiterque respondere, licet in amplissimo statu collocatus, nulla umquam ratione posset. Ne autem iis dignitatibus SANNAZARIUS ornaretur, quas fortasse, pro meritorum suorum magnitudine, speraverat, Columnensium bella, quibus Pontifex distinebatur, & ejusdem in præmiis tribuendis lentitudo quæ-

quædam, in causâ fuere. Ceterum in Eclogis quoque Piscatoriis ACTII judicium cognitum est. Testatur enim Julius Scaliger, unam ex iis, quæ nimirum secundo loco posita est, apud se exstitisse, in qua multa legerentur quæ postea scriptor diligentissimus immutaverit. Decem ab eo hujusmodi poemata scripta fuerant, si Paulo Manutio fides habenda est: sed quum ex ulteriore Gallia in patriam longo intervallo reversus esset, quinque tantum in scriniis invenit; reliquis aut furto surreptis, aut negligentia suorum amissis. ARCADIAM suam, opus juvenili quodam fervore effusum, ætate provectus minus probavit, eamque multorum efferri laudibus, indigne tulit. Quamvis autem poetarum sui temporis princeps a doctis omnibus haberetur, neque ipse in eo genere mediocritati ullum esse locum existimaret, quos tamen scribendi carminis gloria olim insignes futuros conjecisset, eos magnopere coluit; in quibus Joannem Cottam: cuius etiam mortem epigrammate deflevit. De ceteris ejus moribus hæc feruntur. Magno atque erecto animo fuit, & qui pusillos quosdam obtretractores tanquam e superiore loco despiceret. Quapropter Lucium Joannem Scopam, ludimagistrum, qui plurima antiquorum scripta nunquam in vulgus edita in bibliotheca sua servari, falso gloriabatur, ineptum sane hominem, atque
in

in ipsum ridicule insultantem, adeo contempsit, ut indignum omnino esse duceret cum quo decertaret; ejusque audaciæ jacula levi, ut ita dicam, lateris flexu semper declinavit. Hanc animi magnitudinem nonnulli pejorem in partem interpretabantur: superbum enim & contumacem esse aiebant. Nec minore constantia, Consalvi Cordubensis, qui Magnus Dux a rerum gestarum amplitudine appellabatur, amicitiam repudiavit. Ab hoc enim, quod Ferdinandum, Federici Regis filium, ex arce Tarentina extractum, contra datam fidem in Hispaniam ire coegisset, ubi postea miser consenuit, alienum animum habebat. Qui nihilominus gloriæ cupiditate adductus, quum omnia frustra expertus esset, ut egregium poetam sibi conciliaret, id tandem consilii cepit, ut ad visendum Puteolanum agrum, veterum ædificiorum ruderibus, ac subterraneis ignibus admirandum, eum sibi potissimum ducem itineris deposceret. SANNAZARIUS itaque tanta fortissimi viri comitate victus, ejus voluntati morem gessit. Quum itaque Consalvus iter ingressus, de recentibus Hispanorum victoriis magnifica oratione locutus fuisset, jamque ad speluncam, in ipso Pausilypo monte excavatam, qua Puteolos itur, appropinquassent, Tempus est, inquit poeta, ut postquam res Hispanæ satis a nobis verbis ornatae sunt, de rebus gestis ac virtute

rute Italorum pauca dicamus. Atque ibi de infinito prope servorum numero quem Romani olim ad id specus effodiendum adhibuissent, narrare coepit; multa de veteri historia depromens; eoque tandem, sermonis cursu, devenit, ut diceret, Hispaniam, quæ olim Italorum imperio paruisset, longinqua conversione temporum, victoribus suis jugum imposuisse. Hujusmodi narrationibus delinitus Consalvus ab eo die SANNAZARIUM majore in pretio habuit, ejusque amicitiam studiosissime coluit. Incredibile est, quantum immortalis Venetorum Reipublicæ SINCERUS faverit. Hanc scilicet tamquam unicum antiquæ libertatis exemplum, venerabatur; multaque de ejus magnificentia & splendore honorate & graviter prædicabat. Eum contra Veneri, quasi unum ex suis civibus, diligebant; quumque ille argutum hexastichum scripsisset, quo illorum Urbem Romæ anteferendam esse affirmaverat, tria millia H-S pro singulis versibus Poetæ persolvi jusserunt. Ejus quoque effigies apud ipsos in veteri curia conspiciebatur, a Titiano depicta, prope reliquas summorum virorum; quæ omnes coorto incendio, miserabiliter absumptæ sunt. Quum ille in rerum omnium abundantia viveret, neque ei deesset unde largiorem sumtum facere posset, habitus est ad rem attentior quam satis esset; duo enim tantum-

modo mancipia domi alebat, quorum alteri honestiora officia, alteri culinæ curam commiserat. Quum autem Comes Sanseverinus, qui tum loco Regis Neapolim obtinebat, ut nimiam poetæ parsimoniam perfringeret, mirari se dixisset, quomodo ille cibum capere posset quem servus adeo foedus parasset, hujusmodi a SANNAZARIO responsum tulit: duo in illo mancipio præ ceteris munda esse, mentem nimirum, ac manus. Fallitur Joannes Baptista Crispus, Callipolitanus, a quo SANNAZARII res gestæ accurate quidem, sed omnino impolite, monumentis litterarum traditæ sunt, quum scribit, famulum illum cubicularium, Hiempsalem, coquum vero, Sannazarium, herili nomine, vocatum fuisse. res enim contra se habet; siquidem Alexander ab Alexandro in libris Genialium Dierum, narrat, servum illum ex Aethiopia, qui Sannazarius appellaretur, scitissimum adolescentem, & ob morum elegantiam libertate donatum, liberalibusque disciplinis a domino eruditum; Propertii elegias suavissima voce ad tibiam cantare potuisse; quæ omnia quantum a coqui moribus distent, facile quivis perspicere potest. Joci ac facetiis mirum in modum delectabatur, quæ rerum graviorum tristitiam ac severitatem mitigarent. Nos ejus aliquot festiva & acuta dicta commemorabimus. Quum aliquando in conventu medicorum,

eo præfente, quæsitum effer, quid præcipue oculorum fenfum acuere poffer, aliudque ab aliis magis idoneum judicaretur, ipfe *invidiam* aptiffimum collyrium effer dixit; nonnullosque Ovidii verfus protulit, quorum hujufmodi fententia effer: *alienam fegetem femper videri fertiliorem, ac vicinorum gregibus ubera effer majora*. Nullum inveniri morbum, ajebat, quo plures homines perirent, quam febri tabifica, igniculo fpei excitata. Eos qui ob generis claritatem magnos fibi fpiritus fumerent, hiftrionibus comparabat regali trabea indutis. Librum quemdam Poggii Florentini, fcriptoris alioqui non contemnendi, Judæi domum appellabat, quod alienis pignoribus refertus effer. Interrogatus a quodam, cur tam raro nobilium cœtibus intereffer qui de republica confultabant, ideo, refpondit, quod fuffragia numerari, non appendi foferent. Dicebat præterea, cogitationes & confilia magnarum rerum quæ difficillime efferfici pofferent, eorum militum effer fimillima qui miffionem accepiffer: iis enim fæpenumero, quamvis ufui effer defierint, fipendium tamen ex ærario numeratur. Antiquis familiæ infignibus, quæ difcoloribus ludi latrunculorum tefcellis continebantur, * proprium fignum addiderat, urnam vi-

V 2

deli-

* *Proprium fignum addiderat*) Ut quidem Paullus Jovius memoriz prodidit: legendus tamen Dialogus Scipionis Ammirati, Italice fcriptus, cui *Rota*, five *delle Imprefe* nomen effer; ubi fcriptor elegans narrat, fignum illud, eumque verficulum à *Sannazario*, non fuimet gratia excogitatum, fed ut Marchioni Vici morem gereret. qui poftera conqueri folitus erat, id fibi per injuriam eripi a Jovio, quod ab amici liberalitate olim accepiffer.

delicet, in quam candidos nigrosque scrupos veteres immittebant, ad felices infelicesque dies notandos. Ex hac SANNAZARIUS magnum nigrorum lapillorum numerum, uno tantum candido immisso, pellucere voluerat, hoc urnæ inscripto versiculo:

AEQVABIT. NIGRAS. VNA. SED. ALBA. NOTAS

quumque a Bembo admoneretur, antiquorum urnam haudquaquam pellucidam, sed fictilem fuisse, lepide respondit: suam e crassiori vitro constare. Statura fuit procera, & ad dignitatem adposita, membris solidioribus, facie subtristi, quæ studiosum hominem indicaret. Valetudine autem usus est minus prospera, perpetuoque stomachi languore laboravit. Ex nimis etiam angoribus, assiduaque meditatione, canitiem præmaturam contraxit. Paullo post direptam Romanam a Borbonii militibus, Neapolim atrox pestilentia invaserat; qua ferocius in dies grassante, SANNAZARIUS, exacta fere ætate, ad vicum illum confugit qui olim ad radices Vesuvii situs erat, antequam subitis ignium cinerisque eruptionibus penitus obrueretur. Eo jam pridem secesserat Cassandra Marchesia, atque ibi cælibem vitam agebat. Hujus domum, quamvis a suis ædibus mille passus distantem, poeta quotidie,

tidie, mulierem salutatum, veniebat; ut tantam amoris in sene constantiam omnes vehementer admirarentur. Haud multo interjecto tempore, quum Franciscus Galliae Rex cum Carolo Caesare de Neapolitano regno dimicaret, SANNAZARIUS tristem omnino nuntium accepit: jussu nimirum Philiberti Auranii, Caesariani exercitus ducis, villam suam Mergillinæ, caesa prius Gallorum cohorte, quæ illic ad excubandum confederat, a militibus fuisse dirutam, ne rursus ab hostibus occuparetur. Ea res acerbissimum poëtae dolorem inussit, maxime quod Monachos de quibus antea diximus, honesto illo domicilio excipere cogitaverat. Scribit Jovius, ob hujusmodi factum, ACTIUM SINCERUM tanta in Philibertum iracundia exarsisse, ut quum tandem eum in pugna occisum, audisset, ipse graviter ægrotans, mortique jam proximus, libenter se de vita migrare testatus fuerit, postquam barbarus ille imperator violatis Musis, quibus villa sacra erat, interitu suo poenas dedisset. Mortuus est SANNAZARIUS Neapoli, omnibus quæ ad religionem pertinerent, rite, sancteque persolutis, anno ab humano genere servato clōloxxx. annum agens LXXII. in domo Casfandræ; si fides Rainerio Gualando, viro nobili, habenda est, qui se morientis lectulo adstisse, ejusque cadaver in avitam SANNAZARIO-

RUM

RUM domum transferendum curasse, affirmare solitus erat. Non enim audiendus Trajanus Boccalinus, qui poetam, ex animi acerbitate morbo contracto, in summa rerum omnium inopia, Romæ obiisse, scriptum reliquit. Antequam vero ad sepulturam efferretur, quidam poetarum, doctorumque hominum studiosissimus, formam capitis ejus effingi mandavit, quæ ipsius monumento marmoreo, opera Joannis Angeli Florentini, excellentissimi artificis, affabre sculpto, demum imposita est. Eidem tumulo Petrus Bembo hujusmodi carmen inscripsit:

DA. SACRO. CINERI. FLORES. HIC. ILLE. MARONI
SINCERVS. MVSA. PROXIMVS. VT. TVMVLO

In bibliotheca quoque Hieronymi Seripandi, Cardinalis, a quo maxime colebatur, vera SANNAZARII effigies, in tabula picta, olim exstabat. Sepultus est in templo quod ipse Beatissimæ Virgini, DEI Genitrici, vivens dicaverat; funus procurante Cassandra. Nullos omnino reliquit liberos. Unicum vero filium, quo se orbatum, in epigrammatis * queri videtur, ex qua muliere suscepit, incertum est; quum ceteroqui, uxorem ab eo numquam esse ductam, satis constet.

* *Queri videtur*) Epigr. 18. & 43. lib. 2. quæ tamen carmina alieno Iulio leniendo fortasse scripsit; qui mos poetarum est.

stet. Gens etiam SANNAZARIORUM, quæ Neapoli floruit, mortua nepte Marcì Antonii, fratris ACTII SINCERI, quam Camillus Morumilius, Patricius Neapolitanus, in matrimonio habuerat, tota deleta est. Ita mortalium res omnes definitis temporibus conclusæ circumscriptæque sunt, quibus & incipiant, & sensim augeantur, & demum intereant: ea tantum quæ virtute atque ingenio paratur gloria, numquam senescit, unoque orbis terrarum excidio videtur posse aboleri. Maximo in pretio habita sunt ad hanc usque diem SANNAZARII scripta, non a vulgo solum; cujus judicium leve, fallax, varium, instabile; sed etiam a doctissimis viris, & ab iis qui alienam industriam parce admodum laudare solent, ne suæ quodammodo detrudere videantur. In primis vero Eclogæ Piscatoriæ omnium admirationem promeritæ sunt. Elegantiæ certe poematum SANNAZARII plerosque a scribendo Latino carmine deterruit: Bembusque ipse, quamvis id optime facere potuisset, libris ejus perlectis, ad Etruscam poesim colendam totum se contulit. Quicumque postea heroicum poema attingere voluerunt (si Fracastorium, & Vidam excipias, homines doctrina atque ingenio singulari) longe infra SINCERUM substitere. Aegre ferebat Seripandus, Cardinalis, opus DE PARTU VIRGINIS, tanta

ta cura elaboratum, non a pueris in scholis edisci, quum Aeneidi Virgilianæ orationis maiestate prope par esset, argumenti autem dignitate etiam antecelleret. Non me fugit, Desiderium Erasmus Roterodamum, cui subinvisa erat Italorum gloria, nodum in scirpo quævisse, ac SANNAZARIUM reprehendisse, quod rem sacram fabulis antiquorum inculcandis commaculaverit; sed quum Franciscus Floridus Sabinus in libris Succisivarum Lectionum pro egregio poeta causam dixerit, qui amborum argumenta perpenderent, utri potius adsendendum sit, ii facile dijudicabunt.



DIS-

DISSERTATIO IN LUCRETIIUM.

Viro Doctissimo Clarissimoque

JOANNI GRATIANO

In Gymnasio Patavino Philosophiæ Professori Primario

JO. ANTONIUS VULPIUS S. P. D.



UUM T. LUCRETII CARI, poetæ nobilissimi, ejusdemque philosophi acutissimi, Libros DE RERUM NATURA, ad optimarum editionum veritatem diligenter exactos, meoque sumtu typis excusos, in publico proponere statuissem; quod videlicet bonorum exemplarium pænuria studiosos juvenes jamdiu laborare intelligerem; prorsus autem necessarium mihi videretur, de utilitate ex tam egregio scriptore capienda, quidve in ejus lectione caveri, quid contra seligi ediscique oporteret, paucis exponere; tu statim animo occurristi, JOANNES GRATIANE, nostri temporis philosophorum eloquentissime, ad quem potissimum, tamquam ad judicem harum rerum maxime peritum, orationem meam omnem disputationemque converterem. Dolueram enim sæpissime, has quæ libris præponuntur, & auctoris consilium, susce-

X

pti-

ptique operis rationem declarant, sive Epistolas, sive, ut multis appellare libet, Præfationes, nemini scilicet e doctorum numero inscriptas, ac tantum populari studio commissas, plerumque neglectui esse, aut certe oscitanter legi; quo fit, ut de incognitis rebus pravissima quotidie judicia temere proferantur, utque eruditorum hominum labores non ea qua par fuerat, gratiæ atque honoris mercede excipiantur. Tibi igitur, præ ceteris, viro quum in veteri elegantia, tum in omnis ævi doctrina summopere exercitato, qualecumque hoc industriæ ac diligentia specimen mittendum esse existimavi; futurum enim sperabam, ut nominis tui fama & celebritate, quæ ubique magna est, invitati complures, manum huic scriptioni nostræ cupidius admove-
rent. Quod si etiam, præter te unum, qui nostris hisce legendis otium suum consumere vellet, inventus esset nemo, non ideo me laboris mei fructu, quem petiissem, cariturum videbam: ubi enim alia omnia adversa atque inimica sint, pulchrum tamen est, si minus successum, at optimam saltem de disciplinarum studiis benemerendi voluntatem suffragio tuo gravissimo comprobari. Sed quæ præterea me causæ impulerint, ut hoc ad te litterarum darem, brevissime, si potero, exponam. Audiebam te admodum adolescens, summa juventutis frequen-
tia,

tia, in hoc Patavino Gymnasio e superiore loco philosophiæ decreta illustri cum laude tradentem: audiebam doctorum virorum honestissimos de te tota urbe sermones: audiebam quæ de ingenii tui magnitudine, de tua in veterum recentiorumque physicorum commentariis evolvendis assiduitate ac sollertia, de ista præcipue, in homine philosopho plane admirabili, qua ad Tullium proxime accedis, facultate dicendi, apud exteros esset opinio. Videram libros tuos quos *de Rebus Gestis* invictissimi ducis *Francisci Maurocenti Peloponnesiaci*, tum quos *de Thermis Agri Patavini* copiose atque ornatè conscripseras; & quamvis ea subsidia omnia quæ ad rectè judicandum requiruntur, nondum mihi per ætatem comparare potuissem, quo tamen in pretio habendus esses; ex ipsis librorum argumentis non inanem conjecturam faciebam. Acceperam etiam a majoribus natu, numquam te affinem fuisse earum rerum quas fert adolescentia; numquam, turpe otium atque inertiam secutum; corporis voluptatibus, bonorum ingeniorum pestibus, te enervandum tradidisse; numquam ab honesti rectique tramite vel tantulum deflexisse: at contra dies noctesque in bibliotheca tua delitescere, raro in foro aut in hominum conventibus conspici solitum: semper ea meditatam quæ reipublicæ utilitatem, tibi ipsi gloriam asferre possent:

virilem denique a puero severitatem, prudentiam, animique constantiam, non sine ingenti aequalium tuorum admiratione, praestitisse. Quae quum ego attentius considerarem, acres mihi ad virtutem stimulos exemplo tuo subjici sentiebam; quumque laudi tuae incredibiliter faverem, illum aliquando diem illucescere optabam, quo quanti te facerem, certissimo testimonio omnino perspectum haberes. Huic porro nostrae, quam de tuo ingenio, doctrina, moribus, adolescens imbiberam, opinioni tantum abest ut grandior & confirmata aetas quidquam detraxerit, ut contra insignis accessio facta fuerit: multa enim quae propter judicii imbecillitatem antehac dignoscere nullo pacto poteram, nunc demum penitus intueri licet. Hoc quidem tempore non id in te supra cetera admiror (quamvis id quoque vehementer admiror) quod tibi cum malis etiam hominibus commune esse nihil vetat; multarum nempe rerum scientiam cum singulari eloquentia conjunctam; verum praeclearis illis virtutibus facile primas tribuo, quibus a te invidiam vulgi amoliris; ut nemini, nisi sceleratissimo, tuam consuetudinem, vitaeque rationem reprehendendi locus relinquatur. Quam enim demisse de te tuisque rebus sentis! quam principum virorum, quorum secretioribus consiliis non raro adhiberis, familiaritate innocenter uteris! quam omni-

omnibus auxilio tuo indigentibus facilem humanumque te præbes! quam ab obtrectandi libidine, ac reliquorum contentu abhorres! quam aliena studia, honestosque conatus, ac si tua de gloria commodisque ageretur, quibuscumque rebus potes, adjuvas, tueris, confirmas! Quid porro de pectoris tui candore dicam, nullo unquam malevolentiae felle suffusi? quid de oris tui verecundia, qua omnium vel qui te primum viderunt, animos tibi concilias? quid postremo de illa tua in amicitiis colendis admirabili fide atque constantia, cujus non semel illustria a te data sunt documenta? Fuit hæc in amicos pietas, quemadmodum veteres tradidere, unum ex præcipuis Epicuri decretis, haud paullo gravioris philosophi, quam vulgares censeant ludimagistri; cujus tu rationem philosophiæ, ut est a viro incomparabili Petro Gassendo, nonnullisque recentioribus emendata, & Christianæ religioni accommodata, in plerisque videris non improbare. Quo etiam nomine T. LUCRETII CARUM a te benigne exceptum iri confido, vitio quidem temporum suorum idemtidem insanientem, cetera vero ingeniosum, acutum, bonæ frugis poetam; quodque tibi eum vehementius commendare debet, sermonis elegantiae studiosissimum; quæ quamvis ab Epicureorum grege fere contenta, ad Epicuri tamen sententias cognoscen-

scendas, aliarum quoque sectarum homines facile invitare possit. Hæ sunt causæ quibus adductus, te in rerum pulcherrimarum meditatione versantem interpellare ausus sum: nunc illud te rogo, ut si ea tantummodo in medium afferam quæ a te minime ignorantur, ne continuo mihi succenseas, quemadmodum Phormioni olim, inepto ac deliro seni, de re militari coram se disputanti, fertur Hannibal succensuisse: hæc enim quæ in gratiam tironum a me conscripta sunt, eo consilio ad te mittuntur, ut ea scilicet, si bona fuerint, auctoritate tua confirmare velis; sin autem mala, castigare censura.

Omnis igitur quæ a LUCRETII poematis in legentium animos proficisci potest utilitas, ea procul dubio non aliunde, quam ex rebus de quibus agit poeta, & ex ejus dicendi genere, oriatur necesse est. Si res ipsas consideremus, tria potissimum dispicienda occurrunt: quid videlicet de diis & religione, quid de animorum natura, quid de materia primisque corporibus LUCRETIVS noster, vel potius LUCRETIO interprete doceat Epicurus. Hæc sunt, nisi fallor, desipientis hujus sapientiæ præcipua capita; quæ tamen a nobis breviter summatimque attingentur; non enim ad commentarium scribendum aggredimur (præstiterunt id magna cum laude viri doctissimi) nec est sane hujus loci aut
tem-

temporis longiorem instituere disputationem. Satis erit si juventutem monuerimus, ut meminerit, in LUCRETII lectione, tamquam in lubrico & periculoso loco, sibi caute ac suspenso pede incedendum: non omnibus quæ veritatis speciem præ se ferre videantur, temere adsentendum: ad naturæ sæpe judicium, rectæque rationis normam provocandum: delectu denique utendum, quo & profutura pauca arripiantur, & multa nocitura declinentur. Hinc autem orationis nostræ initium sumemus.

Placet LUCRETIO, & reliquis Epicureis, perturbationes omnes quibus hominum vita exercetur, metum in primis ac superstitionem, non alio pacto, quam rerum naturæ cognitione, leniri ac mitigari posse: dandam iccirco operam philosophiæ, non ut tantummodo inanem quamdam sciendi cupiditatem expleamus, indoctique vulgi plausum & admirationem copia verborum, & linguæ mobilitate aucupemur; quod multis olim propositum fuisse, & hodie adhuc esse, intelligimus; verum ut, populari errore depulso, nihil jam abjectum cogitantes, contraque fortunæ vim, ac mortis terrorem animum erigentes, hoc, quod nobis datur, vivendi tempus tranquille beateque traducamus. Sapienter id quidem, ac bono exemplo; non enim ad hoc nati videmur, ut nosmetipsos negligentes, ac, tamquam

quam incultos agros, vitiorum situ ac squalore horrescere sinentes, cæli terræque ambitum dimetiamur, & quæ natura densissimis tenebris circumfusa esse voluit, in iis vestigandis toti sumus: at potius ad studium justitiæ atque honestatis; unde vera voluptas demum existit. Flagitiosum sane ac miserum est, homines in philosophia diu multumque versatos, plebejis adhuc & anilibus morbis laborare, adhuc lucelli amore flagrare, adhuc gloriolam captare, adhuc invidia tabescere, malisque libidinibus transversos rapi, adhuc spe ac metu jactatos fluctuare; quumque magnifica & sublimi oratione ad populum usi fuerint, in ea tandem probra incidere; quæ a vulgaribus hominibus, naturam tantum ducem secutis, facile devitari videmus. Hinc fit ut philosophi plerumque male audiant; ipsumque nomen philosophiæ apud eos præsertim qui rem familiarem vel publicam gerunt, in contemtionem fere ac ludibrium venerit: existimant enim, rem esse levissimam, neque omnino aliud quam callidam & speciosam inertiam; quod scilicet neque locupletiores, nec adeo meliores familiares suos efficere soleat. Nosti, quid Centurio ille apud Persium dicat: *

*Quod sapio satis est mihi: non ego curo
Esse quod Arcefilas, arumnosique Solones,*

Ob-

* Ser. 3. v. 78.

DISSERT. IN LUCRET. 169

*Obstipo capite, & figentes lumine terram,
Murmura quum secum, & rabiosa silentia rodunt,
Atque exporrecto trutinantur verba labello,
Aegroti veteris meditantur somnia, gigni
De nihilo nihilum, in nihilum nil posse reverti.
Hoc est, quod palles: cur quis non prandeat, hoc est.*

At vero si ad mores formandos, vitæque com-
moda amplificanda totum hoc studiorum genus
adhibeatur, intelliget profecto populus, nullum
esse negotium quod tam operoso salubrique otio
anteponi mereatur, honestioremque aliquanto o-
pinionem de gravissimis disciplinis mente com-
prehendet. Ajunt, Socratem eo nomine philoso-
phos reprehendere solitum, quod otiosis dispu-
tationibus tempus tererent, & in rebus a vitæ
usu remotissimis, omnemque intelligentiæ no-
stræ conatum exsuperantibus multam eamque ina-
nem operam collocarent: quamobrem ipse pri-
mus philosophiam e cælo deduxit, ac studium
omne suum ad morum doctrinam convertit.
Contra Epicurus, quum sibi finem bonorum u-
nicam statuisset voluptatem, sive, ut invidioso
vocabulo abstineam, animi a metu ceterisque
perturbationibus omnino vacui, tranquillitatem,
ac quodammodo libertatem; in abditas propter-
ea rerum causas iis inquirendum censuit, qui
tale ac tantum bonum adsequi voluissent: præci-

Y
puam

puam enim malorum causam hominibus esse arbitratus est veri ignorationem; quod non, ut Socrates, perdifficile inventu, vel, ut Arcesilas ceterique omnes novi Academici, omnino ἀκατάληπτον (a), sed contra, sensuum ductu minime fallaci, promptum expeditumque, quin etiam strenue vestigantibus, ipsum per se benigne occurrere solitum existimavit. Haecenus laudari poterat Epicurus; modo ex rerum naturae contemplatione, falsis ratiunculis deceptus, non eos dementiae, stuporis, atque impietatis fructus collegisset, qui ejus nomini perpetuas infamiae notas apud posteritatem inusserunt. Metum, ait, praeter reliquis animi perturbationibus ei cavendum esse cui curae sit beate vivere; amorem enim, odium, dolorem, iram, paullo rarius, & quasi per intervalla, hominum vitam male habere: metum autem, tamquam Sisypho saxum, assidue capiti impendere, neque ullam adeo miseris voluptatem puram & defaecatam relinquere; quum scilicet praesentibus bonis minus gaudere oporteat in futurorum malorum cogitatione defixos. Est hoc Epicuro commune cum Stoicis, ex quorum praeceptis haec magnifice loquitur Epictetus: (b) κρείττον γὰρ ἐστὶ λιμῶ ἀποθανεῖν, ἢ λυπῶν καὶ ἀφοβῶν ἡυούμενον, ἢ ζῆν ἐν ἀφρόνοις ταρασσόμενον.

Sed

(a) quod comprehendi non potest.

(b) Embridi cap. 16. Praestat enim perire fame, simoniam ac molestiam expertem; quam copiam omnium rerum circumfluentem, animo vivere perturbato.

Sed ob id tamen Epicuri ratio vehementer improbari debet, quod nimirum religionem, ac insculptam in hominum mentibus de Dei providentia, & de animorum immortalitate opinionem, earum quæ in vita sunt molestiarum atque cruciatuum culpam pæne omnem sustinere voluerit: proptereaque summa ope contenderit ut persuaderet, a diis neque mundum administrari, neque ullam rerum humanarum curam geri: animos item hominum, quod corporea natura præditi sint, una cum ipsis corporibus interire. Hæc enim tam absurda sententia malis potius, quam bonis videtur consultum velle. Boni siquidem suppliciorum terrore quæ apud inferos esse constat, quod videlicet ad se non pertineant, minime percelli solent: quemadmodum Lex Julia de adulteriis ei tantum formidanda est qui alienam uxorem corruerit; nemini autem, præterquam parricidæ, culleus metum incutere debet. Nec vero quum se a Deo curari cogitant, horrorem aliquem ex ea cogitatione percipiunt: quin etiam spes omnes suas in eo collocare, atque ab ipso innocentia, virtutis, multorumque benefactorum præmia, postquam corporum vinculis effractis, ex hac turba & colluvione discesserint, tamquam strenui milites ab æquissimo imperatore, exspectare consueverunt. Quæ præmia si auferas, non quidem ab honestate ad tur-

pitudinem traducentur; gratuito enim recte agere, id demum est bonum esse; at fortasse in virtutis curriculo aliquid de pristina alacritate remittent. Mali contra, poenarum metu depulso, qui solus eos in officio continere, aut saltem ab ultimis sceleribus perpetrandis cohibere poterat; si spes ulla se ostendat, occulta fore magistratibus quæ peccaverint, jam libidinibus habenas laxabunt, jam se omnibus stupris, perjuriis, sacrilegiis, cædibus contaminabunt. Egregiam vero disciplinam, quæ bonos a statu virtutis deiciat, malos autem, proposita scelerum impunitate, ad securius peccandum invitet. At quibus tandem rationibus confirmat, humana diis curæ non esse? Sollicitudinis, inquit, expertes deos esse convenit, atque a rebus gerendis omnino feriari; id enim vel maxime ad beatitudinem pertinet. Quasi vero, ut nos homunculi negotiorum varietate ac multitudine obruimur, ita præcellens illa ac divina natura aut lassitudini obnoxia esset, aut diuturnæ administrationis tædio capi posset. Nonne hoc est, quemadmodum Ciceroni videtur*, *verbis relinquere deos, re autem tollere?* Porro, si dii neque gratia moveantur, neque ira tangantur, non video, quo pacto homines de eorum natura, vi, ac potestate quidquam suspicari potuerint; quam procul dubio,
si per

* De Nat. Deor. l. x. in calce.

si per ipsius vestigia cognosci oportuit, beneficentia potissimum, ac vindicta oportuit innotuisse. Videtur autem Epicurusolari potius, quam serio philosophari voluisse, quum *deos non habere corpus, sed quasi corpus, non sanguinem, sed quasi sanguinem* (id quod testatur (a) M. Tullius) litteris traditum reliquit. Posuerat enim, duas tantummodo naturas in universo existere, materiam scilicet, sive corpuscula solida atque individua, & inane, quod locum corporibus daret, ipsique admixtum rerum gignendarum causa esset: nihil præterea excogitari posse quod per se existeret; reliqua vero omnia aut his duobus conjuncta, aut horum eventa appellari debere, ut ex his LUCRETII nostri versibus constat: (b)

*Præterea, nihil est quod possis dicere ab omni
Corpore sejunctum, secretumque esse ab Inani:*

Quod quasi tertia sit rerum natura reperta.

& paullo inferius: (c)

*Ergo præter Inane, & Corpora, tertia per se
Nulla potest rerum in numero natura relinqui;
Nec quæ sub sensus cadat ullo tempore nostros,
Nec ratione animi quam quisquam possit apisci.
Nam quæcumque cluent, aut his conjuncta duabus
Rebus ea intervenies; aut horum eventa videbis.*

Igi-

(a) *Ibidem* c. 18. 25. 26.

(c) *Lib. 1. v. 446. & sequ.*

(b) *Lib. 1. v. 431. & sequ.*

Igitur si dii corpore carent, juxta Epicuri sententiam nec omnino sunt: naturam enim ἀσώματον *, & ab omni materiæ concretionē sejunctam, præter inane, ipse nullam agnoscit. Secum igitur pugnantia docet. Viderat nimirum, si dii corpus habuissent, necessario futurum ut dissolutis corporibus, ipsi quoque perinde ac homines, & universa mundi compages, aliquando interirent; quod quum alienum deorum majestate judicaret, ut ii qui malæ causæ patrociniū susceperē, ad sermonis argutias ineptiasque confugit. Turpem hanc magistri sui sententiarum inconstantiam videtur LUCRETIVS initio poematis imitatus: etenim qui contra deorum providentiam acerrime disputaturus erat, quasi prodito decreto, Venerem supplex rogat, ut ab amatore suo Marte Romanis civili discordia identidem laborantibus pacem impetrare velit. Qui modus vindice dignus eruditissimorum hominum ingenia torfit, veluti ex quadam Petri Victorii Epistola ad Joannem Casam manifestum est. Ego vero existimaverim, Veneris auxilium iccirco invocasse LUCRETIVM ipso in limine operis sui, ut videlicet se poetam ostenderet, significaretque, deos nusquam esse nisi in fabulis poetarum: quibus alioqui omnem fidem abrogare conatus est libro secundo, ubi quid antiquitas

de

* *Exersem corporis.*

de matre deorum Berecynthia, & de Curetibus ejus deæ sacerdotibus commenta fuerit, elegantissimis versibus exponit: & rursus libro quinto, ubi silvarum incolas Faunos, Nymphasque, tum Arcadiæ deum Pana, fistulatorem scientissimum, & si qua sunt alia Græcorum ingeniorum φαρισματι (a), urbane admodum ac lepide irridet. Quæ mihi attentius consideranti illud in mentem venit, tantam illam numinum multitudinem quæ infelicibus illis temporibus *urbes ararum compleverat*, ut nostri poetæ verbis utar, sapientiæ studiosis causam fuisse, cur oppositam (b) ἀθεότητος opinionem turpissime nanciscerentur; quis enim, quæso, naris paullo emunctioris, & a sensu communi non destitutus, ferre poterat minutos illos, & patellarios, tum vappas, ac nebulones deos; in hortorum angulis, in stabulis, in culinis, in cloacis etiam ac sterquiliniis, stultissimorum hominum vota captantes? Igitur, si minus excusatione, at certe miseratione digni sunt veteres philosophi, qui quum adeo indigna de diis sentire non possent, cupientes proferre meliora, ipsi quoque a veritate longissime aberraverunt. Ceterum ea vis est naturæ, ut non solum Plato, Aristoteles, & plerique alii acerrimo ingenio viri, unum rerum omnium auctorem, & conservatorem Deum (qui nobis Christianis

ma-

(a) *Visa, spectra.* (b) *impietatis, quæ deos esse negat.*

maximo ac singulari beneficio pleniorē sui nō-
titiam largiri voluit) cogitatione adsecuti fue-
rint , tametsi qualis esset minime perspexerint ;
verum etiam LUCRETIVS ipse vel invituseum
quodammodo agnovisse , immo & fassus esse
videatur. Quo enim illa pertinent e quinto li-
bro? *

*Usque adeo res humanas vis abdita quædam
Obterit, et pulchros fascis, servasque securis
Proculcare, ac ludibrio sibi habere videtur.*

Profecto dii nihil agentes, & qui nullum ob sce-
lus indignantur, a rebus humanis permiscendis
abstinere dicendi sunt.

Quam vero laborat poeta noster, quam æstuat,
quam se expedire nescit, ubi hominum animos,
quemadmodum reliqua omnia, e corporeis par-
ticulis, tenuissimis illis quidem atque incredibili
pernecitate agitatis, constare docet! Dixeris eum
instituti sui poenitere, qui materiam quocumque
tandem partium ordine dispositam, motuque in-
citatum, sensus, cogitationem, prudentiam, me-
moriā denique efficere posse & ipse crediderit,
& alios persuasum habere voluerit. Quod certe
si quis accuratius animadverterit, absurdorum
omnium absurdissimum esse deprehender. Calo-
rem, aerem, ventum ad effingendum animum
commiscet LUCRETIVS; quibus tamen propo-
siti

* vers. 1232. et sequ.

siti operis summam confici non posse, intelligit: addit igitur quartam naturam, expertem nominis, unde, tamquam a fonte, incipiant oriri sensus: eam persubtilem esse dicit, corpoream tamen. At quum corpus, quantalibet tenuitate præditum, corpus numquam esse desinat, semperque a cogitationis natura plurimum distet, iccirco iisdem rursus difficultatibus poeta premitur, quas, ut erat perspicax, videre facile potuit; ut pessimæ causæ favebat, vitare nullo pacto potuit. Quamobrem argumenta quibus animos post mortem nequaquam superesse, at statim retexi & dissipari contendit, quod infirmo fundamento subnixa sint, jam omnia sua sponte corruunt; quæ sane, si primum illud concederetur, ipsos nimirum corporea constare natura, plurimum ponderis ac momenti habitura fuerant.

Venio nunc ad illam in qua fortunæ omnes Epicureorum positæ sunt, de primis corporibus, & de materiæ soliditate sententiam. Docet igitur LUCRETIVS ex magistri præceptis, innumera esse in rerum natura corpuscula, exiguitate sua sensum omnem fugientia, compositionis, & sensilium qualitatum expertia, partes quidem habentia, sed eas quæ nequeant separari, variis figuris prædita, æterna, per infinitum inane irrequieto motu deorsum tendentia, quorum for-

tuito concursu, sine ullo deorum adminiculo, non solus hic quem incolimus terrarum orbis, & circumfusus ipsi æther aliquando procreatus fuerit, verum etiam alii extra hunc innumera- biles mundi omnibus minimis temporum pun- ctis procreentur; quos tamen singulos, exacta ætate, ob assiduos materiæ nîsus corrumpi oporteat, eadem semper incolumi permanente. Immodicam profecto corpusculis hisce vim at- que licentiam tribuisse videtur Epicurus. Quum etenim ceteri philosophi pæne omnes naturam, ut ait Cicero (a), in duas res omnino dividerent, quarum altera esset efficiens, altera vero huic se formandam atque efficiendam præbens; quum- que in ea quæ efficeret, vim quamdam & facul- tatem, in ea quæ efficeretur, materiam esse cen- serent: quemadmodum Plato mundi deum archi- tectum, res pulcherrimas ex informi materiæ si- nu educentem describit (b), Stoici vero calorem illum ac spiritum per cæli terræque spatia diffu- sum jactare non desinunt, quem mundi animum appellant (c): placuit Epicuro, Democriti ratio- nem secuto, materiam nullo alio indigere a quo moveatur, ipsamque suoapte motu cieri. Hunc autem motum inferiora versus esse dixit; credo, quod reliqua corpora ex primis apta deorsum fer-

(a) *Academic. Quæst. ad M. Varronem lib. 1. cap. 6.* (b) *in Timæo, & in libro de Anima Mundi.* (c) *Cicero de Nat. Deor. lib. 2.*

ferri vidisset; in quo ille, mea quidem sententia, vehementer falsus est. Quid sit enim *descendere* in infinito inani, ubi nihil medium est, quo ex omni regione pondera detrudantur; quæ item superæ, quæ inferæ partes in eodem appellari debeant, neminem arbitror posse intelligere. Porro, quæ de atomi recta descendantis levi declinatione, nec certo loco, nec tempore fieri solita, ut res nimirum effici possent, fatique necessitas tolleretur, arbitrato suo somniavit Epicurus, nostra refutari oratione non postulant, quum eorum vanitatem copiose ac luculenter suo more ostenderit M. Tullius in libris quos de Finibus Bonorum & Malorum, ac de Fato conscripsit. Neque a nobis exspectandum est, ut puerilem ac ineptam illam de simulacris fabulam, in qua exponenda plurimos atque egregios versus perdere non dubitavit LUCRETIVS, cachinno & sibilo excipiamus. Ipsa quam sit futilis, per se declarat: neminem autem sanum in errorem potest inducere.

Fatendum tamen est, quum tot ac tanta peccent Epicurei, multa nihilominus ex ipsorum disciplina vitæ admodum utilia, & ipsi Christianæ religioni consentanea disci posse. Quod enim sensus defendunt adversus Academicorum argutias, neque animi errores iis tribuendos esse clamant; quod res certas a dubiis diligenter secer-

nendas, nec cuiquam viso temere adfentiendum, monent; quod in fulminum, tonitruum, aliarumque rerum quæ in sublimi gignuntur, terræmotuum item, ac morborum quorundam causis explicandis aut vera, aut saltem veris affinia proferunt; quod mundum denique ortum, atque aliquando interiturum testantur; gratiæ illis habendæ sunt, nec est cur eorum cogitatis atque inventis uti nolimus. Præterea, ut ad LUCRETII referatur oratio, multa sunt in hoc poemate, de mortis contemptu fortiter, de temperantia graviter, de humanitate leniter, postremo de animi tranquillitate dicta sapienter. Quibus rebus factum est, ut veteres illi Ecclesiæ patres, summa sanctitate ac doctrina viri, Arnobius in primis, Lactantius, ac Prudentius, a LUCRETII lectione non abhorruerint, ut ex eorum scriptis facile apparet; quum enim sententiarum pondere, tum verborum luminibus, quibus totum hoc poema, quasi gemmulis quibusdam, conspersum est, mirifice capiebantur.

Haftenus de operis argumento, quantum instituti nostri ratio postulare videbatur, dictum a nobis est: deinceps de sermonis genere quo usus est LUCRETII, breviter considerandum. Si quis autem plura & pleniora expetiverit, is Dionysii Lambini, atque Oberti Gifanii, viro- rum doctissimorum, ac de poeta nostro optime me-

meritorum, lucubrationes adire ne gravetur; quibus pauca omnino supersunt quæ adjiciamus. Mirus est igitur in LUCRETII carminibus Romanæ orationis nitor, mirus verborum delectus ac splendor; quod scilicet ejus ætate nondum multitudo illa peregrinorum, atque inquinata loquentium in urbem confluxisset, quæ Latinam linguam iis quæ poetæ mortem consecuta sunt temporibus, ita paullatim immutavit, ut alia prorsus esse videretur. Ex hac porro emendate ac pure loquendi facultate, jucunda legentibus oritur perspicuitas, quæ rebus alioquin obscuris, & intellectu difficillimis, quales necessario sunt quæ a philosophis tractari solent, clarissimam lucem adfert; quo in genere LUCRETIVM excellere, dubio procul fatendum est. Vix enim unus aut alter ex numero philosophorum (te unum semper excipio, JOANNES GRATIANE) soluta oratione ea persequi commode possit quæ scriptor elegantissimus nullo negotio versibus explicavit. Non solum autem proprietatem verborum, causam esse crediderim cur Epicuri doctrina, quam LUCRETIUS exponit, facile percipiatur; sed præterea ordinem, ac totius operis partitionem; qua nimirum alia ex aliis præcognitis ita pendent, omniaque inter se apta & connexa sunt, ut homini non hebeti sciendi cupiditatem addant, de studiis vero tædio ac labore

re multum imminuant. Atque hæc LUCRETIIUM ea tempestate præstitisse, qua Græcorum inventa, subtilesque de rerum natura quæstiones Latinis litteris tradi ac perpoliri posse doctissimi etiam Romanorum diffidebant, quantum a iustis æstimatoribus haberi debet! Verbis quidem horridis, & obsoletis, numeris item præfractis, & asperis, quos ab Ennio aliisque antiquioribus poetis acceperat, sæpius utitur; sed ut sublimitatem, ac majestatem quamdam orationi conciliet, tum etiam ut satietatem devitet, in quam eos incidisse videmus, qui se suaves semper & comtos, numquam austeros & grandes esse voluerunt: Non sum nescius, inveniri nonnullos, ab omni elegantia sermonis, & præcipue a Musarum familiaritate alienissimos, quibus LUCRETIIUM vel digito attingere religio futura sit: diffident enim, se, rebus supervacaneis omnino abjectis (ita hæc studia quæ ab humanitate nomen habent, ipsis appellare placet) nudam & simplicem colere veritatem, quam inanium verborum phaleris violari & obscurari nolint: nihil esse poeticæ levitati cum philosophia commune: hujuscemodi nugis bona adolescentium ingenia depravari, aut obtundi: postremo, tempus omne male perire quod non in solidiorum disciplinarum studio & cognitione ponatur. Hi sunt scilicet qui cum litteris assidue bellum gerunt, qui

qui Aristotelem, Platonem, Theophrastum, ac veteres pæne omnes philosophos præ se stupidos & nihili homines fuisse judicant, quod non, ut ipsi, infantes & barbaros se in philosophando præbuerint, neque in disputationibus gravissimis, poetarum testimonio abuti veriti sint: hi sunt qui M. Tullii Ciceronis nomine audito, ludimagistri cujusdam de trivio mentionem fieri putant. Hos ego si causas docere velim propter quas LUCRETIVS philosophiæ decreta carmine potissimum tradere aggressus fuerit, nihil profecto agam; non enim umquam adduci poterunt ut se omnium bonarum rerum ignaros, omnis eruditionis expertes esse fateantur. Valeant igitur præposterii homines, qui libellos suos (horribiles, boni superi, & sacros libellos!) quos ne ipsi quidem interdum ex animo satis probant, ætatem ferre, ac famæ antiquorum officere posse confidunt. Quamobrem optimos adolescentes, & LUCRETII nostri studiosos, non hos honestarum artium osores, quæ deinceps dicturus sum, legere & cognoscere cupio. Ea est ad permovendos tenendosque hominum animos pulchritudinis vis atque natura, ut res quantumvis utiles, nisi hac, tamquam condimento aliquo suavissimo, adpersæ fuerint, ob adjunctam ipsis difficultatem, paucos omnino amatores invenire videamus. Ex hoc fonte, non aliunde, artes pæ-

ne

ne omnes quæ vitæ commodis inserviunt, originem duxisse videri possunt. Non enim, ut exemplo rem illustremus, satis est architecto, si domum exstruat firmam atque solidam, quæ diurnum lumen admittat, imbres & frigora nimiosque ardores excludat: verum etiam id propositum habet, ut apta partium dispositione, specieque operis grata & eleganti, decora sit atque aspectui jucunda. Idem in vestium ornatu, idem in cibis parandis, idem in militaribus armis, idem in sollemnibus pompis, omnique religionis cultu quotidie servari cernimus. Quid? non ille orbis conditor Deus, quum hanc rerum universitatem, tamquam ingentem aliquam domum, in usum hominum creare statuisset, eam ornamentorum omnium varietate distinguere ac insignire voluit? quam Græci universitatem ab ornatu κόσμον, Latini *mundum* appellavere. Sciebat enim sapientissimus artifex, divinum hoc, & rationis particeps animal pulchritudine potissimum affectum iri. Sæpe quidem sum admiratus, quidnam esset, cur, ut quæque res pulchritudinis plurimum in se contineret, ita maximis obæpta esset difficultatibus; vetus enim illud experientia comprobari videbam, χαλεπὰ τὰ καλὰ *. Inveniebam autem, quum ad difficilia, eademque profutura, capeffenda hortari natura homines veller, cof-

* Difficilia, quæ pulchra.

eosque a laboribus subeundis vehementer abhor-
rere intelligeret, honestatem, pulchritudinem,
gloriam, uberrimam contentionis mercedem ipsis
proposuisse. Quæ quum ita sint, magna profe-
cto laus Empedocli, ac LUCRETIO nostro de-
betur, qui philosophiam, rem humano generi
saluberrimam, at, si cultum ei omnem, & qua-
si vestem orationis detraxeris, tristem ac moro-
sam futuram, carminum suavitate ac pulchritu-
dine, quibus nihil in vita dulcius, juventuti a-
mabilem atque expetendam reddere voluerint.
Operæ pretium est ipsum audire LUCRETIVM,
consilium suum his versibus Memmio exponen-
tem: *

-- quoniam hæc ratio plerumque videtur
Tristior esse, quibus non est tractata, retroque
Vulgus abhorret ab hac; volui tibi sua-viloquenti
Carminè Pierio rationem exponere nostram,
Et quasi musco dulci contingere melle,
Si tibi forte animum tali ratione tenere
Versibus in nostris possem, dum perspicis omnem
Naturam rerum, qua constet comta figura.

Decebat præterea, nisi fallor, res minime hu-
miles aut populares, non familiari & quotidiano
dicendi genere, sed maxime sublimi, quale sci-

A a licet

* Lib. 1. v. 942. & sequ. & Lib. 4. v. 18. & sequ.

licet poetarum est, explicari: quemadmodum ab Homero, pluribus in locis poematum suorum, sapientissime fictum est, alia deos, alia homines lingua uti: mentis enim altitudinem electa & magnifica verba, atque a vulgari consuetudine remotissima subsequi necesse est. Quærat fortasse aliquis, quid sibi voluerit Q. Cicerō, cui adsentitur (a) Marcus frater, quum LUCRETII poemata non ita multis luminibus ingenii, multa tamen artis esse judicavit: quod Q. Ciceronis judicium (b) Dionysius Lambinus, ut ægre admodum ferebat, LUCRETIO ingenii laudem eripi, aut perperam explicasse, aut saltem calide videtur dissimulasse. Multa occurrunt quæ responderi possint, at illa in primis; ex M. Tullii verbis modo memoratis nihil aliud colligi, nisi, præ admirabili artis præstantia, quam LUCRETIVS in suis de rerum natura carminibus adhibuerit, si qua ipsis insint ingenii lumina (insunt autem plura, & egregia) non adeo apparere: vel ipsum operis argumentum arte magis, quam ingenio tractari postulavisse; quod poeta optime præstiterit. Non enim eadem LUCRETII ratio erat, Epicuri sententiam exponentis, quæ Tragicorum, Epicorumque poetarum esse solet, qui nisi res incredibiles, & monstra

pas-

(a) Lib. 2. ad Q. Fratrem, Epist. 11. (b) In Dissertat. de T. Lucretii patria, genere &c. tertiam suam hujus poeta editioni præfixam.

passim confingant, statim de manibus deponuntur. Utcumque vero res se habeat, (nam a Jano Grutero, & Jacobo Gronovio verba illa Ciceronis aliter leguntur) quoties ab angusta philosophiæ semita in late patentibus eloquentiæ campos evagari libuit poetæ nostro, quantum ingenio valeret, fatis ostendit. Principiis & finibus librorum nihil elegantius, nihil splendidius, nihil jucundius excogitari potest. Quam copiose atque eleganter describit LUCRETIVS mutuas inter Martem Veneremque blanditias! Religionem truculento aspectu a cæli regionibus mortalium generi minitantem! Iphigeniam, superstitione Agamemnonis patris, ad aram Dianæ, hostiarum more, raptatam! Corybantes circum Cybelem æra quatientes! cruciatus denique illos quos poetæ apud inferos esse finxerunt, scelestis hominibus in hac vita ingeniosissime accommodatos! Porro quis negaverit ea esse pulcherrima quæ de malis ex amore nasci solitis, de puellarum & amatorum vitiis, de agrestibus & immanis primorum hominum moribus, de pestilentia denique Athenis grassante poeta noster litteris tradidit? In quibus omnibus profecto tanta vis elucet ingenii, ut plane dolendum sit, tam illustre bonum ab egregio scriptore ad Epicuri potius, quam vel ad Platonis, vel ad Aristotelis, vel ad Zenonis etiam, meliorum lon-

ge philosophorum, sententias explicandas collatum esse.

Jam omnium quæ proposueram, tractatione absoluta, reliquum est, Vir doctissime, ut quid in LUCRETIO typis recudendo ego meusque frater præstiterimus, paucis enarrem. Primum omnium, ut poematis contextum quam emendatissimum daremus, Editionem Londinensem Anni MDCCCXII. maxime accuratam atque elegantem, plerumque secuti sumus, quæ fere cum Dionysii Lambini Editione consentit: nonnullas tamen Thomæ Creechii Angli castigationes, qui non ita multis ab hinc annis LUCRETIVM interpretatus est, quod nobis vehementer probarentur, & ad veritatem proxime accedere viderentur, libenter sumus amplexi. Utile autem gratumque lectoribus futurum existimavimus, si ejusdem Creechii Argumenta singulis libris præponeremus, & quæ idem adversus impias ineptasque Epicuri opiniones, breviter quidem, at nerve acuteque disputavit, singulis pariter subjungeremus. Variarum Lectionum libellum, quem Londinenses ex præstantissimis Editionibus, ac MSS. Codd. congefferunt, omittere nolimus: quamvis non ignoraremus, fore ut hic labor noster in multorum reprehensiones incurreret, eorum videlicet qui quum ipsi minutam hujusmodi diligentiam numquam adhibeant, in aliis

aliis etiam irrident. At publicis utilitatibus consulentem, quid imperiti, aut malevoli homines de se in angulis tabernarum effutiant, non admodum curare oportet. Utinam vero ea nobis temporis copia suppeditasset, ut Codices duos manu exaratos, quos ex Bibliotheca Canoniorum Ecclesiæ hujus Patavinæ, antiquis voluminibus instructissima, depromptos, nobiscum perbenigne communicavit Vir nobilitate, doctrina, vitæ integritate præcellens, Comes Trojanus Borromæus, ejusdem Ecclesiæ Canonicus, per otium scrutari potuissemus! Horum alterum Petrus Barrocius, Episcopus Patavinus, homo, ut illis temporibus, non vulgariter doctus, ipse sua manu descripsit. At si novam aliquando LUCRETII editionem nobis adornare contigerit, varias ex iis Codicibus lectiones, modo pretium operæ fuerit, proferre in animo est. Ne quid tamen dissimulem, quum unam aut alteram utriusque libri paginam attentius perlegissem, eos adeo inter se similes esse deprehendi, ut Terentianum illud * de ipsis dici posse videatur:

Qui utrumvis recte novit, ambos noverit.

Verborum denique obsoletorum, & numerorum rationem, tum singularium loquendi generum quæ a LUCRETIO usurpata sunt, locupletissimum Indicem, summaque industria elaboratum, ad-

* *Andria* Prologo v. 10.

adjunxi: in quo conficiendo, si me ab Oberti Gifanii doctissimis Conlectaneis adjutum negem, impudens profecto sim. Non tamen ejus viri auctoritatem ubique mihi sequendam esse duxi, & quæ in illis dicta erant fufius, ipse in adolescentium gratiam contraxi, & multa denique de meis adversariis quotidianis excerpta eodem importavi; ut quivis facile intelliget, qui opellam hanc nostram cum Gifanii laboribus comparare voluerit.

Hæc erant, Vir celeberrime, de quibus apud te verba facere non inutile arbitrati sumus; quæ omnia, pro tua singulari humanitate, æqui bonique consulas, rogamus, quum propter ipsarum rerum dignitatem, tum propter nos etiam tui studiosissimos; qui non plane nulli sumus; cœpimus enim, ut audimus, instituto hoc nostro juvandi optimas litteras, malorum invidiam promereri. Vale. Patavii Kal. Januarii Anno a Virginis Partu cIo Io ccxxi.



JO. ANTONII VULPII
DEDICATIONES, ET PRAEFATIONES.

DEDICATIO OPERUM
ANDREAE NAUGERII.

Illustrissimis atque Excellentissimis Viris

Rei Litterariæ Moderatoribus, HIERONYMO VENERIO
Equiti, ac Aedis D. Marci Procuratori, FRANCISCO
SUPERANTIO Aedis D. Marci Procuratori, LAU-
RENTIO THEUPOLO Equiti, ac Aedis D. Marci
Procuratori, totique Triumvirum Litterario-
rum Ordini Amplissimo

Jo. Antonius Vulpius Felicitatem.



Sumquam, pro mandato vobis mu-
nere, litterarum laudi favistis, Vi-
ri Amplissimi, non dubito, quin
hoc potissimum tempore egregiam
in illas voluntatem vestram decla-
raturi sitis. Veneti enim Senatoris, præclare o-
lim de sua Republica meriti, ejusdemque do-
ctissimi hominis, atque eloquentiæ gloria flo-
rentissimi, Monumenta ad vos afferuntur: ad
vos scilicet, qui ex principibus familiis orti, re-
bus gestis, probitate, prudentia diu multumque
spectati, maximis honoribus perfuncti, summum
gradum & dignitatis & gratiæ in Civitate ve-
stra obtinetis. Is est de quo loquor, ANDREAS
NAU-

NAUGERIUS, qui dum Patriæ commodis inserviret, eamque, propter ejusdem caritatem, reliquisset; in medio ætatis cursu, apud Franciscum Galliæ Regem legatus occubuit. Ea porro fati acerbitate non solum ipse, a quo summa omnia exspectabantur, magno civium suorum dolore, publicæ utilitati creptus est: verum etiam plurima quæ inchoaverat scripta (inter quæ celebris illa Rerum Venetarum Historia) non sine ingenti Musarum luctu, interciderunt. Hujus igitur excellentis viri ego meusque frater & ingenium admirati, & miserati fortunam, Omnia ejus Opera, quæ usquam reperiri potuerunt, tamquam ex ardenti rogo servata spolia, pari fide, ac diligentia collegimus, vobisque, Amplissimi bonarum artium Patroni, inscribenda esse existimavimus. Quibus enim potius NAUGERII Scripta commendanda fuerant, quam vobis, qui & eandem quam ille, Patriam fortiti, & eodem loco nati, &, quod caput rei est, in eodem vitæ genere, gloriæque curriculo usque ab adolescentia versati estis? Dies me profecto, atque oratio ipsa deficiat, si magistratus a vobis gestos, si difficillimas legationes magno animo susceptas, singularique prudentia actas, si liberalitatem, si constantiam vestram, si moderationem in privatis rebus, splendorem in publicis, commemorare ac persequi velim. tantum

DEDICAT. ET PRAEFAT. 193


tum hoc dicam: quum vobis, e reliquis omnibus, Patavini Gymnasii gubernationem, studiorumque curam, quæ gravissima in recte institutis civitatibus esse solet, Respublica vestra mandaverit; vos ab ea sapientissimos, litterarumque amantissimos certo admodum testimonio esse judicatos. Qua laude quid præstabilius, quid magnificentius excogitari potest? Hæc una scilicet & acceptæ a majoribus nobilitati, & exaggeratis opibus longissime antecellit: hæc una hominum vitam caducam & fragilem, angustisque finibus circumscriptam, non solum prætergreditur, sed etiam immortalitate donare potest. Lætis igitur animis, hilarique vultu, Civem optimum, scriptoremque elegantissimum, a sinu oblivionis industria nostra vindicatum, novoque cultu ornatum, & auctum, excipere velitis, Viri Amplissimi: eique vos longo post tempore æquos honores deferre non pigeat, ac olim e Gallia redeunti, si hoc illi per fatum licuisset, majores vestri fuerant delaturi. Simul illud vos oro, ut me tenuem quidem hominem, sed tamen pulcherrimarum artium studio acrius inflammatum, noctesque ac dies de eorum dignitate cogitantem, in fidem vestram & clientelam accipiaris: novamque Typographiam, quam domi meæ ad optimos cujusque generis libros edendos institutam habeo, patrocinio ve-

B b

firo,

sro, ac defensione tueamini. Id si feceritis, dignam rem humanitate, auctoritate, atque amplitudine vestra feceritis. Valete, Patres Amplissimi, & Reipublicæ, ac litterarum bono felices diutissime vivite. Patavii III. Nonas Junii. clō lō cc xvii.

PRAEFATIO IN OPERA
ANDREAE NAUGERII.
LECTORI BENEVOLO.

 YPOGRAPHICAM Artem, quæ summo DEI OPTIMI MAXIMI beneficio hominum generi concessa est, prima ejus ætate docti admodum, & honesti viri magna industria diligentiaque excoluere. Ab his auctior facta, latiusque per orbem propagata, in eam sensim fortunam devenit, ut a plerisque male omnino haberi, ac patrimonii tantum augendi causa exerceri cœperit: & iccirco litterati homines ab ea deinceps tractanda manus abstinere satius arbitrati sint. Ob id, quæ duæ res arctissima societate junctæ inter se fuerant, scriptores nimirum optimos typis divulgare, & ad ipsorum emendationem non mediocre ingenium, & do-

& doctrinam adhibere; eandem postea disjunctæ atque distractæ non perinde uberes fructus attulerunt. Quo magis de litteris præclare merentur non pauci ex eruditorum numero apud Transalpinas nationes, & in Italia quoque nonnulli, qui in id totis viribus incumbunt, ut quæ vel ab antiquis, vel a recentioribus sapienter excogitata, eleganterque conscripta sunt, ea in manus hominum accuratissime castigata, magnificeque exornata perveniant. Horum igitur exemplo nos excitati, quamquam nec studiis bonarum artium, nec ingenio, neque ulla alia re cum iis conferendi sumus, nulli tamen sumtui parcentes, Typographiam domi nostræ instituimus, eique hominem diligentem præfecimus, ad egregios in omni disciplinarum genere libros edendos; præsertim vero ad illorum memoriam renovandam qui sanioris Eloquentiæ, atque Eruditionis laude floruerunt. Hanc nostram publicis commodis inserviendi voluntatem a studiosis quibusque, & potissimum ab Italis, æqui bonique consultum iri speramus; quod si adsecuti fuerimus, vitæque, & valetudo suppeditaverint, majore in dies alacritate susceptum opus urgebimus. Specimen igitur diligentæ nostræ præbituri, ANDREAE NAUGERII, Patricii Veneti, quo scriptore magis elegantem, ac nitidum haud alium facile invenire possis;

Monumenta undique collecta typis describi curavimus; nihil fere prætermittentes quod vel ab eo profectum, vel ad ejus nomen, gesta que illustranda utcumque pertinere duceremus. Et nihilominus nonnulla fortasse nos effugerint; id enim est humanæ infirmitatis: & quædam fortasse in abdito latent, quæ nulla hætenus inquisitione erui, & in lucem protrahi potuerunt. Utinam ille aliquando illucescat dies, quum plura suavissimi hujus Poetæ Carmina, quæ apud Laurentium Pignorium, doctissimum virum, olim exstabant, ex alicujus bibliothecæ forulis depromantur: tunc enim demum confecta res fuerit. Interim, quantum Joanni Baptistæ Recanato, Patricio Veneto, debeamus, studiis politioribus mirifice dedito, jamque satis libris editis claro; quantum Apostolo Zeno, viro non doctrina minus, quam humanitate spectato, vix est ut oratione complecti valeamus. Ab his videlicet opera, consilio, codicibus, perquam benigne adjuti sumus. Non solum autem elegantia, & nitor NAUGERII nos impulerunt ut ab ipso potissimum laboris hujus nostri caperemus exordium; sed præterea hominis Patria & Nobilitas cohortata est, quæ scilicet liberalium disciplinarum gloriam in illo quodammodo efficit ampliorem. Si enim auspicato res gerenda erat, non aliunde initium ducere oportuit, quam a flo-

florentissimæ Venetæ Reipublicæ, cujus Imperio paremus, Cive optimo, ac sapientissimo; qui plurimis etiam eodem loco natis exemplo esse possit, ut majorum suorum vestigiis insistentes, eorum virtutes, & studia ardentius æmulentur. Sed jam, quid in hac Editione a nobis præstitum sit, paucis exponere aggrediamur. Circumferebantur uno volumine Orationes duæ, altera in Bartholomæi Liviani, altera in Leonardi Lauretani funere a NAUGERIO habitæ; nonnulla item Carmina: omnia amicorum ejus diligentia posteris conservata. His plura adjicere visum est, quæ aut dispersa in libris latebant, aut dissimulato scriptoris nomine in manibus versabantur. Et primum Epistolas tres exhibuimus, lectu sane dignissimas, quas ille Ciceronis Orationibus opera sua emendatis apponi curaverat: has proxime alia consequitur, quæ Latinæ Comœdiæ principatus Terentio adjudicatur, Francisco Asulano Typographo ab Auctore afficta, fortasse ut invidiam effugeret; quemadmodum Franciscus Floridus Sabinus, ob ejusmodi sententiam NAUGERIO iniquior, Henricus item Stephanus, uterque Plauto mirum in modum addicti, existimasse videntur. Accedunt Doctorum aliquot Virorum ad NAUGERIUM Epistolæ, ex quibus, quanto is esset in honore apud excellentes doctrina viros, facile apparet. Variarum
etiam

etiam Lectionum in omnia Opera P. Ovidii Nasonis rationem habendam esse duximus; in quibus multa passim occurrunt quæ non contemnendam poetarum studiosis afferant utilitatem. In his, Lector, videbis numerorum notas Ovidii carminibus appositas: typorum quoque varietate ad distinctionem usi sumus; quod etiam in propriis nominibus, rebusque insignioribus denotandis ubique a nobis factum reperies. Carmina porro NAUGERII nova accessione cumulavimus: addidimus enim ex Origini-
bus Patavii Pignorianis suavissimos Hendecasyllabos in Vancium vicum Patavinum: item Epigrammata duo ex Gagnæji, atque Ubaldini carminum collectionibus. Nihil est autem quod mirere, Hieronymi Fracastorii de Poetica Dialogum inter NAUGERII lucubrationes collocatum: ut enim in Platonis libris adhuc antiquissimi illius Socratis sapientia vivit, quum ipse de philosophia litteram omnino nullam fecerit; similiter, tot NAUGERII scriptis deperditis, quænam ejus de poetarum studiis sententia fuerit, non injucundum fortasse erit e Fracastorio cognoscere. Atque hæc quidem de Latinis Monumentis. Sequuntur nonnulla, Italica, quæ nunc utimur, lingua conscripta: Versus nimirum faciles, arguti, elegantes, ex vetustis libris, ac propemodum ignoratis deprompti; quibus

DEDICAT. ET PRAEFAT. 199

τὰς μεταφράσεις Epigrammatum aliquot NAUGERII a claris Poetis elaboratas addere visum est, in primis vero quasdam Petri Angelii Bargæi, nondum vulgatas: tum Epistolæ quinque ad Joannem Baptistam Rhamnusum ex Hispania missæ, duabus Petri Bembi ad NAUGERIUM adjectis: postremum Descriptio itineris per Hispaniam, Galliamque ab Auctore confecti; opus quidem non adeo multis luminibus ingenii exornatum, sed tamen utile, copiosum, varium. Quæ duo, Descriptionem, & Epistolas, sexcentis locis emendavimus; erant enim in antiquis exemplaribus fœde corrupta. Ne quid autem a nobis omissum queri aliquis posset, Doctissimorum Virorum Testimonia de NAUGERIO collegimus, non quidem omnia (id enim infinitum fuisset) sed tantummodo illustriora: ex quibus, nec non ex ipsius NAUGERII scriptis, brevem ejus vitæ Historiam diligentissime concinnavimus. Hæc sunt quæ in hac Editione præstitimus. Tuæ humanitatis erit, Lector candide, si alicubi a nobis peccatum fuerit, ignoscere; & si quid forte, præsertim in orthographia, deprehendas quod tibi minus probetur, non continuo id vitio vertere; scis enim, in ea re tot pæne sententias esse quot capita. Utinam hæc qualiacumque tibi, atque eruditis omnibus grata accidant: erit scilicet, cur sumtus,

tus, & labores nostros, qui non mediocres hercule fuerunt, leves arbitremur; nostraque deinceps cura excitetur ad majora in dies publicis commodis, utilitatique adornanda.

DEDICATIO FABULARUM GABRIELIS FAERNI.

Illustrissimo & Reverendissimo Præsuli

FORTUNATO MAUROCENO

Episcopo Tarvisino, & Pontificii Solii
Episcopo Assistenti

Jo. Antonius Vulpinus S. P. D.



ON deerunt fortasse, Præsul sapientissime, quibus res insolens planeque a decoro aliena videatur, me tibi potissimum, viro & instituto vitæ, & dignitatis ratione gravissimo, hæc GABRIELIS FAERNI Fabulas quæ iterum proferuntur, nugas videlicet ac primæ ætatis oblectamenta (sic enim ipsi appellare amant) inscribendi consilium cepisse. Quid enim, dicent, Episcopo cum Apologis? aut quid tandem emolumenti fecerint rei Christianæ otiosorum hominum cogitata, acuta quantumvis atque elegantia? Huic ego generi obtrectatorum ad repreh-

prehendendum accusandumque paratissimo satis responsum esse arbitror, si unam tantummodo aut alteram pagellam vertere voluerint: invenient enim, Silvium Antonianum, incredibili doctrina & pietate hominem, atavorum temporibus, hunc eundem Fabularum Libellum, quum primum ederetur, Carolo Borromæo, S. R. E. Cardinali, dicavisse: ei scilicet quem propter excellentes divinasque virtutes inter Cælices locatum veneramur. Quod si clarissimo exemplo uti non liceret, non continuo mihi defensionem omnem ereptam existimarem. suppeditarer quippe longe gravior Sacrorum Librorum auctoritas, in quibus alicubi * arbores inter se colloquentes, & de rege creando deliberantes introducuntur: quod certissimum argumentum est antiquitatis & nobilitatis Fabularum. At sint hujusmodi narrationes puerorum præcipue causa efficiæ: num propterea principum virorum auribus indignæ censerī debent? Inter illa quæ antiquis legumlatoribus, rerumque publicarum conditoribus cordi fuisse legimus, primum fere locum obtinuit instituentæ juventutis cura; videbant etenim, in ætate illa rudi atque infirma bonorum malorumque temporum semina contineri; & iccirco nihil tene, nihil pusillum ducebant, cujus adminicu-

C c

lo

* *Judicium cap. 9. v. 8.*

lo parentes melioribus liberis uti possent. Quantum vero nudam illam & incomptam veritatis faciem pueri aspernentur, omnibus, opinor, paullo humanioribus perspicuum est. Necesse igitur fuit ad eorum animos pravis cupiditatibus liberandos, virtutisque amore sensum imbuedos, præceptis e media philosophia petitis jucunditatis aliquid inspergere, ne scilicet honestarum rerum tædio ac labori turpium voluptatem anteponerent. Hinc porro intelligi potest, multa ex poetarum figmentis, eaque non contemnenda, in hominum vitam commoda promanare. illud modo caveatur, ne sine ullo discrimine quæcumque ab iis per ludum & jocum, aut etiam altiori quadam obscuraque ratione scripta sunt, adolescentibus ediscenda proponantur. Nam ut olim Aegyptus magnam utilium, magnam item noxiarum herbarum vim producere, vulgari proverbio ferebatur; sic in poematis futes, molles, impiæque sententiæ, prope salubres honestasque collocatæ, passim occurrunt, quæ mentes imperitorum a recti studio facillime abducere, integrisque moribus pestem atque exitium præsentissimum asferre possint. Quapropter singularem innocentiae laudem tulisse videtur GABRIEL FAERNUS, qui Fabularum suarum materiam diligens ex optimis antiquitatis auctoribus, tamquam Catoni alicui,
aut

aut Curio industriam suam probaturus, eam semper in scribendo constantiam tenuit, ne quid minus virile, minusve castum versiculis suis immisceret, & iis plerumque argumentis uteretur quæ ad appetitus legentium contrahendos, virtutemque commendandam valde profutura existimasset. Hæ igitur me causæ cohortatæ sunt, Præsul ornatissime, ut hoc tibi munusculum sidenter offerrem: sed in primis admirabilis humanitas tua dubitantem confirmavit; cujus ope & plurimum gratiæ apud omnes qui te novērunt collegisti, & ut præ ceteris litterarum studiosi te certatim diligerent, effecisti. Quum enim ea in familia natus sis, quæ in vetustissimis florentissimisque totius Venetæ Civitatis numeratur, eumque Patrum habueris, qui rerum bellicarum splendore adeo claruit, ut cum invictissimis omnium sæculorum imperatoribus conferri debeat, ejusque nomen, licet extincti, barbaris nationibus timorem adhuc fugamque injicere posse videatur; in hac nihilominus tanta benignitate fortunæ, superbiam, fastidium, arrogantiam tibi magnopere fugienda esse duxisti, idque ab adolescentia vitæ genus amplexus es, in quo nihil præclarius habetur, quam dignitates atque opes excelsio animo despiciere, unam colere pietatem, inanibusque vulgi opinionibus summo studio adversari. Atque ibi

atatem jucundissime exegisses, nisi Clementis
 XI. Pont. Max. providentia te ad Tarvisinam
 Ecclesiam administrandam e solitudine illa evo-
 casset. Hoc autem quanto consilio ab Optimo
 Pontifice factum sit, ii demum intelligunt qui-
 bus ingenii, prudentiæ, doctrinæque tuæ magni-
 tudo antea perspecta est. ut enim de rerum divi-
 narum scientia, quam tibi longis vigiliis assi-
 duoque labore comparasti, nihil in præsentia lo-
 quar, nullum fere disciplinarum genus est quod
 non attigeris; nullum, cujus doctores non in
 familiarium amicorumque loco semper habue-
 ris. Memini ego, &, dum spiritu perfruar, non
 sine grato quodam animi sensu, meminero, te,
 quum primum institutum hoc nostrum vulgan-
 di illustrandique bonos auctores & cognovisses,
 & probasses, domum nostram cupidissime ad-
 ventasse, nobisque gratulatum esse hanc juvan-
 di elegantiores litteras voluntatem, itemque plu-
 ribus verbis hortatum esse, ut susceptum opus,
 contentis malevolorum hominum reprehensionibus,
 majore in dies alacritate urgeremus. quod
 etiam præstitit germanus Frater tuus, Vir Amplif-
 simus, tuique vere simillimus, qui nuper Pata-
 vini Gymnasii procurationem accepit; quum ei
 Andreæ Naugerii Monumenta, nostris curis col-
 lecta atque exornata, præbuissem. Nobis igitur
 eo studio quo cœpisti, Antistes humanissime,


fa-

DEDICAT. ET PRAEFAT. 205

favere, obsecro, perge: &, ubi per otium licuerit, FAERNUM in manus sume, ejusque lectione animum seriis cogitationibus fatigatum remittere atque oblectare velis. id si feceris, magnum pulcherrimumque laborum meorum tui se fructum mihi videbor. Vale. Idibus Januariis. clobccxviii.

PRAEFATIO IN FABULAS
GABRIELIS FAERNI.

LECTORI BENEVOLO.

 ATINAE Poeseos incorruptus ille candor, germanaque suavitas, quam elegantissimi doctissimique homines ante duo fere saecula pertinaci labore, optimorumque poetarum imitatione adsecuti fuerant; neque ita longo intervallo temporis consenuit, & jamdiu celebrari, atque in pretio haberi desiit, amice Lector. Ut enim Sannazarios, Fracastorios, Bembo, Naugerios, Castilionios, Flaminios, Amalthæos, Vidas, Lampridios, Casas, ceterosque eorum similes fatum suum peremit; pauci admodum ad nostram usque ætatem exstiterunt qui aut ipsi aliquid egregium, & posterorum cognitione dignum

gnum hoc in genere præstare possent, aut ullum omnino antiquæ simplicitatis gustum habere viderentur. Rursus igitur ad barbariem, seu quid barbarie foedius atque inquinatius est, res poetica paullatim rediit: quum interea homines leviter litteris imbuti, suoque judicio beati, illud in condendo carmine unice spectarent, ne quid syllabarum rationi legique metricæ adversaretur: nihil præterea de verborum delectu, nihil de figurarum splendore, de sententiarum gravitate, de moribus animique affectibus exprimendis, de totius denique fabulæ structura & compositione solliciti. Quæ nihilominus judiciorum perversitas utcumque ferri potuisset, nisi ad illam gravius longe malum accessisset. quum enim primum ea colluvio in scholas invasit, simul ornatissima, magnisque curis & vigiliis elaborata poemata de manibus adolescentium excuti cœperunt; ut jam plerique ex istorum numero qui aures suas ineptiis dedidere, illustrium scriptorum nomina ne fando quidem audiverint; quum ceteroquin *Suffenos, et Venena omnia* (ut Catulli verbis utar) tamquam ungues & digitos suos diligentissime teneant. Quo magis nostra hac tempestate danda opera est, ut, quando in pulcherrimam spem veteris eloquentiæ restituendæ nos adduxit excellentium quorundam virorum industria, qui acerrimum contra

tra falsas istiusmodi opiniones bellum gerere nunquam intermittunt; cultissimi quoque poetæ ex abdito bibliothecarum, ubi hætenus delituere, in lucem & conspectum hominum, quasi postliminio, revocentur, in eumque locum existimationis & gloriæ, unde per summam injuriam dejecti deturbatique fuerant, tandem aliquando restituantur. GABRIELIS itaque FAERNI Fabulas, ex antiquis auctoribus delectas, carminibusque comprehensas iterum proferre constituimus, dignissimas sane, non solum quæ a pueris in scholis ediscantur, sed & in quibus legendis universi qui litteras amant, otium suum collocare non dedignentur. quum enim formandis juventutis moribus multa utilia salubriaque præcepta continent, tum eo lepore conditæ, eaque Latini sermonis proprietate insignes existunt, ut ex iis Terentianæ atque Horatianæ veneres quodammodo redolere videantur. Fabulis porro & alia ejusdem scriptoris Carmina adjungere visum est, in quibus omnibus elegantia par & doctrina conspicitur, in primis vero studium probatissimorum melioris ævi poetarum mirum in modum elucet; sine quo Latinas Musas qui tractant, ii demum gnaviter insanire dicendi sunt. Et quoniam eadem fati acerbitas FAERNUM præripuit, quæ Andreæ Naugerium, antequam scilicet fructum aliquem laborum suorum capere

re posset, iccirco Libellum quem de Versibus Comicis inchoaverat, omittere nolimus; existimantes gratum futurum eruditis id quaecumque ingentis operis rudimentum: non secus ac qui signis & picturis delectantur, nobilium artificum simulacra non modo perfecta atque exposita, verum etiam mutila, vel primis tantummodo lineis informata conquirere consueverunt. Ex hoc autem fragmento plurima *σφάλματα*, quæ in editionem Florentinam anni M.D. LXV. irreperant, sententiamque foede turbabant, accurate sustulimus. Addidimus etiam FAERNI Præfationem (ut vocant) in Philippicas M. T. Ciceronis ex vetustissimo Codice Vaticano ipsius industria emendatas, nec non Vincentii Luchini, Petri Victorii, & Silvii Antoniani Epistolas ad FAERNUM pertinentes, eo consilio scilicet, ut ingenium, & probitas viri, magnique pro bonarum litterarum dignitate ab illo exantlati labores adolescentibus innotescerent. Aliam denique FAERNI Epistolam vernacula lingua conscriptam, & a paucis omnino visam, qua Caroli Sigonii emendationes nonnullæ in T. Livium reprehenduntur, & vulgata lectio defenditur, ut oculis tuis exhiberemus, Lector candide, nobis auctor fuit Dominicus Lazarinus de Muro Maceratensis, vir nobilissimus, qui Græcas Latinaeque litteras in Patavino Gymnasio summa

DEDICAT. ET PRAEFAT. 209

ma cum laude profitetur, & hoc potissimum anno T. Livii Historiarum libros docte & copiose explanat, iisdemque a Criticorum temeritate sæpius male habitis salutis atque adjumento est. Hujus igitur cohortationem humanissimam, quam ante FAERNI Epistolam collocavimus (quod bono tuo fiat) perlegere ne graveris, nosque ad cetera quæ sunt in manibus, perficienda favore tuo alacriores redde.

DEDICATIO POEMATUM
HIERONYMI FRACASTORII.

Marchioni Illustrissimo

SCIPIONI MAPHAEO,

Patricio Veronensi, Eruditissimo
ac Sapientissimo Viro,

Joannes Antonius Vulpus S. P. D.



ULTAE causæ me impulerunt, SCIPIO MAPHAEI, Vir illustrissime ac sapientissime, ut HIERONYMI FRACASTORII Poemata, itemque JOANNIS COTTAE, JACOBI BONFADII, ADAMI FUMANI, & NICOLAI ARCHII, Veronensium Poetarum, Carmina nonnulla, suavitatis atque elegantiae plenissima, quæ

D d

nunc

nunc nostris curis emendata de integro prodeunt, in tuo potissimum nomine apparere vellem. Primum enim, quam de tua singulari virtute, præstantique litterarum scientia, opinionem jamdiu animo imbiberam, eam omnibus certo aliquo testimonio significare vehementer cupiebam; non quod ex meo qualicumque suffragio ullam tibi gloriæ accessionem fieri posse existimarem; quippe hoc levitatis ac dementiæ fuisset non ferendæ: sed potius ut in te observando colendoque ipse mihi satisfacerem, ab eorumque stupore longissime abessem qui maximorum ingeniorum luce, insolitæque doctrinæ specie nihil admodum commoventur. Deinde illud cogitabam; quemadmodum olim FRACASTORIUS, doctissimis monumentis ad sempiternam memoriam temporis propagatis, urbis Veronæ, in qua natus erat, Italiæ totius, ac sui denique sæculi decus atque ornamentum existisset, eamque scribendi carminis facultatem adeptus esset, ut uno Virgilio inferior, vel æmulorum confessione judicaretur: sic te ex amplissima vetustissimæque familia pariter Veronæ ortum, divina providentia delectum esse, qui scriptis editis immortalibus ætatem hanc nostram mirifice illustrares. Nemo satis pro dignitate laudare possit Libros illos tuos vere aureos in quibus contra falsas quorundam opiniones acerrime

rime disputas, qui futilibus impiisque præceptis nobilium virorum animos contentionis rixæque cupidos efficere studebant. Eas nimirum disputationes, simul ac typis descriptæ circumferri coepere, tanto favore omnes boni prosecuti sunt; ii præsertim quos curare oportet ne quid Christiana Respublica detrimenti capiat; ut veteris immanitatis notas, quas barbarorum in Italiam adventus nostris moribus fœdissime inusserat, sapientia tandem tua penitus deletum iri prædicarent. Quis autem non valde miretur, hominem philosophiæ semper vacantem, summiq; officii rationem diligentissime perquirentem, si ad mansuetiores Musas oblectamenti causa interdum accesserit, iis palmam eripere qui ætatem omnem in eo studiorum genere consumserunt? Te vero ejusmodi esse quum alia multa testantur, tum in primis Tragœdia nobilis, quam ad veterum Græcorum lucernam elaboratam, his proximis annis publice spectandam exhibuisti. hæc scilicet ubicumque locorum acta est, fletum spectatoribus excitavit; nec tantum quum daretur nova, at decies repetita multitudinis oculos tenere potuit. Præclarum est, in singulis disciplinis singulos homines excellere; at quanto præclarius, unum aliquem reperiri qui quæcumque fere in disceptationem cadunt, innumerabilia sane, ac nullis prope terminis de-

finita , animo universa comprehendat? Si quis hoc fieri neutiquam posse arbitratur, is domum tuam veniat, tecum colloquatur, periculum faciat in litteris , in arte dicendi , in differendi subtilitate; interroget de pietate, de justitia, de finibus bonorum , de administratione reipublicæ, de institutis populorum: historiam sibi promi petat , poetam aut oratorem explicari, veteris lapidis aut numismatis inscriptionem declarari; nulla ex parte imparatum offendet, sed contra omnibus doctrinis & artibus instructissimum admirari cogetur. Ad has causas, quas hæcenus memoravi, illa vel gravissima accedit, te, si quis alius hoc tempore, cum fucata eloquentia justas inimicitias suscepisse, nihilque in dicentibus probare solere quod non simplex, non candidum, non rectum, non denique utile sit. Est hoc nobilitatis tuæ, quam animus veritatis studiosus, & qui neminem fallere postulet, summe decet. quid est enim tam plebejum, quam vel in vita, vel in oratione mendacis rem agere? Quo fit etiam ut ab omni arrogantia superbiaque maxime abhorreas, quæ vitia plerique nobilium otio disfluentes, eo consilio adhibent, ut nimirum inertiam suam ad populum tegant, ac ne plane cessare videantur. Et quamquam generis claritate, ceterisque ornamentis, quæ ipse tibi magna virtute comparasti

DEDICAT. ET PRAEFAT. 213

raſti, nemini concedas, Fratremque habeas, a-
 pud Principes Germaniæ Viros gratia, opibus,
 dignitatibus mire florentem, nihilominus faci-
 lem te in audiendis admittendiſque hominibus
 præbes, comiter unumquemque appellas, citiuſ-
 que fortunæ tuæ obliſceris, quam humanita-
 tis. Accipe igitur, Vir ſapientiſſime, hilari vul-
 tu munuſculum hoc noſtrum, Poetaſque elegan-
 tiſſimos, cives tuos, & ipſe amare, & aliis com-
 mendare velis. Hoc mihi gratius accidere nihil
 poteſt. Vale. Patavii clō clō ccxviii. Kal. Se-
 ptembris.

PRAEFATIO IN POEMATA HIERONYMI FRACASTORII.

LECTORI BENEVOLO.

NON ſum neſcius, erudite Lector,
 plurimos inveniri qui de Poetarum
 ſtudiis, deque univerſo genere Poe-
 ſeos ita ſtatuant, rem eſſe minimi
 pretii, & quæ magna ingenia ab in-
 quirendæ veritatis ſtudio ad nugas & ſomnia ſæ-
 pe traducat: proptereaſque recte Platonem feciſ-
 ſe dicant, qui a Republica illa ſanctiore quam
 ipſe

ipse optimis legibus instituebat, eos omnes exclusit qui versibus & fabulis delectarentur. Hujusmodi hominibus poemata offerre perinde haberetur, ac si Pentheum Bacchis discerpendum traderes; adeo sunt pertinaci animo ac fero, Musisque inimico. Cum his porro disceptare velle quid est aliud, nisi inanem operam sumere? contracto enim semel supercilio, judicioque facto, citius se spiritum amittere, quam de sententia dimoveri patiantur. Qui si delicias ita odere, ut nihil humanitati dandum putent, omniaque ad veram directamque rationem exigi oportere clamitent, non video cur ullam aut in victu munditiam, aut in vestitu elegantiam adhibeant: cur artes ullas probent, præter eas quæ, ut vitæ necessitatibus inservirent, rudibus adhuc sæculis inventæ sunt. At hos, quoniam communi hominum sensu satis refutantur, & sua ipsi tristitia abunde puniuntur, Diis iratis suis relinquamus: remque poeticam hætenus in civitate retineamus quoad ingenuam ex illa voluptatem capere possumus. ceterum parcat ea moribus juventutis, maledicto abstineat, ne incurrat in famam bonorum, ne prava exempla in scenam immittat: recte facta potius illustret, virtutes laudet, disciplinas ornet, salibus etiam interdum ac deliciis utatur, sed illis innocuis ad hilaritatem, non perniciosus ad corruptelam. Est aliud

DEDICAT. ET PRAEFAT. 215

genus hominum, qui se quidem Musas amare dicunt, & poemata magni facere, sed qui perverse adeo de poetis judicant, ut illis ejusmodi aures esse existimes quales olim Regi Midæ fuerunt; cui scilicet Jovis filium Apollinem, dignum convivio deorum citharædum, ad Panos rustici numinis suavitatem nimium nugatorem visum fuisse perhibent. Enimvero majus in hæc studia periculum intenditur ab his qui se amicos profitentur, quam ab illis de quibus antea diximus, reprehensoribus. nam illi quidem suum negotium agunt, ac veluti in alio terrarum orbe collocati, nostra neque attingunt, neque magnopere curant: hi vero importune adsunt, insistant, omnia permiscant, omnia inquinant, & quum elegantiores Musas vix a limine salutaverint, vel in eos magistros inciderint a quibus nihil sapere docti sint, nihilominus, tamquam ex tripode ac lauru, consulentibus respondent, unumquemque scriptorem trutina examinant, suas cuique dignitatis partes tribuunt, alios probant, alios damnant, indicta sæpe causa; quod iniquissimum pariter ac stultissimum est. Horum judicio (ut in præsentia tantummodo leviora persequar, & exemplis res illustrior fiat) Catullus, quem Aulus Gellius *elegantissimum poetarum* appellare non dubitavit, quem omnis antiquitas sic est admirata, ut docti cognomine dona-

ve-

verit, asper atque horridus est, iis vero numeris gaudet, quos eorum delicatissimæ aures ferre nullo modo possint; penitus insuper argutiis caret: (hoc nomine ipsi pueriles ineptias, crebras paronomasias, exquisita antitheta, absurdas translationes, & reliquas hujusmodi orationis labes honestare consueverunt) ad hæc, quod maxime dolendum est, obscuras historias fabulasque confectatur, quæ lectorem alio properantem, non sine temporis dispendio, identidem remorantur. Quod si forte de Lucretio mentio facta fuerit, tum vero nauseant, vehementerque indignantur. nam, præterquamquod scriptor ille *abens* religionem omnem funditus tollere conatur, longissime quoque abest ab ea suavitate quam ipsi venantur assidue: Ennii, ac Pacuvii vestigiis nimium insistit, verbis utitur obsoletis, hiulcos dissolutosque numeros amat, ita denique agrestis, ita incomtus est, ut a pueris gratiam omnino inire noluisse videatur. Fuerit Lucretius optimus Latinitatis auctor; quid tum? id ipsi in minima laude ponunt: non enim Latinam, sed mollem potius & pictam orationem requirunt, qualem hoc proximo sæculo ingeniosissimi homines, bona cum Ciceronis, aliorumque veterum venia, in medium protulerant, nunc vero ingenti piaculo scelesti quidam oppugnare non verentur. Quamobrem & Virgilium
accu-

accusant, quod antiquiorum auctoritatem secutus, non usquequaque concinnum se præbeat: Lucanum, aut Statium, aut Claudianum, si diis placet, in condendo carmine rotundiores esse ajunt; vel si hoc dicere reformident, imitatione tamen sua, quum aliquid ipsi scribere aggrediuntur, quid sentiant, satis aperiunt. Jam de Elegia, ejusque scriptoribus, mirum est quantum a Fabio Quintiliano dissentiant, qui nimirum litteris tradiderat, in eo genere *sibi tersum atque elegantem maxime auctorem Tibullum videri; non deesse tamen qui Propertium mallent: Cornelium autem Gallum duriores, Ovidium lasciviores* esse pronuntiavit. Inepti scilicet ac præposteri homines, meliores se harum rerum aestimatores fore confidunt, ac ille olim vir exstiterit, ea præsertim ætate natus, qua verius longe certiusque judicium de hujusmodi studiis fieri poterat, quam hac nostra. nondum enim desierant Latina lingua loqui, & quid esset Romanæ elegantiae, vel tabernarii & aniculae facile dignoscebant. In uno igitur Ovidio libentissime conquiescunt, hunc unum admirantur, hunc sibi ad imitandum proponunt: quam vero ejus similes evadant, ipsi viderint. nisi forte in optimorum imitatorum numero reponendi propterea sunt, quod semper de fæce haurientes, & ea potissimum colligentes in quibus ingenio suo nimium indulsit scri-

Ee

ptor

ptor ille, alioqui dignissimus qui legatur, & quantivis pretii, crebris eorundem verborum repetitionibus utuntur: duarum syllabarum voces in fine pentametri diligenter collocant, polysyllabis omnibus, tamquam horridioribus, rejectis: penthemimerim, seu semiquinariam caesuram, in hexametro fere servant: singulis distichis singulas sententias comprehendunt: qui secus fecerit, hunc artis ignarum esse ajunt, magnoque in errore versari affirmant: quod falsas denique, easdemque durissimas leges studiosis adolescentibus imponunt, quas illi violare sine summo scelere non possint. Ab his igitur, si sibi constare velint, consilium hoc nostrum edendi tanto intervallo HIERONYMI FRACASTORII Poemata, item JOANNIS COTTAE, JACOBI BONFADII, ADAMI FUMANI, NICOLAI ARCHII Carminum reliquias, improbari certe, fortasse etiam derideri, necesse est. FRACASTORIUS etenim, dummodo Virgilianam illam gravitatem, heroicis carminibus scribendis, adsequeretur, argutiores poetas, quos ipsi tantopere amant, omnino contempsit: reliqui vero, nescio quo malo Genio instigante, ita Catullo aut Propertio addicti sunt, ut Martialis & Ovidii scripta vix umquam attigisse videantur. Sed ista omni oratione omissa, levibusque hominibus valere jussis, tibi, tuæque fidei, erudite

Le-

DEDICAT. ET PRAEFAT. 219

Lector, hos elegantissimos Musarum alumnos custodiendos tradimus: quos & multo emendatiores quam antea, & pleniores invenies; nonnulla enim addidimus quum ex Gagnæji, ac Taygeti Carminum Collectionibus, tum ex aliis etiam libris; quæ si legeris, te industriæ nostræ non poenitebit. Existimavimus autem, Poema illud sacrum quod FRACASTORIUS de Josepho inchoaverat, quamvis longe positum infra Syphilidos dignitatem, ceteris tamen egregii viri monumentis esse adjungendum: sunt enim & quos magnorum operum rudimenta delectent, & qui ad ea perficienda excitentur quæ alii aut curis gravioribus, aut infortunio impediti, tantummodo adumbrata reliquere. Eiusdem Poetæ rerum gestarum narrationem, non illam quidem accuratissime scriptam, (sunt enim in ea nonnulla quæ vix intelligas) verum simplicem, & singularem, ne prorsus abjicere velis. nam ut meliorem de integro daremus, tantum otii non habuimus. Mirabitur fortasse quispiam, atque indigne feret, JACOBUM BONFADIUM, Veronensem a nobis appellatum, quum aliqui e scriptoribus eum Brixianum fuisse malint. Nos plerisque fidem tribuere satius esse duximus; nec tamen, quid de hac re homines sentiant, multum laboramus. Tu interim, amice Lector, si quid ad juventutis studia promo-


venda labore nostro collatum esse censes, neque nos indignos putas quorum conatibus faveatur, hilari fronte hunc Libellum excipe, daque operam sedulo, ne posteritas hanc bonarum litterarum causam, quæ nobis tanto sumtui est, a te neglectam fuisse, aliquando conqueri possit.

DEDICATIO POEMATUM
JACOBI, SIVE ACTII SINCERI
S A N N A Z A R I I.

Illustrissimis atque Excellentissimis Viris

ALOYSIO PISANO Equiti, ac Aëdis D. Marci Procuratori,
JOANNI PETRO PASCHALICO, MICHAELI MAU-
ROCENO, Rei Litterariæ Moderatoribus,

Jo. Antonius Vulpius S. P. D.

 I quis est cui mirum forte videatur, ACTII SINCERI SANNAZARII, elegantissimi hominis, Poemata, sublatis mea cura librariorum erroribus, in lucem rursus prodeuntia, a me vobis offerri, Viri Amplissimi; is profecto aut ea numquam legit, aut oscitanter, minimeque intento animo legit. Quum enim Poeta ille recti amantissimus, de immortali Venetorum Republica omnia egregia & præclara sen-

DEDICAT. ET PRAEFAT. 221

sentiret, diligenter providit, ne sententia hæc sua paucis tantummodo familiaribus nota esset, ac deinde oblivione deleteretur. Splendidis itaque magnificisque carminibus, audiente atque invidente reliquo terrarum orbe, admirandæ Urbis vestræ dignitatem, vestrorumque clarissimorum Civium libertatem ornavit. quæ carmina quanto in pretio habenda sint, & insigni liberalitatis exemplo Senatus eo tempore declarare voluit, & ex ipsius Poetæ natura facile colligi potest: non enim is erat SANNAZARIUS qui libenter adsentaretur, sed potius qui hominum vitia acerrime exagitaret, neque illos quidem intactos abire sineret quibus opes & potentia scelerum impunitatem quodammodo peperisse videbantur. Hæc est demum vera laus, quæ a magni & excelsi animi viro proficiscitur, neque spe, neque metu extorta: ad hanc improbis & pusillis hominibus omnino adspirare non licet. Quapropter ad neminem alium nisi ad vos hujusmodi scripta deferenda erant, Viri Amplissimi, qui publico Venetorum Patrum decreto, gravissimæ studiorum procurationi præfecti estis, disciplinas autem quæ ab humanitate nomen habent, præcipuoque urbibus ornamento sunt, vel in primis diligitis, & coli gaudetis. Poetam igitur vestrum benigne atque hilare excipite, ejusque carminibus legendis, majorum gloriam agnoscite,

scite, quæ tamquam hereditate ad vos usque pervenit. stat enim, DEI OPT. MAX. beneficio, Respublica vestra, ac tamdiu stabit, quamdiu genus ipsum hominum permanebit. Utinam vero aliquid non contemnendum ipse ingenii mei viribus præstare possem, nec semper, ad meam erga vos observantiam significandam, alieno adminiculo indigerem: nemo profecto esset qui virtutes vestras majore studio atque alacritate celebraret. At quoniam eloquentia excellere, perpaucorum est, neque id mihi natura concessit; hoc qualecumque munusculum æqui bonique consulite, Viri Amplissimi, meoque conatus, quæso, patrocinio ac benevolentia vestra prosequimini. Valete. Patavii. Idibus Novembris. clō lō cc xviii.



PRAE-

DEDICAT. ET PRAEFAT. 223

PRAEFATIO IN POEMAT A
JACOBI, SIVE ACTII SINCERI
S A N N A Z A R I I.

ERUDITO LECTORI S.



UOD polliciti sumus anno superio-
re, nos videlicet daturos operam
ut cultissimi quique probatissimique
scriptores qui sæculo post CHRIS-
TUM ortum decimosexto Lati-
nas litteras a barbarie vindicavere, novo quasi
lumine illustrati, in manus hominum perveni-
rent, id sedulo præstare pergimus, erudite Le-
ctor. Ecce tibi ACTIUS SINCERUS SANNA-
ZARIUS, poeta merito suo ab omnibus fere ce-
lebratus, atque illis tantummodo ignotus qui-
bus vita elabitur dormitantibus, & quos nulla
de rebus optimis cura unquam attingit. Ex hu-
jus carminibus, antiquarum editionum ope,
menda typographica passim susulimus; quæ res
ad institutum hoc nostrum potissimum spectat.
Quidquid autem de clarissimo genere, de fortu-
na, de studiis, de amicitis, ceterisque casibus
tanti viri, memoriæ proditum est, non medio-
cri labore ac diligentia ex variis libris collegi-
mus, perpetuaque narratione contexuimus; est
enim

enim doctis hominibus jucunditati, quorum ingenium admirentur, eorum eventus moresque cognoscere. Gravissimos etiam laudatores excitavimus, qui SANNAZARIO singularis eruditionis doctrinaeque testimonium tribuerent; ut scilicet auctoritatem, qua ipsi caremus, ex aliorum sententiis mutuaremur. Indicem quoque rerum memorabilium adjunximus, iis qui totum volumen perlegere noluerint, prope necessarium. Denique GABRIELIS ALTILII Epithalamium, exquisitae venustatis poema, sed in quibusdam libris foede corruptum, emendatius multo exhibemus; nonnulla item HONORATI FASCITELLI carmina, Catulli elegantissae affluentiae, excutenda curavimus: quos poetas ACTIO SINCERO adjicere, non abs re visum est; ambos enim regio Neapoli finitima protulit, ALTILIUS vero SANNAZARIO sodalitate etiam conjunctus fuit. Hanc volebamus ne ignorares, amice Lector. Vale, fruiere, ac fave.



DEDICAT. ET PRAEFAT. 225

DEDICATIO OPUSCULI
AUGUSTINI VALERII
DE CAUTIONE ADHIBENDA
IN EDENDIS LIBRIS, &c.

Illustrissimis atque Excellentissimis Viris

Patavini Gymnasii Moderatoribus, ALOYSIO PISANO Equi-
ti, ac Aedis D. Marci Procuratori, JOANNI PETRO
PASCHALICO, MICHAELI MAUROCENO,
Omniq[ue] Triumvirum Litterariorum
Ordini Amplissimo

Jo. Antonius Vulpus S. P. D.



RAESTANTIUM ingeniorum quibus
Respublica vestra semper mitifice
floruit, Viri Amplissimi Sapientissi-
mique, Liber quem vobis offero,
egregium quoddam specimen est.
Hoc nimirum perlecto, facile inter omnes con-
stabit, elegantioribus disciplinis, ab eo tempore
quo primum detersa barbarie, caput rursus at-
tollere, atque in pretio esse coepere, neque ma-
gnificentius hospitium ullum, neque ampliora
usquam præmia, quam apud Veneram Nobili-
tatem, patuisse. Et sane divina providentia fa-
ctum arbitror, ut quæ Urbs Senatores gravissi-
mos, invictos belli Duces, Antistites religione,
vitæque innocentia singulari, parere ac educa-

F f

re

re consuevisset, ea in Urbe præclari quoque Historici, & Oratores provenirent, qui Civium suorum virtutes & pulcherrima facinora omnibus eloquentiæ viribus celebrarent, atque oblivioni surripere niterentur. Exteri enim scriptores, quum res alienas litteris mandare instituerunt, multa plerumque silentio prætereunt, quæ ipsi minus perspecta habent, aut in quibus narrandis nullus maledicto locus est; & quædam verbis extenuant, quorum magnitudo ac splendor malevolorum oculos quodammodo perstringit; & nonnulla denique pejorem in partem interpretando, illustrium virorum laudibus graviter obtrectant, iisque notam turpitudinis calide inurere conantur. Neque contra, in libera republica metuendum est, ne qui ejusdem civitatis homines laudandos suscipiunt, spe; gratia, amicitia ducti, modum in laudando non adhibeant; plurimi enim testes adsunt, in quorum conspectu vita ejus qui celebratur, tota fere acta est; ad redarguendum scilicet paratissimi, ubi immane aliquod mendacium scriptor in medium attulerit, tamquam si causæ suæ diffidere videatur. Quæ quum ita sint, nolite, quaeso, Viri Amplissimi, me impudentiæ crimine accusare, qui vos maximis occupationibus distentos molestus interpellator a gerenda republica paullisper avocem; est enim pietatis vestræ, ma-

majorum gloriam, quæ ad posterorum etiam fructum redundat, commendatam habere: est sapientiæ, tempus quod bonis libris legendis tribuitur, in maximo lucro ponere: est hujus præclari muneris quo fungimini, quidquid ad litterarum dignitatem pertinet, non solum æquis animis, verum etiam libentissimis, excipere, amplecti, tueri, ac denique auctoritate nutuque vestro confirmare. Finem dicendi faciam, si prius paucula de me ipso addidero; quod mihi per vos liceat, Viri Amplissimi. Quamquam honeste recteque agere, ipsum sibi largissimum atque uberrimum præmium est, ego quidem certe hac spe unice sustentor, ac recreor, id vos aliquando pro vestra benignitate, effecturos, ne me umquam poenitere possit, vitam laboribus vigiliisque exercitam, & a voluptatibus alienissimam, turpi otio, ignobilique silentio anteponendam existimasse: ac judicio vestro longe gravissimo declaratos, sollertiam ab ignavia ut re, sic existimatione distare plurimum. Sunt enim qui sine ullo imperu pulsuque remorum, ventis tantummodo valde secundis, rectum dignitatis cursum se tenere arbitrentur: meque etiam irrideant hominem simplicem, qui probitate atque industria, obsoletis jam artibus (ut ipsi ajunt) aliquid profici posse confidam. Hanc porro opinionem in malorum animis penitus

inſitam , vos evellere convenit, Viri Ampliſſimi; quod ut fieret, ſedulo adhuc dediſtis operam, doctiſſimis experiendiſſiſque hominibus undique conquiſitis, & magna mercede invitatis, qui juventutem in hoc celeberrimum Patavinum Gymnaſium , tamquam ad mercaturam bonarum artium , confluentem , præceptis ſuis erudirent, atque utiliorem reipublicæ redderent. Horum veſtigia, ſi minus ingenio poſſum (quod mihi exiguum ſane a natura tributum eſt) at pertinaci ſtudio, aſſidua meditatione, inexplebili denum cupiditate litterarum, perſequi mecum ipſe decrevi. Multum quotidie temporis in jure civili, aliquantum in philoſophia, ceteriſque diſciplinis quæ juris civilis ſcientiam exornant, jam inde a prima adoleſcentia ponere ſolitus ſum: non eſt autem meæ verecundiæ, quid tantis conatibus proſecerim, judicare. Peto igitur a vobis majorem in modum, Viri Ampliſſimi, ut ſtudia noſtra ex abdito in conſpectum hominum lucemque trahatis, idque vobis perſuadeatis, copias meas omnes, quas præceptoribus olim audiendis, deinde optimis libris pervolutandis, exercendoque ſtilo, multorum annorum ſpatio mihi comparavi, quum totius Reipublicæ Venetæ, tum vero maxime veſtras eſſe, & ſemper futuras. Valete, ac rem litterariam, quod facitis, bene & feliciter gerite. Patavii. Idibus Junii. cIdo cccxix.

PRAE-

P R A E F A T I O
IN IDEM OPUSCULUM, &c.

LECTORI BENEVOLO S.

EXPOSITURI, Lector benevole, quod consilium secuti, quibusve causis adducti, hæc summorum Virorum Opuscula, disjuncta olim & dissipata, in unum tamquam corpus collegerimus, typisque describi jusserimus, rem paulo altius repetere necesse habemus. Quum JOANNES PETRUS PASCHALICUS, Venetus Senator Amplissimus, vir omni humanitate suavissimisque moribus præditus, in primis vero majorum suorum gloriæ perstudiosus, qui nunc inter Patavini Gymnasii Moderatores, magno litterarum bono numeratur, editionem Operum Andreæ Naugerii, Civis sui eloquentissimi, a nobis anno superiore non mediocri sumtu diligentiaque adornatam, & considerasset, & probasset; sciret præterea, nos in re nulla operam nostram libentius collocare, quam in iis quæ ad hujus immortalis Reipublicæ laudem ac dignitatem quocumque modo pertinere possunt; nobis per familiarem quemdam suum significavit, gratissimum sibi futurum, si, ubi primum suscepti alicujus

cujus operis ratio ac similitudo pateretur, Orationem egregiam PETRI PASCHALICI, Viri e familia sua celeberrimi, qui ante duo fere sæcula, ob virtutis & eloquentiæ opinionem, quam consecutus fuerat, ad potentissimos Europæ Principes, de maximis negotiis legatus a Senatu missus est, in Typographia Cominiana, cui præsumus, nova quasi veste indui, novoque cultu expoliri studuissimus. Orationem porro ipsam, a paucis omnino visam, quæ domi ejus adservabatur, statim ad nos perferendam curavit. Honestissimo igitur tantî Viri desiderio obsequendum rati, nos id propediem facturos, idoneamque rei occasionem captaturos, in nobis recepimus. Accidit autem peropportune, ut Camillus Varottus, Abbas, Canonicus Patavinus, vir omni laudum genere cumulatissimus, Libellum hunc AUGUSTINI VALERII, S. R. E. Cardinalis, Episcopi Veronensis, numquam antea typis editum, quem ab unico illo Antistite, veteris sanctitatis exemplo, Gregorio Cardinali Barbadico, dono acceperat, nobiscum benigne communicaret. Hunc olim Roma Barbadicus, talium scilicet mercium avidissimus, Patavium secum attulerat: eundemque vix in paucorum quorundam bibliothecis hodie custodiri ajunt. Scriptoris fama (nemo enim est vel mediocriter eruditus, qui VALERII doctrinam, vitæ inno-

cen-

centiam, ejusque pro Christiana pietate res præclare gestas, aut ignoret, aut non plurimi faciat) & ipsa scriptionis utilitas, nos impulerunt, ut voluminis edendi curam susciperemus; ac tam exquisito munere summam a doctis hominibus gratiam iniremus. Hoc brevi commentario, quot libros ad eam usque diem confecisset (confecerat autem pæne innumeros) quibus moribus in adolescentia, in juventute, in reliqua vita fuisset, quos amicos habuisset, quid quovis tempore sibi accidisset, VALERIUS diligentissime enarrat. Id vero præ ceteris inculcare non desinit, se, quamquam scribendi jucunditate captus, voluptates alias omnes repudiaret, cavisse tamen summo opere, ne quæ animi tantum causa, vel amicorum hortatu, litteris mandasset, ea temere in vulgus prodirent: plurima enim se scripsisse quidem fatetur, at pauca omnino emendare conatum esse. Quod gravissimi Viri de se suisque scriptis judicium quicumque attentius expendet, omnium ejus librorum *συναγωγὴν* atque editionem minus fortasse desiderabit. Hanc etiam lucubrationem, si Auctori dicto audientes prorsus esse voluissimus, divulgari certe non oportebat; sed ob hanc præcipue causam eam edere decrevimus; ut quamobrem ceteræ non sint edendæ, manifesto apparere possit. Stilus VALERII non est ille quidem ad Ciceronis normam severe exactus;

actus; *fluit enim cum luto aliquo*, quemadmodum Auctor ipse testatur, longeque distat a Bembi, Sadoleti, aliorumque ejus ætatis clarorum hominum candore atque elegantia: perspicuus tamen est, simplex, ad res Ecclesiæ cum dignitate tractandas accommodatus, qui scriptoris denique animum ingenuum, & publicæ magis utilitatis quam suæ laudis appetentem, facile ostendat. Ridebunt, credo, nonnulli, quum audierint (id quod hoc volumine VALERIUS commemorat) Bernardi Naugerii Cardinalis eam fuisse sententiam, ut existimaret, antiquorum industria in omni disciplinarum genere omnem scribendi materiam posteritati præreptam; & iccirco novos libros meditari, hominis esse (ut Tullii verbis utar) intemperanter abutentis & otio, & litteris. At bonus Naugerius,

Si foret hoc nostrum fato dilatus in ævum,
 quo qui paullo sunt moderatiores, antiquorum vicem dolent, quibus nempe multa scire, temporum vitio, non licuerit; qui vero ingeniosos ac liberos se & esse, & haberi volunt, clamitant sapius, veterum illorum fatuas plerumque ac deliras fuisse doctrinas, & nostro demum sæculo homines, tamquam e diuturno somno, ad rectius philosophandum excitari cœpisse; profecto sibi multo aliter sentiendum esse intelligeret. Sed videlicet ea tempestate (quamquam multis
 ad-

adversantibus) ita opinari impune licebat. Quæ tamen opinio, eorum saltem levitati mederi poterit qui non ideo scripta sua typographis tradunt, quod ea jampridem ad umbilicum perducta, accurateque castigata, doctorum virorum judicio comprobentur; sed hoc potissimum consilio scribunt, ut quæcumque ipsis exciderint, sive utilia, sive nullius pretii, ea statim edere festinent; quo evenire necesse est, ut infinita, eademque inani librorum copia laboremus. Sed jam ad instituti nostri rationem exponendam redeamus. Hunc VALERII commentarium adepti, in animum induximus, ei scripta quædam alia PATRICIORUM VENETORUM adjungere; tempus advenisse existimantes quo obligatam Paschalico fidem liberaremus. Quum autem Apostolus Zenus, vir celeberrimus, Cæsaris Historicus, & Poeta, quem honoris causa nominamus, nonnihil de cogitatis nostris audivisset, qua est insigni erga nos, omnesque litterarum cupidos humanitate, auctor nobis fuit per epistolam, ut Cardinalis NAUGERII Vitam, a VALERIO, sororis ejus filio, diligentius quam solebat, conscriptam, & ante hos centum annos Veronæ editam, sed raro admodum occurrentem, iterum cura nostra proferremus, atque nitore suo restitueremus; mendis enim typographici passim scatebat. Misit etiam ad nos e biblio-

thea sua, quam instructissimam possidet, veterum Orationum fasciculum, quas Veneti Patricii diversis temporibus ac locis recitaverant (omnes autem fere oblivione sepultæ erant) ex quo numero, quæ nobis hac nova luce digniores viderentur, eas deligere possemus. Codicem præterea manuscriptum benignissime obtulit, in quo PAULLI BARBI Oratio ad Ludovicum XI. Galliarum Regem adhuc inedita continebatur. Incredibile enim est, quantam vir ille doctissimus rariorum & singularium codicum suppellectilem congefserit; prodigii vero simile, quantam rerum historiarumque cognitionem pectore suo atque animo ipse complexus sit, ut merito eum vocare quis possit; quemadmodum olim Eunapius Dionysium Longinum nominavit; βιβλιοθηκῶν ἑμψυχον, καὶ περιπατῆν μυσέων. Sed quamquam his copiis comparatis, liber nihilominus exiguus futurus erat (paucas enim Orationes e plurimis excerpseramus) nisi Petrus Catharinus Zenus, Apostoli frater, Clericus Congregationis Soma-schæ, vir eruditissimus, & de universa litteratorum natione, in primis vero de Italorum ingeniis optime meritis, fraternam liberalitatem æmulari, atque editionem hanc nostram insigni thesauro (quo enim alio nomine appellemus?) locupletare voluisset. Tres enim Orationes PETRI BARROCCII, Patricii Veneti, Episcopi Pa-

tavini, hominis, ut illa ferebant tempora, eloquentia & eruditione non vulgari, quas in membrana concinne admodum exaratas, ipse in privata bibliotheca adservabat, nobis edendi potestatem fecit; idemque CAROLI CAPELLI Orationem suppeditavit, habitam in funere Georgii Cornelii, Viri summi, quæ numquam typis descripta, Venetiis in bibliotheca domus religiosæ, ubi ipse commoratur, longo tempore delituerat. Utinam vero Laudationem pulcherrimam, a BERNARDO NAUGERIO in funere Andreæ Gritti, Venetiarum Principis, recitatam, de qua valde honorifica doctorum virorum testimonia exstant, hoc volumine exhibere potuissemus. At nescio quo malo fato, quamvis ab eodem Zeno diligentissime perquisita, nusquam tamen reperta est. Hujus porro humanissimi, atque omni virtute ornatissimi fratrum paris, Apostoli scilicet, ac Petri Catharini, nullam meritorum partem non modo referenda, sed ne cogitanda quidem gratia consequi nos posse, libenter fatemur; qui studiosis universis, quam sibi solis divites esse malunt, & clarorum hominum monumenta, quæ plerique alii, ne quisquam attingat, centum ferreis vestibus obferant, vel blattis & pulveri comedenda permittunt, ipsi, ut bonos ac magnanimos decet, reipublicæ commodo quotidie depromunt.

Nolumus autem, amice Lector, te mirari, CHRISTOPHORI MARCELLI, Canonici Patavini, Orationem, pluribus barbarorum sæculorum navis plane deformem, testimoniis quæ de PETRO BARROCIO protulimus, a nobis interpositam esse; non enim verborum, aut sententiarum, sed narrationis dumtaxat rerum a BARROCIO gestarum, quæ in ipsa continetur, rationem habuimus. Petimus etiam ab istis qui se Ciceronianos profitentur (difficili sane ac fastidioso genere hominum) ut si huic volumini manum admoverint, passimque offenderint quæ ipsis Tullianam dicendi formam minus referre videantur, scriptoribus ignoscere, causamque in tempora conferre velint. Sunt enim ut picturæ, ita & eloquentiæ rudimenta quædam. Quemadmodum vero pictores illi qui ante Apollodorum Atheniensem fuisse, Hygiænon puta, Dinias, Charmas, Bularchus, & plerique alii, longissimo intervallo a Zeuxide, Timanthe, Parrhasio, Protogene, Apelle superati sunt, nec tamen a sanis hominibus contenti, quum artium inventoribus omnia debeantur; similiter, doctos & laboriosos viros qui paullo post renatas litteras, viam posteritati ad ornatus dicendum exemplo suo monstravere, risu & petulantibus joci excipere, arrogantia atque impietatis est non ferendæ. Non diffitemur quidem, CAPEL-

LI, GABRIELII, & LONGI Orationes propius a perfecto dicendi genere abesse; verum illud quoque affirmamus, in his omnibus illustrium Virorum scriptis, si minus Ciceronianam elegantiam, at certe Ciceronianam sapientiam, quæ pars potior orationis est, inveniri. Quod si horridiora quoque essent quam sunt, tamen ob virorum principum laudes quas complectuntur, dignissima essent quæ legerentur; ut olim Saliare carmen, tum Livii Andronici, & Q. Ennii poemata, quamvis incomta, obscurisque verbis adeo referta, ut vix interdum intelligi possent, nihilominus & summo in pretio habebantur, & magna cum voluptate audiri ac legi solebant.

Postremo accuratissimos Indices duos huic volumini adjecimus, alterum Lucubrationum omnium AUGUSTINI VALERII, quem a multis vehementer efflagitari cognoveramus, maximam partem ex commentario DE CAUTIONE ADHIBENDA IN EDENDIS LIBRIS, concinnatum, suppletum vero ex Catalogo quem nobis Mediolano misit Josephus Antonius Saxius, S. Theologiæ Doctor, & Bibliothecæ Ambrosianæ in ea urbe Præfectus, Vir scriptis editis, doctrina, humanitate, ac religione clarissimus: alterum nominum propriorum, rerumque memorabilium quæ toto volumine occurrunt, quo ni-

mirum libri utilitas magis innotesceret. Tu interim fave, Lector optime, & majora in dies a nobis exspecta.

E P I S T O L A A D

JOANNEM PETRUM PASCHALICUM.

Illustrissimo atque Excellentissimo Viro

JOANNI PETRO PASCHALICO,

Veneto Senatori Amplissimo, Rei
Litterariæ Triumviro,*Joannes Antonius Vulpius S. P. D.*

XIMIA virtus habetur, JOANNES PETRE PASCHALICE, Senator Amplissime, respondere in amore iis a quibus omni officiorum genere provocere; non, quod sine summo ac nefario scelere mutua prætermitti benevolentia possit, sed quod hac temporum iniquitate plerique jam homines eo se scelere obstringi facile patiantur. Illud tamen longe præclarissimum existimari debet, ei qui nullam adhuc observantiæ erga te suæ significationem dederit, rationem qua de te optime promereri possit, quasi digito monstrare; ut scilicet in quem beneficia conferre cogites, eum antea dignum beneficio præstes.

Qui

Qui hoc pacto aliis prodesse student, ii quodammodo DEI OPTIMI MAXIMI sapientiam, ac liberalitatem imitari videntur, qui nos ideo primum bonos efficit, ut deinde beatos efficiat, & a quo perinde virtutes ipsas, ac uberrima virtutum præmia accipere homines consuevere. Quorsum hæc pertineant, jamdudum sentire te arbitror, Vir nobilissime atque humanissime; tuas enim laudes agnoscas necesse est, quotiescumque de singulari quadam beneficaque natura sermo instituitur. Quum enim de ingenii mei mediocritate, & de studiorum meorum ratione, deque amore quo liberales disciplinas a puero sum complexus, nonnihil audisses; continuo me non indignum cognitione ac benevolentia tua existimasti; utque mihi, tenui sane homini & novo, aditum ad te aperires, futurum tibi gratissimum ostendisti (quod commodo meo fieri posset) si egregiam Orationem quam PETRUS PASCHALICUS, inclytæ Familiæ tuæ maximum decus atque ornamentum, ad Emmanuelem Lusitanæ Regem Reipublicæ Venetæ legatus olim habuisset, typis Cominianis denuo excudendam curassem (exciderat enim fere ex hominum memoria, & in paucissimorum bibliothecis adservabatur); ejusque Orationis exemplum mecum benigne communicasti. Ex hoc honestissimo desiderio tuo, quanta in majores tuos pietate, quan-

ta

ra in bonas litteras propensione, & qua erga me ipsum voluntate sis, facile perspicere potui. quapropter dedi operam sedulo, ut quamprimum tibi cumulate satisfacerem; non solum enim PETRI hujus PASCALICI Orationem, sed & plures alias Civium tuorum clarissimorum, quæ aut calamo tantum exaratæ in publicum conspectum nondum exierant, vel typis descriptæ, longo tamen situ ac pædore obsoleverant; alia item opuscula elegantissima, & multum studiosis hominibus profutura, non mediocri sumtu, atque incredibili diligentia divulgari curavi; ut tibi potissimum qui me impulisti, hanc egregiorum scriptorum editionem docti homines, nobilesque in primis Veneti adolescentes omnino debitori sint. Nihil addam in præsentia de Familiæ tuæ laudibus, nihil de Fratrum tuorum, tui vere similium, dignitate atque splendore; e quibus Georgius potissimum supremus totius Rei Maritimæ Præfæctus, difficillimam provinciam summa cum sua gloria, ac Reipublicæ utilitate administrandam suscepit; nihil denique de tuis ingentibus spectatisque virtutibus; res est enim neque ingenii mei, neque hujus loci, aut temporis, neque adeo quam eximia probitas & pudor tuus ullo modo pati possit. hæc omnia enitent ipsa per se, atque in oculis universorum posita, nullius oratione ornari, aut clarescere postulant.

DEDICAT. ET PRAEFAT. 241

lant. Rogabo potius, ut munusculum hoc me-
um eo quo tibi offertur animo, accipias, inge-
nuo nimirum ac benevolentissimo; deinde ut ra-
tionibus meis consulas enixe obsecro atque ob-
testor, qui optime id præstare potes, in eo sci-
licet dignitatis gradu collocatus ad quem te plu-
rima & singularia in patriam merita, & præci-
pue mirificus quidam litterarum amor provexit.
Vale. Patavii. Kal. Junii. MDCCXIX.

PRAEFATIO IN
CORNELIUM NEPOTEM.

LECTORI S.



CORNELIUM NEPOTEM, scripto-
rem elegantissimum, verbis nitidum,
sententiis gravem, ad juventutem
pulcherrimis exemplis imbuendam
idoneum, iis qui rempublicam ad-
ministrant apprime utilem, non est cur longa
oratione tibi commendatum velimus, amice
Lector. Satis erit si dixerimus, eum, post rena-
tas litteras, a doctis hominibus dignum semper
habitum qui cum Cicerone, Cæsare, Teren-
tio, aliisque Latinitatis principibus, adolescen-
tium

tium ingenia exerceret. Accipe igitur læto animo, egregii Auctoris quæ supersunt monumenta, ut Romani sermonis, veterumque historiarum studiosis gratum faceremus, nova veste a nobis induta. quamquam enim & in Germania, & in Gallia, & in Belgio, & in Anglia ipsa, novis in dies doctorum virorum curis illustrata prodierint, apud Italos tamen (quod harum regionum fatum est) desiderabantur. Nam & minus sæpe peregrinæ editiones huc importantur, & typographi nostri suavibus nugis divulgandis plerumque occupati, rei familiaris metuunt detrimentum, si & hunc, & alios optimos libros recudendos susceperint. Nihil enim fere nostris adolescentibus probari vident, præter fabellas & Gallica in Italicam linguam conversas, aut nescio quas doctrinarum epitomas, quæ, si diis placet, rudem & imperitum hominem, dieculæ spatio, vel Platone ipso sapientiore effecere possint. Hæc causa fuit ut jam inde ab Andrea Asulani, Aldi Manutii soceri, temporibus ad hanc usque diem scriptor tam candidus * numquam in Italia (quod sciamus) typis editus fuerit; magno certe Italorum opprobrio, qui sibi litterarum laudem

* *Numquam in Italia*) Quam hæc scriberemus, ignota nobis erat scilicet Nepotis editio ad usum Scholarum Collegii Romani Soc. Jesu adornata, Romæ MDCCLXIX. Et fortasse aliæ nonnullæ reperientur, si quis diligentius inquirat; sed fama adeo obscura, ut nulla prope illarum habenda sit ratio.

dem ab iis eripi passi fuerint quos olim barbaros superbe nimium & contumeliose appellabant. Sed hæc vetus jam & molesta querela est: ad propositum redeamus. Ut huic nostræ editioni pretium conciliaremus; dedimus operam ut quam emendatissima in manus hominum perveniret. Expressimus autem potissimum Schotti, & Savaronis, virorum doctissimorum, exemplaria; neque ea negleximus quæ nitidissimis typis excusa, Notis Variorum (ut vocant) illustrata prodierunt. Insuper Nicolai Jensonis editionem principem, & Aldinam, summa diligentia scrutati, si quid inter legendum occurrisset quod ad rem facere videretur, non inviti recepimus: quæ vero minus arriderent, rejecimus in Libellum Variarum Lectionum; ut scilicet nostris laboribus uti volentes, antiquarum etiam editionum una opera fructum perciperent. Utriusque autem codicis inspiciendi potestatem nobis fecit nobilissimus juvenis * Alphonsus Alvarottus, Patricius Patavinus, idemque singulari humanitate præditus, & optimarum disciplinarum, in primis vero Latinæ linguæ studiosissimus; qui magnam exquisitorum, præcipue ve-

H h 2 te-

* *Alphonsus Alvarottus*) Per eos fere dies quibus hæc nostra Nepotis editio primum vulgata est, mense nimirum Junio anni MDCCXX. generosus juvenis, gravi morbo consumptus, excessit e vita: & aliquanto post tempore Joannes ejus frater, natu minor, pariter mortem obiit: quibuscum Alvarotta familia, inter Patavinas antiqua nobilitate, virisque illustribus valde clara, penitus deleta est.

terum * librorum vim, incredibili animi ardore, atque ingenti sumtu undique collectam, domi suæ adservat, & cum melioris antiquitatis amatoribus libentissime communicat. Fragmenta NEPOTIS in plerisque editionibus mire depravata, ad librorum unde sumta fuerant, fidem exegimus. Indicem denique verborum & phrasum insigniorum adjecimus, brevibusque explicationibus idemtidem locupletavimus. Cetera quæ in hanc editionem contulimus, tute ipse, studiosè Lector, facileprehendes. Fave interim conatibus nostris, & propediem T. Lucretium Carum, eadem industria expolitum, a nobis expecta. Vale.

* *Veterum librorum vim*) Pretiosa istiusmodi supellex, Alvarotto extincto, in bibliothecam Seminarii Patavini commigravit; ubi studiosorum hominum commodis quotidie exposita est.




PRAE-

DEDICAT. ET PRAEFAT. 245

PRAEFATIO IN
VALERIUM FLACCUM.

ERUDITO LECTORI S.

EROICI poematis apud Latinos Auctorem, si unum Virgilium excipias, doctorum quorundam sententia reliquis in hoc genere praefendum, C. VALERIUM FLACCUM; ut primum hac in urbe typis excudi curaremus, & paucitas ipsa exemplarium, quæ vix occurrerant, & hujus nobilissimæ civitatis gloria nos impulerunt. Speravimus etenim quum ab omnibus poeticarum rerum studiosis, tum præcipue a Patavinis adolescentibus, eximium hunc poetam cupide exceptum iri; qui quidem Patavii, ut plerique tradidere, natus educatusque fuerit, &, quod ex ejus lectione manifestum esse potest, ingenio, gravitate, sapientia, Patavinam indolem quodammodo præ se ferre videatur. Porro a NICOLAI HEINSII recensione, quam PETRUS BURMANNUS V.C. secutus est, ne latum quidem unguem discessimus; incredibile enim est, quantam in Codicibus MSS. conferendis solertiam, judicii subtilitatem, solidæ in primis ac minime vulgaris doctrinæ copiam, ad hunc alios-

aliosque optimos poetas nitori suo ac genuinæ
lectioni restituendos vir ille magnus attulerit; ut
hoc nomine multum illi debeant, ac in posterum
debituræ sint Latinæ litteræ. Utinam aliquando
exoriatu qui hos ARGONAUTICON libros,
ingentem profecto poeticæ eruditionis thesau-
rum, accurate explicandos suscipiat (quod qui-
dem a nonnullis, duobus superioribus sæculis,
at irritò conatu, tentatum est) ut tandem ob-
securitas illa tollatur, quam ignavi homines, &
ab omni reconditarum litterarum subsidio im-
parati, se in hoc scriptore invenisse conquesti
sunt. Fruere interea hoc munusculo nostro, Le-
ctor candide, & tute ipse ad VALERIUM in-
telligendum eas tibi copias comparare stude,
quibus instructus, æquo animo commentario-
rum adminiculis carere possis; & nostræ hone-
stissimæ de te benemerendi voluntati mutuam
voluntatem retribue.



PRAE-

DEDICAT. ET PRAEFAT. 247

PRAEFATIO IN LIBROS
SEVERINI BOETHII
DE CONSOLATIONE
PHILOSOPHIAE.

Viro Doctissimo, Clarissimoque

JACOBO GIACOMETTI

Philosophiae Moralis in Gymnasio
Patavino Professori eximio,

Jo. Antonius Vulpus S. P. D.



TSI omnia quæ ad litterarum digni-
tatem amplificandam quocumque
modo pertinent, maximæ mihi cu-
ræ semper fuerunt; nihil tamen um-
quam antiquius habui, JACOBE do-
ctissime, quam ut tui similes viros ea observan-
tia colerem, ex qua facile intelligeretur, me de
ipsorum laude vehementer esse sollicitum. Qui
enim ex animo litteras amant, (in quorum nu-
mero jam inde a pueritia nomen & ego meum
profiteri cœpi) parum admodum referre arbi-
trantur, sua potissimum, an etiam aliena opera
earum studia florent, majusque in dies incre-
mentum accipiant. Ipsi quidem nervos omnes
in ea re contendunt, ut studiosis adolescentibus,
cete-

ceterisque cupidis bonarum artium omni genere profint lucubrationum; at iis nihilominus quos viderint idem saxum volvere, non modo non obtreſtant (id quod levium & pravorum ingeniorum eſt), ſed contra favent, ac libentiſſime velificantur. Nam ut ab ignavia quamplurimum abeſſe volunt, ſic invidentiam declinare: quorum vitiorum altero effectum eſt, ut pauci omnino doctrina excellant; altero, ut ſi qui excellunt, iisdem ſæpe probitas, verecundia, fides, ceteraque animi bona deſint, quæ ſunt dubio procul doctrina ipſa potiora. At quum plerique non ideo ſe doctõribus erudiendos tradant, quo meliores fiant, & rempublicam aliquando juvent, ſed potius ut litteris ex-culti, patrimonium augere, & prætereuntium digito monſtrari poſſint; iccirco ſtudiorum æmulos odiſſe conſueverunt, quos nimirum ſuis rationibus officere, atque in ſuæ gloriæ communionem venire, moleſte ferunt. Quum igitur doctõrum virorum cauſſa omnia me & velle & debere ſemper oſtenderim, eoſque omni officio, ac potius pietate fuerim proſecutus; quid ego te non in primis diligereſ atque ſuſpicerem, tanto ingenio, tanta eruditione, tanta melioris antiquitatis notitia virum, ut nihil propemodum in veterum ſcriptis deliteſcat, cujus tu momenta ſollertiſſime non perpenderis? cur unus

te

te segniter ac remisse observarem, quem sapientissimi Christianæ Reipublicæ Antistites dignum cognitione judicant; ad quem, tamquam ad florentissimæ hujus urbis præcipuum quoddam ornamentum, concursus peregrinorum fieri soliti sunt; quocum denique Italogum paucissimi, qui hodie vivant, Græcarum litterarum scientia contendere audeant? Incredibilem porro amoris erga te meo cumulum accedere sentiebam, quum hæc illustria, ac prope divina bona, quæ multis vigiliis, improbo labore, assidua exercitatione adeptus es, non apud te maligne contineri, sed ad communem studiosæ juventutis utilitatem humanissime conferri viderem: in quo quidem docendi munere, ut in re animo tuo gratissima, pecuniæ atque honorum cupiditate posthabita, bonam ætatis partem maxima cum laude exegisti. Nemo fere e nostris adolescentibus invenitur, qui aliquid modo in dicendo possit, qui non te magistro multum profecisse fateatur: nemo fere in hac urbe, barbariem exiit, ac mansuetiores Musas amplexus est, qui non te auctore, hortatore, adjutore id fecerit. Quod si tibi gratias pro meritis referre homines vellent, aut hoc tempora ipsa paterentur, jam in celeberrimo aliquo urbis loco, quemadmodum olim Delphi Gorgiæ illi Leontino, insigne virtuti tuæ monumentum excitandum curarent.

Quid est enim sanctius, quid augustius, quid omnium seculorum memoria dignius, quam civibus quibuscum vixeris, profuisse? & profuisse quidem non aquis ducendis, aut porticibus exstruendis, aut viis muniendis (quamquam sunt hæc ipsa ad nominis diuturnitatem idonea) sed animis potius humanitate leniendis, & sapientiæ studio imbuendis? Nihil tamen tibi ad summam gloriam deesse video; qui provideris magnitudine benefactorum, ne ulla umquam oblivione ex animis hominum excidere possis: intereunt enim statuæ, ut ait * Cicero, tempestate, vi, vetustate; laudes autem virorum bene de republica meritorum, posteritati quasi per manus traditæ, vix consenescent. Fructum interea laboris tui uberrimum, & jucundissimum capis, quum te amari a bonis, atque in oculis nobilitatis esse intelligis; quum tibi omnia prospera evenire optant quicumque solida certaue doctrina, moribus nullo eruditis artificio simulationis, ingenua denique oris animique libertate, quibus rebus excellis, mirifice delectantur. An quod ab Amplissimo Venetæ Reipublicæ Senatore, tuique amantissimo, MICHAELE MAURO CENO, quem honoris causa nomino, ceterisque Rei Litterariæ Triumviris, ad hoc publice docendi munus ultro vocatus fueris; idque

* *Philippica IX.*

que sapientium virorum de te iudicium Senatus universus, optimus ac liberalissimus virtutis aestimator, gravissimo decreto suo comprobaverit: quod hunc dignitatis gradum, quem plerique tanto ambitu petunt, ipse a petendo alienissimus, ac pæne invitus obtinueris: id vero non fuit ad invidiam usque perhonorificum? Quam quidem provinciam sapienter tibi demandatam ita sustines, ut juvenes discendi cupidi qui ad te audiendum frequentes conveniunt, philosophiam quæ de moribus est, non ex turbidis barbarorum lacunis, sed ex purissimis Aristotelis fontibus haurire possint, te videlicet fores & adyta gravissimæ disciplinæ aperiente, & abditissimos quosque summi philosophi sensus, pro tua Græcæ linguæ facultate, copiose ac dilucide enucleante. Vides, nisi fallor, quæ me causæ impulerint, ut, quamvis nullo familiaris consuetudinis vinculo inter nos conjuncti simus (quod ego in meis adversis numero) aliquod tamen observantiæ erga te meæ testimonium exstare vellem. Illud etiam adderem, me tibi mutuam voluntatem ideo debere, quod, si quando a doctis viris qui domum tuam ventitant, de instituto hoc nostro juvandi optimas litteras, in quotidianis sermonibus mentio facta fuerit, consilia abs te mea probari soleant, & contra calumnias improborum amicissimis

verbis propugnari: sed vereor, ne forte homines putent, me tam multa de te prædicasse, non ut candide aperirem quod sentio, sed tantummodo ut ne officio deesse viderer. Quum igitur in ea cogitatione defixus essem, quo tandem pacto, me tui studiosissimum esse, tibi non obscure significarem; commodum accidit, ut ANICII MANLI TORQUATI SEVERINI BOETHII, post M. Varronem Romanorum omnium longe doctissimi, ejusdemque sanctissimi viri, Libros vere aureos DE CONSOLATIONE PHILOSOPHIAE, ex quibus animi magnitudo, rerumque humanarum despicientia adhuc spirat, domesticis sumtibus iterum edendos susciperem. visi sunt mihi, si eos tibi inscribere voluisssem, propensæ in te voluntatis meæ peridonei testes, ac tamquam prædes futuri. quam sane occasionem tam opportunam declarandi omnibus quanti te facerem, nullo modo amittendam esse duxi. Quamvis enim, vitio temporum quibus conscripti sunt, non eam Latini sermonis elegantiam præ se ferant quam in scriptoribus superioris ævi tantopere admiramur, & a Tulliano dicendi genere valde interdum abhorrere videantur; habent nihilominus quo tenere lectorem possint; abundant enim saluberrimis præceptis, quæ si quis non aspernetur, in tantis vitæ tempestatibus cursum teneat,

& ad

& ad tutissimum felicitatis portum perveniat. ejusmodi autem praecepta omni vel exquisitiori Latinitate, recte quidem aestimantibus, neque inepte morosis, aliquanto cariora esse debent. Quorundam porro levitas ferenda non est, qui quum siti ardentissima excrucientur, frigidam tamen, nisi in aureis poculis apponatur, abjicere solent; & sententias pulcherrimas gravissimaeque minime probant, quæ non illustrium selectorumque verborum lenocinio commendentur. His videas inani quadam eloquentiæ specie corruptis, placere sæpius futes nonnullos oratores scriptoresque, in quos Theocriti Chii de Anaximene oratore dictum (a) illud pulchre convenit: ἀρχεται λέξεων μὲν ποταμός, οὐ δὲ σαλαγμός. Hos tamen libellos ab ornamentis orationis non adeo inopes esse dixeris, ut scriptoris infantiam arguant; sunt enim & politi, & candidi, & in materiæ difficultate mire perspicui: quæ vero Boethius noster versibus ludit, ea certe (quod olim (b) Julii Scaligeri judicium fuit) meliorum quoque poetarum lucubrationibus comparari merentur. Ad calcem hujus præclarissimi operis Cajetanus frater meus, quem in hac difficili provincia accurate edendi bonos auctores magnum adjuto-

rem

(a) Incipit verborum quidem flumen, sed mentis gutta. Apud Stobæum.

(b) Poetices lib. VI. cap. V.

rem habeo, ELPIDIS matronæ lectissimæ, primæ BOETHII uxoris, ut a plerisque traditum est, Hymnos duos in Petrum & Paullum, principes Apostolorum, adungere voluit: qui quum & ipse doctrinæ atque humanitati tuæ plurimum tribuat, me præ verecundia cum hoc munusculo ad te accedere dubitantem hortatu suo confirmavit. Accipe igitur, Vir doctissime, benignitate qua soles, hoc quod tibi a me permanenter offertur, & ita meis rebus favere perge, ut tuo testimonio fretus, & in benevolentia conquiescens tua, nullis pusillorum hominum aut malevolorum conatibus, de statu tranquillitatis & constantiæ umquam dimoveri possim. Vale. Kal. Junii. Anno a Partu Virginis MDCCXXI. Patavii.

F I N I S.



ERU-

ERUDITORUM
QUORUMDAM VIRORUM
quibuscum JOANNI ANTONIO VULPIO
amicitia intercedit,

N E M P E

JOANNIS CHECOTII VICETINI,
FRANCISCI ZANOTTI BONONIENSIS,
MATTHAEI BURDEGATI PATAVINI,
DOMINICI LAZARINI DE MURRO MACERATENSIS,

POEMATA NONNULLA.

ΚΑΛΛΙΜΑΧΟΥ ΚΥΡΗΝΑΙΟΥ ΕΙΣ ΔΟΤΤΡΑ ΤΗΣ ΠΑΛΛΑΔΟΣ ΥΜΝΟΣ.

Ο ΣΣΑΙ λωτροχόοι τᾶς Παλλάδῃ, ἔξίτε πᾶσαι,
 Ἐξίτε. τᾶν ἵππων ἄρτι φρυασορμύδων
 Τὰρ ἱερὰν ἐσάκυσσα, καὶ ἂ θεὸς ἄτυχῃ ἔρπει·
 Σῶθε νῦν, ὦ ξυθαί, σῶθε Πελασγιάδες.
 Οὐ ποτ' Αθαρρία μεγάλως ἀπενίψατο πάχεις,
 Πρὶν κόνιν ἱππέων ἔξελάσαι λαγόνων·
 Οὐδ' ὅκα δὴ λύθρῳ πεπαλαμύβια πάντα φέροισα
 Τεύχεα καὶ ἀδίκων ὠϊὺν ἀπὸ γηγενέων.
 Ἀλλὰ πολὺ φράτισον ὑφ' ἄρματ' αὐχένας ἵππων
 Λυσταμύβια, παγαῖς ἔκλυσεν Ωκεανῷ
 Ἰδρῷ καὶ ῥαδάμυγλας· ἐφοίβασεν δὲ παρῆτα
 Πάντα χαλινοφάγων ἀφρόν' ἀπὸ σομέτων.
 Ω ἴτ' Αἰχαιῖδες· καὶ μὴ μύρα, μηδ' ἀλαβάσρας,
 (Συρίγλων αἶω φθόγγον ὑπαξιόν)
 Μὴ μύρα λωτροχόοι τᾶ Παλλάδι, μηδ' ἀλαβάσρας
 (Οὐ γὰρ Αθαρρία χρίματα μικτὰ φιλεῖ)
 Οἴσετε· μηδὲ κάτοπτειν· αἶε καλὸν ὄμμα τὸ τῶας.
 Οὐδ' ὅκα τὰν Ἰδρὺ Φρύξ ἐδίκαζεν ἔειν,

Οὐδ'

257

JOANNIS CHECOTII
VICETINI
METAPHRASIS ELEGIAE
SIVE HYMNI
CALLIMACHI CYRENAEI
IN LAVACRA PALLADIS.

ITE agedum, magnæ lotrices Palladis, ite;
Sacrorum fremitum namque ego quadrupedum
Audiui: nec abest longe dea. quare agite, eja
Ite simul, flavæ, ite, Pelasgiades.
Fortia non Pallas perfundet membra prius, quam
Coeno sordentes terferit alipedes.
Tum quoque quum bello decedens retulit arma
Turpia dirorum sanguine terrigenum,
Fumantes primum solvit temone jugales;
Abluit & magni fontibus Oceani
Pulveream sudorem. at spumas diva lupatis
Expressas nivea deruit inde manu.
Pergite, Achæiades; non myrrham, non alabastrum;
(Audin' vocales ut cecinere rotæ?)
Palladi non myrrham, lotrices, non alabastrum,
(Illa fugit mixtis diffuere unguinibus)
Neu speculum ferte. æternum decus adsidet olli.
Judicium Idæi vel subitura Phrygis

K k

Spre-

Οὐδ' ἐς ὀρείχαλκον μέγ' ἄλ' ἑὸς, ἔδ' Ἰμῶντ' ὅ
 Ἐβλεψεν δίνῃ ἐς Διφαινομῶν.

Οὐδ' Ἡρῇ Κύπρις δὲ διαυγέα χαλκὸν ἔλοισα,
 Πολλάκι τὰν αὐτὰρ δῖς μετέθηκε κόμην.

Ἀ δ' ἐ, δῖς θεήκοντι διατρεφέστα διαύλως,
 Οἷα παρ' Εὐρώπῃ τοὶ Λακεδαιμόνιοι

Ἀσέρες, ἐμπερέαμ' ἑτείψατο λιτὰ λαβοῖσα
 Χέλμια, τὰς ἰδίας ἔκλυσσε φυταλιᾶς.

Ὡ κἄρα, τὸ δ' ἔρευσθ' ἀνέδραμε παρώϊον, οἶδ' ἄν
 Ἡ ῥόδον ἢ σίβδης κόκκ' ἔχει χροῖδ' ἄν.

Τῷ κ' νῦν ἄρσεν τε κομίσαστε μῆνον ἔλαιον,
 Ὡ Κἄστωρ, ὦ κ' χρίεται Ἡρακλῆς.

Οἴσπε κ' κτένα οἱ παῖχρύσειον, ὥς δ' ὅτ' χαίτην
 Πέζηται, λιπαρὸν σμασαρνύα πολόκαμον.

Ἐξίθ' Ἀθηναῖα· ὦ τὰ τοι καταθύμι' ἴλα,
 Παρθενικῇ μεγάλων παῖδες Ἀχαιοειδῶν,

Ὡ' θάρ' α, φέρεται τ' κ' ἂ Διομήδε' ἀσπίς,
 Ὡς ἔθ' Ἀργείων τῷτο παλαιότερον

Εὐμήδης ἐδίδαξε, πὲν κεχαισμέν' ἱεὺς·
 Ὅς ποτε βεβρυτὸν γυνὴ ἐπὶ οἱ θάνατον

Δαῖμον ἐποιμάζοντα, φυγὰ πόν' ἱρὸν ἄγαλμα
 Ωλιχέτ' ἔχων, Κρεῖτον δ' εἰς ὄρε' ὤκισατο,

Κρεῖτον ὄρε'· σέ δ' ἐ, δαῖμον, Διὶ ῥά γε σιν ἔθηκεν
 Ἐν πέτραις, αἷς νῦν ἔρομα Παλλατῖδες.

Ἐξίθ' Ἀθηνῶν περσέπτολι, χρυσοσπῆλ' ἔχου,
 Ἰππῶν κ' σακῶν ἀδορῶν πατάγων·

Σάμερον ὑδροφόροι μὴ βάπτετε· σάμερον Ἀργ' ὅ
 Πίτετ' ὅτ' κερῶν, μὴδ' ὅτ' ποταμῶν.

Σά-

CHECOTIO INTERPRETE. 259

Sprevit orichalci arbitrio dea magna nitere,
 Et Simoenteis fidere imaginibus.
 Sprevit quin etiam Juno. Venus attamen ære
 Usa, comas iterum contulit, atque iterum.
 Hæc celeri lata arva fuga mensa, atque remensa,
 Eurotæ ripas ut Lacedæmonia
 Astra solent, facili duravit corpus olivo,
 Illi de propria quod satiatione redit.
 Emicuit regina, puellæ; punica quali
 Grana rubent, quali prima colore rosa.
 Quare olei vim ferte modo, quo Castora scimus
 Ungi, quo magnum Amphitryoniada.
 Adsit & ex auro pecten, quo fingere crinem
 Gaudeat, & nitidam pectere cæsariem.
 Egredere, o Pallas: tibi præsto est grata caterva
 Virgineus veterum sanguis Acestoridum.
 O Pallas, tibi procedit scutum Diomedis,
 Ritus ut Argivis traditus exstat avis.
 Eumedes tuus edocuit, tuus ille sacerdos;
 Qui, sibi compositam quum ferere usque necem
 Audisset populum, sanctum amplexus simulacrum,
 Abripuit montes protinus in Creïos;
 In Creïos. tum præruptis te, diva, sacravit
 Rupibus, hinc dictis nomine Pallatisin.
 Egredere, o terror belli, auricassis Itoni, (vant.
 Quam clypeum impulsus, quadrupedumque ju-
 Parcite vos hodie fluyiis haurire, ministræ,
 Parcite; fontanas nam bibet Argos aquas.

K k 2 Et

Σάμερον αἰ δῶλαι τὰς κάλ' πίδας ἢ ἑ Φυσάδειδον.

Ἡ εἰς Ἀρυμῶνιν οἴσετε τὴν Διναῶ.

Καὶ γὰρ δὴ χρεῦσθ' τε καὶ ἀνθεσιν ἕδατα μίξας

Ἡξεί φορβείων Ἰναχ' ὅξ' ὀρέων,

Τῶν δ' ἑνὶ τῷ λουτρῷ ἄγων κυλόν· ἀλλὰ, Πελασγέ,

Φράζο μὴ ἐκ ἐθέλων τὰν βατίλειον ἴδης.

Ὅς κεν ἴδῃ γυμνὰν τὴν Παλλάδα τὴν πολιῦχον,

Τῶν γὰρ ἐσοψέεται τῷτο παρυσάτιον,

Πότῃ Ἀθαναία, σὺ μὴ ἐξίθι· μέσφα δ' ἐγὼ τι

Ταῖς δ' ἐρέω. μύθοι δ' ἐκ ἐμὸς, ἀλλ' ἐτέρων.

Παῖδες, Ἀθαρῖα νύμφην μίαν ἐν ποταμῷ Θήβας

Παλὺ τι καὶ πέρι δὴ φίλατο τὴν ἐπέρην,

Ματέρα Τειρεσίαν, καὶ ἑποκα χωρὶς ἔγεντο·

Ἀλλὰ καὶ ἀρχαίων εὐτ' ἐπὶ Θεσπιδέων,

Ἡ πὶ Κορωνείας, ἢ εἰς Ἀλῖαντον ἐλάνησι

Ἰππας, Βοιωτῶν ἔργα διερχομένη,

Ἡ πὶ Κορωνείας, ἵνα οἱ πεθυμῶν ἄλσθῃ,

Καὶ βωμοὶ ποταμῷ κέιντ' ἐπὶ Κεραιίῳ

Πολλάκις αἱ δαίμων μιν ἐὼ επέβατατο δίφρῳ.

Οὐδ' ὅπρῳ νυμφῶν εἰδὲ χοροσάτιαι

Ἀδείαι πέλεθροισιν, ὅτ' ἐχ' ἀγῆτο Χαελκλῶ.

Ἀλλ' ἐτι καὶ τῶν δάκρυα πόλλ' ἔμψας,

Καίπερ Ἀθαρῖα καταθύμιον εὖσδ' ἐταίρην.

Δὴ ποτε γὰρ πέπλων λυσάμενι περόνας,

Ἰππῳ ἐπὶ κράνῃ Ἐλικανίδι καλὰ ρεοῖσα

Λώντο· μεσαμβρινὰ δ' εἴχ' ὄρ' ἀσυχία.

Ἀμφότρῳ λώντο, μεσαμβρινὰ δ' εἰσδ' ὦραι·

Πολλὰ δ' ἀσυχία τῷσιν κατέχεν ὄρ'.

CHECOTIO INTERPRETE. 261

Et vos, o famulæ, situlas hodie ad Physadeam,
 Aut ad Amymonem ferte Danaïadem.
 Jam jam frondosis de montibus Inachus auro
 Auro, atque omnigeno flore lavacra deæ
 Mixta feret. tu reginam ne forte, Pelasge,
 Dum lavat illa, volens intucare cave.
 Continuo, dominam quicumque aspexerit, Argos
 Cernere frustra ægro lumine discipiet.
 Pallas age, egredere. Interea narrabo puellis
 Non mea, sed quæ mi fama reportat anus.
 Inter Thebanas pulcherrima Nympha, puellæ,
 Deliciæ quondam Palladis una fuit
 Mater Tiresiæ. non hac sine Pallada vidit
 Ulla dies, veteres sive ea Thespiadas,
 Sive Coroneam peteret, properansve Aliartum
 Bœotum vegetis arva secaret equis;
 Sive Coroneam, illi umbras qua densat olentes
 Silva, & Curaliis imminet ara vadis.
 Sæpe illam curru secum dea vexit eodem.
 Nec temere coetus, vel chorus ullus erat
 Nympharum, cui non esset dux alma Chariclo.
 Hanc tamen, o divi, plaga manebat atrox.
 Nec quidquam miseram Pallas tum juvit amica.
 Quondam etenim teretes dissolvere peplos
 Gramina ubi placidis Heliconia frigerat Hippo-
 crene undis, mediam sole coquente diem;
 Membraque demittunt fonti, dum tristibus horis
 Aura levis vacuo luderet in nemore.

For-

262 CALLIMACHI ELEGIA

Τειρεσίας δ' ἔτι μῦθον ἄμμι κυτὴν, ἄρτι γῆρα
 Περκάζων, ἱερὸν χῶρον ἀνερρέφετο.
 Διψάσας δ' ἀφ' αὐτὸν τι, ποτὶ ῥόον ἤλυθε κράτας
 Σχέτλιον· ἐκ ἐθέλων δ' εἶδε τὰ μὴ θέμιδες.
 Τὸν δὲ χολωσαμένη περ, ὅμως ᾤροσέφασεν Αἠόνα,
 Τίς σε, τὸν ὀφθαλμῶς ἐκ ἔτ' ἀποισόμενον,
 Ω Εὐφρείδα, χαλεπὴν ὁδὸν ἄγαγε δαίμων;
 Ἀ μὲν ἔφα, παιδὸς δ' ὄμματα νύξ ἔβαλεν.
 Εἰσάθη δ' ἀφθογλόν· ἐκόλλασεν γὰρ ἀνίαι
 Γόνατα, καὶ φωνὴν ἔσχευ ἀμυχήρεια.
 Ἀ νύμφα δ' ἐβόησε, τί μοι τὸν κῶρον ἔρεξας
 Πότνια; τοιῶν δαίμονες ἐς ἐφίλαιο;
 Οἰμωγὰ μοι τῆ παιδὸς ἀφείλεο· τέκνον ἄλασε
 Εἶδες Ἀθαρμίας σῆθεα καὶ λαγόνας·
 Ἀλλ' ἐκ ἀέλιον πάλιν ὄψευ· ὦ ἐμὲ δειλάν.
 Ω ὄρθον, ὦ Ελικῶν ἐκ ἔτι μοι παριτέ.
 Ἡ μεγάλη' ἀντ' ὀλίγων ἐφράξαο· δόρκας ὄλεσας,
 Καὶ πόρκας ἐπολλάας· φάεα παιδὸς ἔχεις.
 Ἀ μὲν ἐπ' ἀμφοτέρωσι φίλον παῖδα λαβοῖσα
 Μήτηρ μὲν γαστρῶν οἷον ἀλδονίδων
 Ἀγε βαρὺ κλαίεσσα· θεὰ δ' ἐλέησεν ἐταίρην,
 Καὶ μιν Αἠθαρία πρὸς τὸν ἔλεξεν ἔπῳ,
 Δῖα γυνῆ, μὲν πάντα βαλεῦ πάλιν ὅσα δι' ὄργαν
 Εἶπας· ἐγὼ δ' ἔτοι τέκνον ἔθηκ' ἀλαδόν.
 Οὐ γὰρ Αἠθαρία γλυκερόν πέλει ὄμματα παίδων
 Ἀρπάζειν· Κρόνιοι δ' ὦδε λέγοντι νόμοι.
 Ὅς κέ τιν' ἀθράπτων, ὅκα μὴ θεὸς αὐτὸς ἔλην,
 Ἀθρήσῃ, μοῦθῳ τῶτον ἰδέειν μεγάλῳ.

Δῖα

CHECOTIO INTERPRETE. 263

Forte ibi Tiresias primævo flore juventæ
 Ducebat fessas per loca sacra canes .
 Exustusque siti , gressum dum fontis ad undas
 Fert miser , invitus , quæ vetitum , ille videt .
 Diva , licet sævo perculsa dolore , locuta est :
 Quis te huc postremum lucida tela die
 Visurum , o Everida , deus ire paravit ?
 Dixit ; at in verbo nox rapit atra oculos
 Tiresiæ . tum genua fluunt , vox faucibus hæret :
 Arrectæ gelido horrore comæ steterunt .
 Ingemit at mater : Natum mihi cur , dea , perdis ?
 Hæccine sunt divis jura sodalitiî ?
 Luminibus fili plectis matrem ? hei mihi , nate :
 Vidisti , infelix , pectora Palladia .
 Non tamen & dulcem spectabis , perditæ , lucem .
 Jam vale mi æternum , o nemus , o Helicon .
 Mercaris magna exiguis . an , lumina ferres
 Ut nati , cervas , capreolosque dabas ?
 Sic misera ambobus puerum complexa lacertis ,
 Qualis ubi tristes dat philomela modos ,
 Flebat . nec Pallas mærentem passa sodalem ,
 Aggressa est dulci farier alloquio .
 Parce , ait , o Nympha , irarum : nimio acta dolore es .
 Non ego sum puero , non ego , causa mali .
 Nec puerorum oculos Pallas venatur . at hocce
 Saturni æterno lex jubet imperio .
*Qui dicunt aspiciet quemquam , nisi ipse videndum
 Obtulerit , multis cernito cum lacrimis .*

Nym-

Δῖα γαῖαν, τὸ μὲν ἔπαλιν ἀγρετον αὖθι γένοιτο
 Ἔργον· ἐπεὶ μοιρᾷ ᾧδ' ἐπένεσε λίνα,
 Ἀνίκα ποτῶν τιν' ἐγένετο· νῦν δὲ κομίζω,
 Ω Εὐφρέδα, πέλθῃς ὀφειλόμενον.
 Πόσα μὲν ἂν Καδμῆϊς ἐσύσερον ἔμπυρα καύσει,
 Πόσα δ' Ἀριστῶν, τὸν μόνον Ἀχόρῃσι
 Παῖδα τὸν ἀβατὰν Ἀκταίονα τυφλὸν ἰδέσθαι,
 Καὶ τλῶν μεγάλας στυγερὰς Ἀρτέμιδι
 Εἶσε· ἀλλ' ἐκ αὐτῶν ὃ, τε δρόμῳ αἱ τ' ἐν ὄρεσι
 Ρυσεῦνται· ζῶναι τᾶμ' ἐκαβολίαι.
 Ὀππότῃν ἐκ ἐθέλων περ ἴδῃ χαρίεντα ἡόετρα
 Δαίμον'· ἀλλ' αὐτὰς τὸν πρὶν ἄρακτα κωῖες
 Τυτάκι δειπνησεῦντι· τὰ δ' ἔτι ὅσ' ἔα μέτηρ
 Δέξεϊται, δρυμῶς πύκτας ἐπερχομένη·
 Ὀλβίσι δ' ἐρέει σὲ καὶ δαίανα ἡμέσθαι,
 Εξ ὄρεων ἁλῶν παῖδ' ὑποδεξαμένην.
 Ω ἑτάρα, τῷ μὴ τι μινύρεο, τῷδε γὰρ ἄλλα
 Τεῦ χάριν ἔξ ἐμέθεν πολλὰ μνηεῦσι γέρα·
 Μνήστιν ἐπεὶν θησῶν τιν' αἰοῖδιμον ἑοσομένησιν,
 Ἡ μέγα τῇ ἄλλων δὴ τι φιλοστότερον.
 Γνωσέῃ δ' ὄρνιθας, ὅς αἰσι, οἳ τε πέπονται
 Ἥλιθα, καὶ ποίαν ἐκ ἀγαθῶν πτέρυγες.
 Πολλὰ δὲ Βοιωτῶν θεοσκόπα, πολλὰ δ' Ἰὼν Κάδμω
 Χρησέῃ, καὶ μεγάλοις ὕερα Λαβδακίδας.
 Δωσῶ καὶ μέγα βόκτρον, ὃ οἱ πόδας ἐς δέον ἄξει,
 Δωσῶ καὶ βιότῃ τέρμα πολυχρόνιον.
 Καὶ μόνῃ, εὐπερὶ θάμῃ, πεπιτυμένῃ ἐν νεφέεσι
 Φοιτᾷ, μεγάλῃ τίμῃ ἀγεσίλῃ.

CHECOTIO INTERPRETE. 265

Nympha, hoc infectum reddi haud pote, quod tibi
 Non exorata constituere colu (Parcæ
 Pondera solventi partus. Nunc accipe dignum,
 O Everida, promeritis pretium.
 Ah quot fumabunt votis Cadmeidos aræ!
 Ah quot Aristæus congeret! unigenam
 Optantes puerum servare Actæona cæcum,
 Dianæ ingentis sit licet ille comes.
 Proderit at nihil in sylvis communiter altis
 Et cursu, & jaculis exagitasse feras.
 Ille, vel invitus divæ quandoque lavacra
 Spectarit, propriis prandium erit canibus,
 Olim qui ductor. tum saltus mæsta pererrans,
 In teneros mater colliget ossa sinus.
 Et dicet: Felix, puerum quæ lumine cassum
 Accepsti e duris montibus in gremium.
 Ne, comes, hunc ne desle, instant cui nempe tot a me
 Munera, pro meritis, officiisque tuis.
 Nam vatem faciam, cui non conferrier ullus
 Ausit: quem stupeat sedula posteritas.
 Felicesque sciet pennas, tristesque volatus,
 Quæque secet liquidas nil metuenda vias.
 Plurima quin promet Bœotis, plurima Cadmo
 Responso, & magnis postea Labdacidis.
 Et lituo gressum firmare dabo, & dabo cursus
 Vivendo plures vincere signiferi.
 Mortuus ast inter prudens versabitur umbras,
 Solus vel domino maximus Agesilæ.

L I

Hæc

266 CALLIMACHI ELEGIA

Ως φαρμάκῃ κατέιδσε· τὸ δ' ἐπιτέλεις ὦκ' ἐπιπόσει
 Παλλὰς. ἐπεὶ μῆνα Ζεὺς πόγε θυγατέρων
 Δῶκεν Ἀθαρῳά· πατρώϊα πρῶτα φέρεσθαι·
 Λάτρεχοι, μήτηρ δ' ἔστις ἔτιπτε θεάν·
 Ἀλλὰ Διὸς κορυφά· κορυφὰ Διὸς ὦκ' ἐπιπόσει,
 Εμπεδον· ὠσμήτως ὦ κέν οἱ ἂ θυγάτηρ.
 Ἐρχετ' Ἀθαρῳά νῦν ἀτρεκές· ἀλλὰ δέχεοδε
 Τὰν θεόν, ὦ κῆραι τᾶργ' ὅσας μέλειται,
 Σιώ τ' ἀαγορίᾳ, σιώ τ' ἀγμοσι, σιώ τ' ὀλολυγῶς,
 Χαῖρε θεά, καῖδευ δ' Ἀργεῶ· Ἰναχί' ε.
 Χαῖρε καὶ ἐξελαόισα, καὶ ἐς πόλιν αὐτίς ἐλάοισαι
 Ἰππες, καὶ Δαρῶν κλᾶρον ἄπδερτα σάω.



CHECOTIO INTERPRETE. 267

Hæc ubi : profequitur nutu verba omnipotenti .

Uni e divinis Palladi virginibus

Namque pater tribuit se se omni ex parte referre .

Mater , lotrices , Pallada non genuit ;

At Jovis enixum caput . ilicet evenere

Quæ pater , evenit nata quod adnuerit .

Pallas adest manifesta . deam curate , puellæ ,

Quas bonus antiquæ tangit amor patriæ .

Et bona verba precesque sonent , strepitusq; vocatum .

O salve , & felix Inachium Argos ades .

Salve ; & ne Danaos pigeat servare : nec Argos ,

Quum semel exieris , flectere rursus equos .



ANGELI POLITIANI

Metaphrasis præcedentis Elegiæ

CALLIMACHI CYRENAEI

IN LAVACRA PALLADIS.

ITE foras agedum, quæcumque liquentibus undis
 Membra lavaturæ Pallados, ite foras.
 Ipsa venit; fremitus sacrorum audimus equorum.
 Ite agedum, flavæ, o ite, Pelasgiades.
 Non prius ingentes lavit sibi diva lacertos,
 Ilia quam absterfit pulvere cornipedum.
 Nec tum quando armis multa jam cæde cruentis
 Venit ab injustis horrida terrigenis:
 Tum quoque equum subducta jugis fumantia colla
 Perfudit largi fontibus Oceani,
 Dum sudor, guttæque putres, dumque omnis abiret
 Spuma oris circum mansa lupata rigens.
 Ite, o Achivæ, sed non unguenta, aut alabaistros,
 (Audio certe ipsum stridulum ab axe sonum)
 Palladi, lorrices, non unguenta, aut alabaistros,
 (Nulla etenim divæ huic unguina mixta placent)
 Ferte nec huic speculum; vultu est pulcherrima semper.
 Nam nec in Ida olim iudice sub Phrygio,
 Se vel orichalco magna hæc dea, vel Simoentis
 Spectavit, quamquam vortice perspicuo.
 Nec Juno; sed sola Venus se splendido in ære
 Vidit, eandem iterum disposuitque comam.
 Bis sexaginta spatilis verum incita cursu,
 Stellæ apud Eurotam ceu Lacedæmonis,
 Perficit tantum pingui se diva liquore,
 De baccis arbor quem sua protulerat.
 O pueræ, emicuit rubor illico, matutina
 Quem rosa, quem grano punica mala ferunt.
 Ergo marem nunc tantum olet quoque ferte liquorem,
 Quo se ungit Cæstor, quo Amphitryoniades.
 Ferte etiam solido ex auro, quo pectine crines
 Explicet, & pinguem cæsariem dirimat.

Exi

Exi age jam, o Pallas: præsto tibi virgineus grex
 Natæ magnorum carus Acestoridum.
 O Pallas, quin jam clypeus Diomedis & ipse
 Fertur, ut Argivum mos verus obtinuit.
 Eumedes docuit, meditant tibi grata sacerdos,
 Quum in se compositio cerneret interitu
 Ire malam sortem; fugit quippe ille, tuamque
 Ad montem Crion sustulit effigiem.
 Ad montem Crion. tum abruptis imposuit te
 Cautibus: hasque vocant nunc quoque Pallatidas.
 Exi age, quæ expugnas urbes, cuique aurea cordi
 Cassis, equumque fremor, cum sonitu clypeum.
 Vos hodie, undifera, ne tinguite, vos hodie Argos
 Fontibus ex ipsis, non fluvii bibite.
 Vos hodie, ancillæ, ferte urnas ad Phsydeam,
 Aut ad Amymonem progeniem Danai.
 Namque auro, & multis permixtus floribus undas
 Desuet e lætis Inachus ipse jugis,
 Et purum feret huic laticem. cave tu ergo Pelasge,
 Ne nudam imprudens aspicias dominam.
 Aspiciet nudam qui Pallada, quæ tenet urbem,
 Ultra jam hoc Argos cernere non poterit.
 Jam veneranda exi Pallas, dum quiddam ego istis
 Dicam: nec meus hic sermo, sed alterius.
 Unam olim, o pueræ, Thebis dea Pallas amabat
 Nympham, præ cunctis quas habuit comites,
 Matrem Tirestæ, numquamque fuisse scorsum:
 Sed sive ad veterum mœnia Thespiadum,
 Sive Coroneas, seu tenderet illa Haliarton
 Bæotum visens vesta jugis populos,
 Sive Coroneas, ubi pulcher odoribus halat
 Lucus, ubi ara ipsi Curatium ad fluvium;
 Sæpe illam curru secum dea vexit eodem:
 Nullaque Nympharum colloquia, aut thias
 Grata fuisse satis, nisi præforet ipsa Chariclo.
 Verum & ei multæ debitæ erant lacrimæ,
 Quamvis cara comes magnæ foret usque Minervæ.
 Nam se olim pepelis utraque depositis
 Dum lavat in lymphis Heliconidos Hippocrenes,
 Utque die vacuus mons tacet in medio;
 Dum lavat ergo utraque, & medicæ sunt tempora lucis,
 Dumque est in toto plurima monte quies;

Tire-

Tiresias unus canibus comitantibus ibat
Per loca sacra, levi flore genas nitidas,
Immensamque sitim cupiens relevare, petito
Fonte, videt quæ non cernere fas homini.
Hic, irata licet, sic illum adfata Minerva est:
Quis te non ullis jam rediturum oculis,
O Everida, malus hæc deus in loca duxit?
Sic ait: at pueri lumina nox pepulit.
Adstitit, obticuit; dolor illi, ut glutine, viuxit
Genua; sonum tenuit vocis inops animus.
At Nympha exclamans, Quid nato, ait, o dea, factum est?
Numquid vestra, deæ, talis amicitia?
Lumina mi pueri rapuisti. pectora, nate,
Vidisti, infelix, Pallados, iliaque.
At non & solem cernes iterum. heu misera! o mons,
O Helicon rursus non peragrande mihi!
Magna nimis parvis mutas, quæ lumina nati
Pro cervis paucis, dorcadibusque habeas.
Sic puerum ambobus carum complexa lacertis
Mater scibulum carmen acdonidon
Triste gemens iterat. sed enim miserata Minerva
Tunc sociam verbis talibus alloquitur:
Dia, inquit, mulier, verte hæc, quæ protulit ira;
Non per me captus luminibus puer est.
Nam pueris auferre oculos haud dulce Minervæ,
Verum Saturni legibus hæc rata sunt,
Ut quicumque deum aspiciat, nisi iusserit ipse,
Mercede ingenti scilicet aspiciat.
Dia, igitur, mulier, fieri hæc infecta nequit res,
Quippe ita Parcarum fila voluta manu,
Editus ut primum puer est. Sed tu accipe contra,
O Everida, quod maneat, pretium.
Munera Cadmeis prob quanta adolebit in ignes,
Quanta & Aristeus, vota que suscipient,
Natus ut impubes Adæon, unicus illis,
Tantum oculis careat! namque erit & Triviæ
Concursor: sed non cursus, non æmulus illum
Tela arcus jaciens montibus, eripiet,
Quum divam, licet invitus, se fonte lavantem
Viderit: at fiet, qui modo erat dominus,
Esca suis canibus. sed enim nemora omnia lustrans
Dum genitrix nati colliget ossa sui,

Tunc

POLITIANO INTERPRETE. 271

*Tunc te felicem, tunc dixerit esse beatam,
 Cui mons vel cæcum reddiderit puerum.
 Parce queri, mea grata comes; nam plurima contra
 Huic ego, te propter, præmia contribuam.
 Esse dabo egregium vatem, quem protinus omnis
 Perpetuo celebret nomine posteritas.
 Cognoscet, volucrum quæ prospera, quæque volatu
 Irrita, cujus item triste sit augurium.
 Plurima Bæotii oracula, plurima Cadmo
 Hic canet, & magnis plurima Labdacidis.
 Huic ingens baculum dabo, quod vestigia ducat
 Qua velit: huic vitæ tempora longa dabo.
 Mox & honoratus Diti colet infera regna,
 Inter & extinctos unicus hic sapiet.
 Adnuit his Pallas dictis; quodque adnuit illa;
 Perficitur. soli Juppiter hoc tribuit
 Natarum e turba, quæ sint patris omnia ferre.
 Lotrices, mater nulla deam peperit,
 Immo Jovis vertex. vertex Jovis omnia nutu
 Perficit, & natæ prorsus idem licitum est.
 En vere nunc Pallas adest. Eja ergo, puellæ,
 Quis Argos curæ est, ite, deam accipite.
 Cumque bonis verbis, & cum prece, cumque ululatu,
 Salve, o diva, urbem protege & Inachiam:
 Salve hinc abscedens, iterumque huc flecte jugales,
 Ac rebus Danaûm sis, precor, auxilio.*



AU-

AUCTORIS CUJUSDAM

Alia Metaphrasis præcedentis Elegiæ

CALLIMACHI CYRENAEI

IN LAVACRA PALLADIS.

ITE, o lotrices divinæ Pallados, ite
 Omnes; nam sacri præteraguntur equi.
 Audivi fremitum, Pallasque huc proripit ipsa.
 Ite, coma insignes, ite, Pelasgiades.
 Diva suas numquam Pallas prius abluit ulnas,
 Pulvere quam rapidi membra levasset equi.
 Nec quum, terrigenis celesti limine pulsus,
 Tela giganteo tincta cruore tulit.
 Nam prior hæc illi tunc cura, ut libera curru
 Aeripedum liquidis colla lavaret aquis.
 Cura prior icpidas sudoris demere guttas,
 Et quæ frenatos spuma gravabat equos.
 Ite foras, pigmenta nec ulla, nec ulla alabastra,
 (Audio stridentes axibus ire rotas)
 Nulla unguenta deæ, lotrices, nulla alabastra,
 (Non amat his Pallas culta nitere bonis)
 Nec speculum ferte huc: semper formosa Minervæ
 Est facies. nec quum sub Phryge rixa fuit,
 Se se in orichalco dea, nec Simoentis in unda
 Contemplata olim limpidiore fuit:
 Nec Juno: sed sola Venus speculo usa fuisse
 Fertur, & ornatam bis posuisse comam.
 Pallas ubi emensa est bis sexaginta diaulos;
 Qualis ad Eurotæ cum pare Castor aquas;
 Tum demum sua perfrexit medicamine vili
 Membra, quod huic sacre frondis oliva dabat.
 O nuptæ, hic subito micuit rubor, ignea qualem
 Seu rosa, seu grano punica mala ferunt.
 Ferte maris tantum præpingue liquamen olivi,
 Quo caput Alcideæ, Tyndarideque mader.
 Ferte etiam aurati dentes huc pectinis, illo
 Ponat ut absterfas in statione comas.

Egre-

Egredere, o Pallas: adsunt tibi grata puellæ
 Concio, magnorum filia Acestoridum.
 O dea, quin etiam scutum Diomedis ad undas
 Exit, ut Eumedem instituisse ferunt:
 Eumedem, gratus qui quum tua templa sacerdos
 Servaret, populi vim tulit Argolici:
 Compertis post infidiis fugitque, tuoque
 Cum signo Creji sub juga montis iit:
 Sub Creji montis: teque alta in rupe locavit.
 Pallatides rupes incola turba vocat.
 Egredere, o Pallas, bello metuenda, trucique
 Casside: quam fremitus, scutaque densa juvant.
 Vos vero, undiferæ, ne tingite membra; nec, Argos,
 Tu fluvios bodie, sed bibe fontis aquam.
 Hac ad Amymonem ferte urnas luce, puellæ,
 Aut qua fontanis it Phsydaea viis.
 Namque auro mixtas, & floribus Inachus undas
 Herbiferis orto provehit amne jugis:
 Pulchraque divæ ornat pro more lavacrum: Pelasge
 Sed tu ne videas Pallada forte cave.
 Viderit hanc si quis nudam, & sine veste lavantem,
 Extremum Argolicos viderit ille focos.
 Egredere, o Pallas. loquar hic ego pauca puellis,
 Haud ficta, at longo tempore nacta fidem.
 Nympha fuit Thebis, quam prætulit omnibus unam
 Quas coluit socio Pallas amore deas:
 Tiresie mater. numquamque fuere scorsim,
 Seu dea Thespiacos ingrederetur agros,
 Sive Coroneam, seu colla Haliarton equorum
 Flederet, Aoniam quum peragraret humum.
 Sive Coroneam, qua lucus odoribus balat,
 Curallumque sacros alluit amne focos.
 Sæpe illam curru secum dea vexit eodem.
 Grataque Nympharum fabula nulla fuit,
 Nulla chorea, cui non præforet ista Chariclo:
 Sed tamen hanc lacrimæ, duraque fata manent,
 Quamlibet una foret nimium dilecta Minervæ.
 Nam postis quondam monte Helicone stolis,
 Utraque tingeat liquidis Aganippidos undis
 Corpora, per medium colle silente diem.
 Utraque tingeat, medioque altissimus orbe
 Sol erat, & toto plurima monte quies.

Forte huc Tiresias, primæ lanuginis heros,
 Advenit, & catulos per nemus illud agit:
 Urgentique sit, fontis descendit ad undam,
 Quodque nefas illo est fonte videre, videt.
 Hunc, irata licet, tamen est adfata Minerva:
 Quis te, post oculos non habiture tuos,
 Quis te, Tiresia, lucum perduxit in istum?
 Dixit, & æterna lumina nocte premit.
 Constitit hic, mutusque hæsit. nam plurimus ægra
 Membra dolor, nimius præpedit ora timor.
 Tum Nympha exclamat, Pueri quæ damna dedisti,
 O dea? num divis hæc in amore fides?
 Eripuisti oculos pueri. prob peccora, fili,
 Palladis infausto quam male visa tibi!
 An solem posthac tu numquam aspexeris? heu me,
 Me miseram: heu Helicon numquam adcunde mihi.
 Haud facilo par pœna suo. nam lumina cæcas,
 Nec damis alias, nec metuenda capris.
 Sic ait, amplexum desletque miserrima natum,
 Mater ut amissum quum gemit ales Ilym.
 At dea dilectam vitæ miserata fodalem,
 Compellat tali sacra Minerva sono:
 Dia comes, revoca quæcumque e bile locuta es.
 Excæcat sobolem non mea dextra tuam:
 Nulla mihi puerorum oculos rapuisse voluptas:
 Sed rata falcigeri lex jubet ista senis,
 Ut qui forte deum (nisi cui permiserit ipse)
 Viderit, is visu præmia digna ferat.
 Dia comes, mihi facta nefas fecisse deorum
 Irrita: Parcarum sic statuere manus,
 Fatales a luce manus, qua prodiit ortus.
 Quin tu igitur merita præmia sortis habe.
 Quot dein Autonoe sacros adoleret honores!
 Et quot Aristæus! votaque quanta darent,
 Ut puerum possent Alcæona cernere cæcum!
 Atqui erit ille tuus, magna Diana, comes.
 Non tamen hunc cursus, sociique in montibus arcus,
 Venturis poterunt eripuisse malis,
 Quum divam imprudens conspexerit amne lavantem:
 Sed dominus canibus præda erit ipse suis.
 Ossaque tum gentrix nati, nemora omnia lustrans,
 Colliget, in multis inveniendâ locis.

ANONYMO INTERPRETE. 275

*Et te felicem, te dixerit illa beatam,
 Quæ puerum hac habeas conditione tuum.
 O mea, ne plores: etenim pro lumine raptò,
 Illi, te propter, munera plura dabo.
 Scire futura dabo, reliquisque excellere vatem
 Omnibus in sera posteritate viris.
 Noverit is, volucrum quæ prospera, quæque volatu
 Irrita, & augurio quæ mala signet avis.
 Plurima Bæotis oracula, plurima Cadmo
 Concinet, & magnis plurima Labdacidis.
 Addam etiam, quo cæca pedum vestigia firmet,
 Fulcrum illi, & vitæ tempora longa bonæ.
 Solus & a leto Stygiis consultus in oris
 Vivet: & hunc, Pluton ægesilæ, coles.
 Sic ait, & nutu firmat. nam si cui Pallas
 Adnuit, id debet firmiter esse ratum.
 Natarum hoc soli pater, omnia ferre paterna
 Concessit; nulla nam dea matre scita est,
 Sed Jovis e cerebro. cerebrum Jovis omnia nutu
 Firma, suoque simul cum patre nata facit.
 Pallas adest vere: venientem mollibus ulnis
 Excipite, Argolidis quas pius urget amor.
 Edite clamores, date vota, attollite plausus.
 Pallas, ave, & curæ jugiter Argos habe.
 Salve, quoquo abeas, & colla huc mitis equorum
 Reflecte; & Danaos prompta tuere focos.*



E J U S D E M
JOANNIS CHECOTII
CARMINA NONNULLA.

I.

Ad Amicum.

(*Hanc Elegiam scripsit Auctor admodum adolescens.*)

DUM te continuum solantem carmine amorem
 Frigidus in viridi litore Parma videt :
 Atque indignantes molli sub gurgite Nymphas
 Se se mortali vincier a domina ;
 In qua te tantum duplex Amathuntia torret , (dos
 Quantum quum Daphnes Phoebus Hamadrya-
 Paullatim fibris dulcem implicuisset amorem ,
 Hæmoniis flevit saucius aggeribus :
 Tempore quo potum pastor deducere vaccas
 Optavit stabulis , Theffala terra , tuis .
 Nympharum domus , & longe resonantia saxa ,
 Et vaga Penei fluminis hospitia ,
 Vos testes , miseri quæ flerit Apollinis ardor :
 Seu passim croceo sidera pulsa polo
 Stillantes pelago tollens Aurora capillos .
 Nereidum ad solitas exigeret choreas :
 Seu quum noctiferos ostendens Hesperus ignes
 Invitas tremula luce fugaret aves ,

Quas

Quas mater verita obscuræ discrimina noctis,
 Increpitans pennis acciperet cubitum.
 Nam quid te juvat, o niveo magis alba ligustro,
 Atque eadem scopulis sævior Hadriacis,
 Me miserum extenuare, ac lentæ dedere pesti,
 Quæ sensim inrepens pascitur ossa mea?
 Quod si me tali torqueri peste necesse est,
 Atque id melle tibi dulcius esse potest,
 Ah ego cur tantos leto finire dolores,
 Nec possum in gremio, vita, perire tuo?
 Omnia quæ levibus ventorum credita pennis
 Arduus e scabris rupibus Ossa refert.
 Nec Phœbo prodesse comæ immortalis honores,
 Nec poterat numeris docta sonare lyra.
 Cui tu nec forma multum, nec carmine dispar,
 Dum quereris dominæ flebile discidium,
 Me tenet arboribus variis mihi consita silva,
 Et fons, lucidulis quem vehit amnis aquis.
 Hic mihi naturam placeat servare fugacem,
 Et Lunæ, & Solis perdidicisse vias.
 Semine quo magni consistant ætheris orbes,
 Et cur tam vario lumine Luna micet.
 Quid pluvias, Austrosque graves, quid fulmina cælo
 Sufficiat, seras quid pariatque trabes.
 Aut cur, florentem Zephyrus quum liquerit annum,
 Inferat æstatem pulverulenta Ceres.
 Quam subit Autumnus musto circumlitus atro:
 Mox venit imbrifero vertice tristis hiems.

Tum

Tum stellarum ortus canere , ac prædicere ventos ,
Dum fortis durum villicus urget opus .
Quæ post evenisse stupefeat rustica pubes ,
Et me tam certas fandi iniisse vias .
Non mihi sit formosæ ad limina flere puellæ ,
Nec dextram teneris implicuisse choris .
Nec foribus clausis grandes opponere vinctes ,
Nec dominam ad lacrimas sæpe movere novas .
Naturæ potius viridi spatiarier horto ,
Et cupiam suaves demetere inde rosas .
At neque poeniteat , modo me trahat illa voluptas ,
Musæo interdum spargere cuncta sale .
Orpheu , te pecudesque , boumque armenta secuta ,
Fluminaque , & Tempe saxa coisse ferunt :
Atque ubi vel gregibus fuerat mons arduus olim ,
Aurigæ celeres incaluisse rotas .
Dum caneres Lunæque vias , Solisque labores ,
Stellarumque vagos , Nocte regente , choros .
Quin etiam infernas potuisti flectere leges ,
Et deploratæ consulere Eurydici .
Scilicet hæc possunt manes revocare sepulcris
Sola , & de nigris ossa ciere rogis :
Et sola obscuro nomen subducere leto ,
Atque ad longinquos ferre Borysthenidas .
Hæc mihi contingant olim . nunc teque , tuamque
Aspiciat læta fronte benigna Venus .

I I.

*Vicetia urbs N. N. Praefectum,
a se discedentem, alloquitur.*

MULTAS post hiemes quum me permittere divis
Visum est ut longa prosperitate forem,
Tempora venerunt nigro signanda lapillo.

Hei mihi quam celeres illa habuere pedes!
Ergo ego postremum misera hac te luce videbo,

Heu pater, heu pectus pectoris ipse mei?
Te propter, mihi nec belli sentire furores,
Nec fuit externos pertimuisse duces.

Exemplum vixi, te propter, nobile mundo.

Tu mihi tu tanti causa decoris eras.
Et potui hospitio magnos mihi jungere REGES.

Tunc ego quam multis invidiosa fui!
Non possum reticere: vetat tamen omnia mæror,
Et rumpit medio tristia verba sono.

Ergo abeas, capiasque tuam post longa quietem
Tempora. me hoc uno non doluisse decet.

Non ego sum tanti, ducas ut nocte labores,
Et tenuet graciles alba senectæ genas.

Vive, pater. Pylii vivas ut Nestoris annos,
O ego si possem contribuisse meos!

Tum, tibi quæ venit diis adspirantibus uxor,
Expleat ingentis munera connubii.

Quumque tui steteris præcellus honore senatus,
Inter & æquales conspiciendus eris,

Me

Me quoque ne pigeat reliquis, pater, addere curis.
Tunc mihi quam felix facta videbor ego!

I I I.

L Y C I D A S.

LANGUENTES Lycidæ pascit dum somnus ocellos,
Obsrepitans placidæ qua fluit humor aquæ;
Et querulo argutæ strident modulamine quercus,
Tum vario tellus picta colore nitet;
Tu notos pueri vultus, gressumque, Cupido,
Induis, & faciles, improbe, fallis oves.
Illæ autem Idalio percussæ corda lepore,
Nec memores herbæ, nec memores laticis,
Confestim ignotum circumfunduntur Amorem,
Et se se tenero conglomerant lateri.
Atque ibi dum excitus Lycidas circumspicit, & ne
Procedat nimium grex, timet, in nemore;
Vixque levi digito sonitum dat semisopitus;
Continuo ad dominum corripuere fugam:
Voce licet, fremituque alter fugientibus instet.
Inunc, & te amens confer Amor Lycidæ.



IIII.

III.

IN EDITIONEM OPERUM

ANDREAE NAUGERII

A JOANNE ANTONIO VULPIO

PROCURATAM

EPIGRAMMA.

ΑΛΛΑ' τίς ἐκ οἰκτρὸν σε πολὺ καὶ σχέτλιον ἔποι-
 Νωγῆται; ὃν γὰρ ζῶντα ἐν ἀλλοδαπῇ.

Πολλὰ θεὸς τιμῶντα ὡς νόσιμον οἱ ἐπίνασται

Ἡμερ, ἀεικελίως εἴλετο μοῖρ' ὀλοή.

Τόσσα δὲ Μυσάων πινυταῖς πεπονημένα χερσὶν,

Τόσσα γέμοντα ἄκρας βιβλία σωφροσιώης,

Ως κενὴν Εὐρὸς ἐνότισε φέρεσιν ὁμίχλῃ,

Φῶ, φῶ, τῆς λήθης πικρὸς ἀνείλεν ὁδός.

Τίς δ' ἐκ δούλινα πάλιν δίδαιμονα τ' εἴποι;

Οππότε ἔρας χαλῖτων Οὔλιπ' ἀπλοκάμων,

Οὔλιπ', ὃν Ληθεὺς μέλα τιμᾷ καὶ Διὸς ἰός.

Οἷα φίλῃ μήτηρ, ἥδ' ἑλκεὶ ἄλοχ'

Ἀνδρὸς ἐπερχομένη λάκ' ὅσα, λεῖψανα πάντα

Δέξατο, καὶ νεκρὸν κόσμον ἔδωκεν ἔχειν.

Ὡ μέγα, ὡς πολὺ νῦν μάλλον σέθεν ἔνομα λάμπει,

Ἡ ὅσον ἀπείρου νεκτὸς ἐβλάψε φθόγ'.

Χαῖρε κόνις, καὶ τῷ τιμῶν ἄναι' ἐνὶ τύμβῳ,

Καὶ σὺ πινόμε σοφὸν χεῖρε ἐν Ἡλυτίῳ.

N n

Idem

V.

Idem Latine redditum,

EODEM CHECOTIO

INTERPRETE.

NAM quis te miserum non dixerit, & male natum,
 NAUGERI? cara quem procul a patria
 Optantem longos reditu finire labores
 Pallidus infernis obruit Orcus aquis.
 Quid memorem æterno stillantes neſtare libros,
 Quos Muſæ argutis texuerant digitis?
 Hei mihi, ceu nebula ventorum ſponte feruntur,
 Omnia Lethæo perdita dente jacent.
 At nunc felicem fugiat quis dicere? quando
 VULPIUS, auricomæ quem pereunt Charites:
 Cui pulchra adſurgit proles Latonia: mater
 Ut bona, vel multis candida cum lacrimis
 Conjux oſſa viri quærit, ſic undique lectas
 Perſudit claro lumine reliquias.
 Felix, ah quanto recipis cum fenore quidquid
 Abdiderat longis invida Nox tenebris!
 Eja agite officio cineres gaudete ſepulti,
 At docta in campis gaude anima Elyſiis.

VI.

VI.

INSCRIBENDUM SEPULCRO
SEBASTIANI FRATRIS,

immatura morte prærepti.

NEC mihi te quidquam poterat contingere vivo
Triste, nec abrepto dulce quid esse potest.
Quod reliquum est vitæ, frater, totum dare luctu
Certum est, perpetuis implicitum lacrimis.
Illa modo latum faciet lux, illa beatum,
Quæ mihi complexus reddet amica tuos.

VII.

SUB EFFIGIE
D. CAROLI BORROMÆI.

FERREA torpentes premerent quum sæcula terras,
Et scelus abruptis passim ferretur habenis,
Tum mortale genus cælo miseratus ab alto
CHRISTUS labenti misit te, CAROLE, mundo.



FRANCISCI ZANOTTI

B O N O N I E N S I S

C A R M I N A.

AD FERNANDUM ANTONIUM

G H E D I N U M.

E L E G I A I.

ET si me variæ rapit inconstantia fortis
 Jampridem, incertæ versat & orbe rotæ:
 Nunc vero, fieri quod numquam posse putabam,
 Torquet Amor duræ sævitia dominæ:
 Quæ, nisi opem fert Juppiter, aut alius deus ullus,
 Hei mihi! rus longam cogitat ire viam,
 Meque suum juvenem confectum pæne dolore,
 Inque malis tantis impia deferere:
 Ah, tibi ego si quid placui, si me quid amasti
 Umquam, per Venerem, perque suum puerum,
 Per te ipsam oro, vita, mane. an tu, lux mea, credas
 Unum me sine te vivere posse diem?
 At, memini, quondam, quum non sic dura fuisti,
 Dulcius esse aliquid me tibi non poterat.
 Nunc tibi mens alia est; at non mihi, non mihi certe,
 Qui te fixam unam semper habebam animo;
 Teque die semper, te semper nocte vocabo,
 Frustra, etsi multis non sine lacrimulis.

Non

Non fecus ac quondam deserti ad Strymonis undam
 Orpheus erepta dicitur Eurydice :
 In tantis, GHEDINE, tamen mæroribus, inque hoc
 Luctu, qui me intus devorat assidue,
 Nec finit, heu, noctes requiescere, scripsimus ad te,
 Quem unum plusquam oculos diligo, plusquam
 animam.
 Dicitur ut caro flagrasse in Castore Pollux,
 Quem ut voluit divis Juppiter inferere,
 Atque novum cæli sidus facere, Est mihi, dixit,
 Frater: is in partem, Juppiter, ut veniat.
 Qui subito arreptus magni jussu omnipotentis,
 Ad fratrem sedes venit in ætherias;
 Postque aliquot menses incedere cœpit Olympo:
 Ille alto se se proluit Oceano.

Ad Virum Celeberrimum

JOANNEM BAPTISTAM MORGAGNUM

In Gymnasio Patavino Anatomæ Professorem Primarium.

E L E G I A II.

QUOD scribis, MORGAGNE, satis placuisse,
 quod ad te
 Misi, incomtum illud carmen, & horridulum,
 Quod, mihi quum mordax laceraret pectora cura,
 Et miserum urgerent Sors, Amor, & domina,
 Nescio qua tacitum & longum sub rupe querenti
 Mi mea dictarat candida Calliope,

Id

Id gratum est mihi; sed quod rursus adducere tentas,
 Meque ad Musarum delicias revocas,
Possem utinam! at quis me credat (nisi ferreus ipse est)
 In tantis quidquam scribere posse malis? (est,
Tempore nam ex illo mea quo mihi reddita amica
 Quam unam præ vita carā habeo atque oculis,
Non possum, quales tulerim, quantosque labores;
 Quot gemitus, quot suspiria, quot lacrimas,
Dicere, quotque preces, ut duram flectere mentem
 Possem, mi misero fundere opus fuerit.
Quum mihi visceribus furor hic hæreret in imis
 Interea, & saxis staret ea asperior.
Ah! quid tantum a me peccatum est, Lydia? quod tam
 Tam dirum potui admittere flagitium,
Tamque grave, ut me tot poenis, & tam male plectas?
 An non te toto semper amavi animo?
An non laudavi semper, formamque probavi?
 Quæ tamen, heu, miserum quid benefacta juvât?
Illa quibus dictis jam coeperat inflammari,
 Jam flecti precibus coeperat illa meis.
Jam se culpabat, jam se duramque vocabat:
 Ipsa fatebatur lenta fuisse nimis.
Litterulasque mihi mittebat idemtidem, & oh quas!
 Quas, credo, ipse suis scripsit Amor digitis.
Queis ego sollicitum, ut poteram, solabar amorem;
 Quum subito ecce aliud mi accidit horribile.
Nam dum candentem mi dextram porrigit illa,
 Spondet & optati gaudia conjugii,

Nec

Nec tātum quidquam potis est exstinguere amorem;
Cogitur ad patrios illa redire Lares.

Ad patrios, M O R G A G N E, Lares heu cogitur illa.

Quo perculsa novo fulmine mens animi
Excidit, atque omnes secum sensus rapit una,
Omnes delicias, omne meum studium.

Quare nec dulces impellere pollice chordas
Nunc mihi, nec teneris ludere carminibus,
Nec solita cura est præcingere tempora lauro

Tristia, nec colles scandere Pierios;
Sed flere, & longas sine somno ducere noctes;
Qualis dimisso Penelopea viro

Dicitur, ille inter quum proelia versaretur
Agmen agens muros militum ad Iliacos.

Quæ tamen haud solis sibi tum metuebat ab armis,
Verum etiam a ventis, & mare navifrago,

Quum sæpe egrediens portis bipatentibus Hector
Se se per medios irrueret Danaos,

Cogeret & ventis rursus dare vela secundis:
Illa autem scibat, quanta pericla maris.

Quæ tamen heu voluit, voluit G H E D I N U S adire
Heu miser, & rapido credere se pelago.

Et nunc heu (qui scit?) nunc illum forsitan Auster,
Forsitan unda mali verberat Oceani.

Tune igitur patriam potuisti linquere terram?

Tune igitur tristem deseruisse patrem?

Tune igitur dulces fratres, caramque sororem?

Et procul a cara vivere tun' domina?

Par-

Parcite vos fluctus, vos, quæso, parcite venti,
 Et facite ut faciles naviget ille vias.
 Et rediens omnes circum amplexetur amicos,
 Inque suæ gremium se referat dominæ;
 Quæ misera, heu, frustra aversos amplexa Penates
 Qualia pro caro vota facit juvene!
 Infelix! sed quid luctus nunc persequar illos?
 Lydia me torquet, Lydia cura mea est.
 Hæc mihi lætities omnes, hæc gaudia ademit,
 Hæc cor, hæc mentem surpuit, hæc animum.
 Hæc me perpetuo vultum pallefcere cogit,
 Et madidas lacrimis semper habere genas.
 Quare, si quos vis, renuo tibi mittere versus,
 Hoc ego non renuo, verum Amor, & domina.
 Quite utinam, MORGAGNE, magis feliciter urant:
 At fore mi semper difficiles video.

A D P U E L L A M.

E L E G I A III.

(*Argumentum pro antiquo fictum.*)

MENE igitur vanæ semper servire puellæ?
 Mene igitur duræ ferre jugum dominæ?
 Munera quid nobis, quid nobis carmina profunt?
 Ah per vim atque minas illa movenda mihi est.
 Vis alias movit; vis te quoque, dura, movebit.
 Perfida, quid rides grandia vota mea?

Si

Si nescis ; magicos docuit me Veïa versus .

Possum ego te in ferrum vertere , te in lapidem .
Et faciam ; nam quid fulvi me verticis aurum ,

Contextus gemmis quid juvat iste sinus ?

O pereant crines , pereant gemmæque , sinusque .

Illa mihi tanti caussa fuere mali .

Illa per obscuras me cogunt ire tenebras ,

Et caput egelidis imbribus objicere .

Illa jubent miserum tota hic me nocte jacere ,

Et latus in duris frangere liminibus .

Limina dura ! quibus toties excludimur ; ah vos

Grandine vos cælum verberet , & pluvia .

At dominæ imperium crudelis vos premit : illa est

Impia ; laxari vos vetat illa mihi .

Impia , pande fores . non sic excludere amantem

Fas est . per magnam non licet hoc Venerem .

Quid si ardens ira , rapidus , præcepsque venirem ,

Armatos ducens in tua tecta homines ?

At ducam ; quando nec te suspiria nostra ,

Nec possunt ullæ flectere te lacrimæ .

Ducam . illi æratos evellent cardine postes .

Fracta cadet multo janua cum strepitu .

Ipse etiam ingressus , clamans te persequar usque ,

Injiciamque manus , diripiamque comas .

Non mihi te mater , non te mihi subtrahet ullus .

Frangam te multis , impia , verberibus .

Nempe etiam e summa possum te , sæva , fenestra ,

Si furor impulerit , præcipitem ejicere .

O o

Quid

Quid loquor? ah miserum quo me rapit ira, dolorq;?

Hei mihi! non ullis vincitur illa minis.

Parce, precor; sæpe hæc etiam sum dira precatus

Ipse mihi; parce, o parce, puella, precor.

An mihi tam rigido credas præcordia ferro

Cincta esse, ut possim tanta videre mala?

Non faciam. sed tu repera jam, lux mea, postes;

Jam repera; excluso quæ tibi laus puero est?

Non peto ego tecum nocte hac concumbere posse

Furtim: posse loqui, posse videre peto.

Id si dura negas; mulier non te edidit ulla,

Sed potius rabidis tigribus es genita.

Sed tamen usque negas. O ferro, & durior ipsis

Saxis! multa tuo dii mala dent capiti.

AD DIVUM PHILIPPUM NERIUM.

ELEGIA IV.

ET si animum subito perculsus funere amici,

Quem nuper mihi mors invida præripuit

Exstinctum misere, atque ipso in flore juventæ,

Spem patriæ, nostri spemque sodalitii,

Vix possum ingenium solitas appellere ad artes

Musarum, & mentem vertere ad hæc studia,

In quibus exercet se se generosa juvenus,

Tantis curarum fluctibus intus agor;

Non possum tamen, o felix, atque optime NERI,

Hic ego non aliquos promere versiculos.

Non

Non quo facta tua, & divinas dicere laudes,
 Et quæ factorum præmia magna capis,
 Ipse putei me posse, aut, si possim, hoc opus esse.
 Sunt qui resque tuas, & decora, & titulos,
 Virtutesque æterno carmine complectantur;
 Mi satis est animum expromere, & officium.
 Scis tu; quum potui, pastores Arcadas inter
 Quæ tibi, sancte senex, carmina persolui.
 Nimirum ingenuas ego tunc per Apollinis artes,
 Quum nullis curarum æstibus abriperer,
 Gaudebam, exultansque animo; lætusque ferebar:
 Nunc me crudelis nocte dieque dolor
 Occupat assiduus, animique in limine perstat
 Expellens omnem pectore læticiam.
 O pater, o mihi da curæ moderatier isti,
 Et luctum hunc tantum cōprimere, & lacrimas,
 Quas dudum cari mors immatura sodalis
 Exprimit. haud peto ego hoc pro pietate mea.
 Pro meritis, & pro virtutibus ipsius ipsis,
 Pro fide, & eximia religione peto.
 Nam meminisse decet te, quæ mihi multa precatus,
 Dulcia quum vitæ tempora transigeret,
 Ille fuit, quum se ante tuam prosterneret aram
 Dona ferens multis non sine lacrimulis;
 Postea linteolo quas leniter abstergebat,
 Plorantem ne quod proderet indicium.
 O qualem, & quam nunc mutatum tempore ab illo,
 Dulcis Alexander, te miser excipio!

O O 2 Dul.

Dulcis Alexander, nostri solamen amoris
Quondam, nunc luctus, perpetuusque dolor.
Non jam ullam invises aram, non jam amplius ulla,
Hei mihi! pro caro dona sodale feres,
Quem miserum liquisti, & pectore confternatum.
Credo equidem, nec mi id quidlibet eripiat,
Te vita meliore frui, & cælestibus auris
Vesci, interque altos degere cæcicolas.
Illic res omnes, rerum & primordia cernis,
Tam multa unde exstant, tam nova, tam varia,
Quæ nos ignari miramur, at omnia paucas
Per leges Natura expedit, & faciles.
Ut Solem obducant maculæ, radiantiaque astra
Fixa suis maneant singula vorticibus:
Utque iis circumfusa volumina materiai
Immensis se se circumagant spatiis;
Atque alios orbes secum, ingentesque planetas
Præcipites cursu præcipite abripiant,
Aspicias, utque suo de vortice quisque cometa
Exeat, inque alios transvolet, inque alios.
Quâquâ equidem nil hæc plane sunt omnia, nil sunt,
Ad tua si propius gaudia respicio,
Quum Deus illabens præcordia in intima, se jam
Præbet, & ipse ipsam mentem animi alloquitur.
Tum nempe illa nova, ac mira dulcedine rapta
Exsultat, nec se se capere ipsa potest. (verso,
Hæc quidem ego recolo, & tacitus mecum omnia
Felicem & te nunc esse scio, & fateor.

Quin

Quin etiam (adjuro teque, & tua numina, NERI)

Sublevor, hæc mecum ipse omnia dum reputo.

Nā decet, immo æquum est, si quæ sint gaudia amicis,

Gaudere, atque eadem illa esse putare sua.

Sed tamen ut cari vultus, atque oris imago

Mi redit, & numquam, numquā ego te aspiciā!

Numquā te amplectar posthac! numquā alloquar! o me

Me miserum! qui tunc intima ad ossa dolor

Labitur, & mentem, & sensus mihi surripit omnes!

Quare ego per sanctam, quam violasse, fidem

Me numquam puto, tu numquam certe violasti,

Tē precor, atque simul te, venerande senex,

Cui prisco de more sacrum hunc celebramus hono-
rem,

Si quidquam hæc curas, atque hominum studia,

Votaque de cælo bonus aspicias; hanc mihi, quæso,

Si fieri potis est, demite tristitiam.



DE GUIDONE ANTONIO BARBATIO
BONONIENSI SENATORE,

*Quum is summum Patrie magistratum III. iniret
Kal. Januarii Anni MD CC XVIII.*

ELEGIA V.

QUI primum pronò terræ æquora findere aratro,
Et virgulta in humum defodere instituit,
Et qui vitigenos fetus, & pabula læta
 Monstravit, vitam quæ recreant hominum;
Quique animo & maria, & terras cõplexus, & omnes
 Aërios tractus, ætheriamque plagam,
Institit omnigenarum inquirere pondera rerum,
 Naturamque, & motum inspicere, & numerum;
Ordine quo, & per quas leges Natura gubernet
 Fulgentes stellas, ut face Sol rosea
Undique terrarum immissa circum sola lustret,
 Succedat tacitis humida Nox pedibus:
Et qui navigii dubia ratione reperta,
 Arte nova rudem adhuc imbuit Oceanum:
Quique alias nobis artes aliasque tulerunt,
 Non tantum humano profuerunt generi;
Quantum is qui linguâ arte inflectens, nomina prima
 Finxit, tum rebus distribuit variis,
Singula commonstrans digito, quæ voce notabat.
 O mirum, dignumque omnia quem celebrent
Sæ-

Sæcula, cui statuas ponant, cui templaque, & aras

Instituant, sanctis non sine muneribus!

Nam simul ut ratio tali tantoque reperto

Aucta est, qualia tunc protulit in medium

Certatim quæcumque ætas inventa deinceps!

Mitto & scribendi multiplicem & variam,

Cantandiq; insignem artem, & studium numerorum,

Quorum ope recludi abdita quæque putant;

Omnia quæ, vocum nisi fulgor prænituisset,

Nunc premeret cæcis improba nox tenebris.

Sed quid, quid facundia? quid vis illa potentis

Eloquii, cui obsistere nil potis est?

Nomine si careant res, an non muta jacebit?

Et tamen humanum sola genus potuit

Tristibus a silvis, tætrisque abducere ab antris;

Quum illic ætatem vi coleret miseram,

Non ratione; ævumque agitare more ferarum:

Quod simul adfata est vociferans ratio,

Perdomuit, dictisque bonis mansuescere fecit.

Felices animæ, munere quæ superûm

Tam claro, tamque egregio vitam illustrastis!

Vos ego sæpe meo carmine ad astra feram.

Quamquam equidem multo mihi Guido beatior esse

Creditur: is GUIDO, cui sua purpureum

FELSINA vexillum dat habere, & pandere ad auras:

Cui neque præstantis splendida sensa animi,

Virtutum soboles præclara, nec aurea desunt

Verba, quibus pandit singula mirifice.

O fe-

O felix vere , multo & felicior illis !

Nam quid mundus adhuc scire tener poterat ,
Quum primum extulit ora, atq; hâc emerfit ad artem?

O miseram artem ! cui splendidae opes fuerant
Notitiæ tenues , & pauca vocabula . sed quas

Conflavit quantas post sibi divitias
Aeternæ lumen rationis , & intima rerum

Perscrutans , artesque artibus accumulans ?
Quas sibi quum ingenio , longoque paraverit usu

GUIDO , proh quali , & quam valido ore ruens
Dicendi formas devolvit verba per omnes !

Nam seu dictis ille omnia terrificis
Misceat , ancipiti perfundens corda pavore ,
Territat , & trepidam turbat ab imo animam :

Sive foras terrorem agat , atque ad fortia cives
Accendat ; quid tum difficile esse queat ?

Quid non impavidi tum cives aggrediantur ?

Et quidquid promit ore , oculis , habitu ,
Adfistunt , præstoque ei sunt ad cuncta , timendi
Verborum comites , ira , amor , invidia :

His premit , his mentes hominum propellit , & urget.

Quales non illi quos mi adeo celebrant ,
Tullius , & Crassus , Romanæ robora suadæ :

Non Laertiades ille vafer Danaûm
Hortator , ductorque , idemque omnis pater astus ;

Qui , postquâ ad veterum mœnia Dardanidum
Raptoris Phrygii confixus arundine plantam

Thessaliæ columnen concidit Acacides ;

Au-

Ausus Achilleam est primus sibi poscere parmam,
 Quum misera, & sine hero illa jaceret humi,
 Atque unus contra nequidquam surgeret Ajax.
 Ille Jovem, & superos, Oceanumque patrem,
 Et magnum Simoenta, & litora testabatur:
 Magnanimi adstabant, prima virum, proceres.
 Queis neque doctrina GUIDO, nec laude secundus
 Ulla, quosvis per pectora mirificos
 Concutit eloquio motus, & versat, agitque,
 Impellitque animos quo lubet, unde lubet.
 Jam vero si hilares animi velit edere fetus,
 Omniaque arguto spargere dicta sale;
 Ut gestit, ut tunc oratio tota renidet!
 Ut se se flores induit in varios
 Luxurians sermo ridentibus undique verbis!
 Atque hunc miramur, qui loca Pieridum
 Avia tam subito peragret, saltusque beatos?
 Nempe alii unum hoc mirentur; ego id minime.
 Et si illic non Titanas telluris alumnos,
 Non Cadmi repetit facta, nec Aesonidæ,
 Herculeave manu domita Stymphalia monstra:
 Hæc temnit, non hæc unius assis habet;
 Quæ vel falsa, vel aucta hausit mens credula vulgi:
 Nobis fama vetus, vana anus, hæc loquitur.
 At neque gliscentes tractat per gaudia curas,
 Quæ nimium multis paucula tristitiis
 Miscet Amor volitans puerorum pectora circum,
 Queis omnes libat lætitiis animi:

Et miseri illius extollunt carmine laudes.

O miseri! quorum noster hic haud similis
 Heroas tantum, heroumque ingentia facta,
 Proeliaque, atque acies grandiloquo ore tonat.
 Ut gladiis hinc districtis Germana juvenus
 Irruat, hinc pubes Thracia, flos Asiæ:

Ut se se ferat in primis, mediosque per hostes
 Fulminet EUGENIUS, dum miseram interea
 Bello ardescendentem crudeli undeundique complent
 Europæ, atque Asiæ funera Pannoniam.

Hæc tantum ille canit. teque, o Tritonia virgo,
 Teque vocat, rixæ dure comes rabidæ,
 Bellorumque pater Mavors. videt, & sibi frustra
 Invidus extremum mordet Amor digitum.

O ratis, o cælo ratis olim digna locari,
 Quæ BARBATIADAS per mare navigerum
 Gestabas quondam felix, o quam bene terras
 Liquisti Siculas, clara deûm genitrix!

Nam tu non gemmas, non vestes murice tinctas,
 Non Colchis raptum nobile vellus ovis,
 Sed miram virtutis vim & decus asportasti.

Quæ post progeniem lapsa per innumeram
 Ad feros venit patres, capita inclyta; demum
 ANTONII excepta est pectore magnanimo.
 Amnis uti quum alios aliosque effluxit in amnes,
 Immensum tandem excurrit in Oceanum.

Hinc plures GUIDO & doctos sibi jungit amore
 Musarum comites, dulce sodalitium:

Hinc

Hinc & BASSANUM illum ipsum complectitur: illum

Quem unum ego multa inter millia suspicio:

Dulcem BASSANUM, jucundum, suaviloquentem

BASSANUM, quo jam urbs illa vetus PATAVI

Hospite, nunc gaudet mea FELSINA. namq; venustum

Et lepidum esse ajunt. quamquã ego id inficior:

Nam mi non lepidus, verum lepor ipse videtur

Ipse lepor, sal ipsum esse, merusque jocus;

Et quos edit versus, illos non ego versus,

Sed puras putas esse reor verneris.

Qualis mane novo dum roscida matutinus

Lucifer aequoreis exferit ora vadis,

Et Zephyrum vocat obscura sub rupe latentem,

Chloris odorato quem tenet in gremio;

Ille levi fertur per florida prata susurro,

Et dulcem spargit per nemora alta sonum:

Improba dum teneris rixatur frondibus aura,

Huc illuc sicca pervolitant folia:

Dulce simul cantant volucres, quas undique multæ

Quercus frondiferis excipiunt domibus.

Ac veluti aeris, & tangentis nubila rupis

Emicat exeso rivulus e latere,

Cujus ubi exiguis adluditur unda lapillis,

Non sine jucundo lenta fugit strepitu:

Talis. quid talis? nam quis te compareret illis?

Immo multo etiam dulcior, & melior

Suavidicis fertur numeris tua Musa, JACOBÈ;

Seu tu illum dominos evehis ad superos

MORGAGNUM humanæ illustrantem commoda vitæ,
 Dum follers medicis invigilat studiis,
 Et cæcas aperit caussas rerum, & nova semper,
 Et pergit semper pandere mirifica.
 Et vero ut facilis, dii magni, ut lenis in omnes,
 Ut sibi vel duros concilians animos (quis
 Cunctis dulcem inspirat amorem! O Juppiter, hunc
 Non ipsis oculis plus amet, ipsa anima?
 Te tamen, excultis sive illum versibus ornas,
 BASSANE, o quis tum te furor intus agit!
 Sive ipsum hunc celebras GUIDONEM, & grandia facta,
 Unde ætas nostra hæc fulgeat ad reliquas,
 Carmine complexus veniens producis in ævum,
 Virtutem tantam ne neget ulla dies.
 Atqui ipsum hoc agit & Guido; ac ne immemor ætas
 Nocte tegat cæca pulchra hominum studia,
 Scandere Musarum interdum juga nititur. illi
 Adfurgunt omnes undique Pierides,
 Et liquido cantu mentem pascunt. novus ei tum
 Exoritur vigor, & pectora Apollineus
 Intima pervadit calor. O quos accipit ictus
 Phœbeos! o quæ concita mens animi
 Tum fingit simulacra, & partes versat in omnes!
 Tum vero tum ille nubiferasque vias, (nat,
 Dum stimuli subsunt animo, & liquidum æthera tra-
 Sanctaque magnorum templa deum ingrediens
 Præclaros IGNATIADAS extollit ad astra
 FRANCISCOS, unum Gallia quem superis
 Misit,

Misit, ut armorum quæ gens laude antèit omnes,
 Ne illa foret sancta relligione minor;
 Alterum & Indorum patrem, & decus Hispanorum:
 O pater, o tua hinc quam procul ossa jacent!
 Qui tantus, quinam tantus te te impulit ardor
 Extremos longe visere Japonios?
 At non ut tu illinc gemmarum, aurive referres
 Munera, per dubia vela dabas maria:
 Tantum ut gentem semotam, tantum ut nova regna
 Christiadum antiquis finibus adjiceres.
 Felix qui vestras laudes efferre canendo
 Est potis! huic furor est, hic mihi numen habet;
 Hunc præsens tradet sæclis venientibus ætas,
 Illa aliis tradent sæcula, & illa aliis.
 Fert nam equidem magnos ætas hæc nostra poetas:
 Sed tamen hi magni tenuia sæpe canunt.
 Dii faxint, ut tam præclaris artibus istum,
 Tamque bonis studiis erudias puerum,
 Qui tibi nunc primis, GUIDO, florescit in annis,
 Jamque tuis confert grandia facta atavûm;
 Sed celeri ingenio mox clara exempla sequetur,
 Virtutesque addet præterea ipse suas.

AD JOANNEM ANTONIUM VULPIUM.

ELEGIA VI.

VULPI, cui gelidum Pindi nemus, & loca Phœbo
 Sacra novem doctæ dant habitare deæ;
 Egregium mihi quem studium, & præclara voluntas
 Devinxit sanctæ fœdere amicitiae,
 Cui nemo, ut spero, quisquam me carior uno est;
 Tantus te nostræ coëpit amor fidei;
 Quamquam ego solvendis paullo sum tardior illis
 Quæ tuus altus amor postulat, officiis,
 Non hoc, quæso, animi ingrati, mentisque malignæ,
 Sed magis esse puta pauperis ingenii.
 Nam quod tam longo tibi scribimus intervallo,
 Id non, crede mihi, fecimus immemores.
 Hæret adhuc animo, & fixum penitus manet illud
 Immortale tui carminis officium,
 Cui ego, qua poteram, quum respondere pararem,
 Non fuit heu facilis cur mihi Calliope?
 Scis, dea, me totis tum nisum viribus esse.
 Sed nunc, quum studii VULPIUS omne genus
 Præclare illustrans, fama compleverit orbem,
 Nunc vero mea non gaudia mente premam:
 Sed dicam, ut potero. vos dextram mi date, Musæ,
 Cultorem vestrum dum super astra voco.
 Nā quum corrumpant anni, & pulchra omnia libent,
 Indomitam possint nec saturare famem,
 Con-

Contra ille obniti, & vim ævi convellere tantam
 Non timuit tota solus in Ausonia.
 Eque vetustatis tenebris, & nocte profunda,
 Omnes quæ fetus devorat ingenii,
 Educit veterum divina poemata vatium,
 Perfunditque novis omnia luminibus.
 Tum vitam, & mores enarrans, & genus, omnes
 Discutit antiqui temporis historias.
 Tune igitur, VULPI, tun' blandi dulcia COTTAE,
 Tun' FRACASTORI carmina restituis?
 Et quos divino ALAMANNUS percitus œstro
 Versiculos rudibus scripserat agricolis?
 Quæque adeo admiror, Musis, & Apolline digna,
 Per te nunc vivunt carmina NAUGERII?
 Carmina, quæ quondam liquidas jactabat ad auras
 Formosæ referens ora, oculosque suæ?
 Dum caneret, Fauni circum undiq; protinus omnes,
 Et Pan illi aderant, & Satyri, & Dryades:
 Quin etiam Hadriaco sunt visæ e gurgite Nymphæ
 Vicinis passim fidere litoribus,
 Stillantesque ligare comas post candida terga.
 Ille intus totum exustus amore animum
 Fragrantes oculos pulchræ cantabat Hyellæ,
 Quasque sibi injiceret Gellia blanda faces.
 Et modo sævitiem crudæ memorans Telayræ,
 Unam quam toto pectore caram habuit,
 Ut flebat miser! illum omnes circum undique Fauni,
 Illum Pan flebant, & Satyri, & Dryades.
Im-

Immitis Telayra, quid is committere tantum
 Heu potuit, quem tu perfida sic crucias?
 Aspice, quam largo perfundat pectora fletu
 Ambabus tergens ora puer manibus.
 Ille potest cantu immensum te ferre per orbem,
 Atque parem antiquæ reddere Tyndaridi.
 Tu tantum ne averte oculos, ne despice amantem.
 O miseros nimium quos tuus ardor agit!
 At tu, docte puer, quid frustra te amplius angis?
 Ne dubita: poenas illa dabit sceleris. (Amoris
 Quin te animo obfirma, & contra omnia spicula
 Inviictus persta pectore magnanimo.
 Aspice, quæ longe post nos ætas veniat, quam
 Innumera annorum progenies sequitur.
 Illa aliquem feret olim, qui tua facta, tuumque
 Aeternas referat nomen in historias.
 Quas inter se se multum admirata deinceps
 Omnia certatim sæcula pervoluent,
 O felix VULPI, nobis qui talia promis,
 Ne inrepens ætas omnia dente terat.
 Quantum Romani te diligit umbra TIBULLI,
 Si quidquam hinc campos fertur ad Elysios,
 Quum se se ille tuis audiverit illustrari
 Libris, quos Pallas, quos Cytherea probat.
 SEXTUS & ipse suæ laudat te sæpe puellæ,
 Gratatur juveni LESBIA sæpe suo.
 Atque aliquis propriis metuens obliviam chartis,
 Nam longinqua ætas immemor esse solet,
 Quam

Quam sibi fulgorem vestræ cupit editionis,
 Illius antiquum ne pereat studium !
 Tu tamen ornatos, quæso, ne pone libellos
 Qui tibi sunt, VULPI, jam, reor, in manibus:
 MORGAGNI ornatos, immortalesque libellos,
 Invida quos olim posteritas releget.
 Illic humanis præpandit lumina membris,
 Et fibras fibrarum indicat, atque aperit,
 Morborumque domos, & sacræ habitacula mentis
 Detegit, ut toto in corpore nil lateat.
 Quas tenues, cæcasque vias, ductusque paravit,
 Quot Natura imis, quæ loca visceribus
 Exigua, ut vix vis animi valeat penetrare!
 Atqui hæc ipsa tamen hæc videt, & referat
 MORGAGNUS, tot nobilium pater inventorum.
 Cujus jam celeri fama sonans strepitu
 Trans Batavos, trans divisos toto orbe Britannos,
 Arctoasque domos vadit, & ulterius.
 Et vero hic ille est MORGAGNUS quem mea quondam
 Excepit docto FELSINA cara sinu:
 Is cui tanta sedet tam grata modestia vultu,
 Nil ut eo fingi possit amabilius.
 Hic ille est quem nunc PATAVI exoptata ferentem
 Dogmata, tota unum suspicit Italia:
 Quem nunc propterea VENETI, capita inclyta, PATRES
 Muneribus cumulant, atque novis titulis.
 O factum bene! o quid me jam lætius esse,
 O dii, quid me felicius esse potest?

Quam suaves illi mores, quam candida mens est!
 Illi non ulla est ira, nec ambitio.
 Et rixas odit, vesanaque jurgia. tantum
 Hæc illi, verum noscere, cura sedet:
 Quod quum perscrutans causas inquit in omnes,
 Out mira animos, Juppiter, arte capit!
 Nam quidquid vult, non tantum efficit id ratione,
 Ast etiam facie, & dulcibus alloquiis.
 Qualis ubi ætherios accendit Noctifer ignes,
 Flammea quum lassis Sol juga demit equis,
 Aura levis nigræ soboles placidissima noctis
 Litore nonnumquam surgit ab Hesperio:
 Agrestes illam per prata virentia Fauni,
 Et chorus errantum captat Hamadryadum;
 Tam suavem, MORGAGNE, animum, tales tibi mores,
 Tale tibi natura indidit ingenium.
 Cujus, mi VULPI, ne cessa promere librum,
 Ne, desiderio dum teneor, peream.
 Ast ede, atque tuos aliquos adjunge libellos,
 Quos Musæ volvent protinus, & Charites.
 Horum unusquisvis, vel si penitus periissem,
 Reddere defuncto mi potis est animum.

MATTHAEI BURDEGATI

PATAVINI

CARMINA.

I.

QUUM

JOANNES FRANCISCUS BARBADICUS

S. R. E. CARDINALIS,

*A Brixienſi ad Patavinam Eccleſiam gubernandam
traductus eſſet, Anno clō lō cc xxiii.*

QUIS te felicem non dixerit, & bene natam,
Gens PATAVI; quum ſis invidioſa aliis
Gentibus, creptum ſibi quæ teſtantur ocellum,

Quum BARBADICO facta ſuperba ſuo es?
Veronæ gemitus audivit Brixia: nunc tu

Brixiam inexplēto flere dolore vides;
Immitesque deos, crudeliaque aſtra vocantem
Audisti, quum ſe cerneret (heu miſeram!)

Quod numquam verita eſt, facie Paſtoris amati,

Quem plus ſe illa ſuis ſcibat amare oculis,
Orbari: diſceſſurum quum mæſta videret,

Et poſtrema inter munera deficeret.

Deſine flebilibus cælum complere querelis,

Brixia, magnanimum ſi modo pectus habes,

Qq 2

Quod

Quod necopinanti tanto Pastore carendum
 Est tibi: nostra tuus scilicet iste dolor
 Gaudia, tristitiæ guttis adspersit amaris,
 Nec communi adeo lætitia patitur
 Nostros exsultare animos, quin te miserantes
 Ultro mærentem non leviter doleant.
 Et tamen aspice, ut illuviem deponat anilem
 Urbs de Trojanis condita relliquiis,
 FRANCISCO adveniente: ut rideat undique tellus,
 Et cælum argutis personet alitibus.
 Ipsa parens Doris centum comitata puellis,
 Læta per Hadriacas ludere gestit aquas
 Delphinum tergo insidens; vicinaque Nereus
 Fatidicis implet litora carminibus.
 Cui senior Triton concha respondet ab antris.
 Sanctæque silvarum numina Hamadryades
 Festivos pergunt certatim tollere cantus,
 Nostraque compositis ire per arva choris.
 Ipsi etiam nostri velamina pinea Fauni
 Quassantes capitis semiferi, virides
 Et saliant per agros, & procurrunt, redeuntque
 Innumeris acti lætitiis animi.
 FRANCISCO, molli sunt prata virentia musco,
 FRANCISCO erumpens uberiore etiam
 Vena fons quivis garrit manantibus undis:
 Et nigras violas, puniceasque rosas,
 Luteolosque crocos, & purpureos hyacinthos,
 Atque alios flores educat aura solo.

Omnia

Omnia FRANCISCI adventu dare signa videntur
Lætitiæ: remove, Brixia, jam lacrimas.

Quid tua adhuc tristi corrumpis lumina fletu?

An quod amans caro Præsule abesse procul
Fers ægre? invitus plane de sede recessit

Ille tua: in fatis at fuit hoc PATAVI.

Jam tibi FRANCISCUS primævum invexerat aurum,
Et niveos cælo jusserat ire dies:

Pace tua & nostram solari is debuit urbem.

Et vero ut fines contigit Euganeos,

Muscofo caput antiquum Medoacus ab antro
Sustulit, & lætis ora rigans lacrimis,

Nempe mihi emeritus Patruī quum spiritus olim
Aetherias peteret, morte jubente, domos,

Curarum hæc requies, & spes hæc certa relicta est:

Haud nostra Aeolii vota tulere Noti.

En novus Euganeis venit deus incola terris.

Dixit, ad æternum seque recepit opus.

Jam sumit, FRANCISCÆ, animos te præside Virtus,

Sperat & ingenuum tollere ad astra caput.

Nempe tuum numen, quæ pæne sepulta jacebant,

Candori prisco munera restituit.

Per te, magne pater, quam desperata voluptas

Expulit a nostro pectore amaritiem!

Quum procul a sacris jussisti abscedere tectis

Ignavos pleno gutture vulturios,

Contra illos revocans, cordi quis aurea semper

Justitia, & morum candida simplicitas.

At

310 MATTHAEI BURDEGATI

At cuinam potiora putas hæc gaudia , quam mi ,
 Cui de materno sanguine servitium
 Dulce domus , FRANCISCÆ , tuæ servatur ab annis
 Pluribus ? est etiam hoc nomine carus avus .
 Hoc mi unum variis fortunæ fluctibus ætæ ,
 Hoc unum dederunt fata benigna bonum .
 Vive diu , populis præclara exempla daturus :
 In BARBADICÆ more fuit positum
 Hoc gentis : sed prima fuit tibi cura fovere
 Virtutes Patruī Præfulis egregias .
 Atque utinam Summi vox sancta & certa Parentis
 Te vivo , Patruum fecerit Indigetem : (rum
 Quo tum animo , FRANCISCÆ , putem , qua mente futu-
 Te , pia quum sacro tura dabis cineri ?
 Scilicet immenso perfusus gaudio ad aram
 Stabis cum populo vota ferente tuo .
 Sollemnes feret interea cælestium honores
 Ille tuis etiam lætus ab auspiciis .
 Quumque bene implevis longævæ tempora vitæ ,
 (Ut meritos ornant præmia iusta viros)
 Te tandem placido claudentem lumina somno ,
 Sidereis Patruus sedibus excipiat .

II.

AD JOANNEM ANTONIUM VULPIUM,

Amicum eximium ac singularem.

HIC ubi in antiquam properās Antenorīs urbem
 Medoacus cursu liberiore fluit;
 Seque petit ripa sisti ulteriore viator,
 Quem celer adjuncto navita lintre vehit;
 Candide, me, ut nosti, mihi reddit villula, VULPI,
 Dum licet a rauco longius esse foro.
 Nam recreor, seu cymba levis, cantante magistro;
 Vicinas curvo remige findit aquas;
 Rustica sive choros ducit per gramina pubes,
 Populea incomto fecta gerens capite.
 Sæpe ruber pictas magno clamore Palæmon
 Terret, & occulta in retia cogit aves.
 Et me densa vocat subter vineta latentem,
 Atque hilari prædam sumere fronte jubet.
 Interea maris Hesperii declinat in undas
 Sol, & anhelantes sedulus urget equos:
 Ecce Charinus adest, veteres qui cantet amores,
 Cui cithara exusto pollice tacta sonet.
 Versibus ille modos agrestibus aptat inertes:
 Hi tamen agresti simplicitate placent.
 Quæque juvant animos curis & amore solutos
 Omnia noster habet commoda parvus ager.
 Nam

312 MATTHAEI BURDEGATI

Nam quum me Phyllis crudelius ureret olim,
 Phyllis & alpinis candidior nivibus,
 Et nigris oculis, nigro & spectanda capillo,
 Sed qua perfidior femina nulla fuit,
 Grata nec esse mihi poterant spectacula in urbe,
 Nec formosa oculis prædia culta meis.
 Tunc me sævus Amor, tunc sævi mater Amoris
 Jusserat immitis ferre jugum dominæ.
 Heu quoties torvi tulimus fastidia vultus,
 Et tulimus tristes corde pavente minas!
 Nunc vel felices ausim contemnere curas,
 Votaque placatis solvere numinibus.
 Quorum ego ut illecebras possem vitare nocentes,
 Nudasti quotquot sunt in amore doli.
 Quam felix fuit ille dies qui fecit amicum
 Te mihi! quam vere candidus ille fuit!
 Nam meminì, dulci quum me sermone teneres,
 Proferresque animi vota modesta tui;
 Quantus te priscae virtutis tangeret ardor,
 Quam sequitur recto tramite verus honor.
 Cetera quid memorem? tua me facundia cepit,
 Compulit & certo vivere consilio.
 Nec sine te firmam poterat sperare salutem
 Mens ægra, in levibus perditæ deliciis:
 Nec sine te dulcem subito deponere morbum,
 Ac penitus Paphiæ linquere signa dæ.
 Te monstrante, animum tranquillæ dedere vitæ
 Perdidici, & vulgi posthabuisse vias:

Et

Et fructus aliquot, non adversante Minerva,
 Qualiscumque mei percipere ingenii.
 Te duce sepositas Heliconis adivinus umbras,
 Labraque Pegaseo proluere amne datum est.
 Nec tecum piguit longos perferre labores,
 Nec tam prærupti scandere saxa jugi.
 Quid mihi mentis erat, quum te referante viderem
 Abdita Musarum claustra adaperta mihi?
 Tum nova sollicitum tentarunt gaudia pectus,
 Gaudia quæ sensus surripuere meos.
 Non ita Chironis pendebat ab ore disert
 Cærulea quondam progenitus Thetide,
 Seu caneret solisque vias, lunæque recursus,
 Et quæ perpetuis ignibus astra micant:
 Sive illum citharæque modos, artemque doceret,
 Imbueretque sua callidus ipse manu.
 Ex illo quid juncta fides, quid mutua nosti
 Cura, quid unanimi in pectore possit amor.
 Scilicet iste tuum potuit lenire dolorem
 Solus, & indomitam pellere tristitiam,
 Quum tibi speratum rapuissent improba linguæ
 Rivalis linguæ murmura conjugium.
 Ut tamen ereptæ penfarunt damna puellæ,
 Ut fecere tibi dii potiora bona!
 Quid refert? satis es MOSCHINA conjuge felix,
 Per quam tota tua est plena decore domus.
 Non ea femineis est quæ vacet anxia nugis,
 Quæque suas tantum fingat inepta comas:

Aut si qua assiduis nimium morosa querelis
 Conficit immeritum nocte dieque virum.
 Ingenuis ornata magis nec moribus ulla est,
 Illa quid deceat nec videt ulla magis.
 Sic tibi contingat soboles optata: quid ultra
 Supplice jam, VULPI, numina voce roges?
 Illa tibi mentemque bonam, ingeniumque dedere,
 Quod ventura probent sacula, & invidiant.
 Non omnis moriere: tui pars optima vivet,
 Dum refluant pulsus æquora litoribus.
 Et merito: tua nam celebrat cultissima Phœbus,
 Et legit Aonidum carmina sæpe choro.
 Quid potius celebretque, legatque libentius? ille
 Odit, & incultos respuit aure sonos.
 Multus enim Ausoniis qui perstrepat anser in oris,
 Qui canat hoc nostro tempore rarus olor.
 Nempe canorus olor gaudet felicibus auris,
 Non umquam facili deficiente cibo.
 Hei mihi, quis possit fortuna pressus iniqua
 Rebus in angustis otia lenta sequi?
 Nam neque Mæcenas nunc est, qui talia curet,
 Quique animo vates jusserit esse bono:
 Ac si forte aliquis tulerit pro carmine laudes,
 Idem laudato carmine pauper erit.
 Paupertas tamen ista magis cupienda poetis,
 Quam magno argenti pondere barbaries.
 Barbaries miratur opes, opibusque fluentem
 Suspicit, ac solum diis putat esse parem.

Sed

Sed tu divitias sapiens contemnis inanes,
 Contentusque tua vivere sorte potes.
 Credo equidem, paucis (liceat modo vera fateri)
 Munera largitos tanta fuisse deos.
 Gaude, quod nullus Musarum cultor ab Austro,
 Et nullus gelido cultor ab axe venit,
 Quin te conveniat, cupiatque audire canentem,
 Juret & invitos inde referre pedes.
 Nec minus ipse suos fert CAJETANUS honores,
 Frater Ledaë Castore amabilior,
 Quem Pollucis amor fecit, pietasque per ævum
 Alternis terras linquere temporibus,
 Aetheriasque domos, cælumque habitare paternum,
 Et divûm sedes, non renuente Jove.
 At tu sume animos: tibi, CAJETANE, quod optas,
 Ad superos virtus inclyta pandit iter.
 Te curante, diem veterum monumenta revifunt,
 Tot monumenta malo pæne sepulta situ.
 Isque tibi labor est, ea cura, ut docta virorum
 Scripta ornare novo lumine semper ames.
 Quos certe Elysia lætos in valle putandum est
 De pietate loqui, deque tuo hoc studio.
 Tu modo ne numquam perituro parce labori,
 Nec te opere a tanto sevocet ulla dies.
 Tuque adeo, præclare, tuos deprome libellos,
 ANTONI, & cultis versibus adde novos.
 Et mihi mitte; aderit præsto tibi nuntius a me,
 Credere cui possis: sed magis ipse veni.

Te dudum exspecto, dudum te exspectat agellus,
 Et Fauni, & Dryades, & nemus, & falices.
 Heu frustra exspectamus; habes quid in urbe moreris:
 Te retinent patrios inter, amice, Lares
 Aut ALDRIGHETTI pulchrum sectantis avena,
 Et lyra Pindaricos docta referre modos;
 Seu recinat sanctos formosæ Doridis ignes,
 Sive amet egregios tollere ad astra viros:
 Aut Elegi, Etrusco SALIUS quos carmine noster
 Ducit, inexhausto maximus ingenio;
 Quem modo festivæ juvat antra subire Thaliæ,
 Et modo plorantis funera Melpomenes.
 Ille Sophocleum florenti ætate cothurnum
 Sumsit, & inceptum grande tuetur opus.
 Hos doctæ nobis sic devinxere sorores,
 Nulla ut ferre queant tempora discidium.
 Vivite felices, mea maxima cura sodales,
 Fataque sint vestris candida consiliis.
 Præcipue, multos rerum spectate per usus,
 VULPI, mi vita carior, atque oculis,
 Sis felix, votique potens; & munera nostra,
 Parva licet, lætis excipe luminibus;
 Sisque memor nostri, nec possit sera senectus
 Solvere quæ sapiens vincula junxit amor.
 Nostra fides certe manet, infragilisque manebit,
 Dum mihi feralis tibia triste canat.

I I I.

Ad Aeglen, de Amynta venatore.

PARCE piis lacrimis, Aegle, nimioque dolori :
 Desine tam pulchras dilacerare comas .
 Vivit, & incolumis rediit tuus ignis Amyntas ;
 Et cecidit multo vulnere fossus aper .
 Jam parat exuvias magno suspendere templo ,
 Et venatrici solvere vota deæ .
 Namque feræ miserum rabidis e dentibus illa
 Dicitur invicta surripuisse manu .
 Te quoque pastori nostro, Venus alma, dedisse
 Auxilium, fama est : te quoque, blande Puer .
 Nunc, age, compositis, ter felix Nympha, capillis,
 Cinge triumphali tempora fronde tua .
 Laudes ipse canam . tales sibi Cynthia honores
 Postulat : hoc uno munere plura dedit .
 Servatus tibi carus amans, mihi fidus amicus,
 Maxima Pieridum gloria, matris amor .
 Arcadiæ peritura fuit spes . Ergo quotannis
 Ante alias nobis festa sit ista dies .
 Hic ego cæspitibus statuam silvestribus aram ,
 Imponamque sacro tura, merumque foco .
 Tu vitulâ, aut niveum mactabis, Nympha, juvencum ;
 Nos dabimus pleno de grege semper ovem .
 Altera dein Veneri statuatur, & altera Amori .
 Sola tibi sint hæc numina, sola mihi .

IIII.

IIII.

De puella fluvio. mersa.

IBAT Leucothoe nitidas ad fluminis undas,
 Aestivam ut sicco pelleret ore sitim.
 Fama est, Naiadas facie stupuisse puellæ,
 Et subito injecta corripuisse manu.
 Ergo formosas nequeunt loca sola tueri?
 Et divina malus pectora livor habet?
 At sibi caruleæ sociam voluere sorores,
 Augeret sanctos ut dea facta choros.

V.

EX ITALICO FRANCISCI PETRARCAE:

*Or vedi, Amor, che giovinetta Donna
 Tuo regno sprezza &c.*

EN tua, fortis Amor, contemnit regna Lycoris,
 Et nihil, heu, nostro tangitur illa malo.
 Sunt tibi tela, arcus: mediis in floribus illa
 Nuda pedem, & molli in gramine lenta fedet.
 Uror ego: sed, si pudor est, deprome pharetra,
 Inque repugnantem conjice tela feram.
 Nempe jacens mi animus surget te vindice: at illa
 Quid valeat læsi sentiet ira dei.

DO-

DOMINICI LAZARINI

DE MURRO MACERATENSIS

C A R M I N A.

I.

Fingit, se pro-vec-tiore atate in amorem incidisse.

UMBROSUS montes, & montibus abdita vallis,
 Umbria qua solem vergit in occiduum,
 Vos colit Ausonidum Crene pulcherrima, cui se
 Lesbia nequidquam comparet, aut Nemesis:
 Quæ me nunc & prima docet, quid spicula possint,
 Quid pharetra, & flammæ, sæve Cupido, tuæ.
 Jam didici, seræ oblitus decedere nocti,
 Carminibus rigidas flectere velle fores.
 Jam possum aëria tacitus mecum ipse sub ulmo
 Lugere, & longo pascere luctu animum:
 Et desiderio possum tabescere inani,
 Possum etiam extremum velle obiisse diem.
 O studia, & præclaræ artes, & jura, valete;
 Et mihi culta diu Stoa superba, vale.
 Tu mihi pollicita es perituram tempore nullo
 Pacem animi, & vitæ gaudia perpetua.
 Credideram, nos posse homines obistere Amori;
 Sunt etenim ista tui dogmata stulta senis.

Qua-

Quare ego quum fidebã animis, tum vana loquebar,
 Unde gravis læsi cresceret ira dei.
 Qui nunc me miserum tanto crudelior urget,
 Quanto olim placido restiteram improbius.
 Stoa superba, tuæ male me dementia cepit,
 Creditaque incauto grandia verba scholæ. (do,
 Quod neque amarim ætate apta, neque amore secun-
 Et quod amem adverso tempore, culpa tua est.
 Tunc etenim quum jam florebam vere juventæ,
 Nostra quidem fuerat nympha superba minus.
 Nunc turpes ignominias mihi ferre necesse est,
 Adjunctumque gravi dedecus imperio.
 O amor, o commune malum divûmque, hominumq;
 Ne miserum infueto me velis esse jugo.
 Te sequar heu quacumque jubes: me jam illius olim
 Quo fidebam, animi pœnitet indomiti.
 Non ego, si jubeas, detrectem ducere sulcos,
 Et premere immundo pinguia musta lacu.
 Non ego ad imperium dominæ, læta procul urbe,
 Detrectem ardenti demetere arva die.
 Jam quidquam nihil est olim quod turpe putaram,
 Quod non esse putem magnum in amâte decus.
 Invideo tibi nunc, lucisque & carminis auctor,
 Quod vilem Amphrysi laveris amne gregem.
 Et multa cum laude etiam genus Amphitryonis
 Duxerit invicta mollia fila manu.
 Quidnam homines possint? mugit pater ipse deorum
 Litore in extremo, Sidoni terra, tuo.

Et

Et patitur stimulis adigi, ridente puella, (sui.
 Aeque hominum, atq; deorum immemor, atque
 Et cui miscebat Ganymedes pocula divûm,
 Virgineos lambit per maria alta pedes.
 Illum falsipotens, illum Nereïdes udæ
 Miratæ undisonis exsiliere vadis.
 Pube tenusque Jovem excitæ comitantur amantem,
 Tristitiamque abigunt, rapta puella, tuam.
 Interea victor torquebat tela Cupido,
 Et sensere ignem monstra marina suum.
 Aëria de rupe procul lata æquora spectans
 (Nam perraro oculos dimoveret ille mari)
 Pan deus Arcadiæ ex animo suspiria ducens,
 Te petit unam, unam te, Galatea, oculis.
 Immitis Galatea, viden' quæ forma Tonanti est?
 Quantaque divina cornua fronte nitent?
 Aut igitur posthac nostrum ne despice vultum,
 Cornuaque; aut ipsum sperne superba Jovem.



II.

In funere optatissimi amici,

C L A U D I I N.

TE raptum ante diem fatali funere, CLAUDI,
 Quem dulcem a puero, atque unicum amicum
 habui,

Sæpe animo, sæpe ore voco, & crudelis amaror
 Me jubet in longa vivere tristitia.

Si non absenti inferias tibi ferre sepulto,
 Ponereque e Pario marmore signa licet;
 Attamen (hoc etenim supremo possumus unum)
 Tristitia donamus carmina cum lacrimis.

III.

DE FONTE MURRANO.

ET gelidus fons est clivoso e tramite ductus,
 Vitifer & circum collis opacat humum.
 Huc venit ex agro lymphis Faustilla ferendis,
 Huc potum e pago plurima nympha venit.
 Hinc tu sudantes mannos averte, viator,
 Spuma oris nitidos ne inficiat latices.
 Quod si sacrilegus vitream vitiaveris undam,
 Oblita sit limo quælibet unda tibi.

F I N I S,

JOAN-

JOANNIS ANTONII
VULPII
ANTIQUIORIS,
PATRICII, ET EPISCOPI NOVOCOMENSIS,
CARMINA

QUAE EXSTANT OMNIA;
Partim & antea typis vulgata, partim ad
hanc diem inedita.

ACCESSERE

HIERONYMI VULPII,
*Cosmographi suo ævo excellentissimi, Joannis Antonii
fratris, Epigrammata nonnulla.*

D E V I T A
JOANNIS ANTONII
V U L P I I
ANTIQUIORIS,
EPISCOPI NOVOCOMENSIS.

JOANNES ANTONIUS VULPIUS, antiquior, natus est Novicomi, Pridie Kal. Februarii Anno MDXIII. nobili quidem genere, sed quod ipse suis virtutibus, rebusque præclare gestis longe nobilius effecit. Quum sex fratrum natu maximus esset, adolescens admodum patrem amisit: quo casu, Græcarum Latinarumque litterarum studia, ad quæ mira quadam animi propensione ferebatur, subito interrumpere coactus est. Patruī nempe jussu Ticinum commigravit; ibique plures annos Jurisprudentiæ perdiscendæ egregiam operam dedit. In patriam deinceps reversus, causas actitare cepit, magna clientium frequentia: remque familiarem ejusmodi ratione insigniter adauxit. Electus est etiam a suis civibus, qui lustrum conderet, ac jura municipalia conscriberet: moxque de rebus maximis ad Carolum V. Cæsarem legatus missus. quod munus ita explevit, ut opinionem prudentiæ quam de se in animis omnium excitaverat, abunde confirmaret. Sed quum amplissimis honoribus decorari cuperet (modo ipsi poetarum in morem de se loquenti credendum sit) hortantibus etiam amicis, et spem optimam ostendit.

ostentantibus, quam celerrime Romam contendit: qua in urbe, apud Alexandrum Farnesium, S. R. E. Cardinalem, æquissimum doctorum hominum aestimatorem, inter nobiliores aulicos aliquamdiu commoratus est. Quum autem se otiose vitam traducere, neque a domino in re ulla graviore adhiberi animadverteret; aule moribus offensus, & minus prospera valetudine usus; quod Romani aeris vitio, plerisque exterorum atatem illic degentium contingere videmus; in suorum complexum denuo se contulit. Patriam igitur Ecclesiam, loco Bernardini Cruceji, Novocomensis Episcopi, absentis, quem Romæ purpuram captare dicebant; longo tempore administravit: tandemque a Paulo IV. Pont. Max. Crucejo ipso flagitante, qui se sponte dignitate abdicaverat, successor ejus creatus est Anno MDLIX. Concilio Tridentino interfuit, atque in illo publico Christiani orbis theatro, quantum pietate ac doctrina prestaret, satis ostendit. Dicenda etenim sententia, de sanctissima religione majorum, quam tunc perduelles scelerate oppugnabant, optime promeritus est. Pii IV. Pont. Max. jussu semel atque iterum, Gregorii postea XIII. auspiciis legationem ad Helvetios, illustrem atque difficilem, summa cum fidei ac sollertia laude tertium perfecit. Domum Episcopalem vetustate labefactatam, reficiendam atque ornandam curavit. Synodos aliquot in sua diœcesi coegit, in quibus multa egregia atque utilia ab eo constituta sunt. Quamvis autem gravissimis negotiis distineretur, non tamen litterarum curam penitus abjiciebat: quas contra mirifice coluit. In Poeticis ipsum excelluisse, nonnulla ejus que su-
per-

VULPIO, ANTIQUIORE. 327

persunt Carmina, testari possunt, praesertim vero Satyræ illæ duæ quas ad Venusinam lucernam diligentissime elaboravit. quo in genere vix ullum profecto invenias qui cum eo comparari mereatur. Summa illi necessitudo intercessit cum D. Carolo Borromæo, cujus fortasse opera inter Mediolanenses Senatores cooptatus est: item cum Hieronymo Dandino, ac M. Antonio Maphæo S. R. E. Cardinalibus. Paullum quoque Jovium, Episcopum Nucerinum, civem suum eloquentissimum, in familiaribus habuit. Obiit Anno MDLXXXVIII. III. Kal. Septembris: exacta jam ætate, verum laboribus magis quam senectute confectus.



PAUL

PAULLI MANUTII

EPISTOLA AD

JOANNEM ANTONIUM VULPIUM.

Quæ est XXII. libri VIII.

PAULLUS MANUTIUS

JO. ANTONIO VULPIO S. P. D.

VIX credas quam me delectaverint Inscriptiones a te missæ: non solum quia disertæ, ac perelegantes; verum etiam quia gratiæ in eundem ab amplissimo viro, singulari virtute ornato, Thoma Altimaro, oblatam occasionem avidissime sum complexus. nam, quod indignum est argumentum epistolæ tuæ, ita scriptæ ut summum ingenium, summum etiam erga me amorem ostendat; hoc ipsum apud me quanti esse putas? equidem, siqua est hujus vitæ felicitas, majorem ejus partem in hominum eruditione, & probitate excellentium, idest tui similium, amicitia constituo. Quare quum tibi maximas ago gratias quod ad me scripseris, quodque mihi baud paullo plus quam agnoscere debeam, tribuere videaris, quippe quum ea referas ad judicium meum quorum ego te, si arbitrii mei res esset, Aristarchum libenter statuerem: tum vero se velim existimes, si quis est qui tuæ laudi faveat, qui tuam præstantem doctrinam in ore habeat, qui denique tua causa summa omnia & cupiat & curet, eum esse me, daturumque operam ut animum aliquando res ipsa declaret. De Inscriptionibus, indicavi S. Severinæ Archiepiscopo, quas probarem maxime: nullam tamen, ut vere dicam, improbare audeo; quum aliquid in unaquaque videam excellere. Vale, & Altimaro salutem a me plurimam.

Romæ. Kal. Jun. MDLXIIX.

JOAN-



JOANNIS ANTONII VULPII
 ANTIQUIORIS,
 PATRICII, ET EPISCOPI NOVOCOMENSIS,
C A R M I N A
QUAE EXSTANT OMNIA.

I.

AD HIERONYMUM DANDINUM,
 EPISCOPUM FOROCORNELIENSEM.

S A T Y R A I.



UOD te interpellem nugis, dum pu-
 blica tractas
 Munera, & ingenti rerum molimine
 anhelas; (cesse est.
 Des veniam, vel te culpes, DANDINE, ne-
 Qui mihi dum comis nimium, nimiumque benignus
 Das faciles aditus, epulisque, & divite mensa
 Excipis, hos a me malesanos elicis ausus.
 Contra alii quidam bifida qui tempora mitra

T t

Cin-

Cingunt, congressus fugiunt, turbamque precantem
Colloquiis arcent; centeno poste, ministris
Et totidem oppositis. quod si, quum maxima rerum
Postulat hoc moles, precibus, vel munere nonam
Irrumpas, decimæ trudéris limine portæ.
Tu facile ingenium natura, mitius arte
Efficis: hinc casu adverso tristaris amici,
Non secus atque tuo, curis & frangeris iisdem.
Hoc tibi me cogit causas exponere, quare
Sortiti dominum clarum natalibus; annis,
Fortunis, animo insignem, virtutis amicum,
Post sextum mensem Roma discedimus. hoc tu
Forte malum ducis: nos contra. si vacat, audi.

Me pater haud vilis susceptum conjuge honesta
Primum natorum sex, vix fantem, ac pede firmo
Tentantem gressus, semotam ablegat in oram;
Scilicet ut possem post prima elementa, Latinum,
Et Grajum pelagus tutâ sulcare carina.
Eventus poterat voto adridere, quod essem
Ingenio haud prorsus stupido; quum quattuor annos
Atque decem nato rapuit Libitina parentem.
Inde domum rediens cesso, lustrumque supine
Traduco. post me patruus patria expulit, atque
Ticinum misit, tabulisque incumbere bis sex
Jussit, scita decem queis sunt inscripta virorum.
Hic ego sub claris hausi documenta magistris
Militiæ, implevique novem stipendia: post quæ
Emeritus mittor donatus cum rude lauro.

Post

ANTIQUIORIS CARMINA. 331

Post hæc in patria, turba comitante clientum
 Dum causas agito & defendo, jura popello
 Tætica responso, non parva pecunia, verum
 Quod majus duco, mihi gratia quæritur ingens.
 Hinc legor & populi, sanctique ex mente senatus,
 Qui lustrum condam, qui scribam civica jura,
 Judicio & præsim. post nostra missus ab urbe
 Legatus, faciles lassavi Cæsaris aures.
 Quid quæris, proprias tumido dum projecis ore
 Laudes? hac poteram fortuna vivere lætus,
 Ni mihi, ceu stipulis ignes, injecta fuisset
 Ambitio. nobis dum proponuntur honores,
 Atque aurum; dum tu occurris, pariterque Maphæus,
 Atque alii proceres, qui orbis tractatis habenas;
 Nec merita expendo, curas, tantosque labores,
 Insomnes quæ vos cogunt traducere noctes;
 Captus opum tanto splendore & lumine, claras,
 Ceu Satyrus quondam, flammias exurere sensi.
 Si mihi non stabat Pariis suffulta columnis
 Regia, nec sensus fallentia marmora, saltem
 Culta domus fuerat; tenuisque, at munda supellex,
 Qua exciperem insignes homines ex classe secunda,
 Communis quæis nostra fuit semper domus, & res:
 Et census parvus certe, at sine crimine partus.
 Ire salutatum nos atria nulla potentum
 Cogebant; multa quum limina nostra salute
 Ferverent: fuit & comitum lectissima turba,
 Quos nobis mores, & par junxerat ætas.

His ego gaudebam; domini quum nomine Romam
Advocor. haud credo: sed te vult. me vocat ille?
Sic est. at ludis; quid enim stupidi atque pusilli
Me ingenii cupiat tantus rex? est ita. me? inquam.
Tertia deinde venit; nuto; sed epistola quarta
Expugnat. quis enim multis magnisque repugnet
Promissis? mitto quæ fors sperare juberet.
Ex illo & patria, & comites fordescere nobis
Cœpere, & fastu sensim turgescere pulmo.
Hinc tumidis ducens ingentes follibus auras,
Omnia magna sono, reges, diademata, mitras.
Ante oculos stat Roma mihi, noctesque diesque
Hæret Roma oculis. in somnis cernimus arcem,
Rostra, theatra, forum, Saturni templa, Suburram.
Flentibus hinc fociis tandem discedimus, armos
Argento grvida nobis lassante crumena.
Omina, dum propero, retinent me: in limine primum
Offendo, valvisque lacinia vestis adhæret:
Claudicat alter equus soleis offensus: ab alta
Ilice parra canit: læva occurrit lupo: anguis
Rumpit iter: pluviae, altisque erumpentia ripis
Flumina nos tardant. properavimus attamen, & diis
Iratis magnæ perveni ad moenia Romæ.
Hic dominus, quod erat curarum pondere magno
Oppressus, sero me admittit ad oscula dextræ,
Excipit & blandis verbis, & fronte serena,
Quæ nutantem animum firmarent: inde suorum
Scribimur in numero. Sed bina cubicula primum
Con-

ANTIQUIORIS CARMINA. 333

Conducenda mihi, stabulum post, deinde culina;
 Quæ quater undenas cogunt nos pendere drachmas
 In mense. at dominus promisit: ferre necesse est,
 Condus ait, multo quod regia plena cliente est.
 Si dispensator jubet, hospitiiue magister,
 Chironomo, scurræ, perductori, aut citharædo
 Adsurgas: quid enim? pereat ne sportula; quippe
 Tres nobis numerant nummos mercede diurna
 Cum pueris & equo: hinc quærenda caro, hinc olus,
 hinc sal,

Hinc oleum, scombri, pernæ, vilesque faseli;
 Odit enim lepores, turdos, conchyliæ, mullos
 Mensa mihi & pueris communis. Sportula quamvis
 Sit tenuis, quæ vix lychnum præbere lucernæ
 Sufficiat, nobis numquam datur integra: avaro
 A quæstore aliquid semper conraditur: adde
 In primo quod nulla mihi sit reddita mense.
 Præpositus stabulo domini negat hordea, fenum,
 Et stramen: negat ille mihi? negat improbus. ardet
 Intus bile jecur: descendo ad jurgia. tandem
 Post quartum mensem vilem metitur avenam,
 Et putrem culmum, pudeat quem sternere, & illam
 Quæ in vacuas paleas, & purgamenta recedat,
 Si cribro excutias. non adsignantur equilis
 Aut locus, aut statio. Post tres cellarius horas
 Dimittit puerum tandem: redit ille lagena
 Dimidia, verum sic diluta, ut mihi Tibris
 Fluât in stomacho, dum credo hausisse Falernum.
 Hic

Hic ego : Tot * paream dominis ? tot pessima liber
 Facta feram ? semper me impune a poste repellat
 Janitor implumis , rosea facie , cute levi ,
 Cirrataque coma ? si non distringimus enses
 Fulmineos , liceat genuinum frangere , more
 Lucili , generet rabies ne pressa venenum .
 Mitto , quanta tuli , patiarque incommoda . mane
 Summo profilio stratis , & currimus usque
 In Vaticanum , pluviis , seu solibus æther
 Sæviat : hic stantes aliquot consumimus horas ,
 Ut dominum videam , quem claudunt ostia centum ,
 Atque aditus centum . populis ut præbeat aures ,
 Egreditur tandem ; quem nos veneramur aperto
 Et capite , & genibus flexis : dum quisque videndum
 Præponit se se , impellor , turbæque procella
 Jactor : postremus tum ne sim , viribus arta ,
 Et cubito rumpenda via est . si forte vehatur
 Aut mulo , aut rheda , raptim sequor , ilia equorum
 Tundens : post redeo perfusus pallia cœno .
 Postea quum dominus discumbit , stans ego contra
 Illi me oppono , ut , si tollat lumina mensa ,
 Me videat : lustroque oculis , si forte beatum
 Me obtutu faciat ; si me servire parato
 Utatur ; si sponte aliquid mandet , jubeatve .
 Sed frustra ante oculos versamur : namque secundus ,
 Tertius , & quartus mensis mihi labitur , atque
 Post quintum sextus , quum nec mandata , nec ullum
 Acci-

* *paream*) dissyllabum per synæresim .

ANTIQUIORIS CARMINA. 335

Accipio a domino verbum . comis tamen ille
 Omnibus adridere , joco perstringere , & ultro
 Compellare . tamen solus dimittor , ut ille
 Quem vel relligio , aut pestis congressibus arcet .
 Hinc nos sollicitant curæ , indignatio flammæ
 Excitat , & rabies nigrum vomit ore venenum .
 Ergo ego , qui ut scribam , aut responsem civica jura ,
 Evocor , hic tantum spectator Laocoonti
 Servio marmoreo ? præceptis Pythagoræis
 Vincior ? Harpocratis factus sum ad templa sacerdos ?
 Debebas illum tu compellare . egone illi ,
 Quem tantæ exagitant curæ , quem tanta fatigat
 Congeries rerum , me ausim præbere molestum ?
 Excivit ; veni , sto coram , me videt ille
 Luce vel invitus . tu Sauli , tuque Maphæ ,
 Tuque Jovi , profertis me : respondet at ille
 Coniter : Est cordi ; memini ; quum tempus erit , tunc
 Accersam . at cesso : tentem , DANDINE , quid ultra ?
 Quid faciam ? patere . hic nobis plus deperit uno
 Mense animi cultus , quam quod profecimus anno :
 Evolat e loculis æs : curis urimur : adde
 Quod mihi relligio est domini consumere fruges
 Segniter , & lecto , atque epulis traducere luces .
 Rusticus Aufidius , conducti cultor agelli ,
 Adfuetus curvo glæbas versare tridente ,
 Et segetes farrire , boves & jungere ; multo
 Quum frangi interdum sentiret membra labore ,
 O fortunatum , dicebat , cui datur urbem

Inco-

ANTIQUIORIS CARMINA. 337

Peccatum fateor) nimis est durus, gravis, asper.

Has, DANDINE, putas causas, quod linquimus
urbis

Moenia, & armato stimulamur calce caballum?

Falleris. ut mittam, quod cura domestica dudum

Me vocat, ut, nisi crescat, saltem ne pereat res;

Urget me major ratio: nam cura salutis,

Et vitæ nobis præponitur ambitioni,

Atque opibus. licet illa aliis sit vilior alga,

Est mihi cara; ideo leti eripienda periclis.

Sive cibi vitio, seu cæli, five Falerni

Eveniat, seu forte animis illustribus aer

Hic solitus, nutrire negat viles, &, uti nos,

Degeneres; ego semper torqueor, atque laboro

Et stomacho, & capite: hoc semper vertigine circum

Volvitur, at gravis hic hesternæ pondere cœnæ

Affiduo turget. jam septima præterit hora;

Et marcescit adhuc: saltamus, currimus, at nil

Proficimus. si sit cœnandum, fercula sordent

Languenti stomacho: haud obsonia lauta palato

Respondent: digito in guttur, ceu pharmaca, cœnam

Farcio; vivendum quoniam est; & pondere pondus

Trudimus. hinc macies artus, hinc occupat ora

Pallor: tabescunt sensus, pupillaque flava

Caligat, crudosque cibos tussi exscreo anhela.

Sic ego qui vaccas avias, proavosque elephantos

Possem concoquere, ossa, & dimidio gravor ovo.

Contemti augentur morbi, præsensque minatur

V v

Exi-

Exitium, si nos paullum præcidere caussas
 Differimus lenti, quas non lenire valerent
 Pharmaca, vel succi, medicinæve auctor Apollo.
 Vivere commoditas magna est, summumque bo-
 num. ergo

Sedandæ ingentes curæ, quibus enecor, ipsi
 Quod sim despectus domino: fugienda Quirini.
 Inclemens regio, & cælum grave: nostra petenda
 Est patria. hæc, quod nos dederit vitalibus auris,
 Aut alet, aut saltem producet funera. Roma
 Discedo, quod vita mihi, quod cura salutis
 Haud spernenda fuit:causam hanc adducimus unam.
 Quam si forte probas tu, Saulius, atque Maphæus,
 Quos veneror nostri tamquam tria numina sæcli,
 Non ego curarim quid latret cetera turba.

Hæc, DANDINE, tibi Venusina scripta camœna
 Carmina dictabam Senis, dum sedulus hospes
 Curat equos, nobisque dapes adponit: ut istic
 Si quis me accuset, domino purgare valeres.
 Plura locuturum me pagina deferit: hospes
 Sollicitat: comites frigescere fercula clamant.
 Ergo vale, inque tui me scribe volumine census.

ANTIQUIORIS CARMINA: 339

II.

AD ALEXANDRUM FARNESIUM

CARDINALEM.

SATYRA II.

ALTER, FARNESI, jam nobis ducitur annus,
 Ex quo caussatus capitis stomachiq; laborem
 Discessi Roma, te permittente benigne;
 Et quâvis valeâ bene nunc (diis gratia habenda est)
 Ut proficiscenti jussisti, & pollicitus sum,
 Ad te non redeo tamen: at male jussa, fidemque
 Fallens, constituo, & prope certum est nolle reverti.
 Ne tibi me purgem, fateor peccare, queas ut
 Me jure erronem, desertoremque vocare.
 Sumere si cupias poenas, dicique severus;
 Ut libet: haud injusta feram. quod si esse benignus,
 Comis, & humanus mavis, ceu te Itala tellus
 Jampridem jactat, parces, errata remittens:
 Prætereaque mihi debere fateberis. hoc cur?
 Parcere nam magna est virtus: hanc adsequitur quis
 Virtutem, si non sit qui peccaverit? ergo
 Officium cogit mihi te debere. Sed unde
 Digressus fueram, illuc nunc redeo. Redeam cur
 Romam? percunctor te hoc ipse, tuine, meine
 Causa, me esse velis Romæ; & ratione probes qua,
 Scire velim. at si vis, quia sic libet; ulterius nil
 Perquiram, sed mox properans per tela, per ignes,

V v 2

Mu-

Mutatos flagro stimulo, & calce caballos.
Quod si desit equus, possum pedes ire, Padumque
Iratum, & cani superare juga Apennini.
Possum ego vitales (tibi dum tamen obsequar) auras
Fundere, & exiguae usuram contemnere lucis.
Servitio at credis si me haud fortassis ineptum
Esse tuo, doleo quod decipiare. tamen, ne
Imprudens fallare, tibi exponam omnia; sicut
Inflitor emptorem qui non postponit amicium
Lucro, venalis narrat vitia omnia mercis.
Primum; proveniat quod nostro a corpore, nullum
Servitium exspectare potes, quoniam male regi
Adfuescit servire rudis morum, artibus ægris,
Atque incompotis: nisi me objectare periclis
Expediat, serves ut te, & monstro objicere offam.
Nec fidibus, nec voce scio: nulla ars mihi mensæ,
Vel thalami, vel qua valeam extorquere cachinnos.
Regia si nostra posset splendescere forma;
Adliciens oculos hominum, velut ærea signa,
Aut pictæ tabulæ, aut vecti ex oriente tapetes, (sum.
Gauderem: at neque sum, quod nosti, hunc aptus ad u-
Corpore sum longo, exilique: inclinat in armum
Cervix, quæ capitis succumbit pondere: pallet
Os, macies rictum producit, cæcula nictant
Lumina. nec barba decorantur tempora: tantum
Prominet a mento spirillum, hirtumque, piloque
Subrufo; cui, si vulgo adfentis, male credas.
Defluit ex humeris semper toga, calceus autem

Sor-

ANTIQUIORIS CARMINA. 341

Sordidus. At commissa teges secreta, fidemque
 Servabis. verum hoc etiam ut sit, quæ tamen ista
 Est virtus? melius præstant hoc marmora, mutæ
 Et statuæ. hoc solo laudabor? si valeo quid,
 Ingenio id valeo, quod nec frangat labor; ut si
 Me dictare velis, vel scribere civica jura,
 Vel respondere; & (sua sit quum insania cuique)
 Nos etiam interdum insanimus carmine, sed quod
 Non valet, & non vult parere precantis amici
 Verbis, non jussis regum, pretiove potentum.
 Sed tibi quid notum nitor me ostendere? nosti,
 Vidisti. sed me quoniam haud audire loquentem
 Contigit, hoc fateor, me nec mediocriter aptum
 Servitio esse tuo. ergo hoc vile & inutile mitte
 Mancipium; nisi te delectant cercopitheci,
 Aut nani informes, monstrorumque id genus omne.
 Postquam servitium aversare, acquirere liber
 Famam, & divitias poteras. ego quærere famam?
 Qua ratione, modove? an sic me lumine captum
 Ducis, ut ingeniis quibus omnis Roma referta est,
 Me conferre velim? plaudebam olim mihi, Roma
 Nondum perspecta; nec mox concurrere doctis
 Romæ ausus, sensi tum primum quam nihili essem.

Viderat e celsa mus quondam rupe juvencos
 Certare inter se, longe in convalle reducta:
 Quare avidus pugnae, se æqualem dum putat illis
 Deceptus visu, decurrens credere campo
 Audet se, propius sed maxima corpora cernens;

Et

Et molem ingentem, nil, si se conferat illis,
 Esse ratus, referens se retro, Aut hi tumuere,
 Ni visu fallor, vel nos decrevimus, inquit.

Nunc ad divitias redeo. licet exiguae sint
 Nobis fortunæ, urit opum me nulla cupido,
 Vel desiderium. rides; & imagine vulpis,
 Quæ jurat gallo non vefci elusa rubenti,
 Me ludis. fateor, si me faceres locupletem,
 (Quod potes, & velles, hoc si tamen exigere a te
 Ausim; non quod sim meritus, sed quod tua gaudet
 Munificam quum se natura ostendere possit)
 Si non lætarer, non ferrem forte gravate:
 Sed quæ ad divitias ducit via? dispeream si
 Hoc novi. studium, & labor: ut sim utrique paratus;
 Venalisque simul, quis nos conducet, in urbe
 Ignotus quum sim? Romæ sine tempore notum
 Te esse putas? quid ais? sed quanto tempore? mense?
 Aut anno? properas. addatur & unus, & alter
 Hoc nihil est. nihil hoc? totam ergo perdere oportet
 Aetatem, & curis angi noctesque diesque,
 Ut ditere senex? ut multo splendeat auro
 Funus, sarcophago & felix tumuleris eburno?
 Nil moror hæc; quoniã interea mihi res perit omnis,
 Annus abit; fenus solvendum est; urget agellus,
 Ac domus; a nobis prece compilatus amicus
 Instat: versuram facio; tandem, ære alieno
 Pressus, deficio. Romæ hoc cognovimus ipsi
 Experti. Quid opes jactas? summum esse bonum quid

Cen-

ANTIQUIORIS CARMINA. 343

Censes? virtutem. quid deinde malum? vitium. ergo
Nec mala paupertas, nec opum bona copia, quum non
Hanc vitium, aut illas virtutem dicere possis,

* Efficient omni quin vivas tempore felix.

Est aliquid coccum induere, & laquearibus aureis
Uti; quis negat hoc? magno procedere coetu
Stipatum, sit apud regem cui gratia prima.

Quenam? quum libitum sit, semper in aure susurret,
Sit conviva frequens, & quodlibet impetret. est hæc
Maxima res, si non lateat sub melle venenum.

Sed mihi dic, nostine ut Gratia pingitur? Ingens
Est rota, cardinibus volucris axe innixa, rotatu
Quam rapido semper versat hinc Casus, & hinc Sors:
Stat super hunc uno tantum pede Gratia, librans
Nutantem gressum, & jam prensat nubila, cælumque
Attingit digito: huic ante Adsentatio prona
Adridet, stupet, & solum præsentia laudat.

Pone statim subeunt Odium, Indignatio & ardens,
Invidia & quam mille Doli, Fraudesque sequuntur.
Omnes hæc laqueis, tormentis, ignibus, uncis
Incautam observant, tergum testudine pulsan,
Perfodiuntque latus longe fallente sagitta.

Quæ titubans, uno vix stat pede: ferre tot ictus,
Insidiasque nequit, quin det prostrata ruinam.

Commoda si pendas, & cuncta incommoda quæ fert
Gratia, (dum trutinæ sint æquo pondere lances)
Ad terram hanc videas, aut illam ad sidera ferri.

Hæc mala qui videat, cupiatque hæc peste beatus
Esse,

Esse, refer medico læsa quod mente laborat.

Ut verum fatear, tecum dum contigit esse
Romæ per multos menses, quum gratia apud te
Nulla foret nobis, quum nec sermone beares;
Me quidam ridere videns, & ludere, Curis,
Quod sis despectus domino, non ureris? inquit:
Quid narras? immo illi plus debere fatemur,
Quod finit hac peste, & curis nos esse solutos.
Accipe, divitiæ, & quanti sit gratia apud me.

Quid? quod nil distant fortuna ductus ab ima,
Et rex: ipse tibi possum concurrere, claro
Et Ghyfio, etsi vos vocet omnis Roma beatos
Fortunis, animis, & forma corporis. hoc cur?
Mille licet capiant vix vestras horrea messes,
Quas nos servamus cumeris, num propterea plus
Quam nos coenatis? num vinum dulcius, auro
Aut gemma bibitur, quam vitro? num altius ac nos
Stertitis, Attalica in thalamis quod stragula fulgent?
An latus clavus distinctus murice, & auro,
Quam toga, scit melius frigus propellere, & imbres?
Tercentum vobis servi famulantur, at unus
Nostra puer jussa observat, solusque ministrat
Pro multis; sternit lectos, mensamque propinat:
Est mediastinus, structorque, & denique cunctis
Officiis valet. Ingens vos comitatur euntes
Coetus: me tres, aut ad summum quinque clientes,
Nostra quibus pretio vox est conductæ, sequuntur.
Denique, ut absolvam uno verbo, æqualia cuncta
Sunt,

ANTIQUIORIS CARMINA. 345

Sunt, nec rex distat censo capite. Est tibi tantum,
Quantum opus est, & quod naturæ alimenta mini-
stret?

Id cape; ab exiguo, aut magno nil distat acervo.
Quid? quod fortunæ sua sunt incommoda cuique:
Majoresque agitant majora pericula; sicut
Non urget lepores, sed apros, urfosque molossus.
Uruntur reges curis majoribus: alte
Insidet ambitio: cupiunt sævire quibuscum
Sunt inimiciæ: horrent, si forte insonuit quid,
Ne cadat a seta gladius qui pender equina.
Quid memorem cædes, aconita, & cetera, toto
Quæ, quamvis numerem assidue, haud tamen adse-
quar anno?

Horret nostra etiam fortuna pericula, sed quæ
Sunt citra vitæ discrimen: denique certum
Quod laudes, & quod damnes, fortuna habet omnis.
Sum pauper, me multa premunt incommoda; tu ista
Cernis: ego video, tibi quæ urat mantica tergum.

Instratus sonipes auro, cui terga premebat
Aere micans eques, ut fama est, ridebat asellum,
Quem pastu exiguo macrum, nimioque gementem
Pondere, verberibus, stimulisque urgebat agaso:
Tu potes, ajebat, tot verbera, onusque, famemque
Ferre? Tibi lippus; qui aliena incommoda cernis
Tam bene? nil prorsus urgent, respondit asellus;
Ilia perfodiunt stimuli, urunt ora lupata:
Truderis in contos, ensesque; eques ulcerat armos:

X x

Hoc

Hoc nihil est? ære an distat, lignisve graveris?
Tu mala nostra, tuis adridens, cernis: ego sic
Et tua; fortunæ quoniam est sua sarcina cuique.
Hac ratione tibi æquales nos dicimus esse,
FARNESI, quod opes, quod gratia multa venena
Celant, non secus ac hamum tegit esca dolosum.

Hæc est nostrarum nugarum clausula, Romam
Me non venturum, quoniam tibi inutilis essem,
Et mihi damnosus. Quod si jubeas, quia sic vis,
Tunc præceps veniam, non sponte equidem, at quia
honestum est
Nostra tuo obsequio postponere commoda semper.



III.

Amaryllidis querelæ de Daphnide absente.

E C L O G A

adhuc inedita.

CONJUGIS absentis flagrans Amaryllis amore,
 Nec desiderium reditus, longasque morarum
 Causas ferre valens, sinuosi in margine Lari,
 Qua (a) tumet alterno, & residet Pluviana susurro,
 It vaga, & assiduo curas lenire querendo
 Credens, hæc surdis jactat verba irrita silvis.

X X 2

Quin-

JOSEPHI MARIAE STAMPA,
 CLERICI REGULARIS CONGREGATIONIS SOMASCHAE,

*Breves in hanc Eclogam Interpretationes, quam scilicet nobis
 divulgandam ipse perbenigne Mediolano misit.*

Hanc Eclogam, candidam sane ac venustam, vel a Joanne Antonio Vulpio, vel a Hieronymo ejus fratre conscriptam dici oportere non diffitebitur, quisquis cogitaverit, eam tamdiu inter Vulpiorum carmina servatam esse, atque ab ipsorum stilo minime abhorrere. Priori tamen rectius tribui, illud argumento esse potest, quod in ea, nomine Amaryllidis diuturnam conjugis absentiam dolentis, intelligenda videatur Ecclesia Novocomensis, cujus Antistes Bernardinus Crucejus Romæ per id tempus apud Alexandrum Farnesium, S. R. E. Cardinalem, commorabatur, ipsa tantisper Joannis Antonii Vulpii, quo utebatur valde familiariter, fidei ac diligentiz commissa. Porro Vulpius munere sibi demandato egregie perfunctus, Crucejo, qui Episcopatum sponte deposuerat, successor dari meruit. Eruditi Lectoris erit, quid de tota hac re statuendum sit, judicare.

- (a) *Qua tumet, & residet Pluviana*) In ea scilicet Larii lacus ora, in qua fons ille duorum Pliniorum præconio, & admirabilis fluxus & refluxus varietate memorabilis (verba sunt Paulli Jovii in Larii descriptione) vulgo la Plinianæ; sive Pluviana; ut vocat Vulpius noster.

Quintum purpureis velatum tempora fertis
 Ver properat, totidemque venit cum messibus æstas,
 Ex quo te absentem nequidquam, perfide Daphni,
 Suspirans revoco ad genialis fœdera lecti.
 Tu tamen uxoris lacrimis, ceu fraxinus Euris,
 Immotus, spernensque (nefas!) promissa, fidemque,
 Hinc abes, & nostro gaudes fortasse dolore.
 At non hos thalamos, non hæc connubia læta
 Sperabam, quum te, quamvis prohiberet Amyntas,
 Vicini, nostrique simul custodia ruris,
 Dedignata procos illustres, perfide, solum
 Solum te vellem, cui me sociare marito
 Delegi, addicens tibi memet, & omnia mecum.
 Non ego ut insomnes traherem mæstissima noctes,
 Ah misera, aut viduo languerem frigida lecto,
 Aspernata alios, sum te unum amplexa maritum.
 Sed tibi me æterno volui conjungere vincolo,
 Ut paries hederæ pallenti, ut vitibus ulmus;
 Nec foret a nobis qui te divelleret umquam,
 Exitus ut vitæ, & morti par esset utrique.
 Tu tamen oblitus fidei, legisque maritæ
 Immemor, ad Tuscam Tiberini fluminis oram
 Hinc abes, & reditus in longum, perfide, ducis
 Caussando, miseram dum spe me pascis inani.
 Scilicet in viduo tabescam (b) membra cubili

Affi-

(b) *Tabescam membra*) Fortasse legendum *tabescant*, vel *tabescens*; quamquam & lectionem quæ in manuscripto reperta est, Hellenismi ratione tueri possumus.

ANTIQUIORIS CARMINA. 349

Affiduo? vanoque illudar nomine semper
 Connubii? sterileque feram nova nupta hymenæos?
 Nec sum adeo informi facie, nec corpore, Daphni;
 Me nisi fallit amor nostri, aut jactatio formæ
 Est odiosa nimis, jure ut me spernere possis.
 Præmia sola tuli, Damoëta judice, formæ,
 Mecum vicinæ quum certavere puellæ,
 Unde mihi, invitæ licet, at cessisse fatentur.
 Sunt mihi cum totidem gregibus magalia centum,
 Et totidem nostris armenta in montibus errant,
 Umbra ubi perpetua est, ubi semper pabula læta,
 Aeterni & trepidant querulo cum murmure rivi.
 Sed neque castaneæ molles, nec jugera (c) campi
 Multa, satis: nostris vindemia Massica prelis
 Vincitur: innumero Sicyonia bacca trapeto
 Atteritur, mensæ servatur nobilis orchis.
 Præterea, extremo piscosi in litore Larî
 Est mihi (d) celsa domus Pario de marmore structa,
 Certat ubi officiis vernarum sedula turba:
 In mea jurarunt tercentum verba clientes.
 Tota mihi paret regio quam Larius ingens
 Adluit, ora simul quam (e) Rhæticus Abdua findit,
 Et

(c) *Nec jugera campi Multa, satis* Id est, nec satis mihi est multa campi jugera possidere, unde fruges uberrimæ quotannis proveniunt; sed præterea vinetis & olivetis abundo. Primo aspectu, aliquid hic deesse videri possit: sed attentius consideranti omnia plana erunt.

(d) *Est mihi celsa domus* Episcopalis nempe domus Novocomi. Est enim Novocomus in extremo Larî litore.

(e) *Rhæticus Abdua* Abdua fluvius e Rhæticiis alpidibus fluens, Volturrenam decurrens, atque in Larium denique erumpens.

Et qua Ticinus (f) Verbanum fertur in æquor.
 Hæc tibi dotali cefferunt nomine, Daphni,
 Inque tuam venire manum nostra omnia mecum.
 Tu tamen aut Hadriæ scopulis, aut tigribus ortus
 Hircanis, fidei oblitus, legisque maritæ,
 Hinc abes; uxoris lacrimis nec flectitur illa
 Quæ tibi, crudelis, perstat sententia menti.
 Ah quoties abiire nives, quotiesque caducæ
 Arboribus rediere comæ, dum te, improbe, frustra
 Exspecto, viridi circumdans limina (g) lauro!
 Si despecta tibi sum forte, incommoda nostra
 Nec curas, non te saltem tua damna movebunt?
 Obvenere tibi postquam nostra omnia mecum,
 Sive ego, sive aliquid nostri perit, id perit uni,
 Daphni, tibi, & rerum sequitur jactura tuarum.
 Aspice ut absentem spernat te inimica deorum
 Gens (h) alpina, genus durum, miscere profanis
 Ausa sacra. officio prohibet parere clientes,
 Despicit imperium, sublati sæpibus agrum
 In nostrum profert fines: nos sevimus illis
 Messem, nostra suis lacubus vindemia feryet.

Quin

-
- (f) *Ticinus*) Hic fluvius in Verbanum lacum deferretur, qui finis est Diocesis Novocomenfis.
- (g) *Circumdans limina lauro*) Solebant veteres lauro ædium fores coronare, ut incolumitatem ac felicitatem significarent. Ejus consuetudinis meminit Tertullianus in Apologetico.
- (h) *Gens alpina*) Hæretici qui se a Joanne Calvino, falsorum dogmatum auctore, Calvinistas appellant, & Rhæticas alpes incolunt. Hi nimirum ea tempestate, in Diocesis Novocomenfis fines irruptionem facere cœperunt, & suos ibi errores propagate.

ANTIQUIORIS CARMINA. 351

Quin etiam posuit pecori, pecorisque (i) magistris
 Insidias; demum ausa greges vi avertere aperta,
 In nostrisque oculis ovium jugulare magistros.
 Hic etiam se se occultant in vallibus imis,
 Insultantque ovibus miseris (k) ursique, lupique,
 Quos morfu assiduo, & latratu fida (l) canum vis
 Exercens, tandem Italiæ omnibus expulit oris.
 Quid faciam infelix absente hinc conjuge? sola
 Femina me campo nullis prope viribus ausim
 Credere? totque armis immania monstra laceßam?
 Ipse quidem (m) Damon, curam te absente peculi
 Cui dedimus, præsto est animo, nec frangitur armis:
 Consilio, & toto quæsitis orbe molossis
 Pro gregibus pugnat, proprioque arcere periculo
 Nititur insidias, vimque, incursumque ferarum;
 Sed tamen & numero multum est, & viribus impar.
 Quos tua dat monstribus animos absentia, franget
 Sola tui adventus fama, atque jugo effera colla
 Sponte dabunt, quum te portis effusa juvenus
 Frondibus accipiet festis, & carmine sacro.
 Tunc ego te venerata prius, mille oscula, mille
 Amplexus rapiam, & lateri tibi semper adhærens,
 Sive

(i) *Pecorisque magistris*) Nonnulli animarum pastores, dum gregem sibi commissum strenue defendunt, ab hæreticis interemti sunt.

(k) *Ursique, lupique*) Qui clam hæresi Calvinianæ, ac Lutherianæ favebant.

(l) *Fida canum vis*) Inquisitores hæreticæ pravitatis (ut vulgo appellant) quos metaphoricè canes vocat, fortasse a cane, qui divo Dominico, e cujus familia sunt, appingi solet.

(m) *Damon*) Joannes Antonius Vulpus, qui loco Bernardini Cruceji Episcopi, absentis, Novocomensem Ecclesiam gubernabat.

Sive greges obeas, sive ad (n) multralia pergas,
 Occurrasve feris ferro, aut indagine saltus
 Cingas, feminea ausim prima pericula dextra
 Tentare, & primos non detrectare labores.
 Prima dies reducem quæ te advehet, illa diebus
 Scribetur festis, cadet illi multa quotannis
 Hostia, pendeatque tholo votiva tabella.
 Tum nobis faustos casus, eventa beata,
 Felices thalamos, connubia læta puellæ
 Finitimæ invideant, ac me contemnere dicant
 Præ te posse deos, thalamosque, dapescque deorum.
 Sed quid ago? scopulis jacto verba irrita duris.
 Daphnis abest, Amarylli, tuus, tua qui omnia tecum,
 Et natale solum, percussa que foedera spernit,
 Dum beat ex (o) spoliis alienis Tibridis oram,
 Et fortasse novos (quis scit?) suspirat amores.
 Namque ferunt illum, non aspernante puella,
 Exuri dudum (p) Tiberinæ Phyllidis igne.
 Quid fruis ah Phylli? hic meus est. te, pronuba Juno,
 Appello, &, iusti thalami, te, auspex Hymenæe.
 At video: illa tibi est potior, Daphni improbe, Daphni
 Perfide, quod Tyrio redimita est murice palla.
 At mea, quæ (q) viola rutilat, quæ sita minori
 Est

(n) *Sive ad multralia pergas*) Nomine multraliū, ærarium fortasse intelligit, vel prædia ad Episcopum pertinentia.

(o) *Ex spoliis alienis*) Puta Novocomensis Ecclesiæ redditibus.

(p) *Tiberinæ Phyllidis igne*) Romanæ scilicet purpuræ desiderio, vel alterius dignitatis quæ ad purpuram obtinendam viam quasi muniat.

(q) *Quæ viola rutilat*) Violacei enim coloris vestibus Episcopi induuntur, quæ minoris quidem habentur, sed & minore laborum impendio constant.

ANTIQUIORIS CARMINA. 353

Est pretio, innumeris nec ponto (r) educta periclis:
 Gratia nec violis, si vis conferre colores,
 Est minor (s) atque rosis, aut purpureis hyacinthis.
 Sive tamen properas ad nos, seu te improba (t) pellex
 Detinet, optati dum spe frustretur amoris,
 Dii tutelares, quibus albam pasco juvencam
 Ex voto, servant mihi te, & tua vota secudent.

IIII.

DE BEMBO.

CANTABAM, memini, pulcher, tibi carmen, Alexi,
 Quum nova se se oculis obtulit ara meis.
 Obstupui; cecidere animi, steteruntque capilli,
 Sanguis abit: quid agam tunc ego, quove ferar?
 Protinus ecce vocor, rursusque iterumque vocatus
 Aspicio: ternas vidimus ire deas.
 Altera tura manu gestabat, & altera pilum:
 Tegmine clara oleæ tertia frondis erat.
 Prima est Tusca mihi, Romana est altera Pallas
 Cognita: quæ comes his, Attica virgo fuit.
 Indicium Tuscæ sacri pia turis acerra;
 Martia Romanæ pila dedere mihi:

Y y

Atticæ

(r) *Educta*) In manuscripto legitur *quæsitæ*, contra metricæ artis regulas. Nos lacunam ita explevimus.

(s) *Atque rosis*) *atque* pro *quam*.

(t) *Pellex*) Pro eo quod hominum desiderium pellicie, qualescunque tandem illud sit.

Atticæ oliviferi viridis frons, baccaque rami,
 Per quam Cecropio nomina parta solo.
 Dum sequor, in strato fulsit mihi purpura lecto,
 Quem subiere novem, turba diserta, deæ.
 Hunc circum aurato resonat dum pectine Phœbus,
 Prima pio querulos edidit ore modos:
 Qualem fatali transfixo vertice penna,
 Deficiensque suo funere cantat olor.
 Cœpit: Quæ fueram cunctis prælata puellis,
 Dum tu vivus eras; hei mihi, nunc jaceo.
 Quæ sermone feras mulcebam, & carmine blando
 Dum tu vivus eras; hei mihi, nunc taceo.
 Fleximus, heu, cantu Venerem: vix vulnera sensi
 Dum tu vivus eras; hei mihi, nunc pereo.
 Ah mea quis misero miscet deus otia fletu?
 Proque jocis tristes has mihi dat lacrimas?
 At dum plura cupit, ficcis vox faucibus hæsit.
 Addidit his questus virgo Latina suos.
 Qualibus ambustum proles Clymeneia fratrem
 Sole fatum gelidi flebat ad amnis aquam:
 Talibus illa modis, lacrimisque cadentibus orsa est,
 Mæsta os, scissa comas, lumina fixa solo:
 Stabam ego, dum stares, & te regnante, manebam:
 Labere, sum tecum lapsa; cadis, cecidi.
 Eheu quo cecinit, quove hic est ore locutus!
 Illa mihi quis nunc aut canit, aut loquitur?
 Exciderat mihi priscus honos: tu reddere priscum.
 Hei mihi, tu moreris, priscus honos moritur.
 Eheu,

ANTIQUIORIS CARMINA. 355

Eheu, quod tecum calamis modulata placebam:
 Eheu, quod modulator te sine, nec placeo.
 Plura dolor vetuit. Sed non minus æmula tandem
 Graja suum querulo fudit ab ore melos.
 Qualem quæsta, sui casus memor, Attica vocem
 Vere novo Geticis dat philomela jugis:
 Talis erat Grajæ tristisque, & blanda vicissim
 Vox, linguæ interitum dum flet & illa suæ.
 Quæ simul ac quæstæ, pronæ incubuere jacenti:
 Osculaque exsanguis dat sua quæque seni.
 Et simul: Ara tibi Romanæ esto urna Minervæ:
 Hæc tibi Palladio convenit urna viro.
 Nec mora: sacrati ventum est ad limina templi;
 Et data funereis turea dona focis.
 Et dixere Vale, & requiem optavere perennem,
 Et tumulo carmen composuere suum:
Conditur hoc tumulo doctorum fama virorum,
Musarum nuper vita, modo interitus.
 Adfensere novem: Phœbus pater adnuit illis,
 Fregit & auratam, qua cecinere, fidem.
 Intonuere poli: Tiberi vagus Hadria fluctus
 Miscuit: o mirum! fecit & Arnus idem.
 Fecit idem Alpheus, qua Graja prorsus ab ora
 Lucidus in Siculas mergitur amnis aquas.
 Intonuit rursus lævum: clamoribus æther
 Insonuit: patula est urna reperta senis.
 Raptaque in ætherias auras fugit umbra: cadaver
 Conditur. ut licuit visere, BEMBUS erat.

V.

AD LUDOVICUM DULCIUM.

(Hoc Elegidion scripsit Auctor admodum adolescens.)

DULCI, qui mulces æstus, ventosque furentes,
 Aestuat Hadriaci quum magis unda maris:
 Qui trahis ad dulces calamos ex æquore vasto
 Cæruleosque deos, squamigerumque pecus:
 Barbara corda domas qui arguto pectine, corda
 Barbara, Sithonia frigidiora nive;
 In Pholoen, DULCI, vertas miracula cannæ,
 Et stipulæ vires experiare tuæ.
 Sentiât illa meos ignes, incendia nostra
 Sentiât, alterna dispereatque face.
 Si tibi ab ingenti casu servaris amicum,
 Accedet titulis gloria magna tuis.
 Ipse tui interea memor, hic altaria pono
 Ex viridi nuper cæspite structa tibi.
 Hostia multa cadet, quæ pingues imbuat aras:
 Exprimeret & casus parva tabella meos.
 Arbuteis libris te curva falce notabo;
 Ambiet & nomen verna corona tuum.
 Te ripæ Larî, te concava saxa sonabunt,
 Alternisque tumens te Pluviana canet.
 Dii facite, ut votis succedant omnia læta,
 Ipsaque se facilem præstet amica mihi.

VI.

ANTIQUIORIS CARMINA. 357

VI.

DE M. ANTONIO FLAMINIO,

qui putabatur mortuus.

AD FRANCISCUM TAURELLUM.

TAURELLE, optime mi patrone, & idem
Olim in urbe sodalium meorum
Prime, FLAMINIUS tuus, meusque,
Quem cuncti modo, mortuum putantes,
Luxerunt juvenes, bonum ut parentem,
Luxeruntque senes, bonum ut sodalem,
Vivit, atque valet, Deo favente;
Quem sancte coluit, pieque semper.
Sic est. FLAMINIUM meum, tuumque
Viventem alloquor, audio loquentem
Illa nectare dulciora verba,
Dicentemque gravedini salutem,
Vitæ dicere quam antea parabat.
Verum, ne auxilio medentum, & arte,
Aut labore putes eum retentum
In vita. jam animus solutus arto
Nexu corporis incolebat astra,
Nil mortale videns, nihil caducum:
Sed nobis fuit ille restitutus
Votis & precibus mei Priuli.
Namque adferre solent Deo supremo
Vim vota, atque hominum preces piorum.

VII.

VII.

SUB IMAGINE ATHILAE.

QUID tot conspiciens, viator, altum
 Erecta ad tumulum tropæa, totque
 Victorum exuvias ducum, urbiumque
 Tot cadavera, totque de subactis
 Triumphos populis, stupes anhelus?
 Rex ille ATHILA, numinum flagellum;
 Tu nosti reliqua; hic jacet. viator,
 Cerne ut nunc etiam cinis superbus
 Spiret imperium, minas, furorem.
 Hunc casus nisi, narium soluta
 Vena, dum thalamis novæque nuptæ
 Indulget nimis, abstulisset; orbis
 Everfus, titulos, decusque monstro
 Fatali cumularet, & tropæa.

VIII.

SUB IMAGINE FRIDERICI I. IMPERATORIS.

EX CISAE Italiæ cupiens pensare ruinas,
 Vel saltem in pulchra quærere morte decus,
 Aenobarbe, Asiæ fines irrumpis, & hosti
 Eripis avectas relligionis opes.
 Invidit cœptis Fortuna inimica secundis;
 Nam dum te in nitido proluis amne, cadis.
 Macste animis, ingens, Asiæ dignissime campis;
 In quibus illustres tot cecidere viri.

Hinc

ANTIQUIORIS CARMINA. 359

Hinc vaturn calamos, & marmora, & æra fatigas :
Hinc merito claris adnumerare viris.

IX.

SUB IMAGINE ISABELLAE ARAGONIAE.

HAEC quæ spectatum ora tenet suspensa, rapitque
Sensus, atque animam, & prope spirat picta
tabella,

Docta animata manu, speciem infelicis ELISAE,
Fortunamque, habitumque refert, animosque viriles.

Aspice, ut in vultu majestas regia avorum,
Et patris, & patrui, fratrisque reluceat. isto
Vultu jura dabat populis, quum scepra teneret
Conjugis, & nati; Insubriae & tractaret habenas.

Hæc etiam insensis superis, adversa suorum
Fata tulit, morientis avi quum lumina claudi
Vidit, & expulsam regno patrumque, patremque;
Et fratrem ereptum, quum jam coepisset avitis
Sedibus, & scepro summa virtute potiri.

Quid memorem regno spoliatum fraude maritum,
Sublatumque dolis? aut cari funera nati?

Quis valet hæc siccis oculis audire? sed illa
Non lacrimis urfit cineres, non questibus; altum
Sed tulit infracta, & pressit virtute dolorem.

Cernis ut affectus vivos animata tabella
Exprimat in vultu? ut summo certamine pugnet
Cum virtute dolor? sexus cum ingentibus ausis,

Atque

Atque animis? pulsi ut cedant sexusque, dolorque?
 Fortunâ insignes aliquot fortasse vetustas
 Jactabit regum matres, & regibus ortas:
 Sed quæ agitata diu per tot discrimina rerum,
 Per varios casus, rapidis jactata periclis,
 Aequo animo infensæ Fortunæ exceperit ictus,
 Nulla erit, antiqua, aut veniens quam conferat atas
 Fortunæ, fatis, animo infelicitis ELISÆ.

X.

SUB IMAGINE GEORGII FRAISPERGII.

QUIs te, GEORGI, magne ductor agminum
 Quæ mittit altrix militum Germania,
 Infanientem perculit quondam furor,
 Tarpeja ut igne sis minatus culmina,
 Urbemque totam perditurum Romuli:
 Impiaque vincla (proh scelus!) paraveris,
 Cervice queis traheretur ipse Pontifex?
 Ecce ut repente stratus occidis levi
 Morbo, priusquam mœnibus Quiritium
 Castra admoveres: nempe sic visum deis,
 Titanas olim qui superbos, & polo
 Arma inferentes contuderunt fulmine.
 Conatus iste nomini notam tuo
 Quamvis inurat, Ducibus egregiis tamen,
 Quos prisca jactant sæcla, vel præsentia,
 Par esse consilio, manuque diceris.

XI.

ANTIQUIORIS CARMINA. 361

XI.

DE ANTONIO LEVA.

QUUM semper vincas, totis licet artubus æger,
Consilio, non vi, vincere, LEVA, doces.

XII.

*In fontem Plinianum, atque in ædes magnifi-
centissimas a Comite Joanne Angussola
ad eum fontem exstructas.*

Abhuc ineditum.

ADVENA, qui in ripa Larî miracula cernis
Nunc abeuntis aquæ, nunc redeuntis aquæ:
Quod fons sit gelidus, quod vitro clarius unda,
Quod scateat gemmis, quod fluat, & refluat,
Naturæ hoc opus est. Mirari desine causas,
Sed tibi sit splendor suspiciendus Heri.
Mirare excelsas rupes, montesque subactos,
Et domitos fluctus collibus oppositis:
Piscinam, umbrosum nemus, hortos, sæpta ferarum,
Et mira arte domum cautibus impositam.
JANUS ab Eridano ortum ducens, nomen ab angue,
Aere suo struxit commoda tanta tibi.

XIII.

*De quadam Veteri Inscriptione ad
C. Plinium Cacilium pertinente.*

Versus a Vulpio adolescentulo, seu potius puero, conscripti, & adhuc inediti.

INVIDA, CAECILIUM ut possis delere, vetustas,
Frangere conaris marmora, scripta, notas.
Sint exesa licet, contractaque marmora, vivent
Te tamen invita nomina CAECILII.



HIERONYMI VULPII

NOVOCOMENSIS,

JOANNIS ANTONII FRATRIS,

Cosmographi suo ævo excellentissimi,

EPIGRAMMATA NONNULLA.

I.

In Statuam Satyri, & Pueri.

BLANDITUR puero Satyrus vultuque, manuque :
 Nolenti similis contrahit ora puer .
 Quem non commorint, quâvis de marmore? fundit
 Pæne preces Satyrus, pæne puer lacrimas .

II.

In Statuam Vertumni.

VERTITUR in lapidem, hoc si credis vivere
 numen :
 Si lapidem esse putas, numina viva vides .
 Unde hoc? VERTUMNUS latitat sub marmore, suctus
 Lumina mutatis fallere imaginibus .

Z z z

III.

III.

In Statuam Adonidis.

QUUM Cytherea procul Parium spectaret ADONIM,
 Accurrens tales fudit ab ore sonos:
 Quis deploratum nobis te reddit, ADONI?
 Quæve tibi lucem fata dedere novam?
 Dixit, & ad caros amplexus lata cucurrit,
 Figeret ut niveis oscula pressa genis.
 Ast aprum aspiciens, nova vulnere dente minantem,
 Semianimis trepido concidit icta metu.
 Vivere quis neget hos lapides? si incendit ADONIS
 Corda deæ forma; vulnere terret aper.

IIII.

Sub imagine Joannis Jacobi Trivultii.

SUNT tumuli, JACOBÆ, tui, certamina, captæ
 Urbes, captivi, regna, tropæa, duces.
 Hos tumulos tibi tu propria virtute parasti;
 Nos tibi pro titulis carmina bina damus:
Vicerat hic hostes animis, at nomine mortem
Vicit: & invictus vixit, & interiit.

JOAN-

EPIGRAMMATA. 365

JOANNES MATTHAEUS TOSCANUS

Pepli Italiae Libro III.

HIERONYMUS VULPIUS.

EXIGUIS *vastum tabulis includere mundum*
Gnarus, et ante oculos ponere utrumque polum,
VULPIUS *Aonio no-vit quoque vertice Musas*
Deductas, Larî sistere ad antra lacus.
Cui fugit angustis conclusus sinibus orbis,
Hujus grande solum vix capit omne decus.

No-vocomensis **V**ULPIUS *atatis nostræ Cosmographos lon-*
go post se spatio reliquit. Ejusdem Epigrammata acu-
men illud summum, a quo animam accipiunt, non sine
candore obtinent. Hujusmodi sunt pauca illa quæ inter
Carmina Illustrium Poetarum Italarum publicavimus.

FRANCISCUS MARIUS MOLSA

DE HIERONYMI VULPII

Cosmographia, ad Carolum V. Imperatorem.

VICTOR *Alexander, sumtis dum fulminat armis,*
Angusto gemit se nimis orbe premi.
Hoc tu quam melius! cujus jam sceptrâ veretur,
Hic radii quidquid VULPIUS ambit ope.

F I N I S.

NOI

NOI RIFORMATORI


dello Studio di Padova.

AVendo veduto per la Fede di revisione, ed approvazione del P. F. Tommaso Maria Genari Inquisitore, nel Libro intitolato: *Joannis Antonii Vulpii Carminum Libri tres* ec. non esser cosa alcuna contra la Santa Fede Cattolica, e parimente, per attestato del Segretario Nostro, niente contra Principi, e buoni costumi; concediamo Licenza a *Giuseppe Comino* Stampatore in Padova, che possa essere stampato, osservando gli ordini in materia di Stampe, e presentando le solite copie alle Pubbliche Librerie di Venezia, e di Padova.

Dat. li 31. Marzo 1724.

- (Gio: Francesco Morosini Cav. Rif.
- (Alvise Pisani Cav. Proc. Rif.
- (Gio: Pietro Pasqualigo Rif.

Agostino Gadaldini Segretario.



PATAVII. CIOCCCXXV.

EXCUDERAT JOSEPHUS COMINUS.

005786068

